





30-7-31

BIBLIOTECA PROVINCIALE

Armadio



Palchetto

Num.° d'ordine 52

Ch e 192



83. CwL

II

852





610291



LOCO-  
SERIORUM  
NATURE ET  
ARTIS,  
Sive  
MAGIE NATU-  
RALIS  
CENTURIAE TRES  
AUCTORE  
ASPASIO CAR.  
AMUELIO.

*Accessit  
diatriba de prodigiis  
et ois Criticis*





# CANDIDO LECTORI


## Liber.

**A**udaci conatu, quibuslibet me insinuare gestio familiaritatibus: nulli non gratus, multis delitiosus, singulis officiosus, tibi sistor curiosus; joco-seriorum & serio-jocosorum factuum fecundus facundè genitor, inexplorati oblectamenti fautor, stupendæ operationis thesaurus: dum tibi abscondita pando artificialis naturæ & naturalis artis mysteria, inter amœna humanæ quietis umbracula: ratus interponenda esse tuis alternis gaudia curis, nam durabile non est, quod caret requiè alternâ. Verax sum per omnia, multoties probatus, experientiâ testimonium perhibente, juratus falsitatis hostis: purus sum ortum trahens à stipite casto: fraudium nescius, dolos sincerè detego, doctor ingeniosæ praxeos: quam novisse ingenii fuerit & scientiæ, vult enim desipiens decipi mundus. Dextris datis, naturam copulavi & naturalem naturæ simiam, artem intelligo, sub tecto eodem: an benè conveni-

## CANDIDO LECTORI.

ant & in unâ sede morentur , non insinuo ; tu-  
um de qualitate connubii expecto iudicium. Ri-  
sum mihi actrices movent spectatori , dum alte-  
ra alteri supplantat fidelissimè conatu invido , u-  
traque triumphare avida , neutra succumbere certa :  
ubi enim deficit natura , incipit ars : tantò Dædala in-  
geniosior , quantò mirabilia in naturalibus Sacra-  
menta recondidit cœlestis omnipotentia.

Meergo fr Vere aC DIV VaLe.



# Index Rerum Notabilium, ordine Alphabetico digestus.

A.

- Aer etiam intra Aerem ponderari potest. pag. 256. objectiones in contrarium p. 257. & seq.  
 Edificium quod hyeme multum a sole calefiat. p. 255  
 Agyræ dolus, ut Vitriarius vitra sua frangat. p. 48  
 ut ollas suas frangant figuli. p. 49  
 Alchimiſtarum vaſtrities. p. 47  
 Aleorum puncta projecta divinare. p. 199  
 Allii comestis ſœtorem abolerè. p. 99  
 Ambulare ſupra aquas. p. 187  
 Amygdalæ nucleum comminuere putamine illæſo. p. 7  
 Anagrammata per combinationes licterarum. p. 117  
 Anatum, aliarumque avium aquatica rum ſacetum aucupium. p. 11  
 Anemocaminum fabricare. p. 287  
 Angelorum ac dæmonum potentia. p. 311  
 Angelorum bonorum officium erga homines. p. 24  
 Animalium ſpeciales proprietates. p. 29  
 Annulus ut ſaltet in vitro ad ſonum tympani aut Inſtrumenti muſici. p. 33  
 Annulus ut per anguſtum foramen tranſire videatur. p. 19  
 Annulli ſibi iuncti, nec ſe tangentes. p. 22  
 Annulus a digito tumefacto avellere. p. 107  
 Annum biſextilem invenire. p. 118  
 Anſerem vivum aſſare, ut comedi poſſit & dum ſcinditur, claminet. p. 10  
 Antidotum contra febres. p. 43  
 Antidotum aliud contra febres. ibid.  
 Antidotum contra morſum viperarum. ib.  
 Antidotum contra omnem ſanguinis fluxum. p. 144  
 Antidorum contra pōdagram. ibid.  
 Antidotum contra calculum. p. 145  
 Antidorum contra peſtem & febres peſtilentēs. ibid.  
 Antidotum Tartarorum contra lue veneream. p. 251  
 Antidorum contra dentium dolorem. p. 253  
 Aliud. p. 251. Aliud. p. 256  
 Apum examina in ſylvis invenire. p. 230  
 Aqua vitæ ex pane. p. 75  
 Aqua in hypocauſto calido ut congeleſcat. p. 158  
 Aqua mineralis mirabilis. p. 10  
 Aqua an lactis ſit immiſta deprehendere. p. 204  
 Aqua an vino ſit immiſta, cognoscere. p. 105.  
 an muſto ſit admixta. ibid.  
 Aquam in vinum convertere. p. 178  
 Aquam a vino ſeparare. p. 205  
 Aquam per montis verticem deducere. p. 276  
 Aqua ſ diverſorum colorum ac ſaporum ex ore depromere. p. 148  
 Arbor Philoſophica in phiala vitrea creſcens. p. 118  
 Arbor metallica in phiala vitrea. ibid.  
 Arbores, cruces, ſtatue. ex alumine. p. 139  
 Arbor inſtar cypreſſi in phiala vitrea. p. 239  
 Argenti vivi mirabiles motus exhibere. p. 209

# INDEX RERUM

- Argentum vivum coagulare. *ibid.*  
 Avem aliusfacere ut avolet, & redeas.  
 p.155  
 Ascendere locum altum sine scala. p.7  
 Avicula dum ad ignem affatur, ut cum  
 veru sponte vertatur. p.13  
 Aureum numerum invenire. p.178  
 Aureum numerum ex digitorum arti-  
 culis invenire. p.187  
 B.  
 Baculos, five cultros tres ita implicare  
 ut erecti stent, nec pondere superpo-  
 sito deprimantur. p.39  
 Baculum duobus vitris impositum frā-  
 gere, illas vitris. p.8  
 Barba viridis naturalis. p.59  
 Biventi cyathus ut ori adhæreat. p.164  
 Buriam difficulter aperibilem præpa-  
 rare. p.19  
 Bursa alia artificiosa. p.40  
 C.  
 Catoptrica experimenta varia. p.187 &  
 284  
 Cæci oculorum defectum aliis sensibus  
 suppletes. p.104  
 Cæcum docere ut scribat. p.25  
 Calamos asnerinos reddere duos. p.116  
 Calendas, Nonas & Idus memoriter sci-  
 re. p.213  
 Calvaria ut loqui videatur. p.30  
 Camelos docere saltare. p.52  
 Caminus qui fumum non remittit. p.  
 288  
 Campanarum ingentem sonum repre-  
 sentare. p.10  
 Candela intra aquam crecta ut ardeat.  
 p.41  
 Candelam in aqua ardentem aut aqua  
 inextinguibilem conficere. p.110  
 Canes ut mingant in aliquem. p.158  
 Canum spectaculum ludicrum. p.53  
 Carbones igniti ut discurrant per pavi-  
 mentum & parietes in Cubiculo. p.6  
 Carnes mensis appositæ ut appareant  
 sanguinosæ. p.165  
 Cerevisiæ potus morbum lethalem cu-  
 rat. p.61  
 Chronologicum paradoxum. p.275  
 Cibi ut in ore amarescant. p.104  
 Cibos in os sumptos ut quis deglutire  
 non possit. p.163  
 Circulos plures in quales unicâ circi-  
 ni aperturâ describere. p.41  
 Colorem rubrum ad scribendum effi-  
 cere. p.293  
 Cometarum significationes ex vulgi  
 opinione. p.353  
 Combinari quoties inter se possint res.  
 p.212  
 Combinationes rerum paradoxæ. p.234  
 Conclave ut uvis plenum appareat; p.  
 56  
 Cornua per fenestram prospicienti ut  
 excrecant, efficere. p.5  
 Corvum dealbare. p.56  
 Cretâ formare litteras non facile dele-  
 biles. p.115  
 Crocum Martis præparare. p.44  
 Cryptographica artificia varia. p.111  
 Cryptographicum artificium. p.108  
 Cubiculum ut inflammetur sine da-  
 mno. p.0  
 Culter strophiliolo involutus ut extra  
 reperiat. p.25  
 Cruces variis temporibus in hominum  
 vestibus visæ. p.116. Cruces Neapoli-  
 tanæ prodigiosæ, inter naturæ mi-  
 racula numeratæ. p.115. in vestibus  
 Judæorum apparent tempore Julia-  
 ni Apostatæ. p.317. apparent in veste  
 Juliani Apostatæ & Comitum ejus.  
*ibid.* apparent in monte Golgatha.  
 p.118. in vestibus tempore Arcadii  
 Imperatoris. *ibid.* in vestibus recens  
 baptizatorum. *ibid.* in vestibus peste  
 affectorum. *ibid.* igne in vestimen-  
 tis hominum. p.119. in vestibus homi-  
 num tempore Ottonis Imperatoris.  
*ibid.* in vestibus Judæorum. *ibid.* in  
 Spanheimensi monasterio, & locis  
 vicinis apparent in vestibus. p.120. in  
 peplis mulierum in Leodiensi dix-  
 cesi. *ibid.*  
 Cruces cur in laneis vestibus, lignis, fa-  
 xis non appareant. p.337. cur tam dif-  
 ferenti



# NOTABILIUM.

ferenti colore sint, p. 138. aliquæ cur  
diu durent, alix cito evanescant, p.  
338. cur diversæ magnitudinis ibid.  
cur tam diversæ formæ, ibid. cur ali-  
quibus tantum in locis appareant,  
p. 339. Neapolitanæ cur tam varia-  
rum figurarum, p. 340. quomodo in  
fructibus appareant, p. 141. Neapo-  
litanæ cur in remotis locis apparue-  
runt, p. 313. cur aliis temporibus  
non apparuerunt, 343. cur aliis in lo-  
cis, ubi nulla montium incendia.  
ibid. Romæ apparuerunt, p. 344. in  
Nosophomiis sæpe apparent, p. 344.  
Neapolitanæ cur tam differentibus  
temporibus apparuerint, & disparue-  
rint, p. 345. Neapolitanæ utrum in-  
ter miracula recensendæ, ib. prodigio-  
sæ non sunt miracula, p. 349. Cru-  
cû in apparitione quomodo effectus  
naturalis à miraculoso discernatur,  
ibid. Neapolitanarum effectus, p. 357  
Cruces alix variis temporibus ac locis  
apparent, p. 111  
Cruces Neapolitanis similes, Romæ vi-  
sæ, p. 112  
Crucis signum rebus omnibus impres-  
sum, &c. voluit Deus, p. 119  
Crucum prodigiosarum Neapolitana-  
rum origo, p. 127. earundem causa  
inquiritur, p. 128. earundem vera re-  
latio, p. 330. formæ varix, 331. Color,  
ibid. numerus ibid. tempus, quo com-  
paruerunt, ibid.  
Crucum Neapolitanarum causæ inqui-  
runtur, p. 331. earum causa materia-  
lis, p. 334. causa efficiens ibid. forma-  
lis & finalis, ibid. earundem materia,  
p. 335. cur in linteis potissimum ap-  
paruerint, ibid. cur in linteis, quæ  
cistis inclusa, appareant, p. 336

## D.

Decem poma integra inter novem ho-  
mines dividere, ut nullus accipiat  
plus quàm alter, p. 11  
Dentium stuporem depellere, p. 236

Deus mediantebus causis secundis pro-  
digia facit, p. 347. ejus clementia in  
revocandis malis & bonis, p. 352. cur  
prodigia permittat, ibid.  
Deus punit mala analoga pœna, p.  
354  
Discumbentes ut à carnibus abhorre-  
ant, p. 34  
Divinare quem quis numerum, abjectis  
aliis, retinuerit, p. 128  
Divinare in quo digito quis gesserit an-  
nulum, p. 89  
Divinare in quo digito & articulo unus  
è pluribus annulus gesserit, p. 90  
Divinare quam quis rem ex pluribus  
conceperit, p. 90  
Divinare quam quis rem ex multis at-  
tigerit, p. 184. & 185  
Divinare quot quis habeat nummos in  
marsuppio, p. 189  
Divinate quam trium rerum quilibet  
ex tribus tetigerit, p. 193  
alius modus divinandi idem, p. 194  
& 195  
Divinatio Arithmetica, p. 85  
Divinatio alia arithmetica, p. 87  
Divinatio Arithmetica alia, p. 95  
Doliolum octo amphorarum æqualiter  
certâ conditione divide, p. 213  
Item duodecim amphorarum, ibid.  
Dolium tres liquores ex eodem episto-  
mio effundens, p. 170  
Dolium per os inferius implere, p. 217

## E.

Ebrietas quomodo vitetur, p. 265, &  
266  
Ellychnia incombustibilia, p. 73  
Emplastri febris fugi usus, p. 146  
Epactam veterem invenire, p. 219  
Epactam novam invenire, p. 219  
Epactam ex digitorum articulis repe-  
rire, p. 195  
Epistolam intra ovum abscondere, p.  
116  
Escharoticum quod cutem celeriter  
perforat, p. 279  
Equi

# INDEX RERUM

Equi, aliaque animalia ut non comedant. p.67  
 Equum reddendi claudum modus superstitiosus. p.187  
 Experimentum opticum novum proponitur & examinatur. p.118

## F.

Fabæ, cucumeres, aliaque semina ut intra quatuor horas è terra germinent. p.152  
 Facies fucatas deturpania ludicra. p.7

Facies aliorum reddere virides. p.8  
 Febres depellere. p.143  
 Felem cultro transigere sine læsione. p.23  
 Feles Valerianæ radice delectantur. p.2  
 Fenestra papyracea ut vitrea videatur. p.135, & 114.  
 Fenestram vitream in ligno fingere. p.134  
 Frumenti 90. modii in tribus navibus per 30. telonia deportandi. p.212  
 Fontem Heronis construere. p.127  
 Fraxini miræ virtutes p.297. ejusdem forma & species. ibid.  
 Fraxinus quando cædi debeat ut virtutes habeat. p.199 ejusdem virtutes. 37. ibid.

## G.

Gallina soluta ut non aufugiat. p.27  
 Gallinas inebriare odore. p.9  
 Geometra Westphalus arborum altitudinem metitur. p.45  
 Geometrarum rustici putei profunditatem quomodo metiuntur. p.44  
 Gladio ferire ut non possit quis alium propè stantem. p.18  
 Gladium è vagina ut quis extrahere nequeat. p.169

## H.

Hebraicam linguam paucarum horarum spatio docere & discere p.105, & 108

Herbas ac flores producere intra phialam vitream. p.147  
 Horam ubi vis terrarum eodem momento scire. p.246  
 Horas è manibus discere. p.199  
 Horologium hydraulicum exiguis impensis facere. p.201  
 Horologium hydraulicum magneticum. p.202  
 aliud. p.201  
 Hydromanticum ludicrum. p.67  
 Hydromanticum artificium. p.8

## I.

Icuncula ut sponte moveatur in gyrum. p.43  
 Icuncula chartacea ut sponte supra mensam ambulet. p.66  
 Idea elementaris mundi in phiala vitrea. p.142  
 Idea Orbium cælestium in vitrea sphaera. p.144  
 Igne modico magnam ciborum copiam coquere. p.68  
 Igneos characteres exhibere. p.77  
 Ignis ut discurrat per domum. p.32  
 Imago rerum in cubiculo obscuro non sunt umbræ rerum. p.10  
 Incendere alterius lectum occulto igne. p.31  
 Indices librorum conficere. p.117  
 Indictionem invenire. p.221  
 Indusium è thoracis manica extrahere. p.17  
 Iter equestre celeriter conficere. p.26  
 Iter per loca incognita ope pyxidulæ magneticæ conficere. p.17

## L.

Lac ut non conguletur. p.9  
 Lactucam ex tempore producere. p.152  
 Lampadi aditantes ut variè colorati appareant. p.4  
 Lampas ex humano sanguine. p.4  
 La-



# NOTABILIUM.

Lapidem durum & crassum pugno frangere.	p.154	Maculas abolere è vestibus, libris, &c.	p.139. & 2.2
Leetus pneumaticus.	p.263	Maculas omnis generis è diversis rebus eluere.	p.247. & 242
Lepidæ quæstiones ac responsiones p. 64		Mala hujus mundi effectus sunt peccati.	p.351
Lepidum Cattorum tripudium.	p.2	Manus & faciem lavando aqua ut quis denigret.	p.162
Lepores in unum congregare.	p.153	Margaritas numero inæquales æque carè vendere, & idem pretium reportare.	p.179
Liber intus & foris scriptus, ab Ezechiele visus, quid significet.	p.323	Margaritas è cruce oppignorata suffurari.	p.183
Librum mirabilem concinnare.	p.55. & 17	Margaritæ 100 decem vicibus per 10. milliaris deportandæ.	p.212
Lineam meridianam lucente Sole invenire.	p.135	Mendacium aut superstitio ingens.	p.176
Linguarum omnium convenientiæ Clavis	p.110	Mensis quilibet quot dies habeat, invenire.	p.221
Linguas omnes mundi ad unam redigere.	p.109	Menfuram pedis & colli humani è manu conjicere.	p.210
Liquores varii vitreæ phialæ includi possint se mutuo circumdare sphaerice.	p.141	Meridianam lineam sine sole reperire.	p.169
Liquores varios sibi mutuo supernatantes eidem vitro includere	p.142	Metiri altitudines umbra.	p.215
Literam Dominicalem veterem invenire.	p.212	Metiri latitudinem fluvii aut fossæ sine instrumentis geometricis.	p.7
modus inveniendi novam.	ibid.	Miraculorum tria genera.	p.124
Loqui noctu absentibus per faciem p. 191		Miraculum propriè quid sit p.146. propriè dictum Deus solus facere potest.	p.347. Miraculorum & mirabilium discrimen.
Loqui absentibus noctu per plures facies.	p.192	Mobile perpetuum Alchymisticum.	p.148
Loqui absentibus sono diversarum rerum.	p.193	Monstrorum partium significatio-nes.	p.354
Lucerna Italica.	p.70	Moribundi destituti auditu, ut audiant.	p.271
Lucerna anno integro durans.	p.72	Moribundus lardi & brassicæ esu sanatur.	p.61
Ludicra varia Hiberni præstigatoris.	p.50	Muros solidissimos construere.	p.78
Ludovici Cæsaris aureum Effatum.	p.162	Mus ut alios mures devoret.	p.280
Luminia adstantes ut appareant squalidi.	p.53	Mures necare aut fugare.	p.281
Lunæ ætatem invenire.	p.120	Muscas & culices arcere.	p.230
Lunæ locum in Zodiaco invenire.	p.125	Mutus discit loqui perfecte.	103
Lupum, capram & caules sine mutuo damno transvehere.	p.9		

M.

Macrocosmi Idea.

p.136

N.

Nasturtium triplex,

p.4  
Na.

# INDEX RERUM

Natandi ignarus ut supra aquam se fu-	Picturas renovare, p. 1268, illustrare p.
stenter, p. 245	269
Naturæ miracula, p. 114	Pili barbæ aut capitis ut decidant, p.
Naturæ vires mirabiles, p. 128	161
Novem nummos certa lege disponere, p. 184	Pisa coquenda ut ex olla esiliant, p.
Novilunia invenire, p. 120	14
Numerum ab alio scriptum sine inter-	Pisces ut ad aquæ superficiem ascen-
rogatione divinare, p. 82	dant, p. 262
Numerum divinandi alius modus, p. 83	Pisces allicere & capere, p. 264
Nummos novem certa lege in pentago-	Pisciculus ut scutellam aquæ ebibat,
no disponere, p. 182	p. 167

## O.

Ocreæ ne aquam transmittant, p. 268	Pluviæ artificiosæ, p. 153
Oculus destructus reparari potest, p. 173	Poma certa conditione à famulo collec-
Olei febrifugi præparatio, p. 146	ta, p. 150
Opticum phenomenon novum, p. 119	Poma certa conditione de loco in lo-
Opticum experimentum novum, p. 132	cum portare, p. 2
Ova inæqualia numero à tribus æquæ	Pomum dividere illæso cortice, p.
cardovenduntur, & idem pretium re-	12
portant, p. 179	Pomum ut discurrat supra mensam, p.
Ovalem figuram circino ordinario de-	12
scribere, p. 65	Porrum miræ magnitudinis ut fiat, p.
Ovum ut discurrat supra mensam, p. 5	52
Ovum erectum ut apici insistat, p. 17	Portæ urbis certa conditione occupan-
Ovum ut sponte ascendat in aëre, p. 34	dæ à septem Capitaneis, p. 17
Ovum ut quis difficulter ex fenestella	Prodigia anni 1661. eorum effectus, p.
proiciat, p. 167	154
Ovum ex orbe in scyphum excutere p. 168	Prodigiorum tria genera, p. 113
	Prodigiorum apparitio utilis homini-

## P.

Panis calidus ut saltet in mensa, p. 11	
Panis in furno ut saltet, p. 53	
Parietes dealbare, p. 20	
Passerres fugare, p. 60	
Pelles & coria à corruptione servare, p. 280	
Pergamenam chartam reddere trans-	
lucidam, p. 282	

## R.

Rannapista ut clamare putetur, p. 5	
Rastrum cum dentibus verè erectis pin-	
gere, p. 6	
Raucedinem depellere, p. 100	
Regionem aliquam in phiala repræsen-	
tare, p. 142	
Re	

# NOTABILIUM.

Regulus cur seipsum vertat cum vena?  
p.14  
Res plures dividere integras inter pau-  
ciores, ut nullus accipiat plus quam  
alter. p.11  
Res aliquastali ordine disponere, ut  
fortitione ejiciantur quas volueris.  
p.214  
Ridicula sententia circa phænomen-  
num opticum in cubiculo obscuro.  
p.130  
Rosam purpuream reddere albam. p.  
15  
Rotam vitæ & mortis construere. p.  
242  
Rota alia vitæ & mortis. p.144  
Ruginem è ferro prohibere, p.169. è  
ferro eximere. p.270

## S.

Sanguinis circulatio in corpore huma-  
no. p.29  
Sanguinem sistere. p.76.98 & 99  
Sanguinis fluxum sistere. p.208  
Schedulæ tres sibi mutuo superposi-  
tæ ut situm mutant non tactæ. p.  
24  
Scribentes sine manibus. p.215  
Scribere in tenebris. p.117  
Secretum Cryptographicum. p.272  
Seram Mathematicam aperire. p.238  
Serpentes mortuos servare incorru-  
ptos. p.137  
Serpentes capere aut fugare. p.231  
Silicem mollem reddere. p.156  
Silvam abietum intraphialam exhibe-  
re. p.150  
Solis ingressum in signa Zodiaci agno-  
scere. p.124  
Solis locum in Zodiaco invenire. p.  
225  
Species rerum in cubiculo obscuro ex-  
ceptæ chartâ non apparent rectæ, si  
tubo optico inspiciantur. p.128  
Speculum in cubiculo obscuro species

rerum excipiens repræsentat res situ  
recto & inverso p.111  
Speculum planum ut ostendat res non  
visas p.172  
Speculum planum aliter situare, ut re-  
præsentet non visa. p.173  
Alius modus statuendi speculû pla-  
num ut non visa monstret. p.174  
Speculo plano repræsentare res extra  
non apparentes. p.175  
Sphæra vitrea nucis avellanæ ma-  
gnitudine, bombardæ explosæ cre-  
pitum æmulans. p.62  
Statua loquens in Museo Kircheriano.  
p.31  
Statua Lapidea ut candelam accendat.  
p.186  
Statua an ope magnetis in aëre possit  
suspendi. p.271  
Sternutationem vehementem provo-  
care. p.4  
Surdus instrumenti sonum ut percipi-  
at. p.150  
Surdus oculis percipientes loquentium  
voces. p.102

## T.

Tachygraphia quid. p.112  
Tachygraphia recentissima. p.114  
Tapetes mundare & renovare. p.240  
Telum sine vinculis pendens in aëre.  
p.271  
Triangulum unico ductu formare. p.  
66

## V.

Valeriana herba, ejusque species. p.3  
Vas plenum intra aliud æquale & ple-  
num effundere. p.68  
Vas stanneum in hypocaufto calido  
ut præ frigore mensæ adhærescat.  
p.157

# INDEX RERUM NOTABILIUM.

Venatorum & jaculatorum secretum examinare.	p. 79	Vera facillimè circumagere.	p. 81
Eorundem incantatio examinatur.	p. 160	Vera aqua vertere	p. 81
Ventris crepitus excitare.	p. 11	Vesuvius cineres eructat & lapides. p.	127
Verba scripta in charta combusta ut in manu appareant.	p. 157	Vitro fracto ut vinum maneat suspen- sum.	p. 11
Vertiginem capitis sanare.	p. 60	Vitrum deaurare.	p. 135
		Vitrum circulariter secare.	p. 207

F I N I S.





IOCO-SERIO-  
RUM NATURÆ

ET ARTIS,

*Sive*

MAGIÆ NATURALIS  
MISCELLANÆ

CENTURIA I.

Prooemium.



*Tridentem, ita jocantem dicere verum, nemo prohibet. Natura & Ars secreta sua nobis pandunt, non seria tantum, & serio, sed jocosa etiam, & jocose, utraque tamen vera, quia simplicitatis utraque & sinceritatis est amans. Has qui auscultat Magistras, non fallitur nisi volens. Falli*

*A*

*autem*

*autem vult, qui causam rerum scire contemnit, praesertim faciliū, & ut apparet, non magni momenti. Ego nihil horum contemnere soleo, sed omnia rimari, ac penitiū cognoscere adnitor, maxima, minima, seria, jocosa. Nihil exiguum existimo, quod Natura docet, & Ars. DEl Ars est Natura; Natura imitatrix Ars. Utramque Magistrā agnosco, ac veneror. Pergo itaque, & quae ab utraque didi, non magna etiam, sed primo intuitu levia, pando. Seria jocosis misceo, quia ita utramque Magistrā meam facere conspicio, DEVM imitatas, qui ludit in Orbe terrarum. Sit itaque*

## PROPOSITIO I.

*Lepidum cattorum tripudium exhibere.*

*Teles Valeriana radice dele-  
stantur,*

**V**alerianae radicem catto uni aut pluribus projice. Accurrent odore illecti; mox lambent, ac basiabunt; tum circumcursantes tripudiabunt; arreptam dentibus vellicabunt identidem; volutabuntur circum, ac mirissimos gestus, incredibilis delectationis, & ut apparet, gaudij indices edent. Diceresherbam eos deperire. Vidi non ita pridem id spectaculi primum in uno, deinde in altero, tertio, ac quarto catto superveniente, qui omnes certatim arreptam radicem vellicabant, ac basiabant, circumque cursitantes tripudiabant. Causa est vel odoris, vel alterius qualitatis effluviū cattis symphaticum & gratum. Simile spectaculū canum dabimus infra Propositione 8.

ANNO-



## ANNOTATIO.

**V**alerianam herbam Hieronymus Tragus seu Bock in Herbario suo Par. 1. cap. 19. & Germani nostri vocant *Rachenwurtel* / putatque Matthiolus eandem esse cum *Phu* (ϕῦ) *Dioscoridis*, qui lib. 1. cap. 10. ait, *Phu*, quod & aliqui sylvestrem nardum appellant, nascitur in Ponto, folio olulatri, aut elaphobosci, caule cubitali, aut altiore, lævi, cavo, molli, in purpuram vergente, geniculis intercepto, floribus narcisso proximis, maioribus, tenerioribus & exalbicans purpureis, radice superius ad digitum minoris crassitudine, ex obliquo villosa in nigri veratri, aut junci odorati modum, capillamentis invicem contextis, flavescentibus, odoratis, cum quadam odoris gravitate nardum æmulantibus, &c. Quem in locum Matthiolus ait, *Phu* trium haberi generum, majus, minus, & exiguum. Majus iisdem depingit verbis, quibus *Phu* suum Dioscorides, nisi quod in summitate floridam extare umbellam asserat. Atinus ait omnibus cognitum, esse, folijs fraxini, vel sorbi, lavibus, nigricantibus, humi accubantibus; canthum & umbellam gerere ut majus, radices habere numerosas, albicantes, invicem complicatas, succisa vocata amulas, odore cum quadam gravitate jucundo, nardi modo; nascique humecto solo. Addit deinde: *Phu* minoribus radicibus mirum in modum delectantur catti, adeo ut è longinquo ijs olfactus adveniant, atque inventas devorent, continuo, dum eas arrodunt, atque delingunt, præ solatio murmurantes: tanta est hujus plantæ cum cattis sympathia. Quod Dioscorides *Phu* appellat, Tragus loc. cit. vocat *Baldrian* / & dividit in quatuor genera, majus, commune, minus, & minimum; & tria ultima genera dicit vocari *Rachenwurtel* / hoc est, radicem cattorum. Differt itaque *Valeriana* à *Nepeta*, quam Dioscorides lib. 3. cap. 36. secundam speciem *calamintha* facit, & Tragus Par. 1. Herbarij cap. 4. vocat *Rachenkraut* / *Brasavolus* verò putat esse illam quam vulgò *Cattariam* vocant, eò quod catti magnæ ejus capiantur voluptate. Sed *Brasavolus* erroris arguit Matthiolus in locum cit. *Dioscoridis*.

*Valeriana  
herba, eius-  
que species.*

## PROPOSITIO II.

*Choreas ducentes unà cum spectatoribus ad vehementer sternutandum provocare.*

**N**asturtij semina, ac folia siccata, comminue in pulverem, & loci, in quo choreæ ducendæ, pavimentum clam alijs eo insperge. Pulvis hic à saltantium motu elevatus, & tam horum, quàm spectantium nares ingressus, eas vehementer vellicabit, tantamq; omnium sternutationem excitabit, ut in cachinnos soluti saltum interrumpere cogantur.

## ANNOTATIO I.

*Nasturtiū  
triplex est.*

**N**asturtium, græcè *καρδάμον*, germanicè *Erbsen*/ duplex facit Plinius lib. 2. cap. 13. album, & nigrum: Tragus vero Part. 1. Herbarij cap. 26. triplex, hortense, aquaticum, & pratense. Notissima est herba. Primi semen mordacius est quàm folia. Et de hoc præcipue est sermo.

*Sternutationem vehementer provocare.*

Eundem effectum facis, si pulveri tabaci misceatur, & per nares trahatur. Vnde similis jocus institui posset. Novio in Sicilia virum tabaco immodicè deditum, adeo ut non capsellam exiguan, sed cistulam benè grandem continuò circumferret, & omnibus ad se accedentibus liberaliter etiam communicaret, præsertim discipulis, erat enim ludimagister. His ut jocum faceret, tabaci pulveri immiscuit pulverem foliorum fruticis, quem Siculi Landrum vocant. Sub ingressum ergo Scholæ discipulos ad tabacum sumendum invitat, & mox doctioni inisium dat: paulò post tantus fit sternutantium strepitus, ac risus, ut lectio solvenda fueris. Multa alia si per nares sumantur, sternutationem provocant.

## ANNOTATIO II.

**P**otest & in convivio simile ludicrum exhiberi, si pulvis sternutationem movens stropholis inspergatur, & venietur supra mentem.

PRO.



## PROPOSITIO III.

*Ut alicui per fenestram prospicienti excrescant  
cornua è capite.*

**D**UO intestina alicujus animalis exsiccata, colore tincta, flaccida, & compressa, absconde alteri intra capillitium, clausâ prius illorum extremitate quæ frontem respicit, alterâ verò quæ respicit dorsum, apertâ relictâ. Dum igitur per fenestram respicit, infla retro intestina: erumpent paulatim è capillitio, & in cornua excrescent, ac divaricabuntur, ut per angustam fenestram caput retrahi nequeat.

*Cornua per  
fenestram  
prospicienti  
ut excres-  
cant, offe-  
rent.*

*Exhibuitum fuit in theatriali spectaculo pro interludio: ubi dum herus è fenestrâ domus suæ prospiciens magum reprehenderet, artes suas ante ades exhibentem; hic indignatus cornua affixit hero prædictâ praxi.*

## PROPOSITIO IV.

*Ut ovum supra mensam huc, atque illuc  
discurrat.*

**O**VUM crudum per foramen exiguum in putamine factum evacua, & putamini deinde impone sanguisugam; clausoq; foramine cerâ candidâ, colloca ovum supra mensam, è regione verò pone scutellam aquâ plenam. Sentiet sanguisuga odorem aquæ, & adrependo volvet ovum versus scutellam.

*Ovum ut  
discurrat  
supra men-  
sam.*

## PROPOSITIO V.

*Ut rana picta clamare putetur.*

**F**ORAMINI in pariete facto impone ranam vivam, & foramini oppande chartaceam ranam pictam. Tene deinde ante pictam ranam candelam accensam. Percipiet rana intus latens calorem a lumen, & coxabit, putabiturque picta rana coaxe. Alij jubent corvum pingi, & hac arte corvum crocitantem exhibere.

*Ranapi-  
ctâ ut clamare  
putetur.*

## PROPOSITIO VI.

*Ut totum cubiculum inflammetur sine damno.*

*Cubiculū  
ut inflam-  
metur sine  
damno.*

**I**N cubiculo angusto, & undique clauso, pone supra carbonēs ardentes vas plenum vino adusto optimo, cum frustulis camphoræ, aut bituminis seu gummi; & tamdiu coque vinum cum camphora, vāte manente aperto, donec in vapores resolvatur, & totum repleat cubiculum. Amotis deinde carbonibus, jubetur quispiam ingredi cum candela accensa in manu. Inflammabitur repente totum cubiculum, & vapido effluvio absumpto extinguetur ignis, sine cujuscquam noxa.

## PROPOSITIO VII.

*Ut carbonēs igniti per pavimentum & parietes cubiculi obscuri discurrere videantur.*

*Carbonēs  
igniti ut  
discurrant  
in cubicu-  
lo.*

**C**ANCROrum aut scarabæorum dorsis alliga frusta ligni putridi, quod noctu in tenebris lucet, & in cubiculo discurrere permitte. Ingredientes, & ibi commorantes putabunt carbonēs accensos discurrere.

## ANNOTATIO I.

**N**ota est historia de stratagemate Cenethi secundi Scotorum Regis, qui ut procures suos in bellum concitaret contra Pictos, ad patris sui Alpini mortem ulciscendam, noctu immisit in singulorum cubicula, cum decumberent, Vitis cum baculis ex putri ligno in manu, & veste ex corio piscium non desquamato, qui ad bellum suscipiendum illos excitarent. Rem gestam narravimus par. 4. Magiæ lib. 1. Syntagm. 1. cap. 4.

## ANNOTATIO II.

**E**iusdem putridi ligni frusta, aut melius frusta lapidis phosphori Bononiensis, qui conceptum lumen retinet in tenebris, ut loc. cit. cap. 1.

cap. I. fusè explicavimus, possunt indi oculus & ori statuarum, & ob-  
scurari cubiculum: putabunt enim ingredientes, statuas ejaculari ignem  
ex oculis & ore.

## PROPOSITIO VIII:

*Nucleum amygdalinum comminuerè, puta-  
mine illaso.*

**N**ucleum amygdalinum, non sine spectantium admiratione,  
in partes minutas comminues, putamine integro remanente,  
si lineo, aut laneo panno circumligato, apprehensoq; ex alia  
parte manu, sæpius super lapidem incufferis amygdalam invo-  
lutam. Nota tamen, inclusionem intra panni extremitatem  
non debere fieri magno hiatu, sed mediocri.

*Amygdala  
nucleum  
comminuo-  
re putami-  
ne illaso.*

## ANNOTATIO.

**P**raxi findendi ossa durissima persicorum, aut amygdalarum, in-  
suo leviter cultri cuspide intra ossis commissuram, & utrumq; per-  
pendiculariter deorsum demittendo in pavimentum, communis est, &  
omnibus nota. Hac si aperius amygdalam prædicto modo concussam,  
deprehendes nucleum comminutum.

## PROPOSITIO IX.

*Locum altum ascendere sine scala.*

**L**oco applica perticam longam eo modo, quo scalæ applicari  
solent: perticæ circumda duos annulos ferreos, qui laxè  
per ipsam discurrere, ac faciliè sursum & deorsum moveri que-  
ant: annulis appende stapedes quibus pedes immittere solent  
equitantes. His factis, immitte pedes intra stapedes: & mani-  
bus apprehensâ perticâ, eleva unum pedem cum stapede & an-  
nulo, ita ut annulus sursum in pertica promoveatur, moxq; for-  
titer preme deorsum, adhærebit annulus immotus perticæ, &  
totius corporis pondus sursum nitentis sustentabit. Iterum  
eleva

*Ascendere  
locū altum  
sine scala.*

eleva alterum pedem cum stapede & annulo, & similiter deorsum preme, manibus verò ac toto corpore sursum nitere. Eadem ratione alternis pedem unum elevabis, alterum deprimes, donec ad summitatem perveneris. *Causam quilibet facile conijciat; pondere enim pressi annuli, adprimuntur pertica, ut desinere nequeant.*

## PROPOSITIO X.

*Ut res visa dispareat, hydromantico artificio efficere.*

*Hydromantico  
artificium.*

**F**UNDO vasis cujuscunque aquâ pleni impone nummum aureum (aut rem quamcunque coloratam) & alium accedere paulatim jube, donec nummum videat. Deple deinde aperto epistomio vas, altero in eodem loco ac situ manente; sensim è conspectu subducetur nummus, donec penitus evanescat. Ratio est, quia species nummi commigrantes ex aqua in aërem, utpote è medio densiore in rarius, refringuntur in egressu aquâ à perpendiculari, ideoque ad oculum spectantis pertinent; ad quem evacuato vase non perveniunt, sed sine refractione procedentes incidunt in latus interius vasis. *Vide quæ dixi Par. 1. Magiæ lib. 9. in Magia Dioptrica, ubi multa alia ac jucunda spectacula simili artificio exhibenda reperies.*

## PROPOSITIO XI.

*Baculum duobus vitris aquâ plenis superpositum frangere, vitris illasis, & aquâ non effusâ.*

*Iconismi I.  
Fig. I.  
Baculum  
duobus vitris  
impositum  
frangere, illasis  
vitris.*

**D**UOS vitreos scyphos, aquâ plenos, aut alia cujuscunque formæ vitrea vasa, æqualis altitudinis, colloca supra duo scamna aut fulcra æqualis item altitudinis, spatio aliquo inter te distita. Vitris super impone baculum aridum, qui non facile flectatur sine fractionis periculo, ita ut baculi extremitates solum

tan-



FIG. II.

FIG. I.




FIG. III



tangant vitrorum latera seu labia extrema. Alio deinde baculo ponderoso validum ac celerem ictum inflige medio baculi superpositi. Videbis illicò baculum hunc diffingi, ac in duo frustra dissilire, immotis & illæsis vitris, & nè guttâ quidam aquæ effusâ. Causam assignavimus *Par. 3. Magicæ lib. 2. Syntagm. 2. Erotem. 5.*

## ANNOTATIO.

**I** Mò & supra duas straminis stipulas baculus prædicto modo positus, atque percussus, frangi potest, si nimirum duo ex adverso stantes, & se mutuo respicientes, ante se utraq; manu stipulas duas teneant extensas, ipsque baculus superponatur, & ab alio percutiatur modo dicto. *Vide Iconismi I. Fig. 11.*

## PROPOSITIO XII.

*Ut lac non possit coagulari.*

**A** lunt, si lacti saccharum injicias, nec coagulari posse, nec butyro efficiendo aptum esse. Itaque jocum hac ratione facies ancillis, aut domesticis alijs, dummodò fiat sine noxa. *Lacus non coaguletur.*

## PROPOSITIO XIII.

*Lupum, capram, & caules, sine mutuo damno singulatim per flumen transvehere.*

**R** usticus ad forum properans è villa cum lupò, caprà, & fascè caullum, ad fluminis ripam offendit naviculam, quæ non nisi se & unam trium prædictarum rerum simul capit. Quæritur, quo ordine transvectio instituenda, nè se absente aut lupus cum capra, aut capra cum caullibus permaneat? Si enim primò transvehat capram, ac deinde vel lupum, vel caules; damnum mutuum non evitabit: multò minùs, si lupum primùm absportet. *Lupum, capram, & caules sine mutuo damno transvehere.*

Transvehat primò capram; secundò lupum, & capram reducat: tertio caules; quartò & ultimò capram denuo: sic



enim nunquam lupus solus cum capra erit, neque hæc sola cum caulibus.

## PROPOSITIO XIV.

*Anserem vivum assare, ut comedi possit; & dum scinditur, clamiter.*

*Anserem  
vivum as-  
sare,*

**A**Nserem vivum depluma penitus, capite excepto. & igne per circuitum valla; non arētē, nē suffocetur calore nimio; neque largē, nē inassatus maneat. Intra ignem dispone ollulas aquā plenas cum sale & melle, & anserem frequenter liquamine pingui obduc, ut esculentior evadat, & facilius assetur. Ubi torren & sitire cæperit, nec tamen effugere poterit; aquam forbebit, & intestina purgabit. Interim spongiā madefactā continuò cerebrum & cor refrigera. Ubi cespitare, & quasi præ insania, humore cordi deficiente, corruere cæperit; remove ab igne, & convivis appone: vociferabitur dum scinditur, & priùs ferē absumentur quàm moriatur. Probatum est, *Portā* teste lib. 14. Magiz Natur. cap. 9. ubi ait, se à fide dignis audivisse, paulò ante sua tempora Aragonum Regum mensis sæpe anserem vivum, & excoctum, fuisse impositum.

## PROPOSITIO XV.

*Ingentem capanarum sonum representare.*

*Самая-  
малень-  
кая ин-  
стру-  
мент-  
ка.*

**F**uniculo, aut chelyum chordæ appende laminam æream valde tinnulam ac tremulam, aut aliud quodcunque corpus metallicum sonorum, tractatâ chordâ per foramen aliquod in extremitate corporis factum. Deinde utrumque chordæ extremum extremis digitis indicibus circumvolve, & digitis aures obtura. Demum pendulam liberè ex chorda laminam illide corpori alicui solido, aut jube alium illam percutere cultro, aut clave. Putabis te ingentis campanæ sonum audire, Erfordianæ campanæ sono haud absimilem. *Alitum in modum hoc experimento delectatos vidi, quos quos exhibuerunt.*

PRO-



## PROPOSITIO XVI:

*Vitrum vino plenum, & è clavo suspensum frangere, vino suspensio manente.*

**V**itrum vino plenum include vesicæ, & vesicam unâ cum vitro è clavo suspende: fustem deinde vesicæ illide: frangetur vitrum, & vinum intra vesicam collectum manebit suspensum. *Quæstionem propositam nemo non miratur: solutam nemo non ridet, maximè si diu antè solutionem anxie quesierunt auditores.*

*Vitro fracto usque vinum manens suspensum.*

## PROPOSITIO XVII.

*Decem poma integra ita inter novem homines dividere, ut nullus accipiat plus quàm alter.*

**H**oc melius proponitur lingua vernaculâ sic: *Sehen Apffel unter neun Menschen aufsthehen / daß keiner mehr bekommen als der ander.* Inter novem homines statatur ordo, ut unus sit primus, quem sequatur alter seu secundus (der ander) tum tertius, quartus, &c. unicuique detur unum pomum, alteri verò seu secundo (dem andern) dentur duo. Hoc facto, nullus ex novem habebit plus quàm alter (als der ander) quia hic habebit duo poma, reliqui verò omnes tantum unum.

*Res plures dividere integras inter pauciores, ut nullus accipiat plus quàm alter.*

## ANNOTATIO.

**H**ic joco similis est ille quem Siculi proponunt in hunc modum: Sono tre persone, che hanno tre pernici; Ognuno mangia la sua, è restano due: hoc est, sunt tres viri, & singuli habent singulas perdicem, quilibet comedit suam, & remanens dua. Nam unus illorum trium vocatur ognuno, qui solus comedit perdicem suam, reliqui duo suas servans.

## PROPOSITIO XVIII.

*Pomum dividere in quot volueris partes,  
cortice illaso.*

*Pomum di-  
videre illa-  
so cortice.*

**A** Cum immisso filo intrude, à vertice pomi incipiendo, & subter corticem protrude, donec alio loco emergat: ubi emerferit, iterum intrude eodem loco è quo emerfit, & subter eundem corticem ulteriùs protrude, donec denuò emergat alio loco; ealdem operationes repete, usque dum totum intus infra corticem circumfoderis pomum, ac usque emergat eodem loco, ubi primà vice fuit intrusa. His peractis, utramque fili extremitatem eodem è foramine prominentem apprehende simul & extrahe; dividetur in duas partes interiùs pomum subter corticem illasum, nec divisum apparebit nisi cortex postmodum dividatur. Simili modo dividetur in quatuor, & quotquot volueris partes.

*Vide  
Iconis I.  
Fig. III.*

Sit pomum H. Infigatur acus cum filo in A, & egrediatur in B, trahaturque filum post acum, ut extremitas I foris maneat. Iterum ingrediatur acus cum filo in B, & egrediatur in C. Tertiò ingrediatur in C, & egrediatur in D, tum in E, in F, in G; tandemque iterum in A egrediatur acus cum filo, ut altera extremitas K sit extrà. His factis, apprehende duo extrema I & K, & fortiter extrahe simul ex A, donec totum filum sit extractum: eritque pomum divisum.

Hoc si dederis alicui decorticandum, peractà decorticatione concidet in frusta. *Filum sit forte, aut duplicetur.*

## PROPOSITIO XIX.

*Ut pomum supra mensam discurrat.*

*Pomum ut  
discurrat  
supra men-  
sam.*

**S**Uprà Propositione IV. docuimus modum, ut ovum supra mensam hucatque illuc discurrat: hic idem de pomo docemus ex *Schwenckero* in *Delicijs* par. 16. quæst. 17.

Excava

Excava in circuitu pomi aliquot foramina, eaque imple argento vivo, iterumque obtura, & pomum colloca supra mensam: fiet quod dixi.

Simili artificio docet Fallopius efficere ut panis calidus in mensa salteet, si nimirum argentum vivum intra panem abscondatur.

*Panem calidum ut salteet in mensa.*

## ANNOTATIO.

Simili artificio putat non nemo effici posse, ut halex craticula impossitus, etiam uno latere assatus, seipsum vertat, ut latus quoque alterum assetur. Iubet nimirum calamum pennae anserinae vacuum impleri argento vivo, atque intra halecem abscondi. Postquam enim incaluit, ait, argentum vivum intra calamum; & se, & simul halecem vertet. Assimo tamen, rem minimè succedere: movebitur enim halex, & forsassis de craticula delabetur; at nunquam vertetur in latus alterum.

## PROPOSITIO XX.

*Ut avicula, dum ad ignem assatur, cum veru sponte vertatur.*

Cum Romæ essem, Eminentissimus Cardinalis Palottus experimentum huiusmodi (quod novum putabat) P. Athanasio Kirchero examinandum, causamque insoliti effectûs explorandam proposuit. Aucupio ceperant dicti Eminentissimi Cardinalis familiares aviculas aliquot minutissimas, quas Regulos vocant Latini, Germani verò *Haunschlupfferlein*; quod in sepium receptaculis nidulare soleant. Has virgis corylaceis infixas dum igni assandas exhibent, notatum fuit magnâ omnium admiratione, veru illa corylacea fulcris imposita paulatim se ipsa una cum aviculis infixis vertere. Sæpius repetita cum fuisset observatio, & semper eodem cum effectû; missa una avicularum simul cum stipite corylaceo ab Eminentissimo Principe ad P. Athanasium Kircherum fuit, petitumque ut idem experimentum repeteret, & suum de causâ tam insoliti prodigii (ut putabant) iudicium interponeret. Ad rei itaque periculum faciendum, aviculam de plumâ inus, virgam corylaceam rectam

*Regulus sepium veru et ad ignem.*

ac tenuem ( nè pondus effectum impediret ) instar veru per corpusculum transadigimus, veru duobus ferreis fulcris imponimus, lentum prunarum ignem admovemus, & motum præstolamur. Nihil primò per dimidij ferè quadrantis horæ spatium fuit notatum, adeò ut circumstantes experimenti vanitatem paulatim cachinnis exciperent, & ipse quoque Kircherus moræ impatiens abitu pararet, fallax & delusorium experimentum dictitans. Dorsum jam verterat, cùm stipitem primò lentissimè, mox vehementius agitari in gyrum animadverto. Revoco igitur abeuntem, ostendoque stipitem unâ cum avicula in orbem tantâ velocitate circumagi, ac si manuum applicatione agigaretur. Neque à circumvolutione cessatum fuit, donec avicula plùs quàm assata, & virga in carbonem ferè fuit redacta. Ad quadraginta gyros ego numeravi.

## ANNOTATIO.

**E**xperimentum hoc non est novum, ut Aulici supradicti putarunt. Meminit enim illius Albertus Magnus lib. 13. de Animal: Vbi regulum vocat Crochylum, quem Trochilum debebat appellare. Hæc avis, inquit, habet, quòd si deplumata in veru parvo figatur, ad ignem gyrat se ipsam. Et hoc jam probatum est à nobis per experimentum. Meminit & Porta lib. 14. Magia Natura. cap. 10. Cardanus lib. 7. variet. cap. 36. Scaliger Exercis. 70 in Cardanum. Aldrovandus lib. 17. Ornithologia cap. 1. Jonstonus in Histèria Avium, cap. de Regulo, & alij.

## PROPOSITIO XXI.

*Examinatur causa cur Regulus sponte cum veru-  
culo columno ad ignem verta-  
tur.*

*Regulum  
cur se ipsu  
veru ad ignem  
vertat,*

**C**Ausam præcedentis effectûs variam adsignant varij. Quidam eam referunt in ipsum Regulum, alij in virgam corylaceam,

eam, alij in utrumque. Nonnulorum sententias indico; deinde quid P. Kircherus, quid ego sentiam, edicam.

Cardanus loc. cit. *Nec minus mirum est, inquit, regulum avem ligneo veru perquam tenui infixum, semetipsum torrere. Multi hoc levitati corporis tribuerent, cum alijs paulo majoribus id non contingat. Nescio an Cardanus sciverit, veru debere esse columnum. Si scivit; cur causam experimenti adscribit levitati soli corporis Reguli? Ignorasse eum id quod dixi, suspicatur etiam Mizaldus, qui idem experimentum refert.*

Scaligeri verba loc. cit. sunt: *Id quod de avicula quisque Regulo ad ignem asso neutiquam fabulosè circumfertur. Nempe nos semel atque iterum converti vidimus. Illud porro experientum, an in alio infixa veruculo, quam columno, & in alijs avicula prater illam. Nam & parvitatem requiri, & desiccationem puto: hanc ob motum, illam propter motus facilitatem. Quæ averfa est ab igne pars, adhuc suo succo plena, aut saltem non exsucta admodum, propter gravitatem decumbere, igni exposita, exustione factam leviozem, in abentis subire locum. Eadem scribit in lib. 2. de causis Plantarum Theophr. Consentit Ionstonus, nec contradicit Aldrovandus. Sed graviter hallucinantur hi Auctores. Causa, quòd experimentum non probè ab ijs sumptum. Semel atque iterum vidit Scaliger verti aviculam cum veru; ego ad quadragies. Exsucta erat ipsi pars avis igni obversa, succulenta adhuc pars ab igne averfa; mea erat tosta undique, & omni prorsus destituta succo, antequam vertebatur, prius tamen infra, nam prunas subjeceram, non ad latus congessem. Demum in columno veru experimentum sumi oportet, in alijs lignis minimè succedit. In veru itaque, non in aviculam referenda est causa.*

Porta loc. cit. propiùs accedit ad veritatem: His enim verbis experimentum proponit: *Si desint servi, qui veru convertant, & viù ut avis seipsum torreat, hoc uteris artificio, &c. Regulum avem, quæ omnium avium minima est, columno veru infiges; & subiectis prunis dimovetur, ut seipsa movere videatur. Quod ex ligni proprietate evenit, non ex ave, &c. nam si columna virga ignem subiciat, distorquetur,*

quetur, ut ex ipsa videatur moveri: & quamcumque carnem, sed modici ponderis, infiges, omnis movebitur circumvolvendo. Hæc Porta.

Ego cum Kircherò *Dico primò*, causam hujus effectus non esse aviculam, sed virgam columnam. Probo, quia si aviculæ infigatur alia virga, non vertitur: & si sine avicula, sola virgæ columna instar veru fulcris sustentetur, & ignis subijciatur, vertitur ipsa sola. Secundum nos probavimus, primum quilibet probare potest.

Ajunt, nullam aviculam aliam præter Regulum, corylaceæ virgæ suffixam, dictum effectum præstare, signum ergo est, in Regulum conijciendam esse causam. Respondeo, etiam carnis cujuscunque frustillum Regulo non ponderosius præstare eundem effectum. Multò magis eum præstaret avicula illa minima Americæ, crabrone non major, de qua Nierembergii in Historia Natur. & nos in Physica Curiosa lib. 9. cap. 61. § 4. pag. 1239. Primum experientia constat; quæ de secundo dubitare non sinit. Quòd ergo apud nos in Europa præter Regulum nulla alia avis prædictum effectum præstet, causa est quòd nulla sit apud nos levior, aut æquè levis: reliquæ enim omnes pondere suo resistunt circumactioni virgæ, in qua sola virtus illa conversiva residet.

*Dico secundo*, effectum hunc non provenire ab occultâ quadam virtute & qualitate specificâ corylo inexistente, sed à constitutione naturali istiusmodi stipitis, alijs etiam lignis & plantis communi. Habet enim corylus fibras, ex quibus in longum componitur, ita constitutas, ut postquàm probè incaluit, sese vehementer contorqueat. Quam quidem torsionem sequitur motus in gyrum, si ita libretur stipes corylaceus, ut liberè verti in gyrum possit. Similem constitutionem habent sarmenta vitium, cuscuta, hedera, aliaque similia ligna, & festuæ avenæ; nisi quòd aliqua faciliùs & longiori tempore, aliaminùs faciliè & breviori tempore contorqueantur.



## PROPOSITIO XXII.

*Ut ovum erectum apici insistant, efficere.*

**O**Vum clàm alijs manu agita tam diu (per spatium quadrantis horæ circiter) donec vitellus dissolvatur penitus. Tum coram alijs colloca speculum planum supra mensam horizonti perfectè parallelum, & supra speculum erige ovum apice suo acutiorè, hucque & illuc libra, donec erectum quiescat. Quiescet autem, quia vitellus dissolutus intra albumen subsidit pondere suo, & ovum erectum firmat.

*Ovum erectum ut apici insistant.*

## ANNOTATIO.

**N**ON itaque impossibile est, ut ovum apici suo insistant erectum, nisi apex contundatur, ut à Columbo factum, putante aliter id fieri non posse.

## PROPOSITIO XXIII.

*Indusium suum è manicâ thoracis extrahere.*

**S**CIO magnum Principem hoc experimento sibi à quodam exhibito vehementer delectatum. Duobus modis fieri potest: primò ut indusium maneat integrum: secundò, ut ex parte disseccetur.

*Primus Modus.* I. Indusium integrum pone supra nudum dorsum, ut plicatum dependeat, & in anteriore colli parte claudeliga culis. II. Vtramque indusij manicam plicatam pone supra nuda brachia, & circa manuum juncturas similiter ligaculis claude. III. Supra indusium indue thoracem, ut per colli ac manicarum aperturas appareat indusium, puteturque toti corpori, ut assolet, circumdatum. IV. Spectaculum exhibiturus, aperi thoracem, & solve tam colli, quàm manicarum ligacula: Immissâque primùm manu sinistrâ ante pectus, introtrahe manicam dexteram indusij: deinde manu dexterâ ante

*Indusium è thorace manica extrahere.*

pectus immisâ, trahe totum indusium versus sinistrum latus corporis tui: demum extrahere sinistram manicam indusij à thorace, & sequetur totum reliquum, non sine adstantium admiratione & risu.

*Secundus Modus.* I. Dissue totum dexterum indusij latus, à collo deorsum, unâ cum dextera manica. II. Indue indusium, ac si esset integrum, ut emineat atque appareat extra manicas & collum thoracis. III. Manu sinistrâ primum, deinde dexterâ intra thoracem misâ trahe intrò manicam dexteram indusij, totumque indusium, quantum potes, versus latus corporis tui sinistrum. IV. Apprehensâ manicâ sinistrâ indusij, extrahere eam extra thoracis manicam sinistram, sequeturque ea cum indusio, ut antea.

## ANNOTATIO.

Schwenterus in *Delicijs Physico-Mathem. par. 16. quest. 16. proponit solum primum modum, & ad extractionem requirit opem alterius. Sed ut ex dictis apparet, idem sibi ipsi suum extrahere potest.*

## PROPOSITIO XXIV.

*Ut quis vix uno passu distans ab altero, cum evaginato gladio ferire nequeat.*

*Gladio fervire ut non possit quis alium propinquare.*

CONDIAM hæcenus dicta experimento haud illepidò, quod Romæ didici à Viro docto. Conveneram hunc officij causâ unâ cum P. Athanasio Kircherò. Loquebamur de varijs experimentis, serijs tamen. Post multa ultrò citròque, ut defatigatos ferè animos joco aliquo recrearet Vir ille doctus, ajebat, scire se adhuc unum tam facile, quàm certum & infallibile, ut nimirum quis evaginato gladio ab alio vix unico passu distans, eum ferire nequiret, si inter utrumque, strophium interponeretur, cujus unam extremitatem unus, alteram alter manu apprehenderet. Instamus vehementer, secretum ut panderet, modò superstitione abesset. Omnem superstitionem abesse ajebat ille, ac merè naturalè esse, nullo qui videret dissentiente, sed





Fig I.



Fig II.



Fig III.




Fig IV.



Fig V.



Fig VI.



sed pandere id non solere, nisi optimè de se meritis, & quos secreti tenacissimos judicasset. Merita obtendimus ambo, secretum promittimus, & deferimus obsequia. Prævalere tandem, ut parerat, Kircheri merita. Baculum ergo pro gladio cum apprehendere jubet, & unam strophili extrematatem; alteram ipse tenebat. Deducit dein armatum ad cubuli januam apertam, & egredi jubet, non dimisso interim è manibus nec strophilo, nec baculo. Extrà cum esset ille; hic intus ad se trahit januam, & alterum coniti jubet quantum valeret, ad se percutiendum. Cum non posset, cum risu solvitur spectaculum, & experimenti fides comprobatur.

## ANNOTATIO.

**S**chwenterus in *Delicis Physico Mathem.* par. 10 quæst. 33. Praxin hanc ita proponit. Dic in amicorum conversatione uni alicui, collocaturum te in terra periscelidem non plus ulnâ longam, effecturumque, ut si tu uno pede unam premas extremitatem, alter ille alteram, evaginatam habens gladium; ferire te nequeat. Acceptâ conditione, colloca periscelidem supra limen porta, ut una ejus extremitas intra, altera extra cubiculum sit, & uterque pedibus, ut conveniunt, premat ejus extremitatem: tum clauda januam, & jube alicrum ferire quantum vi potest.

## PROPOSITIO XXV.

*Ut annulus per foramen angustum transire videatur.*

**A**rtificium proponit aliter, quàm ego, & satis intelligibiliter (quantum in re obscura fieri potest) explicat Schwenterus in *Delic. Physico Mathem.* par. 10. Quæst. 27. magnificèque extollit: est enim verè mirabile, & magicum quid habet, vixque verbis aut schemate, nisi accedat ocularis demonstratio, exponi potest. Conortamen. Igitur

*Annulus  
ut per an-  
gustum fo-  
ramen  
transire  
videatur.*

I. Esto tabella oblonga unius circiter palmi, ejus formæ, quam exhibet A B, aut alterius ad libitum: quæ in medio habeat foramen C D seu oblongum, seu etiam rotundum, angustius tamen quàm ut annulus, quo uti vis, transire naturaliter queat.

*Vide  
Iconis II,  
Fig. 1.*

II. Accipe chordam A K G L B, eamque plica, & plicatâ partem mediam G intrude per foramen C D, ut retro deorsum pendeat usque ad G infra tabellam.

III. Extrema A & B chordæ, quæ extra foramen ante tabellam adhuc pendent, intrude per plicaturam G, ut figura prima monstrat: ambabus verò chordæ partibus G A, & G B, appende annulos H & I, & extrema A & B chordæ alliga extremis tabellæ, ut apparet in eadem figura prima.

His factis, annulus I, qui pendet in L, transferendus est ad partem alteram, ut pendeat in K juxta annulum H: indeque iterum transferendus, ut pendeat in L sicut antea: manente chordâ integrâ, & semper alligatâ extremis A & B tabellæ. Quod fieri non posse videtur, nisi annulus transeat per foramen C D. Fit hac ratione.

*Vide*  
Iconis II.  
Fig. II.

I. Apprehende manu sinistrâ extremum tabellæ, & manu dexterâ trahe deorsum circulum G chordæ; annulum autem I promove sursum, donec transeat per dictum circulum G deorsum pendentem, sitque supra G in parte F ante tabellâ planum, ut apparet in secunda figura.

*Vide*  
Iconis II.  
Fig. III.

II. Apprehende simul utramque chordæ partem E & F, unâ cum annulo, & trahe versus te à foramine C D, Idque tam diu, donec pars G (quæ interim retro versus foramen C D ascendit) sit extracta aliquò usque è dicto foramine C D: prominebitque ex eodem foramine duplex circulus E & F, è quo pendebit chorda cum annulo I, ut apparet in tertia figura.

*Vide*  
Iconis II.  
Fig. IV.

III. Trude annulum I per utrumque dictum circulum E & F; & apprehensis retrò chordis, trahe ambas, ut iterum transeant per foramen C D: pendebitque retrò unicus circulus G, & ex illo in chordæ parte aliâ pendebit annulus I, ut apparet in quarta figura.

*Vide*  
Iconis II.  
Fig. V.

IV. Trude annulum I per circulum G; & descendet usque ad annulum H, ut apparet in quinta figura.

Similiprorsus artificio efficies, ut idem annulus I, redeat ad alteram partem, & dependeat ut antea ex L, ut in prima figura apparet. Eodem præterea modo promovebis annulum H ad partem alteram, ut pendeat ex L simul cum annulo I.

## ANNOTATIO.

**N**on posui clariùs rem describere. Tu, Lector, prepara ruditer saltem instrumentum, & operare ordine juxta Regulas præscriptas, & experientiâ ipsâ disces, verum esse, quod dixi. Ratio praxis patet ex ipso modo operandi; quem tu ipse observato.

## PROPOSITIO XXVI.

*Ut quis cogatur se subducere, è convivio.*

**J**ocum narrabo, aut si mavis, Joco-Serium, quod à Viro fide dignissimo didici, qui novit & eum qui jocum fecit, & eum cui fecit. Erat Principi cuidam Medicus ferè decrepitus, qui tamen gladius semper incedebat, nisi cùm prandendum ad mensam Principis inter alios Aulicos; tunc gladium è latere solum reclinabat ad parietem triclinij, non procul à mensa, & prandio finito resumebat.

*Veneris cre-  
scit exco-  
sare.*

Erat inter Aulicos juvenis Nobilis & facetus; qui jocum ut faceret Medico, clàm extracto gladio vaginam implevit urinâ, & reconditum loco eodem reposuit, unde acceperat. Post dies paucos, quando rubigine obductum judicavit, adventante de more Medico, obviam ivit cum Aulicorum ejusdem generij, quibus rem detexerat, manu, graviterque nescio qua de conficta injuria cum eo exposulavit, additis probis & contumelijs. Hic Medicus irâ exardescens, & torpidos spiritus recolligens, manum capulo gladij admovet; sed quantovis conatu adniteretur, stringere nequit. Hinc risus & cachinnatio Aulicorum, ut fieri in similibus occasionibus assolet, & boni senis confusio. Suspiciatus ergo quod erat, à provocatore nobili jocum sibi factum, omni asseveratione promittit, joco se jocum repositurum, cùm minùs cogitaret, nec evasurum quantum sibi cunque caveret. Elapsis diebus aliquot, cùm utrumque & Medicum, & Nobilem, mensæ Principis inter numerosam Aulicorum coronam assidere oporteret, antequam discumberet, vini vasculum leporino stercore pulverizato mistum sa-

mulo inter ephebos & alios mensæ ministros adstanti tradit, jubetque ex illo, cum peteret, sibi infundi. Inter prandendum, collocutus humaniter cum Nobili, & joci sibi facti memorem adhuc se esse cum risu asserens, propinat eidem more Germanorum, scyphum vitreum evacuatum tradit famulo, vino antea medicato plenum recipit, Nobili porrigit. Hic nil mali aut fraudis suspicatus, alteri propinat, & ebibit. Vix biberat, cum inflatur venter, murmurant intestina, erumpunt crepitus adeo violenter, ut ingenti cum rubore abscedere è loco cogeretur.

## ANNOTATIO.

**A** Lin adeundem effectum præscribunt alij. Johannes Jacobus Weckerus lib. 17. Secretor. ex Alberto docet, Si accipiantur pistisini, qui sunt juxta priapum ejus, & dentur alicui in potu tritis: cum incipere statim pedere. Similiter si ova formicarum conterantur, & prouocantur in aquam, aut vinum, atque in potum alicui dentur: cum statim pedere, & agere cessare. Idem ex Cardano refert, ova formicarum, & castaneorum flores, movere crepitus ventris.

Albertus, vel potius Pseudo Albertus Magnus in Libello de Mirabilibus Mundi, docet modum concinnandi Lampadem, quam si quis manu teneat, non cesset pedere donec eam dimittat. Accipe, inquit, sanguinem testudinis, exsicca ipsum in panno lichinij, & fac ex ipso lichinium, & illumina ipsum in lampade, da ipsum cui vis, & dic: Illumina: nam ipse non cessabit pedere donec dimiserit illud: & est mirabile. utique si verum est. Lampadem credo crepitare, non eum qui lampadem manu tenet.

## PROPOSITIO XXVII.

*Annulos plures sibi mutuò innexos, nec tamen se tangentes, efficere.*

*Annuli sibi  
innexi, nec  
se tangen-  
tes,*

**V**ldi sæpius annulos tres ex ære ductuli fabricatos, & ita mutuò implexos, ut nullus alterum attingeret, Cardanus vocat annu-

annulos præstigiosos, alij annulos Sanctissimæ Trinitatis. Modum conficiendi meminisse aliquando legisse, sed modò non occurrit Author. Itaque

Fiat annulus ligneus, & circa ipsum inflectatur filum ferreum triplici continuato & non interrupto ordine: quorum vestigia in ipso ligneo annulo priùs exprimantur hac ratione. Primus ordo designetur atramento, aliòvè colore; secundus excavetur nonnihil; tertius magis excavetur quàm secundus. Deinde filum ferreum, aut æneum, circumponatur primò ordini illi quem color exprimit, secundò illi qui aliquantulum excavatur, tertio illi qui plùs excavatus est, & fili finis cum ejus initio conjungatur. Demum projiciatur annulus in ignem, & comburetur lignum, annuli verò tres è ferreo filo ita erunt inter se innexi, ut nullus alterum tangat.

## ANNOTATIO.

**M**eminisse hujus annuli *Cardanus* lib. 13. de Variet. cap. 63. ac non præscribit modum conficiendi, sed solum depingendi, his verbis: *Annulus præstigijs sic fit. Elaborantur tres annuli, aut si lubet, plures, ita contexti, una tamen solâ ductili lineâ, ut nulla ex parte alter alterum tangat. Sic fit ut duo penduli in aëre stare videantur, miro artificio, vasroque invento. At efficere faciliùs longè est, quàm effingere: quanquam ut posuimus, eum depinximus. Ratio autem talis est. Si annulum triplicatum facere volumus, describemus circulos duos; deinde accipiemus numerum quem volumus, qui divisus per tria, numerum circularum annulû, super relinquat unitatem, utpote sedecim. nam divisus hic numerus per tria, relinquit unum, & exeunt quinque. Divide igitur circulum exteriorum in partes sedecim æquales, describendo totidem puncta: totidem quoque divisiones in minore circulo efficiemus, ita tamen ut puncta inferiora intercipient in medio superiora. Deinde ductis portionibus circularum a puncto inferiore ad superius, ab eo autem ad inferius, duobus semper intermissis, ac iterum ad superius duobus intermissis, tandem rediit post exactos tres circulos ad idem punctum, itaque unus circulus tres efficitur. Circulos autem hos*  
extre-



*extremos, seu qui prius describuntur, dimissi, seu reliqui indeletos, ut melius descriptionis ratio intelligatur. Caterum iuvat eos delere, ut absolutius & nitidius opus videatur. Oportet autem in sectionibus quæ in solido sunt, non se tangere annulos corporeos; sic enim penduli videbuntur ac per se, cum non sint. Hæc Cardanus, quia sciverit modum conficiendi, dubito; alioquin enim non reticisset.*

## PROPOSITIO XXVIII.

*Ut tres schedula non tacta situm permulent.*

*Schedula  
tres sibi  
mutuo su-  
perposita  
ut situm  
mutuo non  
tacta.*

**L**udicrum hoc quidem est, sed adeo subtile, ut *Iohannes Baptista Porta* existimet, fieri non posse quin mirabile videatur rationem ignorantem. Unde & aliqui ad sortilegia illo utebantur. *Praxin* describit valde obscurè dictus Auctor, & ex ipso *W. Weckerus* lib. 17. Secretorum; clariùs autem *Schwenkerus* in *Delicijs* par. 10. quæst. 35. Portæ descriptionem primò afferam, deinde *Schwenkeri* & meam subjungam. Igitur

*Porta* lib. 20. *Magiæ Natural.* cap. 2. rem ita describit. *Altera* remanet ludicra subtilitas, ut tres schedula non tacta situm permulent. Quod illud penitus ignorantem fieri non potest, quin mirabile videatur. Tres sicut schedula longiuscula è papyro, vel linteis, sequè mutuò aequali superent magnitudine. Nam capite imò aquata omnes, & aequè revoluta, devolvuntur, diversique situs reperiuntur. Si longior in medio, vel primo loco ponatur, permulens locum: si longior eadem in postremo fuerit loco, immobiles remanent. Quod non erit qui non putes à demone factum. Sed aliunde non evenit, nisi quia in revolutionis fine remanet procerior; & extrema, à qua exoritur, in revolvendo remanet. Hæc & alia dictus Auctor, quæ etiam describit *Weckerus* lib. ult. Secretor. Æstimo tamen neminem ea intellecturum, nisi sequentia legat.

*Vide  
Iconis II.  
Fig. VI.*

Meliùs igitur cum *Schwentero* rem eandem sic propono. I. Exscinde tres schedulas oblongas A, B, C, inæqualis longitudinis, latitudinis verò sive æqualis, sive inæqualis. II. Schedulam B colloca super A, & C supra B, ita ut superiùs sibi mutuò coæquantur, inferiùs verò se mutuò excedant. III. Convolva omnes tres simul in formam cylindruli seu columnulæ, incipi-

incipiendo à capitibus A, B, C, simul conjunctis, ita ut A sit extrema, C intima, B media. IV. Evolve iterum cylindrum hoc ordine. Primò evolve schedulam extremam A, incipiendo à calce d, donec pervenias ad g, & discooperias finem e schedulæ B. Deinde relinque schedulam B, & perge evolvere solam schedulam A, donec pervenias iterum ad finem e schedulæ B. Demum evolve simul & schedulæ A residuum, & schedulam B. Finità totâ evolutione, invenies schedulam C inter A & B, ita ut A sit prima, C secunda, B tertia.

Quòd si statim primâ vice, quando in evolvendo schedulam A pervenisti ad schedulam B, eam simul cum A evolvas; & dum venisti cum utraque usque ad finem schedulæ C, eam non simul evolvas, sed pergas cum solis A & B, donec pervenias iterum ad f; tunc finitâ evolutione, A erit inter B & C, ita ut B sit prima, A secunda, C tertia.

## PROPOSITIO XXIX.

*Cultrum involvere strophiole ita, ut dum evolvitur, culter extra strophium sit.*

EX præcedenti præxi originem trahit hæc, quam docet *Culter strophiole involvitur ut extra reponatur.* Schwenkerus loc. cit. Quæst 36, in hunc sensum. I. Plica strophium per medium, ut duæ extremitates sibi congruant; & in medio, ubi plica est, colloca cultrum, clavem, aut aliam quamvis rem. II. Convolva strophium cum cultro, incipiendo à plica, & ab ipso cultro involuto, ita ut finitâ convolutione extremitates ambæ strophiole sint extrâ. III. Evolve strophium iterum hac ratione. Arripe unam solam extremitatem strophiole, & quidem extremam, eamque evolve donec pervenias iterum ad alteram ac intimam extremitatem; & tunc accipe ambas simul; eritque finitâ totâ evolutione culter extra strophium.

## ANNOTATIO.

**Q**uòd si utramque simul extremitatem stropholi statim ab initio sumas, & evolvas, aut si alterutram solam seu extimam, seu intimam, arripias, & evolvendo pergas usque ad finem evolutionis; manebit culter intra stropholum ut antea erat.

## PROPOSITIO XXX.

*Pulli caput perforare, ut vivus maneat.*

*Pulli caput  
perforare,  
ut vivum  
maneat.*

**A** Gyrtæ nonnulli pullorum gallinaceorum capita stylo, aut cultello scriptorio perforant, à summo vertice deorsum, ita ut stylus, aut culter subjectæ mensæ infigatur, & pullus immotus ac silens jaceat: extracto verò iterum stylo, aufugiat, læsione nullâ acceptâ, nec ullâ sanguinis guttâ effusâ. Hoc antiquàm faciant, characteres quosdam confictos sub alis pulli alligant, queis virtutem illam, ut pullus non lædatur, attribuunt: eodemque remedio adhibito promittunt hominem invulnerabilem fieri posse. Hoc cum sæpius vidisset Joannes Baptista Porta, ut ipse testatur lib. 10. Magiæ Natural. cap. 8. caput pulli aperuit, reperitque bifidum esse, & stylum seu cultrum per mediam inter utramque partem rimam pertransire, cerebrumque minimè lædere. Rem itaque tentavit sæpissimè, & semper felicissimè successit. Itaque

Pulli seu gallinæ caput pone supra mensam, ut mentum seu pars inferior innitatur mensæ, vertexque sit erectus. Explora deinde digito, aut ipso stylo seu cultro, rimam in capite à vertice deorsum fissam, & per eam transadige cultrum, seu stylum, ut mensæ infigatur. Post moram aliquam extrahere iterum cultrum, & pullus sine læsione aufugiet.

## ANNOTATIO.

**S**i prius varias cruces efformes, & peregrina aut conficta vocabula enunties, aliaque superstitionis signa adhibeas, persuasum debet

debis spectatoribus, & secretum ignorantibus, superstitione rem peragi.

Eandem experientiam cum successu felici fecit Daniel Schwen-terus, ut ipsemet testatur in *Delitijs Physico-Mathemat. par. 16. quest. 15.* Iubet tamen cultrum statim refigere è mensa, & gallina aperso per vim ori ingerere buccellam panis.

## PROPOSITIO XXXI.

*Ut gallina soluta non aufugiat.*

GALLINÆ ambo crura funiculo constringe, ita tamen, ut facillimè funiculus solvi possit. Ligatam eo modo, projice supra pavementum, & expecta donec post varias huc illucque volutiones defatigata quiescat, capite in pavementum reclinato. Quiescente illā, pingere cretā in pavimento lineam ab oculo gallinæ inchoatam, & solve funiculum. Manebit immota gallina, etiam si manibus ac pedibus trudatur. Causa est, quia quā diu lineam cretā ductam aspicit, imaginatur eam esse funem, seque adhuc fune illo constrictam.

*Gallina soluta usque aufugiat.*

## ANNOTATIO.

ITA proponit rem hanc P. Athanasius Kircherus in *Arte Magna lucis & umbræ*. Aliter eandem proponit Schwen-terus loco paulo antè citato *quest. 13.* jubet enim gallinam collocari supra mensam, rostrum apprimi mensæ, cretā duci luculentam lineam à rostro inchoatam, & liberam dimitti gallinam; quam ait attonita similem mansuram sine motu in mensa, & oculis irretortu aspecturam lineam cretaceam, quā diu adstantes quiesci fuerint.

## PROPOSITIO XXXII.

*Felem cultro transfigere ( ut apparet, ) sine  
læsione.*

*Felem cul-  
tro transfi-  
gere sine læ-  
sione.*

Pillos ac pellem in dorso felis apprehende manu, ac nonnihil eleva, & cultro dexterè ac strictè pellem circumvolve. Cultrum deinde parieti infige. Hærebit felis lacrymabili spectaculo, apparebitque cultro transfixa.

## PROPOSITIO XXXIII.

*Pharmaco purgativo per apertam venam infuso  
purgare corpus.*

*Purgati-  
vum phar-  
macum per  
apertam  
venam su-  
scipere.*

Non ita pridem à magno Principe intellexi, experientiâ deprehensum in Anglia, hominum aliorumque animalium corpora purgari posse pharmaco purgativo per apertam phlebotomicâ lanceolâ venam infuso, in hunc modum.

Vesicam vel utrem implent purgativo liquore; collo ejus fistulam subtilem ita accommodant, ut per eam expressus è vesica liquor transeat; venam in brachio, aut crure, aut quovis alio membro aperiunt; fistulam in apertam venam intrudunt; vesicam comprimunt, & per fistulam contentum liquorem venæ infundunt; venam tandem diligenter claudunt. Post horas aliquot per secessum emittuntur sordes, non secus ac si per os in stomachum purgatio fuisset suscepta.

Experientiam fieri curavit paucis abhinc septimanis Princeps quem dixi, in cane, certissimo successu. Alteri cani eâdem arte intra venas curavit infundi vinum Hispanicum: quo infuso, canis primùm in saltus & tripudiâ effundebatur, tum ebriorum more titubabat, tandem procumbens in somnum solvebatur, donec crapulam edormisset.

ANNO-

## ANNOTATIO.

**C**onfirmat hac experientia mirificè sanguinis circulatorium motum in corde, & toto corpore animalium, quem paucis ab hinc annis primus deprehendit, & eleganti ac docto Scripto publicè ventilandum proposuit, Doctissimus Harvæus Medicus Anglus, & in Londinensium Medicorum Collegio Anatomices Professor. Excitavit ea doctrina plurimorum ingenia, & studia, ad expendendam ejus veritatem. Nam paucis annis post, in Academia Leydensi eadem questio agitata fuit à Doctissimo Vallæo, Anatomia Professore, qui partes Harvæi defendit, & novis experimentis ac rationibus roboravit. Hos secuti deinde sunt Hermannus Conringius, Medicinæ Professor in Academia Julia: tum Plembius, Professor Lovaniensis; & Georgius Ent, Doctor Medicus Londinensis; Henricus Regius, Cornelius ab Hogelande, Fortunius Licetus, Ioannes Riolanus, Antonius Deusingius, Ioannes Pecquetus, alijque multi: quorum alij quidem eadem cum Harvæo, alij diversâ incedunt viâ.

Sanguinis  
circulatio  
in corpore  
humano.

Harvæus, ejusque sectatores favent opinioni Aristotelis de sanguificatione in corde facta, ajuntque (ut Riolanus explicat) totum sanguinem ab hepate ad cor per arterias quoquo versum distribui, venas esse tantum canales revolvendi sanguinem ad cor ab omnibus partibus ad quas allabitur; ideoque circulationem totius sanguinis fieri per venas & arterias sæpius die quovis statuunt, ut assidue sanguis novus cordi suppeditetur ad ejus recoctionem, & recalcificationem. Addunt, à dextro cordis ventriculo secundum ductum vena arteriose per pulmonum substantiam trahendi, inde per arteriam venosam ad sinistrum cordis ventriculum derivari, ut vitalis fiat; sed contracto corde, per arterias in universum corpus distribui; & ubi pervenit ad extremas partes, in venas remigrare, hasque cum revolvere ad dextrum cordis ventriculum; sicque perpetuò redire sanguinis laborem in orbem.

Riolanus discedit ab Aristotele in negotio sanguificationis, eamque constituit in hepate; quamvis ab eo subministratur sanguis cordi,



& vertatur in arteriosum: qui diffusus per omnes arterias, continuo recurrit in venas majores ad circulationem, sed in progressu suo unumquodque vas sanguinem suum partibus per transennam suppeditat. Demonstrat deinde, non totum sanguinem circulari, sed ferme dimidium duntaxat; alterum dimidium contineri in vena porta, & canalibus minoribus vena cava & aorta, qui nullo modo naturaliter circulantur. Is tantum circulatorius est, qui intra canales majores vena cava & aorta, à jugulo ad extremos artus extensus includitur, in corde per septum medium à dextra cavitate in sinistram illabitur, sine transiitione per pulmones. Idque fit bis servè intra diem naturalem, sanguinem tam venosum, quam arteriosum in suo excursu omnibus partibus largiendo.

Hac est brevìs hypothesi sive informatio doctrina Riolani, quam proposuit primò per modum Thesi Parisijs in Aesculapj fano, & doctissimorum Medicorum examini subjecit; deinde vero fusiùs explicavit in Opusculis Anatomicis.

## PROPOSITIO XXXIV.

*Calvaria ut loqui videatur, efficere.*

*Calvaria  
ut loqui  
videatur.*

PRaxis intelligetur ex sequenti Necromantico joco, quo Andreas Albius, Medicus doctissimus Bononiæ, credulo cuidam amatori metum incussit, ut refert VVeckerus lib. 17. Secretor. his verbis ex Cardano.

Demortui caput mensa apposuit, quod patefacturum esse nobis auditoribus promissis, quisnam ex nobis filiam civis cujuspiam miserè deperiret, quis etiam futurus esset amoris exitus, caput hoc id esse pradietum. Ludicrum id non intelligentibus horrorem induxit, perinde atque si cacodamonis ope vaticinium id processisset. Verùm ijs qui jocum animadverterunt, risum movit. Hac autem arte res hac instituta erat. Mensa quatuor columnis pedum instar suffulciebatur, quarum una excavata erat, mensa perforata subdita. Foramen id, sotaque mensa subtili quodam tapese tegebatur, nè mensa foramen conspiceretur. Eo loco demortui caput positum consistebat. Par men-



sum autem in ea parte perforatum etiam erat, in qua columna excavata mensam sustinebat, ut ex inferiori edificio in superius, & vicissim ex superiori in inferius voces transmitti possent. Quamobrem is qui in inferiori erat, tubo quodam in excavatam mensam columnam immisso, & altera ejusdem tubi parte auri admotâ, facile quid alter in superiori conclavi consistens rogaret, exaudiebat, responsaque dabat quesitû ap-primè convenientia. Successit hoc eò facilius, quòd uterque amatoris eludendi secreta novissent: hi enim fabulam hanc communicatis antè consilij dexterè peregerunt. Ad majorem etiam vaticinij fidem, candelas cereas accensas circa demortui calvariam posuit, verbaque peregrina recitavit.

## ANNOTATIO.

EST hic jocus necromanticus similis fraudi illi idololatrica, quâ nonnulli Sicrificulorum Gentilium olim plebem rudem decipiebant, dum per occultos meatus ac tubos è specu subterraneo ad ora usque statuarum deductos loquebantur, & responsa dabant, uti memini in Magia 1. par. lib. 1. cap. 10. & 2. par. lib. 3. Syntag. 3. initio. Quo etiam toto Syntagmate varias Pragmatias alias attuli, id ipsum naturaliter efficiendi. Fortassis etiam non aliâ quàm hac arte loquebatur olim famosum illud caput, quod Albertus Magnus fabricasse dicitur. Exhibet P. Athanasius Kircherus in celebri suo Museo statuam B. MARIÆ virginis DEIPARÆ, qua locum lustrantibus, & aures ad os statua applicantibus, variare responsa dat, non alio artificio, quàm quòd è spatio satù remoto occultus tubus ad os statua ducitur, cujus initio ipse Auctor, aut alius secreti conficius, os applicans, submissâ voce insusurrat, & quidquid insusurratum est, os statua in audientis aures eructat.

Statua lo-  
quens in  
Museo Kir-  
cheriano.

## PROPOSITIO XXXV.

PRæcedens fraus revocat mihi in mentem fraudem aliam, quam memini me legisse olim juvenem in Auctore Alphabeti Christi & Diaboli, qua pius quidam adolescens contubernalem impium ad frugem revocavit. Erant in eodem contu-  
bernio

Incendere  
alterius le-  
ctum occul-  
to igne.

bernio adolentes duo, quorum junior ad omnem pietatem ac virtutem fictus quasi ac factus, provectior verò virijs deditus omnibus, ac præterea amore impuro implicitus erat. Hunc sæpe monitionibus ac precibus defatigarat junior, optimo animo ac zelo, mores ut mutaret, amasiam dimitteret, iram Numinis timeret: Sed surdo semper cantaverat. Ad technas igitur, cum monitiones sinceræ, ac preces nihil efficissent, confugiendum ratus adolescens optimus, clàm altero, cubiculi pavimentum foramine exiguuo perforat, funiculum sulphuratum lecti cortinæ alligat, ac per foramen ad inferius subiectum conclave funiculum demittit. Noctu deinde, cum sciret impium amoribus suis frui, funiculum inferiùs incendit. Memento ergo ignis serpens per foramen, ad cortinam usque decurrit, eamque incendit, attonitis reis, & tanquam cœlesti ac vindicatrice flammâ peterentur, è lecto exilientibus. Hic In genua provolutus diu antea obstinatus leno, primùm tanquam ingenti perfunctus periculo gratias agit Deo, quòd mortem evasisset præsentaneam; tum veniam petit scelorum, lupam dimittit, vitæ emendationem promittit. Nec legniùs quàm promiserat, est exsecutus: abdicatis enim rebus omnibus, Mundo nuntium remisit, ac vitæ austeritate, virtutumque omnium exercitio, ad cælum sibi viam munivit.

## PROPOSITIO XXXVI.

*Ut ignis per domum & cœmeteria discurrat.*

*Ignis ut discurrat per domum.*

**S**Carabæorum, vel testudinum, aut cancerorum dorsis candelas exiguas, aut ligna putrida alliga, ac per obscurum conclave, vel locum alium sub dio discurrere permittit. Putabunt rei ignari, ignes discurrere.

Si locustarum dorsis alligentur prædicta, ignis saltare videbitur. Si noctu in cœmeterio mortuorum capita disponas, & intus candelas abscondas aut lampades; horridum intuentibus spectaculum præbebis.

ANNO-

## ANNOTATIO.

*Quoniam camisteria viscoso vapore & exhalatione abundant, solent noctu per sepe apparere igniculi quidam, fatuis aut lambentibus ignibus similes, qui ignaris aut formidinem, aut admirationem incutunt non medicam, dum putant animas defunctorum specie dictorum ignium apparere.*

## PROPOSITIO XXXVII.

*Ut annulus in vitro saltet ad sonum tympani, aut Instrumenti musici.*

**H**istrion quidam Venetus, teste Cardano, tale aliquando exhibuit ludicrum spectaculum.

*Annulus  
ut saltet in  
vitro.*

Vitrum exposuit in theatro spectatoriis, in quod annulum immisit, qui suâ sponte, quoties id ex peterent spectatores, aut vellet histrio, saltitabat. Hic autem astus hac ratione peragebatur. Subtilis capillus mulieris, qui à procul stantibus non poterat dignosci, annulo alligatus erat ad unam extremitatem, ad alteram verò extremitatem histrionis digito. Cùm ergo saltandum esset annulo, digitos histrio motitabat: quibus motis simul annulus alligatus movebatur in vitro, procul stantibus capillum non videntibus. Fucum insuper subtili commento tegebat histrio. Hic annulus, aiebat, lascivarum puellarum more non saltat, nisi meis ipse digitis ei tympanum pulsẽm. Quamprimùm igitur, & quàm diu pulsabat, ille saltabat: cessante pulsu, cessabat & saltatio.

*Ad hujus imitationem multa similia ludicra institui ab ingeniosis possunt.*

## PROPOSITIO XXXVIII.

*Ut pisa coquenda ex olla exsiliant.**Pisa co-  
quenda ut  
ex olla exsi-  
liant.*

**A**Ncellis domesticis si jocosum facere vis, quo in admirationem & indignationem simul rapiantur, postquam pisa in olla coquenda igni apposuerunt, argentum vivum clam immitto. Commovebuntur primum pisa, ac sursum deorsumque volventur, tandemque exsiliant, nisi ollaris labri altitudo, aut ignis remissior obstiterit. Expertum tradit *Mixaldus*.

## PROPOSITIO XXXIX.

*Ovum ut in aëre ascendat sponte.**Ovum ut  
sponte a-  
scendas in  
aëre.*

**T**Rita & multis nota est hæc experientia. Ovum evacua, & rore Majali imple, foramenque occlude. Impletum Soli meridiano ac valido expone in loco aprico. Elevabitur paulatim, & in aëre hærebit. Si difficilis videatur ascensus, aut ob ovi gravitatem, aut ob Solis imbecillitatem; dum ascendere incipit, baculum aut tabulam admoveto, ut per eam quasi per scalam in altum serpat. Si tabula fuerit excavata in canaliculum apertum, ovi capacem; meliorem successum res habebit.

## PROPOSITIO XL.

*Ut à carnibus appositis discumbentes abhorreant.**Discum-  
bentes ut  
à carnibus  
abhorre-  
ant.*

**S**I carnem calidam mensæ appositam, seu elixa ea sit, seu assata, comedere solus vis, aut cum socio alio; nauseam alijs sic crea-

creabis. Fides chelyum, aut intestina minuta animalium exiguorum contorta, atque exsiccata, minutim in frustula concide, & vel saccharo, vel sali admisce. Appositæ carni saccharum aut salem cum intermistis frustulis (quæ alij non dignoscunt) carni inspergito, quasi condimenti gratiâ. Quamprimùm ea humorem simul & calorem carniū senserint, evoluta paulatim movebuntur, magisque ac magis dilatabuntur, ut vermes appareant derepentè e carnibus erumpentes. Putrem igitur, vermiculosam, ac insalubrem eam existimabunt assidentes, tu verò, tanquam vermes non abhorreas, solus abliguries. Tradit Mizaldus.

## PROPOSITIO XLI.

*Librum mirabilem concinnare.*

**I**Nter secreta manuscripta, quæ Romæ inter P. Athanasij Kircheri Adversaria reperi, unum est quo liber ita artificiosè concinnetur, ut dum folia evolvuntur, omnis generis figuras ostendant, ita tamen ut in una eademque evolutione non nisi unius generis appareant. Quod secretum (ut meam fatear ingenij imbecillitatem) tamen si iterum iterumque legissem, quòd jucundum admodum, ac homine ingenuo dignum videretur, intelligere tamen nunquam potui, donec id ipsum post annos complures apud *Danilem Schwenkerum* in Delicijs Physico-Mathematic. par. 14. quæst 7. legi, clariùs ac fusiùs explicatum. Dictum modum hac propositione proponam, sequenti verò meliùs cum Schwenkero explicabo.

*Librum  
mirabilem  
concinnare.*

Solet fieri liber (inquiunt Secreta manuscripta citata) qui non leviter in admirationem adducit spectatorem: apparet enim, si folia celeriter revolvantur, modò scriptus, modò vacuus, modò hac, modò illâ figurâ notatus, aut pictus. Ejus autem compositio est ejusmodi.

Clauso libro folia in anteriore parte divide transversè in quatuor æqualia intervalla, ducendo atramento transversas

E 2

lineas.

lineas. Aperto deinde libro, primum folium pro tegmine intactum relinque. Deinde in secundo folio in parte superiore scribe litteram A, in sequenti litteram B, deinde C, deinde D: hisque quatuor characteribus pingere totum librum incipiendo rursus ab A, &c. Et primo folio (ut diximus) relicto, duo sequentia folia in primo intervallo in arcus figuram scindenda, & alia duo sequentia folia relinquenda sunt intacta. Deinde duo sequentia folia item scindenda, & alia duo intacta relinquenda; & sic deinceps usque ad finem, binis folijs scissis, & binis intactis. Quo fiet, ut pollice super illud intervallum posito, omnia folia quæ evolvuntur, sint ejusdem characteris.

Rursum ad libri principium redeundum est, & relicto illo primo folio albo, & secundo jam scisso, duo sequentia circa secundum intervallum scindenda, & duo intacta relinquenda, & sic deinceps usque ad finem.

Tertiò ad principium libri redeundo, relicto tegmine cum duobus folijs sequentibus quæ jam sunt scissa, scindenda sunt duo folia sequentia circa tertium intervallum, & duo intacta relinquenda, ut in superioribus diximus.

Quartò denique relicto tegmine cum tribus sequentibus folijs jam scissurâ signatis, duo sequentia sunt scindenda, & alia duo relinquenda, & sic deinceps usque ad finem, quemadmodum in superioribus.

In singulis item characteribus, sive intervallis foliorum potest figura quæ magis arridet, depingi: dummodò in principio illius characteris sive intervalli ad finem usque figurarum aut picturarum similis modus servetur.

## ANNOTATIO.

**H**æc habent manuscripta illa citata. Obscurius dicta intelligentur ex modo sequenti. Folia libri in anteriore parte non debent dividi ita ut scindantur, sed solum dicta anterior pars (den Echmitt vocant Bibliopegi Germani) debes lineis transversis, atramento aut rubricâ ductis, in quatuor aequales partes distingui. Ut autem pars ista exterior divisa est in quatuor partes seu intervalla, ita singula folia  
intus







*intus secundum latitudinem divisa debent intelligi in quatuor intervalla. In his scribendi sunt quatuor characteres A, B, C, D; aut pingenda quatuor diversa figura. Reliqua ex sequenti Propositione intelligentur.*

## PROPOSITIO XLII.

*Eundem librum mirabilem concinnare.*

**P**rimò, Determinandum est, quot figurarum genera liber continere debeat, quas inter evolendum ostendere velimus. Lubeat gratiâ exempli exhibere quinque genera, & sextâ vice monstrare omnia folia vacua; Ita ut in primâ evolutione appareant omnis generis uvæ, in secunda omnis generis pocula, in tertia margaritæ, in quarta fructus varij exceptis uvis, in quinta variæ scripturæ, in sexta denique nihil appareat, sed omnia folia sint vacua, ut diximus.

*Secundò,* Fiat liber chartaceus mediocris spissitudinis, cujus tegmen sit charta pergamena mollis, ut faciliè in omnem partem liber curvari queat. Quod quidem tegmen ipsum chartaceum librum neutiquam excedat, sed perfectè circumquaque adæquet, ut apparet in *abcd*, appositæ figuræ. Præterealiber unâ cum suo tegmine ita scindatur in parte anteriore (am vorſ derem Schnitt) *eagd*, ut pars illa neque excavata sit, neque protuberet, sed perfectè plana, ut in parte superiore *abef*, & in inferiore huic opposita.

*Vide  
Iconi-  
um III.*

*Tertiò,* Dicta pars anterior libri, nempe *eagd*, dividatur atramento aut rubricâ in sex æquales partes, reliquâ tamen superius atque inferius particulâ quapiam. In appositâ figurâ particula superior est *ea*, inferior *gd*: partes sex sunt notatæ numeris 1. 2. 3. 4. 5. 6.

*Quartò,* Sex prædictæ partes scalpro, aliove instrumento scindantur ita, ut in partem anteriorem protuberent, uti ex Figura apparet.

*Quintò,* Inchoetur à protuberante parte 1. & vertatur primum folium libri, tuberque relinquatur, in quinque verò proximè sequentibus folijs tuber abscindatur: in sexto folio iterum reli-

reliquatur, & in quinque proximè sequentibus abscindatur. Hoc modo procedatur usque ad finem libri. His peractis reditur ad initium libri, & ad secundum tuber: quod quidem in primo folio abscinditur, in secundo relinquitur, in quinque proximè sequentibus iterum abscinditur, in sexto post hæc relinquitur, iterumque in quinque sequentibus abscinditur, sicque ad finem libri usque proceditur. His etiam peractis reditur ad tuber 3. & in primo ac secundo folio abscinditur, in tertio relinquitur, in quinque proximè sequentibus abscinditur, in sexto hæc sequente relinquitur, in quinque sequentibus iterum abscinditur, & sic ad finem usque libri pergitur. Simili modo proceditur cum reliquis tuberibus, dummodò benè inchoetur. Itaque ad numerum 4. abscinditur tuber in folio primo, secundo, & tertio, & in quarto relinquitur. Ad numerum 5. abscinditur primum, secundum, tertium, & quartum, quintum verò relinquitur, &c. Ad numerum 6. abscinduntur prima quinque tubera, & sextum relinquitur, &c.

*Sextò*, Inchoando à principio libri pingi in primo folio uvam, in secundo poculum, in tertio margaritam, in quarto fructum aliquem ab uva distinctum, in quinto scripturas varias, sextum relinque vacuum. Iterum in septimo pingi uvam, in octavo poculum, in nono margaritam, in decimo fructum aliquem, in undecimo scripturas, duodecimum relinque vacuum. Hoc modo & ordine progredere usque ad finem libri: eritque liber præparatus.

*Septimò*, Usus ejus hic est. Librum impone manui sinistrae, ut dorsum contingat volam manus, tubera versus te respiciant. Deinde pollicem dexteræ manus colloca supra primum tuber, & evolve librum, sinendo nimirum ut folia celeriter infra pollicem elabantur, ac vertantur, apparebuntque meræ uvæ in toto libro. Colloca deinde pollicem supra secundum tuber, & evolve ut antea; apparebuntque mera pocula. Deinde apparebunt margaritæ ad tertium tuber, fructus ad quartum, scripturæ ad quintum, nihil nisi chartæ vacuæ ad sextum. *Schvvennerus habuit similem librum, in quo scriptæ erant sex diversa idiomata.*



Fig. I.





FIG. II.



FIG. III.



## PROPOSITIO XLIII.

*Tres baculos, cultros, &c. ita sibi mutuò implicare,  
ut erecti non cadant, nec pondere superposito  
deprimantur.*

**T**Res baculi, cultri, tabes, aliavè similia corpora sint AB, CD, EF. Inclina AB sup<sup>er</sup> planum, ut A innotatur plano, B sit erectum. Huic superpone CD, ut D tangat planum, C sit erectum. His duobus imp<sup>one</sup> EF, ut sit infra AB, & supra CD, efficiatque cum ipsis triangulum. Debet autem EF tam diu prædicto modo infra & supra prædictos duos intrudi, donec omnes tres stent erecti, ac se mutuò sustentent. His semel constitutis, nec cadere possunt, nec pondere superposito deprimi, nisi frangantur. Nam AB sustinetur ab EF, & EF à CD, & CD ab AB. *Cardanus lib. 17. Subtilis, & alij ex ipso.*

*Vide  
Iconis IV,  
Fig. I.*

*Baculos  
tres impli-  
care, ut ere-  
cti stent.*

## PROPOSITIO XLIV.

*Bursam parare, qua sine sera clauditur, &  
ab ignaro artificij aperiri  
nequit.*

**A**rtificium describit P. Ioannes Leurechon Gallico idiomate, in Recreationibus Mathematicis Proposit. 60. & ex ipso Daniel Schu<sup>wen</sup>terus in Delicijs Physico-Mathem. par. 15. quæst. 18. Germanicè, & Gaspar Ens in Thaumaturgo Mathemat. Problem. 63. Latinè. Sed omnes tres ita rem obscurè proponunt, ut vix, aut nè vix quidem intelligi queat. Ego simplicissimè, & cum effectum felicissimo, rem ita propono.

*Bursam  
difficiliter  
aperibilem  
parare.*

I. Fiat

Vide  
Iconis IV.  
Fig. II.

I. Fiat bursa è corio qualem equitantes ephippijs appendere solent, aut qualem appositum schema refert. II. In utroque latere adfluantur corrigiæ A B, C D, habentes in extremitatibus B & D annulos ferreos, aut æreos. Et corrigia quidem C D antequam affluatur lateri C, transeat per anulum B. III. Partem superiorem bursæ, seu ejus orificium operiar segmentum oblongum corij E G F H, affutum uni laborum dicti orificij bursæ; alteri verò labro affuti sint plures annuli, per segmen- tum illud factis foraminibus transeuntes. IV. Per hos annulos transeat corrigia A I, bursæ in A affuta, habens fissuram in I, per quam etiam transeat corrigia C D, antequam in C affluatur.



Atque hæc est structura bursæ, ita clausæ, ut aperiri non possit, nisi corrigia C D extrahatur è fissura I; dicta autem corrigia C D extrahi è dicta fissura non potest, quia transit per an- nulum B, per quem annulus D transire nequit. Quid ergo agendum?

*Primò*, Annulus B defluat usque ad fissuram I, corrigiæ A I. *Secundò*, Per anulum B transeat extremitas I cum tota fissura I. *Tertiò*, Per fissuram I transeat corrigia C D, cum annulo D. *Quartò*, Extremitas I, cum fissura sua extrahatur ex annulo B, & annulus B promoveatur versus annulum D. *Quintò*, Corrigia A extrahatur ex annulis versus A; eritque bursa aperta.

Ut iterum claudas bursam, *Primò*, Transeat corrigiâ A I per annulos versus I. *Secundò*, Fluat annulus B usque I fissuram, & per B transeat fissura I. *Tertiò*, Per fissuram I transeat annu- lus D cum sua corrigia C D. *Quartò*, extremitas I extrahatur ex annulo B, & B promoveatur versus D; eritque iterum clausa bursa ut antea.

## PROPOSITIO XLV.

*Bursam aliam artificiosè preparare.*

Bursa alia  
artificiosa.  
Vide  
Iconis IV.  
Fig. III.

A Liam bursam nuper vidi, simplicissimo quidem artificio confectam, adeo tamen occulto, ut vel oculatissimos falle-  
ret.



ret. Bursa erat ex corio molli & candido, formâ bursæ ordinariæ ABC, & plicata. Orificium erat tectum segmento corij FG, antè & retrò nonnihil pendentis; cuius pars posterior assuta erat parti posteriori bursæ, pars verò anterior FG anteriori non erat assuta, futuram tamen similem habebat posterioris futuræ. Anteriori bursæ parti ABC, intra dictum tegumentum FG, alligata erant ligacula ED, quæ per foramina in tegumento facta egrediebantur, & in D colligabantur. Hoc totum erat artificium. Qui aperire volebat, artificij ignarus; in omnem partem versabat bursam, ligacula trahebat, aliaque tentabat, sed frustra. Qui verò artificium callebat, partem posteriorem manu sinistrâ apprehendebat, & anteriorem partem ABC dexterâ manu trahebat deorsum, & sequentibus ligaculis patebat hiatus inter labrum AC bursæ, & tegmen FG.

## PROPOSITIO XLVI.

*Ut candela intra aquam perpendiculariter erecta ardeat.*

Fundo candleæ infige filum ferreum, vel aciculam, cum pondere alligato, quod ad libitum augere vel minuere queas, & fundum immerge aquæ. Mergetur ea plus aut minus, prout majus vel minus fuerit pondus alligatum; & perseverabit perpendiculariter erecta.

*Candela  
intra aquam  
erecta.*

## PROPOSITIO XLVII.

*Unicâ circini aperturâ describere plures circulos inæquales.*

Problema hoc proponit ac demonstrat P. Joannes Leurechon in Recreationibus Mathem. Prop. 34. Quod quoniam facile

*Circulos  
plures uni-  
câ circini  
aperturâ  
describere.*

cile est, & tamen mirabile videtur, huc transferre placuit. Fit autem hac ratione.

Vide  
Iconis V.  
Fig. I.

In plano aliquo, aperto circino describe ex A centro circum A B C, cujus diameter sit B C, ut apparet in Fig. I. Deinde retentâ eâdem circini aperturâ. in eodem aut alio plano, suppone uni pedi circini corpus aliquod exiguum, ut pes sit paulum elevatus supra planum, ac pede altero describe circum A E D, ut apparet in secunda Figura. Erit hic circulus minor priore, & tantò quidem minor, quantò magis fuerit pes alter elevatus.

Vide  
Iconis V.  
Fig. II.

Idem continget, si eâdem aperturâ retentâ, ponas unum pedem in vertice A conî, aut in puncto A globi, cujus diameter sit vel æqualis, vel major, vel minor diametro circuli A B C, altero verò pede describas circum A D E circa conum, aut globum, ut apparet in Figura III. & IV.

Vide  
Iconis V.  
Fig. III.  
& IV.

RATIO hujus rei est, quia in circulis A D E Figuræ II. III. & IV. diameter D E minor est, quàm duo latera A D, A E simul sumpta, per *Proposit. 21. libri 1. Element. Euclidis*: est autem diameter A C Figuræ I. æqualis dictis duobus lateribus A D, A E, propter eandem aperturam circini; ergo eadem diameter D E minor est, quàm diameter B C; ergo circuli circa diametrum D E descripti, minores sunt circulo circa diametrum B C descripto.

## ANNOTATIO.

**E**x his patet, posse eâdem circini aperturâ describi plures ac plures circulos, semper minores ac minores, quantò nimirum gracilior sit conus, aut quantò magis in plano elevatur unus pes circini.





Fig. I.



Fig. II.



Fig. III.




Fig. IV.



Fig. V.



Fig. VI.

## PROPOSITIO XLVIII.

*Ut picta icuncula, aliavè res, sponte moveatur  
in gyrum.*

**A** Venæ silvestris capreoli, sive stipulæ illæ quæ avenam maturam circumstant, ita sunt ex propria naturæ suæ constitutione spiraliter contortæ, ut madefactæ spiras illas suas dilatent, rursusque exsiccata constringant. Quo fit, ut pro perpetua ferè tempestatis mutatione ex humida in siccam, & sicca in humidam, in perpetuo quasi gyrationis sint motu: dum enim humore dilatantur, gyros à dextera in sinistram legunt; dum calore & siccitate constringuntur, eosdem à sinistra ad dexteram relegunt. Eandem constitutionem habent omnia convolvulorum genera, cujusmodi sunt culcuta, bryonia, lupulus, aliaq; similia, quæ incremento suo naturaliter in spiras sese contorquent.

*Iconcula  
ut sponte  
moveatur  
in gyrum.*

Hiscæ avenaceis capreolis, alijsque similibus convolvulis, varia ludentis Naturæ spectacula exhiberi possunt. Si enim unum illorum perpendiculariter in stylulo aliquo erigas, ac supremo apici chartaceam sagittulam velut indicem transversim imponas, aut ex eodem apice levem ex charta icunculam depictam (ut Æoli, Angeli, aliuvè rei) perpendiculariter erigas, ut in appositis Figuris apparet: videbis, quoties aura mutatur de sicca in humidam, aut de humida in siccam, sagittulas & icunculas sponte in gyrum nunc huc nunc illuc moveri. Si verò stylulum erigas intra capsellum aliquam; quotiescunque humorem affundes, & quoties ad ignis aut solis calorem exsicabis, similes gyros repræsentabis. Hinc si loco icuncularum capreolo impones & adglutinabis levem aliquem nummum, is sponte in gyrum movebitur, quoties lubitum fuerit,

*Vide  
Iconis V.  
Fig. V. &  
VI.*

## ANNO TATIO.

**A**lia spectacula quæ ope convolvulorum prædictorum exhiberi possunt, vide apud P. Achanasium Kircherum in *Arte Magnetica* lib. 3. par. 2. cap. 3. ubi fusè de ea retractat. Hujus experimenti mentionem facit alibi Porta in sua *Magia Naturali*, ut olim me legisse memini, at locum nunc non occurrit.

## PROPOSITIO XLIX.

*Putei profunditatem rusticorum quorundam  
more metiri.*

*Geometra  
rustici pu-  
tei profun-  
ditatem  
metiuntur.  
Vide  
Iconifi-  
candum VI.*

**E**St in vicinia nostra pagus non ignobilis, puteum habens profundum, toti pago aquam subministrantem. Hunc, cum temporis successu limo oppletus, & sordibus fuisset sædatus, expurgare cupiebat loci prætor & incolæ. Siculam ergo prægrandem conficiunt, & funem ductarium haud mediocriter crassum coëmere constituunt, quo situla appensa communi labore & operâ in puteum demitteretur. Nè tamen longiorem aut breviorẽ quàm par erat, funem coëmerent, superfluis aut inutilibus sumptibus; putei profunditatem à trochlea, cui funis circumducendus, ad fundum usque explorare priùs statuunt. Cum modus nullus occurreret, consilium ineunt, & quid factò opus sit, sedulò inquirent. Post diuturnam consultationem, prætor, utpote cæteris sapientior, hanc proponit pragmatiam, è Mathesi rustica depromptam. Scimus, inquit, staturas nostras omnium. Unus ergo quispiam è trochlea se suspendat, alter ex hujus pedibus, tùm tertius è pedibus secundi, & sic deinceps, donec ultimi pedes fundum contingant. Tum in unam summam conijctamus omnium sic concatenatorum staturas palmis exploratas, & sciemus quot palmarum funem comparare oporteat: nec enim hic longior esse debet, aut brevior, quàm suspen-

Iconismus VI.  
pondatur e regione pag.







suspenforum catena. Placet consilium; & collaudatâ Prætoris prudentiâ, operi admoventur manus. Jam longa, catena suspenforum dependebat, nec procul à fundo aberat infimus; cum supremus, qui trochleam apprehenderat, manus sentit calore & attritione adeo lubricas, ut nisi humidis sustinere suspenforum onus non posset. Socios ergo monet, fortiter ut sibi mutuo cohæreant, donec spuito manuum volas madefaceret: & cum dicto manus à trochlea dimoveret, ac omnes in puteum præcipitat.

## PROPOSITIO L.

*Arborum altitudinem Westphali idiota prægmata metiri.*

FELICIUS, & omnino ex Practicæ Geometriæ legibus, quamvis ageometra, & literarum omnium ignarus, processit idiota ille Westphalus, quem novit Vir doctus, & fide dignissimus qui narravit.

*Geometra  
Westphali  
arborum  
altitudinem  
metitur.*

Est in Westphalia oppidum, silvam habens procerarum admodum arborum vicinam. Solebant cives, quando arborem quampiam in canalem aut trabem aliquam, aliumvè usum elaborare volebant, à Magistratu loci petere, ut unamquam alluberet, excindere gratis liceret. Obtentâ facultate, & excisâ arbore, non raro contingebat ut quam elegerant, brevior esset quam ulus requirebat. Aliam ergo, ac subinde allam, non gratis ut antea, sed solutâ priùs pecuniâ, excindere cogebantur. Erat inter cives vir industrius, at omnino idiota, & cui nec nomine tenus dimetiendi ars nota erat. Hic miseratus concivium sortem, ut certò ac infallibiliter petite altitudinis arborem vel primâ vice eligerent, atque deijcerent; hanc excogitavit praxim, jam diu antea à *Joanne Taisnero*, alijsque Geometris Practicis usitatam.

A radice A arboris AB, retrocedendo versus C, numerabat tot palmos aut pedes, quot palmorum aut pedum altam

F 3

*Vide  
Iconis VII.  
Fig. I. II.  
& III.*

desiderabant cives arborem. Deinde jacens supinus in terra, ut caput & oculi responderent puncto C, erigebat perpendiculariter inter compressos pedes baculum DE, æqualem suæ staturæ; & per erecti baculi summitatem E, respiciebat versus cacumen B arboris. Et si quidem visus, seu radius visualis terminabatur præcisè ad cacumen B arboris, ut in Figura I; pronuntiabat, & rectè, arborem AB esse æqualem spatio AC. Si autem terminabatur infra cacumen B, ut in Figura II. dicebat arborem esse majorem spatio AC. Si denique visus terminabatur supra cacumen B, ut in Figura III; asserebat arborem AB esse breviorē spatio AC.

## ANNOTATIO I.

**R**atio operationis, quam Geometra VVestphalus ignorabat, desumitur ex Proposit. 4. libri 6. Element. Euclidis, quia duo triangula qua in hujusmodi operationibus fiunt, nimirum triangulum CDE minus, & CAB majus, sunt æquiangula, cum anguli ad D & A sint recti ex suppositione, & anguli ad B & E æquales, per 28. proposit. lib. I. Element. Euclid. reliquisque ad C sit communis utrique triangulo; ideoque sicut in Figura I. baculus ED est æqualis statura DC, ita arbor BA est æqualis spatio AC. Et sicut in Figura II. idem baculus ED est æqualis statura DC, ita altitudo FA est æqualis spatio AC, ac proinde altitudo BA est major quàm idem spatium AC. Et sicut denique in Figura III. baculus ED est æqualis statura DC, ita altitudo FA est æqualis spatio AC, ac proinde altitudo BA est minor quàm idem spatium AC.

## ANNOTATIO II.

**S**i in casu Figura II. Geometra accedat rependo, in casu verò Figura III. recedat, donec radius visualis per summitatem E transiens, terminetur præcisè in cacumen B arboris, ac deinde mensuret spatium inter

Fig. I.



Fig. II.



Fig. III.





*inter radicem A arboris, & punctum C loci in quo caput jacet, & cui oculi respondent, interjectum; sciet præcisè etiam altitudinem arboris: hac enim semper erit æqualis spatio inter A & C interjecto.*

## PROPOSITIO LI.

*Alchimistarum quorundam vafrities.*

**A**lchimistarum quorundam vafrities, si hoc loco detegere vellem, nimis longus texendus foret sermo. Faciam id commodius in Technica Curiosa. Nunc sufficiat, joci gratiâ, *Alchimi-  
starum va-  
frities.* unam proposuisse.

Accedunt ij ad capitis vacui juvenem, aut delirum atque avarum senem, promittuntque montes aureos, & Cræsi thesauros, cum ipsi sint lro pauperiores; & tamen me vides (ajunt) pannis obsecum, possum tamen mihi divitias ingentes comparare, & cum opus est, paro; sed ut securius id agam, ac hic degam, his vestibis uti malo, quam pretiosissimis quas habeo. Dignus tu mihi visus, cui secretum ingentis utilitatis pandam, modò laboris mei fructum aliquem ex te feram. Nihil dicam quod experimento priùs adhibito non comprobem; aut tu ipse, si velis, non experiaris. Inspice igitur ducatum hunc aureum. In fornacem accensam conijciam, ubi aurum alioquin minuitur, non augetur. Quòd si tute tuâ propriâ manu effeceris, ut aurum hoc augeatur; nonnè artem laudabis? Expectat avarus, prætolans finem tanti momenti. Præparatis igitur priùs vilissimis quibusdam auripigmento, nitro, camphora, alijsque minutis, quas Alchimista delusor pro ingenio comminiscitur; ad-eunt fornacem: Avarus manu propriâ in ignem projicit ducatum fucatum, & cætera singulatim pertractat, ipse autem impostor folles motat, & carbones suppeditat. In uno carbonum excavato, aut in rimam fillo, aurum abscondit majoris ponderis, quàm fucatus erat ducatus, quod in fornacem congestum,

cum

cum dicto ducato conglobatur. Cùm demum aurum è fornace extrahitur, purius ac majoris ponderis est quàm antea ducatus erat. Quæ fraus cùm vel vigilantissimos possit fallere, mirum non est, si homo auri cupidus quidvis suppeditet pecuniarum illi, qui tantum mysterium commonstravit. Abit itaque impostor deluso avaro.

## PROPOSITIO LII.

*Agyrta cujusdam dolus, ut vitriarius frangeret vitra.*

*Vitriarium  
ut vitra  
sua frange-  
ret.*

QVod sequitur, legitur inter Secreta illa manuscripta, quæ suprà dixi me reperisse Romæ inter P. Athanasij Kircheri Adversaria, & memini me alibi quoque retulisse.

Fuit etiam (*ajunt Secreta citata*) nostris temporibus quidam, cujus nomini parco, qui magnum sibi nomen paraverat, quòd imperitam multitudinem, atque etiam nobiles multos decipiebat artibus quibusdam nullius ingenij, sed vafritiei multæ. E multis unum aut alterum exemplum subjungam.

Cùm multi adessent procures Romæ, petierunt ab eo ut aliquod ederet spectaculum insolitum. Ille autem velut hæsitabundus: Accipiat, inquit, aliquis hanc schedulam, & occultè in mensam illam vitriarij conijciat. Quod cùm esset factum: Ite, rursus ait, ad vitriarium empturi vasa vitrea. Quod cùm nobiles illi tentassent, vitriarius (cum quo pactus ille fuerat antea) ut singula manibus accipiebat vasa, decidebant, & frangebantur. Cùm multa hoc modo fregisset, veluti ita commotus & in rabiem actus esset, arrepto fuisse, bacchantium more, omnia perfregit, mensamque disturbavit. Referunt procures quod contigerat, & persuasi ab Agyrta, cum scœnore valorum pretia persolverunt,



## PROPOSITIO LIII.

*Alius priori similis dolus, ut figulorum uxores  
frangerent ollas.*

**D**Olum hunc imitatus est non nemo in vicinia nostra, ad Principis hospitii delectamentum. Diverterat nescio quis Princeps Mergenthemij ad Domum Teutonicam. Erant in opido nundinae annuae, & inter merces alias, totum forum Palatio subjectum testaceis vasis repletum, quae ab assidentibus mulieribus vendebantur. Coemit quispiam è Palatio clanculum vasa illa omnia, jubetque mulieres assidentes, ut viso è Palatii fenestra signo à se strophiole ventilatione dato, arreptis fustibus, lymphatarum instar, vasa omnia confringere, ac comminuerent. Itur interim ad prandium. In mensa cum varij micerentur sermones, ac variae proponerentur à varijs artes, ac ludicra; aut antedictus emptor, artem se seire, qua efficeret, ut mulieres vasibus suis testaceis in subjecto foro assidentes, ea omnia confringerent, non secus ac si furore forent correptae. Tantum non ridetur sponsor, ac demum ad experimentum edendum, tum ab alijs, tum ab ipso Principe urgetur; qui insuper sanctè affirmat, quadrigam suam se illi daturum, si quod promiserat, efficeret. Acceptatur conditio; itur ad fenestram, ventilatur erectum strophium; & ecce, bacchantium more quotquot vasà habebant venalia mulieres, in ea arreptis fustibus ac lapidibus desæviunt, nec cessant, donec in frustra comminuta vident omnia. Quid faciat hinc Princeps fraudis, aut secreti nescius? Promissam quadrigam victori transcribit, sed liberaliter ab eo recipit.

*Ollas suas  
ut frangerent  
figulis.*

## PROPOSITIO LIV.

*Ludicra varia praestigatoris Hiberni.*

*Ludicra  
varia Hi-  
berni pra-  
estigatorum.*

**A**dolescentulus Hibernus (inquit *Cardanus* lib. 12. Variet. cap. 61.) octodecimum agens annum, binos cultellos naribus rectâ adeo inferebat, dimidij palmi longitudine, ut ad perpendiculum facie superstarent (nostri erant cultelli) adeo ut necesse esset transire illos per foramina ea, quibus os naribus committitur, atque ita foramina illa multò ampliora esse, & situ inferiora, quàm sint naturaliter.

Paleam etiam obliquam per omnes faciei partes ad perpendiculum insistentem transferebat per frontem, supercilia, palpebras, buccas, nasi summum, mentum, solo musculorum faciei motu: unde interim miras formas effingebat.

Prægrandem quoque gladium rectâ super frontem absque alio auxilio & transferebat, & continebat.

Paleas rectâ hærentes ventri, gladio ut novaculâ incidente, maximis ictibus incidebat; nec unquam irritò ictu. Deinde similibus ictibus cum ventris cutem feriret, haud vulnerabatur.

Cultellum quoque mordicè ex altera parte ore tenens, ei ex adverso lignum cum terrea cuspide superponebat, & rursus ligni cuspidi scutulum plumbeum, quem assiduè celerrimâ versatione rotabat.

Enses plures corpori, tum pugiones cuspide admovebat, quorum capuli solo insistebant, duoque præterea manibus, sed acie ipsa, continebantur, solique manuum ac pedum extremitatibus, tum gladijs ipsis innixus, mirum quantâ

velocitate se inter illos versaret.

## ANNOTATIO.

**A**gilitali, dexteritali, assuetudini, & robori corporis, præsertim (ut Cardanus quoque notat) spina dorsi hæc sunt adscribenda: hisce enim vel barbari quoque mira præstare solent, qualia sunt qua loco citato refert Cardanus de Mexicanis jocularioribus, quos ait primum pedibus ea agere, qua alij vix manibus agere solent: hastiludia enim exercent, jactant recipiuntque qua in sublime jactaverant, pedibus insistant humeris alienis, non solum ut secundus primo (quod frequenter apud nos quoque fit) sed secundo tertius insistas. Ut ascendant autem, tertius secundo genibus insistas, inde eodem modo secundus primo, post singuli se erigunt. Quæ autem superius agant, jactando, ludendoque, fidem quasi excedere ait Cardanus. Vide quæ diximus in Physica Curiosa lib. 3. cap. ultimo.

## PROPOSITIO LV.

*Facetum aucupium anatum, aliarumque avium  
aquaticarum.*

**I**N Physica Curiosa lib. 9. cap. 18. §. 4. descripsimus ex *Petro Martyre* Decade 3. lib. 10. facetum quoddam aucupium anatum, aliarumque aquaticarum avium, à Barbaris Insularibus Hispaniolæ, aliarumque Insularum Americæ objacentium usitatum. Quod quia apud nos quoque usui fortassis esse posset, hic repetere placuit.

*Aucupium  
facetum.*

Sunt in dictis Insulis, præsertim in Hispaniola varij lacus, varique stagnantes lacunæ vadosæ. Per eas vagari solet magna aquaticarum avium multitudo, ut anatum, anserum, cygnorum, fulicarum, gaviarum, mergorum, &c. pisciculos, ranas, variaque insecta in fundo intra herbam & humentem limositate procreata venantium. Intra dictas aquas proij-

ciunt barbari cucurbitas excavatas, & bene clausas, ut supernatent. His insident volucres. Simili cucurbitâ auceps ut galeâ, ante oculos pertusâ, tegit caput & faciem, & mento tenus ingreditur stagnum. Volucres hanc unam è natantibus existimantes, insident; auceps manu furtivè exsertâ nunc hanc apprehendit, nunc illam, & in manticam subtus paratam conjicit. Reliquæ suâ sponte subnatasse comitem arbitratæ, ad victum quæritandum, insident & ipsæ, & simili fraude circumventæ in prædam cedunt ingenioso aucupi.

## PROPOSITIO LVI.

*Camelos docere saltare.*

*Camelos  
docere sal-  
tare.*

**I**N eadem Physica - Curiosa lib. 8. cap. 15. §. 3. docuimus ex Leone Africano, Majolo, Cardano, Scaligero, Aldrovando, & alijs, quâ industriâ Cameli alicubi instruuntur, ut ad tympani sonum saltare ac tripudiare assuescant. Camelum scilicet juvenem loco calido, ubi calidum quoque sit pavementum, includunt, foris tympanum pulsant; bestia ob caloris molestiam pedes alternatim sustollit, tripudianti similis. Hæc enim ratione per menses aliquot exercent. Quæ elapso tempore, quotiescunque & ubicunque etiam in libero aëre, ac solo non calido, audit consuetum tympani sonum, saltationem pedum motu simili exercet. Visum à non nemine spectaculum Memphi in Ægypto. Possent & eadem arte asini instrui.

## PROPOSITIO LVII.

*Porrum ut ad prodigiosam molem excrescat.*

*Porrû mira  
magnitudi-  
nis ut fiat.*

**M**izaldus id docet. Si porri caput, inquit, acutâ arundine, vel ligneo stylo pupugeris, & raporum vel cucumerum

lenico

semen in foramine occultaveris; adeo Intumescet porri caput, ut prodigium videatur. Experimentum capere non erit difficile.

## PROPOSITIO LVIII.

*Ludicrum canum spectaculum.*

**P***seudo-Albertus Magnus* in Secretis suis scribit, herbam cynoglossam, id est, linguam canum dictam, matrici canis copulatam, omnes urbis & ruris canes eò loci cogere, ubi occultata vel sepulta fuerit.

*Canum spectaculum  
Ludicrum.*

Idem ait, si talis miscella collo canis ita appensa fuerit atque ligata, ut excuti non possit; canem tam diu circumvolvi ac rotari, donec semimortuo similis corruat.

Addit præterea, idem sub planta pedis gestatum, omnem canum latratum ligare, & impedire.

## PROPOSITIO LIX.

*Ut panis in furno saltet.*

**M***izaldus* ait, si pani in clibanum mittendo inferueris nucem vivo sulphure, salepetræ, & hydrargyro repletam, ac diligenter clausam; eum ubi incaluerit, ita saltare, ut jucundum spectatoribus præbeat spectaculum.

*Panem in  
furno ut  
saltet.*

## PROPOSITIO LX.

*Ut homines lumini adstantes, squalidissimis  
vultibus appareant.*

**M**Odum docuimus in *Magia 1. par lib 5 Chromatismo 7.* Si enim vitreo crateri ampliori infundas vinum valde vetus, Si  
G 3. vel  
*lumini adstantes ut  
apparent  
squalidi.*

vel vinum græcum, & salein inijcias quantum pugno capi potest, craterem verò carbonibus ardentibus imponas sine flamma, nè rumpatur, & cùm ebullire cæperit, admoveas candelam; statim accendetur vinum. Si jam omnia alia lumina extinguas; adstantium facies per flammam illam tralucescentes apparebunt adeo squalidæ, ut spectantibus horrorem incutiant, putentque mortuos esse, aut macie & squalore confectos. Ita docet *Porta* lib. 20. *Magiæ Natural.* cap. 9. *Cardanus* jubet vinum cum sale ad consumptionem tertiæ partis coquere, ac deinde vinum illud accendere sublato omni alio lumine: tunc enim si adstantes immobiles maneant, mortuorum speciem præbent.

Eundem effectum præstat sulphur in medio adstantium accensum. Et hac arte ajunt *Anaxilaum Philosopherum* illuisse convivis: Sulphur enim calici novo immissum, carbonibus subditis, circumferebat in loco convivij, discumbentibus flammâ repersûâ ac tremore tetrum pallorem affundebat.

Simile quid evenit in officinis, in quibus metalla & campanæ constantur, & sulphur coquitur.

## PROPOSITIO LXI.

*Ut lampadi adstantium in obscuro cubiculo  
facies varijs coloribus imbutæ  
videantur.*

*Lampadi  
adstantes ut  
varijs colo-  
ribus appa-  
reant.*

**H**Oc etiam docuimus in *Magia nostra* loco citato ex *Porta*, & *P. Athanasio Kircher.* Nam

*Primò.* Si atramentum, vel meliùs sæpiarum atrum ac pinguem succum immisceas oleo lucernarum, & eilychnium & filis nigris conficias, atque in loco obscuro, extinctis alijs luminibus, accendas; adstantium facies & manus aparebunt atræ instar *Æthiopum.* Id spectaculi sæpe exhibuisse hospitibus suis

fuis Anaxilaum Philosophum paulò antè citatum; testatur *Porta* loc. cit.

*Secundò.* Si thryallidas, id est, lucernæ stupam, aut fila, in atramento, aut prædicto sæplarum succo, & æris ærugine intingas, & accensâ eâ lucernâ, cubiculum obscures, omneque reliquum lumen amoveas; apparebunt circumstantes partim ærei, partim nigri, propter mistarum rerum insersionem.

*Tertiò.* Si viridi lampadi vitreæ & pellucidæ oleum æris ærugini mistum infundas, ellychniumque ex linteo aut gossipio ejusdem viridis coloris conficias, atque in obscuro conclavi accendas; non solum adstantium vultus & manus, sed etiam vestes, & omnia alia apparebunt viridia.

*Quartò.* Si vitream sphaeram, aut phialam quocunque colore tinctam, vel etiam aquâ colore aliquo tinctâ repletam, intra cubiculi fenestram colles, & ante phialam extra cubiculum ponas lumen, ut phiala sit inter lumen & cubiculum, hocque de cætero quantum fieri potest obscures; videbis totum cubiculum, omnemque apparatus, & vultus hominum eodem colore imbuta, quod phiala ipsa, ejusque aqua est tincta.

*Quintò.* Adhuc meliorem successum res habet, si adhibeas vitrum duplicatum, quorum unum sit intra alterum, ita ut inter utrumque relinquatur spatium vacuum. Si enim hoc vacuum repleas aquâ colore aliquo tinctâ, & in medio vitri interioris vacui statuas lumen, quod per vitra & aquam intermediam traluceat; apparebunt vultus, manus, aliaque membra omnia adstantium eodem colore imbuta, si reliqua lumina in cubiculo clauso amoveantur.

## PROPOSITIO LXII.

*Purpuream rosam ex tempore candidam quovis tempore reddere.*

**R**osam purpuream, maximè cùm recens est, & primum dehiscens in folia capit evolvi, sulphuris accensû nidore & fumo

*Rosam purpuream reddere albam.*



fumo suffumiga; & statim dealbescet. Res sæpe experiētiā probata fuit à me & alijs, & apud veteres etiā vulgata fuit. Causa utique est, quia sulphureus albor igne extenuante, atque rarefaciente penetrabilis, tenuis rosæ meatus pervadit, & inficit.

## ANNOTATIO.

### *Corvum dealbare.*

*Corvum  
dealbare.*

**H**Ac arte utique corvum dealbabis, ostendesque experiētiā, albos in verum naturā dari corvos; quod aliqui ut credant, vix adduci possunt.

Non nemo audierat, si passer vivus deplumetur, & servetur, plumas cum producere albas. Fecit experiētiā, sed falsam esseprehendit.

## PROPOSITIO LXIII.

### *Ut vivis plenum cubiculum appareat.*

*Ut vivis  
plenum  
appa-  
reant  
con-  
clava.*

**M**Odum docent *Cornelius Agrippa* lib. 1. *Philosoph. occultæ* cap. 49. *Pseudo Albertus* in suis secretis, & *Joannes Baptista Porta* lib. 2. de *Miraculis Naturæ* cap. 17. & nos ex ipsis in *Magia nostra* par. 1. lib. 4. *Parastasi* 5. Et quamvis experiētiā rel non habeam, nec causam videam naturalem cur contingat, si contingit; proponam tamen hic iterum, ut si cui lubet, experiatur, & causam indaget. Itaque

Cum deflorescere jam incipit uva, vas vitreum plenum puro oleo accommoda infra, eique racemum deflorescentem cum frondibus etiā immerge; firmaque vas, nè à vento divellatur, aut confringatur; sol tamen illud feriat, & uvam intus latentem concoquat. Operculum præterea vasis bene claude, & gypso obtura, relicto solo foramine quo racemi pedunculus & intromittatur, & sese deinde exferat. Ubi perfectam

fectam uva uasi inclusa acceperit maturitatem, exemptam lim-  
teo exprime, expressumque humorem serua in oleo diebus  
paucis. Hoc deinde oleo lucernam instrue, & accende: vide-  
bis omnia in cubiculo uvis plena, frondibusque & arboribus  
circumvallata. Idem arbitratu *Porta* contingere, si aliarum  
arborum fructus, ubi defloruerunt, uasis dicto modo includan-  
tur. Hoc tamen secretum omittit dictus Auctor in libris 20.  
Magiæ Natur. quod signum est, nullam eum ipsum seniore-  
factum illi fidem adhibere.

## PROPOSITIO LXIV.

*Ludicra fucatas mulierum facies detur-  
pantia.*

*Porta* lib. XI. Magiæ Natur. cap. 30. ait, si quis cognoscere  
cupiat, num mulieris facies sit mangonizata, seu fucata, id  
assequi, si crocum dentibus commanducet, & os propius mu-  
lieris faciei inter loquendum apponat: statum enim ex ore  
prodeuntem deturpare faciem, & suberoccam reddere; si  
autem nullo fuerit circumlita fucio mulier, innoxiam rema-  
nere.

*Facies de-  
surpantia  
ludicra.*

Idem eodem loco ait, si eo loco, ubi mulier commoratur,  
sulphur comburatur, fumum, si in facie cerussa, aut sublima-  
tum argentum vivum fuerit, eam reddere fulcam, ac nigrantem.  
Hinc fieri ait, ut fucatae mulieres in Phlegæis montibus Puteo-  
lorum ambulantes, illicò reddantur nigrae, ut & argentea num-  
mismata in sacculis clausa.

Cerussatam quoque faciem dignoscas, si cumini grana  
commanduces, & alij nucleolum demordeas, propiusque mu-  
lierem alloquaris: si enim natus est color, permanet; si  
cerussatus, vel hydrargyro conclinnatus,  
statim obsolescet.

## ANNOTATIO I.

**C**redo fabulam esse, quod aliquando pro historia narrari pro concione audiui. Parata erat in palatio nescio qua celebris comœdia: consuebat horâ constitutâ mulierum comptarum numerus ingens, interque illas vetula rugosa: omnibus comptis ingressus concedebatur, vetula denegabatur. Tum illa: non omnes comptæ, pulchræ sunt inser eas non paucae me faciores: experimentum, si placeat, capite ejusce modi. Pollubrum aquâ plenum ante palatij ostium statuite, & egredientes omnes jubete facies lavare: larvas non paucas videbitis. Dilectum, factum, visum.

## ANNOTATIO II.

**F**abula tamen non est, quod à viro fide dignissimo, qui diu Madriti in Hispania habitaverat, ibidem contigisse inaudy. Iuris Doctor erat famosissimus, florentis atatis, & opulentus: uxorem querebat nobilissimam, ac pulchram, tamesi pauperem. Hanc quia Madriti non inveniebat, nec in Castella utraque, alijsque vicinis regnis ac provincijs, misit in Lusitaniam qui inde inventam qualem petebat, adduceret. Adducta fuit comptissima, ac juvencula in specie, exceptaque à sponso cum copiosa nobilitate & virorum honestorum manipulo extra urbem regia portas obviam sponsa eunte: celebratum convivium; itum ad thalami locum. Hic sponsa cum ornatu reliquo deposuit & crines, & dentes, apparuitque calva & edentula. Quod adeo pupugit sponsum, ut præ amore paucos intra dies expirârit. Ite nunc, & fidei formæ fallaci.

## PROPOSITIO LXV.

*Facies aliorum ut virescant, ac deinde ad nativum colorem redeant.*

*Facies aliorum reddere virides.*

**E**X Avicenna refert *Porta* loco proxime citato, sparso chamæleontis decocto in aquam balnei, viridi colore infici illum, qui

qui immoratur in balneo isto aliquantisper; & deinde paulatim pristinum colorem recuperare.

## ANNOTATIO.

**V**arios capillorum colores videmus quotidie, in Septentrionalibus præsertim regionibus, ubi major varietas, ob climatis temperiem, quam in calidis. Virides tamen capillos, non arte, sed Naturâ pictos, vix credo esse qui viderit. Norvi tamen ego Romæ, & quotidie fere allocutus sum senem Germanum, cujus barba primo quidem anno, quo illuc appuli, virefcere incipiebat, sequenti vero ac tertio adeo notabiliter in eundem degenerabat colorem, ut tandem planè fere viridis evaderet.

*Barba viridis naturalis,*

## PROPOSITIO LXVI.

*Gallinas odore inebriare.*

**N**on nemo quodam in Collegio nostro, cùm gallinæ jam dormitum concesserant in locum sibi assuetum, infra eum nescio qua de causa accendit vinum adustum: cujus odor cùm ascendisset ad gallinas, omnes velutebriæ deciderunt,

*Inebriare gallinas odore,*

## ANNOTATIO.

**A**nse multos annos cùm quodam in loco docuisssem discipulos meos, quâ arte inebriarent arviculas, ut manibus capi possent; eorum unus experimentum cepit in gallinis, quas mater domi alebat: cùmque omnes temulenta corruissens; mater, nè morerentur timens, obtortis collis necavit universas; quas filius, & qui volebant alij, de damno non incurrendo ex esu securi, coctas absumpserunt.

## PROPOSITIO LXVII.

*Passeres fugare, nè clamoribus locum infestent.*

*Passeres fu-  
gare.*

CUM quodam in Collegio nostro passeres subiectum cubi-  
culis locum importunissimis infestarent clamoribus, ac tum  
orantibus, tum studentibus quietem omnem eriperent; qui-  
dam magni nominis Concionator, & qui vel maximè silentium  
studiorum tempore amabat, unum cepit, & collo nolulam,  
vertici pileolum ad modum cristæ aptavit, ac circa locum illum  
volitare permisit. Ab illo tempore nè unus quidem amplius  
in loco illo comparuit.

## ANNOTATIO.

SCIEBAT hoc alius è Patribus nostris: cùmque alio in loco passeres gra-  
narium nostrum infestarent, nec modis ullis fugari aut arceri pos-  
sent; cepit & ipse unum, appensaque collo nolulâ, & adglutinâtâ ver-  
tici è panno rubro cristâ, dimisit. Fugavit is quidem primis aliquot  
diebus passeres; at non multò post ille ipse cristatus cum alijs ad grana-  
rium redijt. Causam putant fuisse summam, qua tunc campi afflicti  
erant, siccitatem & sterilitatem.

## PROPOSITIO LXVIII.

*Capitis vertiginem sanare.*

*Vertiginem  
capitis sa-  
nare.*

INTER ludicra referre placet, quod audiivi à Concionatore illo,  
cujus paulò antè tacito nomine mentionem feci. Experi-  
mento is didicerat, tum in se, tum in alijs, pelles talparum assu-  
tas, & in modum pileoli aptatas, ac capiti laborantis vertigine  
impositas, malum depellere.

PRO-

## PROPOSITIO LXIX.

*Morbum lethalem cerevisiæ potatione  
sanare.*

**V**Ir doctus, ac religiosus, multisque libris scriptis clarus, mihi retulit, quodam loco plurimos milites ignoto Medicis morbo fuisse absumptos: Medicos sollicitos in causa morbi deprehendenda, secuisse defunctorum nonnullos, & in singulorum stomachis reperisse massam quandam concretam: eam imposuisse diversis liquoribus, ut vino, aquæ, lacti, aceto, vino adusto, cerevisiæ; at in nullo solutam fuisse præterquam in cerevisiâ. Omnibus ergo ægris cerevisiam largè bibendam præbuisse, ac sanasse,

*Cerevisiâ  
potus sanas  
morbum  
lethalem.*

## ANNOTATIO.

**R**Evocat hoc in mentem quod mihi & alijs non semel narravit Vir Religiosus, & fide dignissimus. Hibernabant in pago ad Mænum nostrum sito milites; quos inter VVestphalus erat natione, periculoso morbo ad extrema deductus. Commilitones, qui corpori curando nullam omiserant diligentiam, quam tali loco ac tempore adhibere poterant; ut anima quoque solatio potiretur, è vicino Monasterio Religiosum evocans, qui & ipse natione VVestphalus erat. Hic cum impertito solatio quæreretur, num re aliqua pro corporis refectione indigeret, respondit miles, varia se medicamenta, ac potiones plurimas jam absumpsisse nullo effectui; putare autem, si lardi frustum cum brassica VVestphalico more coctum comederet, sanandum, aut saltem antequam moreretur, recreandum. Vadit confestim Religiosus ad monasterium, lardum cum brassica ut petiverat ager, præparat, ac per Monasterij famulum mittit. Conedit latus, dormit quietè noctem totam, die postero humeris sclopeto imposito Monasterium accedit, ac suo Æsculapio gratias agit.

*Moribundus lardi,  
& brassica  
esui sanatur.*



## PROPOSITIO LXX.

*Vitreæ sphaerula nucis avellanae magnitudine,  
bombardula explosæ crepitum  
amulans.*

*Sphaerula  
vitrea  
bombardu-  
la sonum  
amulans,*

**L**ibet hic repetere quod scripsi in Mechanica Hydro- pneumatica par. 1. Protheoria 3. § 2. est enim multorum jocosum seges.

Vitreas sphaerulas nucis avellanae magnitudine, aut etiam minores majoresve (perinde enim est) heri curavi Romæ ad lampadem à quodam Germano artifice, vitrum in omnes colores, omnesque figuras florum, fructuum, avium, animalium omnis generis, icuncularumque quarumlibet affabrè elaboratarum efformante. In eas sphaerulas acetum, aut nitratum salemaquà dissolutum infundi jussi, & ad medietatem plùs minùs repleti, ac deinde hermeticè claudi liquefacto eodem vitro ad eandem lampadem. Harum sphaerularum unam si quis carbonibus non nimium accensis, aut calidis cineribus (ut paulatim calefieret, intusque conclusus liquor ac spiritus rarefieret) imponebat, post exiguum temporis spatium, tanto cum impetu ac fragore viam sibi aperiebat rarefacta ac spiritosa materia, intus conclusa, majoremque quærens locum, ut non tantum vitrum in mille minutissimas particulas distringeret, sed carbonēs etiam ac cineres toto conclavi dissiparet, nullius damno, nisi si quis vultum propè applicaret.

## ANNOTATIO.

**C**um experientiam Romæ coram Serenissimi Holsatiae Ducis Filio primogenito D. Friderico (qui Romam digressus, Parisijs in morbum



bum incidit, & obijt) & Prænobilis atque Amplissimo Domino Levino Molke, ejusdem Serenissimi Ducis Consiliario, ac tum familia Filij Praefecto, facerem foco in conclavi hyemali tempore a sidentibus: famuli ante cubiculum prastolantes, accurrebant attoniti, bombardulam in Principem suum explosam credentes.

Ibidem anno sequenti alius magnus Princeps juvenis, nunc in-  
clitus belli Dux, cum nonnullas dictarum sphaularum à me accepisset,  
ac domi die quodam cum multis alijs Nobilibus foco assideret: unam  
deprompsit, atque ostendit, videntibusque omnibus igni injecit, asse-  
rens, ubi calefacta foret, gratissimum parsuram odorem. Omnes  
arrectis naribus, & ore hianse odorem expectabant, cum repente fit  
crepitus, & carbonum cinerumque dujellio, diffugientibus omnibus in  
timorem primo, deinde in risum dissolutis.

Alio tempore coram Cardinale quodam, & magno Nobilium  
comitatu, cum ad visendum P. Athanasij Kircheri Muscum convenis-  
sent, admonito prius clanculum solo Cardinale, unam carbonibus acer-  
rà exceptis impositam explosi: & ita omnes alij præter dictum Cardi-  
nalem territi fuere, ut auctorem (nesciebant me esse) ad panam qua-  
rerent.

Alius nobilissimus juvenis Germanus, magni nunc in Germa-  
nia Principis frater, quamprimum dictarum sphaularum effectum  
apud me vidit, magnum earum numerum, in patriam secum ad spor-  
sandarum fieri curavit, ut jocum faceret mulieribus qua pro more  
patriæ, hyemali tempore, urceolos aneos cineribus & carbonibus  
plenos penes se habent, dum ad confabulandum confident: injeclu-  
rum enim se ajebat clamsphaulas in urceolos, ut explosis conserna-  
rentur. Alia multa faceta, innoxia tamen, ejusdem

exhiberi ab ingeniosis pos-  
sunt.

## PROPOSITIO LXXI.

*Lepida quæstiones ac responsiones certis idiomatibus peculiares.*

*Lepida quæstiones ac responsiones.*

Quælibet idiomata peculiares habent loquendi modos, ac verba æquivoca, quibus si interrogas, ni alter eodem sensu intelligat, quo tu, aut ineptè omninò responderet, aut magnum subesse mysterium existimat. Nonnulla exempla subijcio in idiomate Germanico, Latino, & Italico, quæ nunc obiter consideranti occurrunt.

I. Sunt duæ candelæ, cerea una, sebaea altera, ejusdem prorsus crassitiei, & longitudinis, ex cera & sebo ordinarijs, & nullâ aliâ re permixtis confectæ; quæ simul acceduntur, ardentque donec omnino absumantur. Quæritur, welche auß den zweyen Kerzen länger brennt: hoc est, utra longius ardeat? Germanus si respondeat germanicè, keine/ (id est, neutra) rectè respondet, quia länger brennen/ id est, longius ardere, in Germanico idiomate æquivocum est, & sumi potest pro diutius ardere, & pro ardendo longius evadere.

II. Si quærat Germanus, warum Judas der Verräther ein rothen Bart gehabt habe/ id est, cur Iudas proditor habuerit barbam rubram; rectè respondetur, um den Mund/ id est, circa mentum, quia per vocabulum, warum/ non solum causa rei, sed locus etiam quæritur.

III. Si Germanicè interrogetur, quando in arbore crescit pyrum, was wächst vor/ der Eule/ oder die Birne? id est, quid prius crescit, stylus, an pyrum? Rectè respondebitur, die Birne/ pyrum, quia vocabulum vor/ significat prius seu antèrius non solum quo ad tempus, sed etiam quoad locum, seu situm in loco.

IV. Si quis asserat linguâ seu Latinâ, seu Italica, seu Germanicâ, vldisse se hominem habentem tantam barbam, ut quotief-

tiescunque scalam ascenderit, eam pedibus calcârit; verum dicit: tametsi homo ille habuerit barbam brevissimam: non enim barbam, sed scalam pedibus calcare asserit.

V. Simili modo si quis vel Latinè, vel Italicè, vel Germanicè dicat, sedisse in arbore una passerem decem, seque exploso sclopeto deiecit quinque, & quærat quot remanserint? rectè responderetur, nullum, quia omnes avolare solent.

VI. Qui dicit, quâcunque linguâ, cuculos in Sicilia nunquam clamare, ante meridiem, rectè dicit, quia cùm cuculus articulatè non loquatur, non potest clamando formare ista verba, *ante meridiem.*

Omitto innumera alia exempla quæ occurrunt. Lector facetus plura his sciet, aut formabit.

## PROPOSITIO LXXII.

*Eâdem aperturâ circini ordinarij, fixo manente uno pede in centro, figuram ovalem describere, est possibile.*

Chartam circumpone cylindro seu columnæ cuius rotundæ, aut humanæ tibie, fixoque uno pede in puncto quovis electo pro centro, altero ad libitum extenso, describatur circulus. Revolutâ chartâ de cylindro, atque expansâ æqualiter, apparebit in ea figura ovalis.

*Ovalem figuram circini ordinario describere.*

## PROPOSITIO LXXIII.

*Unico ductu pennæ & atramento in charta, cretâ  
in mensa, aut tabula plana, formare trian-  
gulum rectilineum.*

*Unico ductu  
triangulum  
facere.*

*Vide  
Icon. VIII.  
Fig. I.*

IN charta aut mensa angulari rectilinea, ab uno ad alterum  
latus quæ angulum continent, duc lineam rectam, & habebis  
triangulum designatum. Charta aut tabula sit ABCD. Duc  
lineam EA, & habebis triangulum EAH, unico ductu forma-  
tum.

Simili modo unicâ sectione cultro, aut serrâ, aut fortifici-  
bus, efficere poteris solidum triangulum, seu pyramidem, si  
angulum solidum abscindas è charta, aut tabula.

## PROPOSITIO LXXIV.

*Rastrum pingere in tabula, cujus dentes non opticè,  
sed revera sint erecti, aut deorsum  
tendant.*

*Rastrum  
dentibus  
verò erectis  
pingere.*

*Vide  
Icon. VIII.  
Fig. I.*

Pinge manubrium rastrum in superiori aut inferiori tabulæ cras-  
sæ superficie, dentes verò in superficie laterali, & habebis  
quod quæritur. Tabulæ superficies superior sit AB, lateralis  
verò secundum crassitudinem tabulæ superficies sit CD.  
Pinge manubrium rastrum EFG in superficie AB, dentes verò in  
superficie CD; & pinxeris rastrum, cujus dentes revera  
deorsum tendunt.



Fig. I.




Fig. II.



Fig. III.



## PROPOSITIO LXXV.

*Ludicrum hydromanticum.*

EX chalybea lamina cura fieri pennam, ut vocant, qualem apposita refert figura, cujus pars DE violenter depresso infra partem AB versus C, redeat sponte ad situm pristinum talem, qualem eadem figura exprimit. Hoc instrumento exhibebis in aliorum conversatione sequens, aliaque similia ludicra. Deprime partem DE, infra partem AB, & nē sponte redire ad suum situm queat, interpone crustam panis, aut frustulum panis duri, & colloca instrumentum intra vas aliquod oblongum, v. g. intra cantharum aut urceum, quo vinum discumbentibus depromitur; & si quid scis aut suspicaris de quopiam, quod ipse ignotum omnibus putat, v. g. quod in animo habeat ducere uxorem, aut ingredi statum religiosum, aut abire in regiones longinquas, &c. dic te divinaturum hydromantico artificio, quinam ex omnibus in animo habeat uxorem ducere. Tum pete ab omnibus cultrum, conijce illos intra vas, ut apices fundum tangerent; illius verò quem prodere vis, cultrum infige uni foraminum FG. Denum infunde aquam calidam intra vas, & dic, illum ducturum uxorem, &c. cujus culter sponte ex vase exsilierit. Interim mollescente pane qui partem DE cum cultro depressam tenet, dicta pars à violenta detentione libera subsilit cum impetu sursum, cultrumque sibi infixum eodem impetu extra vas ejiciet, magno omnium admiratione & risu.

*Hydroman-  
ticum ludi-  
crum.*

*Vide  
Icon VIII.  
Fig. II.*

## PROPOSITIO LXXVI.

*Ut equi, aliaque animalia non comedant.*

SI joci gratiā, & ad terrendum alios, efficere vis, ut eorum equi, boves, aliaque animalia, ad tempus non comedant,

*Equi, alia-  
que anima-  
lia ut non  
comedant,*



etiam maximâ stimulante fame; linguam, palatum, cavitatemque reliquam oris sevo aut axungia inunge clanculum; non comedent donec abluatur os sale & aceto.

Referunt multi passim, alijque describunt ex istdem, si intra aut supra præsepia suspendatur cauda, aut pellis, aut caput lupi, oves stare attonitas, nec comedere; quod tamen experientia docuit P. Kircherum, esse falsum.

## PROPOSITIO LXXVII.

*Vas liquore plenum intra aliud aequalis magnitudinis aliâ materiâ plenum effundere, ut nec materia illa cedat, nec liquor effluat.*

*Vas plenum  
intra aliud  
aqualis &  
plenum ef-  
fundere.*

**S**ume duo ejusdem magnitudinis vitrea vasa, unumque reple cinere subtilissimè cribrato, non tamen compresso; alterum spiritu vini. Hunc effunde paulatim intra vas cinere plenum; videbis nê guttam quidem superfuturam in uno, aut effluxuram ex altero. Causa est, quia pars utriusque corporis simul commisti resolvitur in vapores & exhalationes, invisibiliter evolantes,

## PROPOSITIO LXXVIII.

*Modico igne magnam ciborum copiam coquere.*

*Ignis modico  
coquere.*

**I**ngentem lignorum copiam absumi video passim apud nos in Religiosorum, aliarumque numerosarum familiarum culinis, ubi tribus quatuorvè ollis aut cacabis cibi coquendi sunt, quoniam ignis loco libero exstruitur, & ollæ aut supra ignem suspenden-

spenduntur, aut ad latera circumponuntur. Prodigalitatis ansam lignorum præbet copia. Parciores eâ in re sunt Itali, quos lignorum aut inopia, aut caritas, sequentem docuit praxin, quâ modico igne, & exiguis sumptibus, ingentem ciborum copiam in magnis, etiam ducentorû capitum (quot ferè numerabantur in Collegio nostro Romano, ac Panormitano, cùm inibi degerem) familijs coquunt.

Furnulum nimirum construunt in culina, tantæ à pavimento altitudinis, ut adstantis umbilicum tangat. Hunc undique claudunt, relicto solum ab anteriore parte ostiolo, quo lignum injeiunt, & focum instruunt, atque restaurant, ubi opus. In furnuli planitie suprema quinque ad summum circularia efformant diversæ capacitatis foramina, quibus cacabos aut lebetes, manubrijs suis apprehensos ita imponunt, ut cavitates exactè expleant, nè per eas calor ignis subjecti transpiret.

In apposito schemate culinæ murus, cui furnulus appositus, est A B C D, pavementum culinæ C D E F, furnulus G H N O, superior ejus planities G H I K, quinque circelli differentis magnitudinis, sunt quinque diversæ capacitatis foramina. Semicirculus V est locus grandioris aheni ad calefaciendam aquam in culinæ usum. L M est diaphragma sive interstitium transversum lapideum, ferreis cratibus intertextum, quo furnulus in duo discriminatur receptacula, superius I K L M, & inferius L M N O. R est ostiolum furnuli, ferreâ portâ munitum, quæ igne intus accenso clauditur, vel panditur, prout necessitas exigit. Per ferreas crates diaphragmatis L M decidunt cineres in receptaculum inferius L M N O, è quo per apertum ostiolum S depromuntur. T V est caminus intra murum culinæ. P Q est spiraculum laterale, cui intruditur ferreâ laminâ, iterumque eximitur, prout necessitas requirit. Intrusâ laminâ, calor totus & flamma intra furnulum concluditur: extractâ, ascendit sursum versus T, calorque furnuli temperatur. Hæc sunt quæ observavi in dictis Italiæ furnulis, Si quæ omisi, aut minùs rectè explicavi, prudens ac discretus lector, qui ejusdem habet notitiam, benignè supplere dignabitur.

Vide  
Icon. VIII.  
Fig. III.

## ANNO TATIO.

**D***u postquam hæc scripseram, reperi idem ferè artificium apud Cardanum lib. 10. Varietas. cap. 49. his verbis descriptum. Clibanus ad coquenda multa simul utilis, nunc in usu Mediolani, compendium duarum partium è tribus lignorum faciens, quoniam conclusus ignis triplo efficaciores vires habet. Quadratam efficies formam, duorum cubitorum fermè latitudine, altitudine unius cum dimidio, è creta lateribusque. Superiùs quatuor foramina ampla, rotunda, pro magnitudine lebetum & patellarum. Superficiem totam superiorem integrare: sed ubi foramina adfunt, æs exscinde, fientque frustra hæc pro operculis. Ubi ergo usus erit, patellas & lebetes suis locis impones: ubi opus non est vase, operculum indito, ut clibanus nullibi respiret. Sub folio superiore cavitas est, ostiolumque quadratum, per quod ligna carbonisque immittuntur: à latere verò multò latius, sed humilius ostium. atque in inferiore parte, Medio folio crates ferrea simplex, per quam cinis demittitur. Constat itaque, ostium per quod ligna immittuntur, in parte superiore esse, reliquum autem in inferiore. Coquuntur & veru carnes, propositis cardinibus à lateribus ejus ostij, per quod cineres extrahi solent: nam ibi pruna torret carnes, & flamma in superiore folio, si aptetur rota, circumaglt verua. Verùm tunc cùm exhalare eam oporteat, non tantum fit compendium lignorum. Hæc Cardanus.*

## PROPOSITIO LXXIX.

*Lucernam Italicam construere.*

*Lucerna  
Italica.*

**C***ardanus lib. 1. Subtilit. exhibet Lucernam, quam ipse mirabilem vocat; estque verè mirabilis, si continuatur ut ipse eam depingit: fieri enim naturaliter non potest, ut oleum infusum retineat, & desideratum effectû præstet. Sed vitio Delineatoris,*



Fig. I.



Fig. II.



Fig. IV.




Fig. III.



toris, aut chalcographi errorem contigisse existimo; alioquin enim rectè verbis à Cardano describitur, ac demonstratur. Ejus figuram in apposito hîc schemate restitui; & quoniam passim in tota Italia ac Sicilia in usu est communiter, Lucernam Italianam vocavi. Sic autem construitur.

Excupro, aut stanno, aut melius ex bractea ferrea stanno obducta (Germani vocant *Wlack*) fit vasculum AB, in modum turriculæ affabrè elaboratum, habens in medio fundi extantem pedunculum solidum D, ut in usu alteri pedi cavo infigi queat. Infra immediatè supra fundum, ubi C, fit foramen oblongum, instar ostioli aperti, ut appareat in I Figuræ II. quod circumdatur margine unius digiti latitudine; qui infra continuatur cum alio margine seu limbo ad angulum rectum prominente, ut in Figurâ I. apparet. Huic limbo secundum longitudinem implantatur canaliculus dissectus instar alvei, ut ellychnium intra cavitatem suam recipiat. Per ostiolum C infunditur oleum, & lucerna plena pedunculo suo solido D infigitur pedunculo cauo K, basis GH quam exprimit Fig. III. statimque per ostiolum C effluit oleum, & replet limbum perpendiculariter affixum, obturatque ipsum ostiolum C, nè aër ingredi, aut plûs olei effluere queat. Canaliculo dissecto margini implantato imponitur ellychnium, & accenditur. Dum flamma ellychnij absûmit oleum in limbo contentum, discooperitur paulatim ostiolum C, ut egredi novum oleum, ejusque loco subintrare aër aut vapores olei rarefacti valeant, partemque superiorem turriculæ, ad vacuum impediendum, replere.

Vide  
Iconis IX.  
Fig. I. II.  
& III.

## ANNOTATIO.

**C**Avendum tamen nè ostiolum C aut nimis parvum fiat, ut prohibeat olei fluxum, aut nimis laxum, nè increscens paulatim ac rarefactum oleum simultoto impetu ex improviso effluat. Quod aliquando contigisse, sed rarius, memini. Certa mensura præscribi non potest: res dependet ab experientia, quam artifices longo usu discunt.

PRO.

## PROPOSITIO LXXX.

*Lucernam quæ anno integro subministret oleum  
ac. enso ellychnio, fabricare.*

*Lucerna  
diu durans.*

Constat Athenienses olim posuisse simulacro Minervæ lucernam, quæ toto anno arderet. Hanc putat Cardanus loco proximè citato non aliter fuisse constructam, quàm ad modum antea expositum, aucto vase oleum continente juxta multitudinem dierum anni. Commodius tamen putat, si fiat vas amplum, superius apertum, & oleo infuso superponantur craticulæ ferreæ subere sustentatæ, ut nunc communiter fieri solet in lampadibus vitreis, quæ in templis ac ædibus aliquorum diebus ac noctibus totis ardent. Ut tamen perseveret flamma in ejusmodi lucernis velut perpetuis, ellychnium comburi non debet. *Tale sit* (inquit Cardanus) *è lino carpasio; hoc enim non uritur: aut ut inferius docebimus, è lapidum crustatorum filis.* Qui autem sint hi lapides, Propositione sequenti dicemus.

Tamet si verò, si in vase amplo ellychnium cum subere & ferreis craticulis descendat, diu duret lucerna, aut lampas, incommoda tamen ea est: quia si oblongum sit vas, absconditur ignis, nec eminet, luxque obtusa est: si verò latum sit vas, obumbrat lumen circumquaque, nec nisi in altum ejaculatur. Aliam igitur rationem ab ea quam Propositione præcedente ex eodem descripsimus, haud dissimilem præscribit lib. 10. Variet. cap. 48. his verbis:

*Vide  
Iconis IX.  
Fig. IV.*

Hac igitur ratione lucernam pro toto anno constituemus. Faciemus lucernam A, quæ tantum capiat olei, quantum sufficit pro unâ die, ratione scilicet dictâ in primo libro de subtilitate. Huic sextuplo majorem faciemus B, jungemusque ipsi A ex superiore parte. Ipsi verò B sextuplam faciemus C, adglutinantem ipsi B superius firmiter. Ipsi quoque C faciemus D sextuplam cum sextante, quam eodem modo adjungemus ipsi C. Sitque tota machina bene undique conclusa. Sup-  
pedita-



*perdit ab hisque oleum toto anno perpetuò ardente ellychnio, & illustrante.*  
*Hæc Cardanus.*

## ANNOTATIO.

**V**ereor tamen, nè pondere nimio olei lucerna *A* superincumbentis exprimatur plus olei, quàm absumi ab ellychnio queat, resolutò in-  
 terim oleo in *D* conclusò in tenuem substantiam, qua partes exinanitas repleat. & patienti Natura succurrat, nè vacuum maneat vas *D*. Si  
 tamen successum habeat praxis, possunt partes *B*, *C*, & *D*, abscondi su-  
 pra templi fornicem, aut domus tabulatum, & sola pars *A* in longum  
 producta emineret.

## PROPOSITIO LXXXI.

*Ellychnia incombustibilia preparare.*

**H**Acere egimus in nostra Pyrotechnia, quæ est liber 2. par-  
 tis 4. Magiæ, ubi de lucernis perpetuis sermonem habui-  
 mus. Nunc placet recensere quæ de eadem re scribit Carda-  
 nus lib 5. Subtilit. his verbis.

*Ellychnia  
 incombusti-  
 bilia.*

*Alumen quod Scajola vocant, est Astrum Samium apud Vete-  
 res, nec est in succorum genere: uti nec alumen plume, quod ex terrenis  
 partibus constat, atque ideo tenuiter si teratur, l. eloque inspersatur,  
 pruritus commovet assiduum: acutas enim & pungentes partes habet.  
 Quòd si ex eo ellychnia fiant, haud ardent (id est, non consumuntur)  
 sed perpetuò oleum consumitur, ipsa autem manent. Commune  
 est hoc omni ferme generi crustati lapidis. Nam & in Eslebia ex pyri-  
 tide, tum lapide alio scissili pyra imposito, liquor viridis emanat, qui cum  
 igne extinctio cogitur, ignem amplius non sentit. Sic ex Amianto la-  
 pide Roma mappas, & in Verebergo Bohemia mantilia esse affirmat  
 Agricola, qua non aqua sed ignibus eluantur. Et ex Magnesia lapide  
 squamoso, argentei & plumbei coloris, in Boldecrana mensa sunt, qua  
 igne purgantur, nec vitiantur: ex tenuiore autem parte thryalides pro  
 lucernis. Videbuntur hæc quibusdam mirabilia dictu, qua tamen*

non solum vera, sed etiam necessaria sunt, ac facilia inventu. Nam cum omnes ferme lapides igni, praesertim haud diuturno, resistunt, squamosi plerumque nentur, ob fila. Texi verò quacunque nentur, quis dubitat? Unde etiam non solum ex lino & canabe, sed ex sparto quoque seu genista mappa conficiuntur, &c. quidquid enim ductile est, nere licet; quod nere licet, licet & texere. Ductile verò est, quidquid humido constat tenaci ac minimè fragili, &c.

## ANNOTATIO.

**Q**ua Cardanus hoc loco asserit de lapidibus, ejus natura ut neri queant, & texi in mappas, multi sciunt vera esse, utpote testes oculati. Nec lapides solum, sed vitrum etiam in tenuissima ac fere invisibilia fila, si singulatim aspiciantur, nentur ad rotas, non secus ac linum, lana, gossipion, sericum, & similia, ut ipsemet vidi.

## PROPOSITIO LXXXII.

*De lampade vitæ & mortis ex humano sanguine.*

*Lampas ex  
humano  
sanguine.*

**E**rnestus Burggravius in Libello, quem Ellychnium vitæ appellat, lampadem præparare jubet ex humano sanguine distillato, & à phlegmate purificato: hujusmodi enim sanguinem ait non secus ac oleum nutrire flammam, & quidem si ellychnium ex asbesto, aliavè incombustibili materia fiat, tam diu, quoad vixerit homo ille ex cujus sanguine est præparata lampas. Lampas hac (inquit citatus Auditor) sive lumen incensum semel, ardet jugiter, quoad homo ille, è cujus aptatur sanguine, vitalem ducit spiritum; atque eodem quo eundem efflat ipse, hore sive momento, sive punctilicio, simul cum eo extinguitur. Scito insuper, si flamma luculenta sit, elevata, tranquilla, & immota, nihil homo iste quod vel corpori, vel animo grave sit, sentit: sin verò secus habeat, & assurgens flamma

*flamma variè scintillet, aut depressior sit, aut nubilosa & torpida; indicium tibi anxietatis, tristitiæ, caterorumque pathematum esto. Perpetuò enim ex congenitis Microcosmi influxionibus astralibus, ac naturalibus in linationibus, cum & sanguis ille à sanguine ipsius hominis, & corpus ejusdem à substantia hujus ipsius sanguinis, à quo sanguis ad præparandam mutuo quasi sumptus est, enutritur) flamma ista pro statu & habitu ipsius hominis sive prospero, sive adverso, emicat, & spectandam se præbet.*

Hæc Burggravius lo. cit. ubi etiam addit historiam de studio quodam Argentoratensi, eum lampadem hujusmodi de sanguine, quem vernali & autumnali tempore è vena secta emittere solebat, præparasse: cumque in ardentem incidisset febrem, flammam lampadis eadem cum feбри caloris augmenta ac decremента sumpsisse, tandem momento eodem quo æger animam efflavit, extinctam fuisse.

## ANNOTATIO.

*Fides sit panes Auctorem. Experimentum mihi non constat, ideoque causam non inquirò. Scio miram esse inter hominem, humanoque è corpore partes etiam separatas concordiam atque discordiam. Exempla passim extant. Aliqua etiam hoc Opere tradentur in sequentibus.*

## PROPOSITIO LXXXIII.

*Aquam vitæ ex pane conficere.*

**E**X pane varia conficiuntur medicamenta. Aqua vitæ, notissimus thesaurus, præsertim apud Polonos, Moschos, & Græcos, sic paratur, teste *fonfsono* in *Thaumatographia* Classe 10. cap. 2. art. 6.

*Aqua vitæ  
ex pane.*

℞. Panis optimi in tenues bracteas secti quantum satis. Impone calenti clibano, ut sensim optimè exsicceetur, rufi bis cocti ad instar. Mox crasso modo tusum abeno capaci indito, & ad singulas panis tusi libras adde aquæ fontanæ libras quinque, florum lupuli manipulum unum, anisorum unciam unam. Coquantur simul ad unius partis consumptionem. Cùm parum refrixerint, effunde, & per sportam, seu cribrum trajice: mox affunde aliquid fermenti, tepidâ priùs aquâ dissoluti: doliolo include, & musti instar fervere, ac fermentari finito: tandem clarum separa, destilla, & ut spiritum vini rectifica.

## PROPOSITIO LXXXIV.

*Sanguinem è corpore humano fluentem  
sistere.*

*Sanguinem  
sistere.*

**G**esnerus apud Jonstonum loco proximè citato cap. 3. art. 3. refert, Fridericum Saxonix Ducem, busonem veru ligneo transfixum, in umbra diligenter arefactum, sindone involutum, hæmorrhagiâ laborantibus tamdiu manu tenendum dedisse, donec intra manus incalesceret: ita sanguinem repressum.

Facit idem gallinaceus pullus, *Platero* teste apud eundem, si eo in loco ubi galli castrari solent, foramine sectione aperto, pars intrudatur læsa. Successum experientia testatur.

Nobilis quædam matrona, sanguinis è naribus fluxum frusto cretæ albæ digito annulari contento, è regione naris sanguinem fluentis reprimebat, teste *Foresto* apud citatum *Auctorem*.

Aliud remedium dabimus infra Centuriâ tertiâ, Propositione duodecimâ; & hac ipsa Centuriâ primâ  
Præposit. 97. & 98.

PRO-

## PROPOSITIO LXXXV.

*Igneos characteres exhibere.*

**T**Ametsi artificium ad igneos characteres exhibendos simplicissimum sit, quia tamen non omnibus notum, & multis est fortassis gratum, hic breviter annuere non gravabor.

*Igneos characteres exhibere.*

In tabula, charta crassiore, aut lamina quacunque, pingantur colore, aut cretâ, litteræ, vocabula, nomina quæ exhibere volueris, & quidem naturali ordine, eoque prorsus modo, quo alias pingi ac scribi solent. Pictæ excendantur, retro tabulam ponatur una aut plures candelæ, aut lucernæ, prout res exiget, ut lumen per litteras excisas traluceat noctu, aut in loco tenebroso; & habebis quod desiderabas.

## ANNOTATIO.

**H**Arttorfferus tom. 1. Deliciarum Mathematico-Physicar. Par. 11. quæst. 37. vult ut litteræ pingantur aut scribantur inversæ eo modo, quo æri incidi, aut fundi pro typographis solent. Sed hoc minimè necessarium est, nisi velis litteras in tabula pingere ex ea parte, qua lumen est collocandum: tunc enim inversæ esse debent, ut antiè rectæ appareant. Verùm, ut dixi, hoc minimè necessarium est: si enim à parte anteriore tabula pingantur, & excendantur, jam inversæ apparent à parte posteriore. Sic si in tabula pingas, & excindas hæc verba: VIAT LEOPOLDVS SEMPER AVGVSTVS, & excindas; apparebunt retrò inversa modo & ordine, quo æri incidi solent, ut imprimantur charta.

## PROPOSITIO LXXXVI.

*Muros solidissimos construere.**Muros solidissimos construere.*

Vldi multis in locis, Romæ præsertim, rudera antiquissimorum ædificiorum, ac murorum, in quibus lapides cæmento intermedio adeo firmiter ac indissolubiliter sunt conglutinati, ut plùs operæ, laboris, ac sumptuum requiratur ad eos demolandos, quàm ad novos extruendos. Eiusdem rei vestigium habemus Moguntia in monumento Drusi Germanici, quæ moles est lapidea, rotundaque, Drusi tempore constructa, adeo compacta firmiter, ut vi nullâ hætenus dissolvi potuerit, nec deiici posse putatur alter, quàm supposito pulvere pyrio ac igne. Mirantur plerique omnes firmitatem horum, similiumque monumentorum, olim à Romanis extructorum, nec ullum adhuc audiui, aut legi, qui artificium se scire fateatur. Solus Cardanus (quod sciam) lib. 12. Variet. cap. 58, id explicare conatur his verbis:

*Fiebant igitur ex terra cretosa albida, seu rubra, purgata ab arena, sabulo, calculis, luto: inde non igne, sed sole, ad quinquennium usque siccantur. Verno tempore & autumno ducendi sunt, nè per solstitia summo corio siccescente contrahantur & frangantur. Exaëto biennio utiles esse incipiunt, perfecti quinquennio. Antequam ducantur, diu macerandi, paleæque immiscenda. Calx è vivo lapide, arena autem qualis pulvis puteolanus aut carbunculus aspera, levis, & vi ignis exusta. His materijs, maximè si etiam lateres è pumicosa argilla fuerint, muri fiunt æterni. Quòd parum differat camentum à lateribus ipsis: & utrumque cum vim ignis senserit, ac attenuatum fuerit, ad extremum usque in duritiem adamantinam transeat. Iuvat etiam ut sub æquinoctia fiant ædificia, camentumque sit haud copiosum, lapidesque bene quadrati, structuraque ad perpendiculum exquisitè erecta. Hæc Cardanus,*

Multa



Multa ex dictis servantur hodie, fueruntque & priori sæculo servata in fabricis Romanis, quæ tamen longissimè distant à firmitate antiquarum. Juncturæ firmitas inter lapides & cæmenta dependet sine dubio ab aqua, arena, lapide ex quo calx, ex calcis conservatione, cæmenti subactione, tempore, & similibus.

## PROPOSITIO LXXXVII.

*Verua facillimè circumagere.*

Notum est artificium quo communiter jam utuntur ad vertenda verua, circumactis rotis dentatis ope tympani laminam chalybeam intus convolutam habentis. Quam diu enim hæc lamina, priùs manubrio ferreo curvo convoluta, evolvitur, tam diu rotæ, & cum rotis verua vertuntur. At quoniam molestum est, toties laminam convolvere, & pronom ut aut incuriâ, aut oblivione, aut occupatione aliâ coqui id operis omittatur; posset adhiberi instrumentum aliud facillimum, quo veru sponte & perpetuò vertitur modico igne, quod describit Cardanus lib. 12. Variet. cap. 58. his verbis.

*Verua facillimè circumagere.*

*Ferrea lamina lateribus camini muro utrimque insigitur. In ea est foramen, in quo cuspis flabelli ferrei versatilis intruditur. Flabellum tenue est, & ab imo tympanum habet dentatum (vel potiùs striatum) cujus cuspis altera, parum obtusa, insigitur foramini superiori clavi, & ipsa in eo versatilis. In eodem clavo juxta foramen superius, aliud est foramen à latere; cui intruditur cuspis alterius virga ferrea, cui juxta cuspidem qua est in clavo, rota ferræa cum denticulis circumducta, sic ut denticuli tympano inserantur, & ipsa cuspis versatilis, ut etiam ex adversa parte qua includitur annulo. Iuxta medium, ligneum circumducitur tympanum excavatum multis circulis, quorum cavitatibus catena circumacta ferrea, rursus circumambit circulum ferreum, circumdans veru: ut quotquot fuerint circulorum cavitates in tympano ligneo, tot etiam sint catena,*




catena totidemque verua quibus inferantur. Ita ergo fit, ut fumo flabellum, quod quasi alis inaequale redditur, & quasi inclinatum, convertatur, quo tympanum rotam circumagat, quae catenam ob inaequalitatem secum trahens, convertit rotam veru. Tantà verò, in aequilibrio & ad perpendicularum stante flabello, vertitur facilitate, ut etiam sine igne, modo veru non desit, etiam tympanum circumagat rotam sibi insertam, non obscurà ratione. Nam sub camino aer inclusus, cum in arctum feratur, vim habet, ut alias de scriptis offendimus. Indicioque hoc est, aerem etiam sursum ferri. Atque eo maxime hoc contingit, cum levis fuerit machina, & bene polita, & camini spatium circa flabellum undequaque conclusum, ut minimum respiret. Camini nomine, ut clarius intelligeretur, quemadmodum alibi etiam, licenter usus sum, non ignorans focum latine, aut fumidum operculum rectius dici debere. Agitur flammâ potius, quam fumo, propter motum vehementem: à pruna nequaquam. Verua quoque rotunda esse oportet eâ parte, qua insistent macroripodibus: angularia enim non facile vertuntur, Haëtenus Cardanus.


Sed ut melius, quæ dicta sunt, intelligantur, adiicimus, & explicemus schéma, quod juxta Cardani schema ruditer delineatum, fuit à nobis haud paulò perfectius expressum.

Vide  
Iconis X.  
Fig. I.

A est focus cui superstructus est ignis. B C murus camini. Q R lamina ferrea muro inserta. D foramen in lamina. D E brachium ferreum laminæ insertum: in quo E est foramen ad perpendicularum excavatum. E K est pertica ferrea, foramini E inferiore cuspide inserta, ita ut facile verti in gyrum queat. I est flabellum tenue. F tympanum striatum. B K clavus muro camini ad perpendicularum insertus, cujus foramini K insertus est cuspis superior perticæ ferreæ E K, ita ut facile pertica in eo foramine possit verti in gyrum. In brachio ferreo D E aliud est foramen P ad latus; cui foramini, alterique H, infixa est virga ferrea P H; cui inserta est rota ferrea dentata G (ita ut dentes apprehendant strias tympani F) & tympanum ligneum L, canaliculatum, seu multis circulis per circuitum excavatum, quorum singulis singulæ catenæ circumponi queant. C M est veru, O allatura, N rota ferrea veru inserta, & ambitu excavata, ad recipiendam catenam, ab L in N, & ab N in L deductam.

Ma-





Machinâ ita constitutâ, dum fumus ascendit sursum, vertitur flabellum I, & cum flabello pertica K E, unâ cum inserto sibi tympano F. Hoc tympanum apprehendens successivè dentes rotæ G, eam circumagit, & cum rota perticam E H, insertumque tympanum L. Hoc rapit secum insertam sibi catenam, ex una quidem parte sursum, ex altera deorsum. Catenâ vertit rotam N, & cum ea veru CM, infixamque sibi assaturam O.

## PROPOSITIO LXXXVIII.

*Aquâ supra rotam delapsâ vertere veru  
facillimè.*

**V**Idi alicubi in celebri quodam Religiosorum Monasterio, *Versus aquâ  
vertere.* ut aqua in culinam derivata, & per admotum pro libitu canaliculum ligneum supra rotam haustris instructam præcipitata, verteret longam perticam prædictæ rotæ insertam, & sub culinæ fornice, nè coquum discurrentem impediret, ad oppositum murum usque derivatam. Huic in fine prope dictum murum inserta erat alia rota dentata, quæ innexum sibi tympanum, & cum eo perticam, rotamque aliam perticæ innexam, tandemque hac veru, tympanulo mediante, verteret.

In apposito schemate focus est A; Murus aquæ fluenti oppositus, B C; Aqua saliens, D. I H G est ferreum brachium, habens in G foramen; cui, & foramini E, inserta est longa pertica. Huic inserta est rota T haustris instructa; quæ cum aqua implentur, pondere suo deorsum tendunt, & rotam ipsam cum pertica E G vertunt. F est rota dentata, eidem perticæ inserta: quæ dentibus suis admordet strias tympani striati K. L M est pertica, cui circumdatum est tympanum K. B L est clavus ferreus, cujus foramini L; & foramini M, inserta est pertica L M, ut facillè verti possit. Huic perticæ circumposita est alia rota dentata N, horizontaliter prostrata, dentibus  
L deor-

*Vide  
Iconis X.  
Fig. II.*

deorsum versis. C O est veru, insertum foramini C muri, & foramini R virgæ ferreæ R S. Q est tympanulum ferreum striatum, veru circumpositum, cujus strias admordent dentes rotæ N.

Dum ergo aqua ex D præcipitatur supra rotam T; hæc cum sua pertica E G in gyrum versa vertit rotam F: hæc autem circumducit tympanum K: hoc perticam L M, cum rota N: hæc tympanum Q, cum veru O C, & assatura T.

Si vis ut motus machinæ quiescat, derlva aquam ex D fluentem aliò per subiectum canaliculum. Quando usui non est machina, auferatur veru C O, & pertica L M, nè impedimento sine.

## PROPOSITIO LXXXIX.

*Numerum ab alio scriptum divinare, sine prævia interrogatione.*

*Divinare  
numerum  
ab alio scri-  
ptum,*

**I**N Centuria II. & III. trademus praxes aliquas, conceptum, aut positum ab aliquo numerum divinandi, sed nunquam sine prævia interrogatione. Nunc modum tradimus, scriptum aliquem ab alio numerum in mensa, aut charta, divinandi sine ullo examine prævio. Fit hac ratione.

I. Jube aliquem scribere quemcunque numerum. II. Jube eum duplicare. III. Jube summæ addere numerum quemcunque à te pronuntiatum. IV. Jube summam totam dividere. V. Jube à dimidio subtrahere numerum primo loco ab ipso scriptum, & residuum scribere. Hoc dimidium semper & infallibiliter erit dimidium numeri, quem tu addere jussisti. Scies itaque quem ipse numerum ultimo loco scripserit.

EXEM-

## EXEMPLVM I.

Scribat quis 12. Duplet, & habebit 24. Jube addi 10, & habebit 34. Dimidiet hanc summam, & habebit 17. Subtrahat ab his 12, numerum scilicet primo scriptum, & habebit residua 5; quæ sunt dimidium numeri 10, quem iussisti addi,

12
12
24
10
34
2
17
12
5

## EXEMPLVM II.

Scribat alius primo 20. Duplet, & habebit 40. Addat 13, habebit 53. Dividat hæc per 2, seu dimidiet, & habebit 26½. Auferat ab his 20, numerum videlicet primo loco scriptum, & habebit pro residuo 6½. Quæ cum sint dimidium numeri 13, quem iussisti addi; scies quem numerum ultimo loco scripserit alter.

20
2
40
13
53
2
26½
20
6½

Ratio operationis clara est. Quia enim numerus primò scriptus, & duplum unà cum numero à te addito dimidiatur; resultat numerus primò scriptus, & dimidium numeri à te additi. Si ergo auferatur ab hoc numerus primo loco positus, remanet necessariò dimidium numeri quem addere iussisti.

## PROPOSITIO XC.

*Aliter scriptum ab aliquo numerum sine prævio examine cognoscere.*

I. Jube alterum scribere numerum quemcumque te non vidente, & tu quoque altero non vidente scribe quemcumque numerum. Quod quò deinde iusseris eum facere cum suo numero, tu quoque fac cum tuo. Itaque II. Jube ut suum

*Divinare  
aliter nu-  
merum ab  
alio scriptum.*

numerum multiplicet per quemcunque numerum quem ipsi dicis, & per eundem tu quoque multiplica tuum numerum. III. Jube ut productam summam dividat per lubitum tibi numerum, & per eundem tu etiam tuum divide. IV. Jube ut Quotientem suum per aliquem à te nominatum numerum multiplicet, & per eundem multiplica tuum Quotientem. V. Dic ut summam suam dividat per numerum quem primo loco scripsit, & tu divide summam tuam per numerum à te primo loco scriptum. His peractis, habebis tu eundem Quotientem cum ipso. Dicere ergo poteris, quem numerum ultimo loco scripserit.

Numerus alterius.

$$\begin{array}{r}
 4 \\
 2 \\
 \hline
 2) \quad 8 \\
 \hline
 4 \\
 10 \\
 \hline
 40 \\
 2 \\
 \hline
 4) \quad 80 \\
 20
 \end{array}$$

Numerus tuus,

$$\begin{array}{r}
 8 \\
 2 \\
 \hline
 2) \quad 16 \\
 \hline
 8 \\
 10 \\
 \hline
 80 \\
 2 \\
 \hline
 8) \quad 160 \\
 20
 \end{array}$$

EXEMPLVM. Scribat aliquis te nescio 4, & tu ipso nescio scribe 8. Multiplicet uterque suum numerum per 2, & habebit ipse 8, tu verò 16. Dividat uterque suam summam per 2, & habebit alter 4, tu 8. Multiplicet uterque suum Quotientem per 10, habebit alter 40, tu 80. Multiplicet uterque suam summam per 2; habebit alter 80, tu 160. Dividat alter suam ultimam summam per 4, & tu tuam per 8, habebit uterque 20. Scies ergo quòd alter ultimo loco scripserit 20.

Ratio clara est, quia ut 4 ad 8, ita 8 ad 16, & ita iterum 4 ad 8, & ita 40 ad 80, & ita 80 ad 160.

Ergo ut 4 ad 8, ita 80 ad 160.

Et ut 4 ad 80, ita 8 ad 160.

Quo-



Quoties ergo 4 continentur in 80, toties 8 continentur in 160. Si ergo sciam, quoties meus primus numerus continetur in mea ultima summa; Scio etiam, quoties alterius primus numerus continetur in ipsius ultima summa.

## ANNOTATIO I.

**P**otest abbreviari processus, & potest ulterius continuari, quousque libet. Nam si alter divideret 40 per 4, & tu divideres 80 per 8; uterque inveniret 10 in *Quoto*. Et si alter divideret 4 per 4, & tu 8 per 8; uterque inveniret 1.

## ANNOTATIO II.

**S**i habitis ultimis *Quotis*, jubeas alterum addere suo *Quoto* numerum à se primò scriptum, & tibi dicere totum productum, ab eoque subtrahas tuum ultimum *Quotum*; scies simul numerum primo & ultimo loco ab ipso scriptum.

## PROPOSITIO XCI.

*De suis nummis tribuere alteri minùs habenti, ut habeat tot, quot tu habebas, & retinere tot quot alter habebat.*

**I.** Jube aliquem accipere clanculum quot vult nummos, nuncies, aliasque quascunque res. **II.** Dic ut jubeat te accipere quotcunque vult, plures tamen quàm ipse accepit. **III.** Jube suum numerum indicare, tuque de tuo tot appone, ut habeat eundem numerum quem tu habebas. Retinebis tu tot, quot ipse ab initio habebat.

*Divinatio  
alia arith-  
metica.*

**EXEMPLVM.** Accipiat quispiam clanculum 10 nummos, jubeatque te accipere 18. Dic ut exponat in mensa suos nummos, & tu de tuis adde tot, donec sint 18; retinebis 10. quot scilicet initio habebat.

Ratio clara est: si enim ego habeo plures nummos quàm alter, ergo habeo tot quot ipse, & insuper excessum: si igitur do ipsi, ut habeat tot quot ego habebam, do ipsi excessum: ergo manent mihi tot quot ipse habebat.

## ANNOTATIO I.

*Secretum hoc reperi inter Secreta manuscripta P. Athanasij Kircheri, quorum jam saepe mentionem feci, sed adeo obscure pressam, ut diu intelligere non potuerim. Sic enim apert. Siquis à me quaerat, quot habeat in manu calculos absconditos; rogabo ego illum, quotum ad numerum velit illos à me perducì: & tunc mihi tot supererunt, quot ille habebat. Verbi gratià, ille 15 habet calculos; rogat me ut ad 20 perducam. Tum ego clanculum 20 sumo, & rogo quot habeat. Cùm 15 ostenderit, tribuam illi 5, & mihi quot ille habebat supererunt. Oedipò sine dubio hic opus est. Volunt dicere: Siquis in manu habens calculos absconditos, petis à me ut dirinam quot habeat; petam ego, ut indicet mihi quot velit à me accipi, ita tamen ut plures habeam quàm ipse. Quos ubi accepero; dico, me ipsi de meis daturum, ut habeat tot, quot ego habeo, & ego retineam tot, quot ipse habet. Exempli gratià, ille accepit clanculum 15, & jubet me accipere 20: ostendit mihi suos 15, quibus ego de meis 20 addo 5, & ipse habet 20, ego retineo 15.*

## ANNOTATIO II.

*Si ex circumstantiis rerum colligere potes, quot circiter accipere tu debeas, ut habeas plures res quam ipse habet (ut si quis ex cumulo aliquo exposito accipiat nuces, poma, aut etiam nummos: tunc enim facile colligere potes quot circiter acceperit, & quot tibi accipiendi, ut habeas plures quàm alter) adhuc occultior & mirabilior est doctrina. Tunc enim si alter exponat suas res, & tu us adicias ex tuis, donec aquentur tuæ; retinebis totidem, quot ipse exposuit.*

## PROPOSITIO XCII.

*Et quatuor numerorum seriebus quem quilibet è  
quatuor personis mente conceperit,  
edicere.*

PRaxin docet *Schruventerus* in Delictis Physico-Mathem. Divinatio  
ad hoc alia  
arithmetic  
tica.  
Par. 1. quæst. 21: quæ quia facilis, ingeniosa, & jucunda est,  
nec parum admirationis affert ignaris modi operandi, placuit  
huc apponere. Quod autem sit cum quatuor seriebus nume-  
rorum, & quatuor personis, fieri potest cum tribus, quinque,  
sex, & quotquot volueris. Sic autem proceditur.

Ad sint quatuor personæ, quarum nomina sint A, B, C, D.  
Primò scribe in mensa totidem series quorumcunque numero-  
rum dispositas in crucis formam, hac ratione.

	B	
	12	
	1	
	7	
	9	
A 14. 15. 11. 6.	O. 3. 5. 10. 13. C.	
	8	
	13	
	4	
	2	
	D	

II. His factis, dic ut persona A mente concipiat nume-  
rum aliquem ex serie Ao, & B alium ex serie Bo, & C alium ex  
serie Co, & D alium ex serie Do. Concipiat autem A nume-  
rum 15, B numerum 12, C numerum 3, D numerum 2. III. His  
etiam factis, dispone aliter dictas numerorum series, ita nimis  
rum, ut quatuor numeri inter Ao sint proximè circa O, & qua-  
tuor numeri inter Bo sint circa priores quatuor, & quatuor in-  
ter Do sint circa tertios quatuor, prout sequitur.

B  
8  
3  
12  
14  
11  
7  
10  
4  
D

A 2. 13. 9. 6. O. 15 1. 5. 13. C.

IV. Factâ hac dispositione, certum est, numerum ab A conceptum esse inter primos quatuor qui proximè o circumstant, nempe inter 6. 14. 15. 11. & numerum à B conceptum esse inter secundos quatuor qui o circumstant, nempe inter 9. 12. 1. 7. & numerum à C conceptum esse inter tertios quatuor, qui o circumstant, nempe inter 5. 10. 13. 3. & numerum denique à D conceptum esse inter quartos & ultimos, qui o circumstant, nimirum inter 2. 8. 13. 4.

V. Quære jam ex singulis personis, in qua serie novæ dispositionis sit numerus ab ipsis conceptus. Respondebit A, suum esse in serie Co: unde tu colliges infallibiliter, esse 15, quia est proximus ipsi o. B respondebit, suum esse in serie Bo: unde tu iterum colliges, esse 12, quia est secundus ab o. C respondebit, suum esse in eadem serie Bo; & tu dices, esse 3, quia scis esse tertium ab o. D denique respondit, suum esse in serie Ao; & tu dices, esse 2, quia scis esse quartum ab o.

## ANNOTATIO.

**I**dem est modus procedendi, si scribantur quicunque numeri, & quocunque series. & quicunque obtineat locum centri; dummodo fiant tot series, quot persone sunt quæ numerum aliquem concipere debent; & dummodo in qualibet serie ante centralem numerum tot scribantur, quot adjunt persona, & quot scripta sunt series.

PRO.

## PROPOSITIO XCIII.

*In quo digito manus annulum quispiam gestet,  
divinare.*

**P**ROblema hoc proponit ac resolvit *Gustavus Selenus* in Cryptographia pag. 487. ex quo ita idem resolvo.

I. Statue ordinem inter digitos manûs, ut pollex sit 1, *Divinare in quo digito quis gestet annulum.* index 2, medius 3, annularis 4, auricularis 5. Erit itaque unicuique digito attributus unus numerus. II. Jube ut indat quis annulum cui vult digito, te nescio; deinde numerum digiti duplicet, & ad duplum addat numeros reliquorum digitorum simul in unam summam collectos, & aggregatum tibi significet. III. Ab hoc aggregato subtrahat 15; residuus numerus indicabit tibi digitum in quo annulus est.

## EXEMPLA.

Pollex.	Index.	Medius.	Annularis.	Auricularis.
1	2	3	4	5
2	2	2	2	2
2	4	6	8	10
14	13	12	11	10
16	17	18	19	20
15	15	15	15	15
1	2	3	4	5

**EXEMPLUM I.** Habeat quis annulum in pollice, significato per 1. Duplicet 1, habebit 2: addat numeros reliquos digitis attributos simul in unam summam collectos, nempe 2, 3, 4, 5, quæ simul faciunt 14: habebit 16: subtrahat ab hoc aggregato 15, remanebit 1. Ergo annulus est in primo digito seu in pollice.

EXEMPLVM II. Habeat alius annulum in annulari, seu in digito 4. Duplicet hunc numerum, habebit 8: addat summam numerorum reliquis digitis attributorum, nempe 1, 2, 3, 5, quæ simul faciunt 11; habebit 19; subtrahat ab hoc aggregato 15, remanebunt 4. Ergo in quarto digito est annulus.

Ratio facilis est. Quia enim omnes quinque numeri, quinque digitis attributi (nempe 1, 2, 3, 4, 5,) simul sumpti, efficiunt 15; si ad duplum alicujus numeri digitum significantis addo summam numerorum reliquos digitos significantium; habeo 15, & insuper numerum digiti in quo est annulus. Si ergo ab hoc aggregato subtraho 15, necessariò remanet numerus digito, in quo annulus est, attributus.

## PROPOSITIO CXIV.

*Quæ plurimum personarum, quoto in digito, & quoto in digiti articulo, annulum gestet, divinare.*

*Divinare in quo digito, & articulo, unus à pluribus annulum gestet.*

Sint quotcunque personæ. Constitue inter illas ordinem, ut sciatur quæ sit prima, quæ secunda, quæ tertia, &c. Constitue item ordinem inter digitos, & articulos, sitque pollex sinistræ manus primus digitus; auricularis sinistræ, quintus; auricularis dexteræ, sextus; pollex dexteræ, decimus. Item extremus cujusque digiti articulus, sit primus, deinde sequatur secundus, demum tertius.

His constitutis, porrige personis annulum, & jube ut una ex illis clàm inserat illum cui placet digito, & cui lubet articulo (quod tamen sciat unus aut plures ex omnibus) & paulisper rede. Tum reversus, operationem institue.

Proponam duos modos operandi: unum simplicissimum, & ferè apertum cuilibet; alterum compositum & artificio quodam tectum, nè modus procedendi notetur. Primus est fundamentum secundi.

Pri-

## Primus Modus.

I. Jube aliquem, qui scit quota persona, quoto in digito, & articulo annulum habet, multiplicare numerum personarum per 10. II. Prodncto addat numerum digiti. III. Productum multiplicet per 10. IV. Addat numerum articuli in quo est annulus. V. Manifestet tibi ultimam summam. In qua, prima figura ad dexteram denotat articulum, secunda digitum, reliqua aut reliquarum personarum.

Notandum tamen, quando secunda figura est zerus, signum est annulum esse in decimo digito. Et tunc ex precedenti figura ad sinistram debet accipi mutuo unitas, & addi ad zerum, ut fiant 10, & ideo figura precedens valet unâ unitate minùs.

EXEMPLVM. Annulum habeat persona 5, in digito 4, in articulo 3. Jube multiplicari numerum personarum per 10, habebit 50. Jube addi numerum digiti, habebit 54. Jube hoc productum iterum multiplicari per 10, & habebit 540. Jube addi numerum articuli, & habebit 543. Horum primus numerus ad dexteram significat articulum, secundus digitum, tertius personam. Sic ergo stabit Exemplum.

$$\begin{array}{r}
 5 \\
 10 \\
 \hline
 50 \\
 4 \\
 \hline
 54 \\
 10 \\
 \hline
 540 \\
 3 \\
 \hline
 543.
 \end{array}$$



## Secundus Modus.

I. Jube unum ex omnibus, qui scit quæ persona, quo in digito & articulo annulum gestet, mentaliter duplicare numerum personæ quæ eum habet. II. Duplo addere 5. III. Summam totam multiplicare per 5. IV. Producto addere numerum digiti in quo est annulus. V. Conflatum multiplicare per 10. VI. Multiplicato addere numerum articuli in quo annulus est. VII. Tandem totam ultimam summam tibi indicare jube. Ex qua summa si abijcias 250, residui primus à dextris numerus indicat articulum, secundus digitum, tertius (quicumque sit, sive simplex, sive compositus) personam quæ annulum habet.

Nota tamen, ut antea, si secunda à dextera incipiendo figura est zerus, annulus est in decimo digito, seu in pollice manus dexteræ; ideoque à præcedenti versus sinistram figura debet detrahi unitas, & attribui zero, & residuum versus sinistram debet multari unâ unitate.

EXEMPLVM I. Sint triginta personæ, occultetque vigesima annulum, in digito quarto (hoc est in annulari sinistræ manus) in articulo secundo seu medio. Numerus personæ est 20: hic duplicatus dat 40: his addita 5, dant 45: hæc multiplicata per 5, faciunt 225: his additus numerus digiti, nempe 4, facit 229. hæc rursus multiplicata per 10, produciunt 2290: his additus numerus articuli, nempe 2, dat 2292. Ab hac ultima summa si subtrahas 250, remanent 2042: cujus primus ad dexteram numerus 2, significat articulum secundum; secundus 4, digitum; reliquum 20, personam quæ annulum habet.

EXEMPLVM II. Habeat annulum persona 23, in digito 10, in articulo 1. Numerus 23 duplicatus, dat 46; & 5 addita, faciunt 51: hæc multiplicata per 5, produciunt 255: additis 10, qui est numerus digitorum, fiunt 265: hæc multiplicata per 10, dant 2650: quibus addita unitas, quæ est nota primi articuli, facit 2651. Ab his ablata 250, reliquunt 2401: cujus summæ prima

prima figura significat primum articulum; secunda cum unitate mutuata à 24, significat digitum; residuum 23 significat personam. Sic ergo stabunt Exempla.

Persona — 20	23 — Persona
<u>2</u>	<u>2</u>
40	46
<u>5</u>	<u>5</u>
45	51
<u>5</u>	<u>5</u>
225	255
Digitus — 4	10 — Digitus
<u>219</u>	<u>265</u>
10	10
2290	2650
Articulus — 2	1 — Articulus
<u>2292</u>	<u>2651</u>
250	250
2042	2401

## ANNOTATIO I.

**V**T constet ratio operationis, modique procedendi, notandum est, in primo exemplo inveniri debere hunc numerum, 2042: inventa autem sunt 2292: itaque subtrahendus est aliquis numerus, ut maneant 2042: hoc fit, si subtrahantur 250 à 2292, tot ergo subtrahenda sunt.

Reperiretur porro numerus 2042, si primus numerus 20, multiplicaretur primo per 10, ut fierent 200: deinde adderentur 4, & productum multiplicaretur iterum per 10, ut fierent 2040: ac deinde adderentur 2. Hoc autem fit in praesenti exemplo, quamvis artificium occultetur: nam primo duplum numeri 10, id est, 40, multiplicatur per 5, quod idem est ac si 20 multiplicarentur per 10, & fierent 200. At quia ad 40, addita sunt 5, ac proinde 45 multiplicantur per 5:

resultant ultra 200, adhuc 25, atque adeo in unumversum 225. His quia adduntur 4, & fiunt 229, eaque multiplicatur per 10; resultant 2290. Hu iterum adduntur 2, & fiunt 2292. Habentur ergo 250 amplius quàm 2042; ideo subtrahi debent 250. Eadem est ratio in alijs exemplis.

Posses itaque primus numerus 20 multiplicari primò per 10, ut fierent 100; deinde addi 4, ut fierent 204, & hoc iterum multiplicari per 10, ut fierent 2040, & addi 2, ut fierent 2042. At ut celetur artificium, multiplicatur duplum primi numeri, & præterea 5, per 5, resultantque 25 plus quàm 200, nempe 225. Et quoniam hæc iterum multiplicatur per 10, ideoque ultra 200. multiplicata per 10, multiplicatur etiam 25 per 10; fiunt 250 plus quàm 2000. Ideo subtrahi debent 250 in fine operationis, ut dictum.

Ratio operationis itaque est, in his, & in omnibus alijs exemplis, partim ut primus numerus, quicumque sit, per multiplicationem geminam per 10, promoveatur versus sinistram, & obtineat tertium locum; partim ut celetur artificium procedendi: nam si solum procederetur per multiplicationem per 10, & additionem numerorum digiti & artificio, ut factum in primo modo; facile notaretur artificium.

## ANNOTATIO II.

UT operandi modus varietur, & artificium adhuc magis occultetur, potest ad duplicatum numerum persona habentis annulum, addi 1, vel 2, 3, 4, 6, 7, 8, 9, &c. Sed tunc si addatur 1, ex ultimo producto debent auferri solum 50; si addantur 2, auferri debent 100; si 3, 150; si 4, 200; si 6, 300; & sic consequenter, semper tot 50 amplius auferendo, quot amplius unitates fuerint additæ. Ratio ex dictis colligi potest. Nam si addatur 1, id multiplicatur primò per 5, deinde per 10, & fiunt 50, amplius quàm fieri deberent. Si addantur 2, ea multiplicantur primò per 5, & fiunt 10 amplius; deinde hæc per 10, & fiunt 100 amplius. Similis est ratio de cæteris.

## ANNO TATIO III.

**S**unt qui præter personam, digitum, & articulum, docent divinare etiam manum, an scilicet sit annulus in manu sinistra, quam primam consiliunt; an in dextera, quam statuunt secundam. At non est necesse: si enim ordo digitorum ab uno usque ad decem inchoetur à manu sinistra, & finiatur in dextera; si sciatur digitus, necessario sciatur & manus.

## PROPOSITIO XCV.

*Quos numeros infra 10. conceperint plures,  
divinare.*

**H**Æc praxis est præcedenti partim similis, partim dissimilis. Eam sic explico.

*Primò.* Si duo numeri fuerint concepti: jube numerum à primo conceptum duplicari; duplicatum augeri per 5; autum multiplicari per 5; producto addi numerum à secundo conceptum; summam augeri per 10. Si ab ultima summa auferas 35, remanebunt duo numeri à principio cogitati.

*Divinatio  
arithmetica alia.*

*EXEMPLVM.* Cogitaverit unus numerum 5, alter 9. Duplicetur primus, fiunt 10: addantur 5; fiunt 15: multiplicentur hæc per 5; fiunt 75: addatur numerus à secundo cogitatus, fiunt 84: addantur 10; fiunt 94. Ab hac ultima summa subtrahantur 35, & remanent 59.

*Ratio operationis est, quia hac ratione disponuntur duo numeri concepti, ut primus obtineat locum denisatum, & secundus locum unitatum, & præterea adduntur 35: qua debent iterum subtrahi.*

*Secundo,* si tres numeri fuerint concepti, procedatur cum primo & secundo ut jam diximus, ultima verò summa multiplicetur per 10, & producto addatur tertius numerus, atque ab ultima summa subtrahantur 350 & remanent tres numeri cogitati.

**EXEM-**

EXEMPLVM. Cogitaverit primus 5, secundus 9, tertius 2. Procedatur cum 5 & 9, ut in præcedenti exemplo, & ultima summa 94 multiplicetur per 10, ut fiant 940, & his addatur tertius numerus, ut fiant 942. Si ab hac summa subtrahantur 350, remaneant 592.

*Ratio est, quia præcedens summa augetur per 10, & additur tertius. Augeri ergo debet etiam numerus 35 per 10, & subtrahi a tota summa producta.*

*Tertio.* Si quatuor numeri concipiantur; procedatur ut cum tribus, & ultima summa multiplicetur per 10, productoque addatur quartus numerus, & ab ultima summa demantur 3500. Si quinque concepti sunt; proceditur ut cum quatuor, & ultima summa multiplicetur per 10, atque ab ultima summa auferatur 3550. Simili prorsus modo procedatur, si plures numeri sunt cogitati.


## PROPOSITIO XCVI.

*Quam quis rem è pluribus in orbem, aut in longam seriem dispositis tetigerit, aut mente notaverit, divinare.*

*Divinare  
quam quis  
rem ex plu-  
ribus conce-  
perit.*

**L** Eve hoc est, si animus ad artificium advertatur; quod tamen causam ignorantes mirantur. Proponatur ergo.

M. L. K. I. H. G. F. E. D. C. B. A.



**S**int res duodecim dispositæ in orbem, aut in longam seriem, ut sunt hæc dispositæ duodecim litteræ, quarum A sit prima, B secunda, C tertia, &c. Jube aliquem tingere aut concipere quo

quotamcunque, & numerum rei conceptæ competentem tribuere litteræ C, & dextrorsum per B, per A, per M, &c. eundo, numerare quindecim. In quam rem cadet numerus decimus quintus, ea est quam alter concepit, aut tetigit.

EXEMPLVM. Tetigerit aut conceperit quispiam G, quæ est septima ab A sinistrorsum eundo. Tribuat litteræ C numerum 7, & pergat dextrorsum numerare 15, hoc est, inclinat à C, & dicat in C septem, in B octo, in A novem, &c. cadet numerus 15 in G. Dices ergo, ipsum concepisſe, aut tetigiſſe rem G.

Ratio est, quia cùm res sint duodecim, & prima sit A; si incipias numerare à C, hoc est, à tertia re inclusive ante A, & pergendo dextrorsum numeres quindecim; cadet numerus 15 in A, & idem erit ac si res essent quindecim, quia ante primam, quæ est A, sunt tres aliæ, includendo ipsam A. Ergo si C constituas primam, & eas dextrorsus numerando quindecim, cadet numerus decimus quintus in A: si C constituas secundam, cadet idem numerus 15 in B: si C constituas tertiam, cadet in ipsam C: si quartam, cadet in D: si quintam, cadet in E; si sextam, in F cadet: si septimam, cadet in G, &c.

## ANNOTATIO I.

**S**i velis ut supra rem tactam, aut cogitatam cadat numerus major, aut minor, quàm 15; jube initium numerationis inchoari à re remotiori aut viciniori primæ rei A. Ut si velis in exemplo antecedente, ut numerus decimus sextus cadat supra rem tactam, hoc est, si velis rem 6 tactam inveniri in numero decimo sexto; jube attribuire 7 rei D, & numerare 16 versus C, B, A, &c. Si autem velis eam inveniri in numero decimo quarto, jube attribuire 7. res B.

## ANNOTATIO II.

**L**oco duodecim rerum possunt exponi quotlibet aliæ, ut 10, 12, 20, &c. Modus operandi ad divinandum rem tactam, semper est similis præcedenti. Sint enim expositæ res decem, ut

K. I. H. G. F. E. D. C. B. A.

quarum A sit prima, B secunda, C tertia. &c. tangatque aliquis rem sextam F, & velis ut numerus 20 cadat super ipsam. Dic ut à K inchoando attribuat illi numerum rei tacta, nempe 6, & numeret versus A 10: cadet enim numerus 20 supra F. Tangat alius rem quartam, nempe D, velisque ut numerus 12 cadat supra D. Dic ut incipiat à B, & attribuat ipsi numerum 4 rei tacta, numeretque versus A 12: cadet enim hic numerus supra D.

Hac ratione poteris eodem tempore variando occultare artificium, jubereque unum à re tacta numerare unum numerum, alium vero numerare alium numerum.

## PROPOSITIO XCVII.

*Sistere sanguinem è quavis parte corporis manantem.*

*Sanguinem  
Mors.*

Suprà Proposit. 84. remedium attuli ad sanguinem è naribus aut alia corporis parte stillantem sistendum; nunc aliud ad eundem è quavis etiam corporis parte manantem cohibendum enarrare lubet ex Mizaldo, qui ait, sanguinem ex quacunque corporis parte immodicè fluentem illicò sisti, si subtili & raro bombace involutum stercus suillum adhuc calens, in nares aliamvè corporis partem sanguine manantem intrudatur. Hoc tamen, uti & aliud illud quod infrà Centur 3. Propos. 12. referam, rusticis potiùs quàm Aulicis scriptum velim cum eodem Mizaldo, ut similes habeant labra lactucas, & nasi flores.

## PROPOSITIO XCVIII.

*Sanguinis fluxum è quovis vulnere erumpentis cohibere.*

Quod sequitur, docet Henricus Ranzovius apud Weckerum lib. 3. Secretor. cap. 4. circa finem, in hunc sensum.

Ineunte



Ineunte vere, cū ranæ semina prima sive ova proijciunt, accipe crassioris linē panni ulnas tres, vel quatuor, aut quotquot volueris. Hunc pannum cum hujusmodi ovīs ranarum bene abluito, & soli exsicccandum exponito. Exsicccatum iterum ac tertio lavato, & ad solem ut antea exsicccatum, ad usum diligenter servato. Cū sanguinem ē vulnere manantem sistere volueris, panni partem vulnere duplo majorem inde præcidito, ac instar cataplasmaris vulnere imponito. Sanguinis effusio statim sistitur, ut certum experimentum in pluribus comprobavit. *Nihil hic superstitionis video.*

*Sanguinem  
aliter sistere,*

## PROPOSITIO XCIX.

*Fætorem post comestum allium exhalatum  
abolere.*

**L**ongā experiētiā didici, quò calidiores sunt regiones, eò magis ab incolis allia appeti, ac pro delicijs devorari, non à pauperibus tantū, qui panem, sed à primoribus quoque, qui carnes aliosque cibos eo condiunt. Tam fætidis delicijs qui abstinent, dici vix potest quantā molestiā afficiantur, si mentis eorum aut colloquijs interesse contingat. Fætorem ab alijs exhalatum ut non percipias, remedium nullum scio quod salvā honestate ac erga primores reverentiā adhibeas: nullum ut exhalent qui manducarunt, hoc reperio, si post manducatum allium cruda faba superaddatur; aut betæ radix prunis tosta supermanducetur.

*Alij comestum  
fætorem  
abolere.*

## ANNOTATIO.

**M**inūs fædum, tetrum tamen odorem exhalant, qui porris vescuntur. Hunc non exhalabit, qui cuminum prægustaverit: nam ejus esu gravis halitus extinguatur.

## PROPOSITIO C.

*Raucedinem facillimè ac citissimè depellere.*

**C**laudam hanc Centuriam facili ac perutili ad raucedinem pellendam antidoto, quo non semel usus cum fructu est qui communicavit.

*Raucedi-  
nem depel-  
lere.*

Accipe allij capita bina aut terna, ac mundata tere, & cum porci pinguedine ad ignem liquefacta misce, donec unguentum fiat. Vesper antequam cubitum eas, calefac pedes, & unguento prædicto unge, ac pannis circumliga. Deprehendes manè omnem recessisse raucedinem.

Novit, qui mihi narravit, concionatorem in Gallia celebrem, qui hoc quoque remedio vocem recuperavit. Inchoarat is pro more patriæ quotidianas Quadragesimales conciones, at post dies aliquot tantam contraxit raucedinem, ut vix pro fuggestu dicentem perciperent propè stantes. Varia per dies aliquot, sed frustra adhibuerat remedia. Audiebat concionantem, sed voce raucâ, civis loci honestus, at pauper. Accedit dimissâ concione Oratorem, secretum prædictû pandit: vespere eodem id adhibet concionator, & die postero cum stupore omnium voce clarissimâ perorat.

Scripteram hæc, cùm in idem paulò distinctûs explicatum Incidi apud *Alexium Pedemontanum* lib. 1. Secretor. cujus Italica verba in hunc sensum formo.

Accipe duo aut tria capita allij, & munda, ac probè contunde, ac tere. Adde porci pinguedinem, & ova, ac cum allijs misce. Vesper iturus cubitum, pedes nudos, plantas præcipuè ad ignem calefac, eosque perunge dicto ex allijs & pinguedine unguento, continuando per aliquantulum temporis unctiorem, pedibus semper ad ignem admotis, & quantum tolerari potest calefactis. Hoc factò, indue soccos priùs calefactos, & lecto te committe; & in ipso lecto lumbos eodem prædicto unguento unge. Hanc curam triduo continenter adhibe, & liberaberis ab omni vel molestissima tussi. *Hac*

*Pedemontanus.*

JOCO-



# IOCO-SERIO- RUM NATURÆ

ET ARTIS,

*Sive*

## MAGIÆ NATURALIS MISCELLANÆÆ

### CENTURIA II.

Prooemium.

**I**mperscrutabiles sunt Naturæ recessus;  
 Artis adyta impervia. Ille magis utri-  
 usque secreta penetrasse existimandus  
 est, qui minus eorum ignoraverit. Nec  
 in grandibus solum, sed in parvis & multorum  
 æstimatione contemptilibus majestatem suam exe-  
 runt. Grandia persequantur alij; nos levia ferè  
 secta-

*sectamur hoc Opere; nec seria tantum, sed ludicra etiam, & jocosa. Hinc ergo exordiamur secundam hanc Centuriam, & inchoatam telam pertexamus.*

## PROPOSITIO I.

*Surdum oculis percipere sonos ac voces, mutum loqui, possibile est.*

*Surdi oculis percipientes loquentium voces.*

Quam mirabilem sæpe Natura se exhibeat in sensuum defectibus supplendis, abundè probavimus in *Physica Curiosa* lib. 3. cap. 33. ubi quamplurima enarravimus Mirabilia visus, auditus, odoratus, gustus, & tactus. Non minùs mirabile est quod refert Illustrissimus Eques *Kenelmus Digbæus* in tract. de Natura corporum cap. 28. num. 8. de nobili quodam Hispano à nativitate surdo & mutuo, qui sonos ac voces oculis percipiebat, ac perfectissimè discernebat, articulatèque loqui didicerat. Vtriusque effectus testis oculatus est ipsemet Digbæus. Erat Hispanus ille frater natu minor Comitissæ stabuli Castellæ, ita à nativitate surdus, ut nè bombardam quidem auribus admotam, cum exploderetur, auditu perciperet. Erat idem (quod ad primum consequens est) omnilinguæ ad loquendum usuprivatus: verborum enim sonum cum non audiret, ea intelligere ac imitari non poterat. Eximia nihilominùs oris venustas, & vivida oculorum acies, egregiæ intus latentis, optimèque dispositæ mentis argumentum erant; quam non immeritò dolebant omnes adeo incultam jacere, destitutamque auxilijs, quibus eâ rerum intelligentiâ imbueretur, cujus apprimè capax videbatur. Huic malo ut remedium afferrent, medicorum & chirurgorum artes in casum diu laboraverant. Inventus tandem est Sacerdos, qui desertam in se provinciam susciperet, pollicitus est Sacerdos, qui doceret, tum quid alij loquerentur intelligere, tum etiam ut ab alijs intelligeretur loqui. Quod tamen non primùm audientium

tium omnium fuerit exceptum, non seriò loqui Sacerdotem existimantium; non post multos tamen annos eventus secutus, pro miraculo fuit habitus. Inviçtâ etenim utriusque patientiâ, rarâ constantiâ, pertinaci labore tandem effectum fuit, ut nobilissimus ille juvenis perfectè verba proferret, aliosque secum colloquentes tam perfectè intelligeret, ut per integros dies, in crebo hominum consortio versatus nè verbum quidem perire pateretur. Cum hoc sæpe sermones miscuit Digbæus, dum esset in Hispania in comitatu Principis Cambriæ (Serenissimi postea Angliæ Regis) quem & ejusdem rei testem adducit. Unum inter loquendum familiare illi vitium erat, vocis nimirum inæqualitas: Sonum quippe à se editum cum non audiret, certâ lege moderari non poterat, quin modò contentiorem, modò remissiorem emitteret. Quanquam quo primùm tenore sermonem cæperat, eodem etiam ferè desinebat.

*Motus di-  
scit loqui  
perfectè.*

Hæc de locutione dicti Hispani nobilis testatur Digbæus: de auditione sequentia. Editorum ab alijs sonorum differentias percipiebat, gravesnè essent, an acuti; vocemque ab alio prolatam, quantumvis difficilem, exactè reddebat. Cujus rei etiam Serenissimus Cambriæ Princeps haud rarò periculum fecit, non in Anglicano duntaxat idiomate, sed & jussu qui in famulatio erant Cambro-Britannis quibusdam linguæ provinciæ suæ propriâ pauca eloqui; quæ omnia tam distinctè repetebat, ut Digbæo nihil mirabilius in toto illo Naturæ miraculo videretur. Quin & Sacerdos ipse qui eum instruxerat, ingenuè fatebatur, artis suæ præcepta eò usque non pertingere, ut id generis effectus constanti aliquâ certâque methodo producerent. Quos proinde ab alijs, quas ipse sibi attentâ observatione præscripserat, regulis nasci aiebat. Hoc verò ideo mirabilius videri meritò debet, quòd lingua illa Cambrico-Britanna instar Hebraicæ litteris, quas gutturales vocant, crebrò utatur, organique quo formantur motus non aliâ ratione dignosci possunt, quàm fortè ex motu aliarum oris partium in conspectu positarum, & ad eandem formationem quoquò modo concurrentium. Ex observato igitur vocalium organorum motu, quid alij loquerentur, intelligebat. Quare modò

modò non deesset lumen, quò loquentes intueretur, absque difficultate voces quantumlibet submissè prolatas percipiebat, & loquentibus colloquebatur. Vidit Digbæus ad ampli cubi-  
culi spatium verba repetentem, quæ ipse nè ad motis quidem ea proferenti auribus audire poterat. Si autem in tenebris constitutus erat, aut si eum quis aversâ fronte alloquebatur, nihil penitus intelligebat.

## ANNOTATIO.

*Quæ porro arte, quibusvè præceptis, Sacerdos ille discipulum tam ingeniosum ac docilem imbuere, Digbæus non prodit, sed lectorem remittit ad librum ab eodem Sacerdote Hispanico idiomate scriptum de Arte, quæ surdi ac muti ad loquendum instituendi sint. Hoc unum insinuat, simplicissima esse ejus artis principia. Mihi ad manum non est liber ille Hispanicus. Astimo tamen, Nobilis illius linguam minime ligatam, sed solutam fuisse; non potuisse tamen verba formare, quia quæ & quæ ratione formanda forent, nunquam intellexerat ob surditatem. Proposita ergo re quapiam surdo, appropriato eam vocabulo Hispanicè appellabat, & ad labrorum ac lingua suæ motum observandum primò deinde etiam paulatim imitandum compellebat discipulum, donec perfectè illud pronuntiaret. Eadem ratione cum rebus alijs procedebat, donec longâ assuetudine singularum rerum significata disceret, ac jussus pronuntiaret, & accuratâ organorum vocalium, dum alij loquerentur, observatione, ex motu ipso prolata verba discerneret. Quæ dico, confirmant binæ exempla quæ retuli in Physica Curiosa loc. cit. § 3. de duobus è Societate Patribus surdis, qui solo labiorum motu observato colloquentes intelligebant.*

## PROPOSITIO II.

*Cæci oculorum defectum alijs sensibus supplere possunt.*

*Cæci oculorum defectum alijs sensibus supplere possunt.*

*Citato proximi loco Physica Curiosa § 2. multa cæcorum mirabilia enarravimus, è quibus Propositionis hujus veritas elucescit.*



cescit. Etenim Diodorus stoicus cæcus, Philosophiam, Musicam, ac Geometriam didicit: Dydimus Alexandrinus Dialecticam ac Geometriam & didicit, & docuit, & commentaria in Psalmos scripta reliquit: Juvenis arcularius Ingolstadij duo minutiora molendina, piperi molendo idonea, cum scalis, arca, rotis, radijs, dentibus, axibus, omnibus denique rebus necessarijs exsculpsit: Joannes Ferdinandus, Poëta, Philosophus & Musicus insignis evasit: Nicasius de Werda Magisterij Philosophiæ gradum, Theologiæ Licentiam, Juris utriusque Doctoratum obtinuit, & Colonix publicè docuit. Alius cæcus per nasum vidit. Alius tactu colores discrevit. Alius statuas effinxit, tactos à se vultus ad vivum referentes.

His addo quod refert Illustrissimus *Digbamus* loco proxime citato, num. 7. de cæco quodam, quem filiorum suorum Prædagogum domi alebat, in quo non minùs, quàm in prædictis, mirabilis planè solertis Naturæ providentia, unius sensus defectum alterius sagacitate compensantis elucet. Erat ille oculis adeo captus, ut nè Solis quidem claritate moveretur; humor quippe crystallinus in utroque oculo penitus deperierat; perfectè nihilominus à reliquis sensibus erat instructus in ijs quæ ad oculorum officium pertinebant. Chartis pictis, & latrunculis tam peritè ludebat, ut à paucis vineeretur. Illud ludigenus, in quo rotundæ argenti alteriusvè metalli laminæ supra mensam pelluntur, aut in quo ferienda vel attingenda meta proponitur, perfectè callebat: tamen si eorum peritia in alijs hominibus vividam oculorum aciem, exactamque manus librationem requirit. In cubiculo xystovè aliquo oblongo, quibus aliquândiu assueverat, directè ambulabat, nullibi impingens. Mensæ accumbens tam aptè se ad aliorum morem componebat, ut qui eum non noverant, illi assidentes nullum in eo oculorum vitium suspicarentur. De hospitis jam primò advenientis, statim ac cum eo collocutus fuerat, statura, totiusque corporis habitu absque errore judicabat. Cùm discipulos suos declamantes audiret, ac dirigeret, gestum eorum, situmque corporum ex voce dignoscebat, adeo ut ubi loqui cæperant, propinè apprehenderet starennè, an sederent, aut aham corporis posi-



positionem tenerent. Quæ illius scientia efficiebat, ut non minus decenter se, dum loquerentur, componerent, quàm si intentis in eos oculis gestum eorum, actionemque quamlibet, visu observaret. Lumini quoque præsentiam & absentiam admirabili modo persentiscebatur: toto enim corpore, præsertim verò in cerebro, mutationem quandam experiebatur ad luminis præsentiam. Inde Solis ortum & occasum intenoscebat, & nubilum à sereno die discernebat.

## ANNOTATIO.

*T*Ametsi ea qua diximus, Natura potius quàm Artis sint privilegia, sedulam tamen observationem, & frequentem experientiam, à solerti ingenio factam, ad id multùm conferre, dubium nullum esse potest. Utraque ergo, Natura inquam, & Ars, in unum conspiret, necesse est. Lege etiam qua suprà docuimus ex Cardano de modo docendi cecum artem scribendi.

## PROPOSITIO III.

*Paucarum horarum spatio, linguam Hebraicam docere, ac discere.*

*Hebraicam  
linguam pau-  
cull horarum  
spatio  
docere, &  
discere.*

*P*Rodijt in lucem Anno 1633. *VVilhelmo Schickardo* auctore, Artificium, quod Horologium Hebræum ipse appellat, quo sancta lingua spatio 24. horarum, ab aliquot collegis sufficienter apprehendi queat, ante id temporis læpius comprobatum, ac typis vulgatum. Testatur eo in libro Auctor, se pridem lex, non ita pridem verò duodecim Theologiæ Studiosos artificio illo adeo feliciter instituisse, ut post exactas 24. horas (quarum quotidie singulas tantùm insumpserant) suâ instructione non indigerint amplius. Idem artificium ait in pluribus Unversitatibus benè successisse. Artificium in hoc consistebat. Omnia Hebraicæ Grammaticæ præcepta, fusè ab alijs tradita, ad pauca, & ab omni superfluitate purgata revocarat præcepta. Ijs addiscendis duodecim jubebat insumi horas, reliquas usui & exerc.

exercitio impendi. Quod priores duodecim attinet, nè multitudine obruerentur discipuli, labores distribuebat in plures, ut quod per se exiguum erat, multò minus fieret dividendo. Sex erant initio discipuli: singulis binæ cedebant horæ, quibus singulas assignabat materias. Primo Nominis addiscendi curam dabat, secundo Verbi, tertio Anomala tribuebat, quarto Affixa, quinto Vocales, sexto Accentus. A quolibet seorsim exigebat quod didicerat, quasi solus is adesset, cæteris interim mutis assidentibus, & Pythagoreo more tantùm auscultantibus. Sic onus in tot humeros distributum, levius gestabatur, cùm quilibet sextam tantùm partem ferret. Posterioribus duodecim horis totidem selectos textus Biblicos resolvebat ipse prælegendo, discipulis respondentibus. Si quis dualis, vel pluralis occurrebat, eum cui Nomen commissum fuerat compellabat; si quod præteritum Futurumvè, eum cui Verbum; si qua punctorum mutatio, eum cui vocales commiserat, &c. Sic in memoria sex Discipulorum, vivam habebat Grammaticam. Dum autem singuli suum depositum reddebant, eandemque rem toties in medium conferebant, assuescebant & cæteri, ac vel nescientes & per lusum quasi memoriæ mandabant, ut propemodum è vultu Collegæ, & antequam os aperiret, quid prolaturus esset, agnoscerent, adeoque priùs se didicisse, quàm discere sentirent, & quantum profecissent, ipsi mirarentur.

## ANNOTATIO.

**H**Aud dissimili ratione dictus Auctor Lexicon quoque inter sex discipulos distribuebat, & uni Radices ab Aleph, Beth, Gimel, alteri à Daleth, He, Vau, &c. inchoatas attribuebat, ut significata vocum, non è scripto Dictionario, sed è vivo penu suo confectum, & sine temporis jactura, depromere scirent. Compendiosa est, fateor, hac docendi atque discendi via, & si ingeniosos ac sedulos nunciscatur discipulos successum habet. At quàm pauci sunt qui constantiam, tamesi ingenium & tempus non desint, adferant? Quod tamen Schickardus, quod alij præstiterè, id alij quoque præstare poterunt. Non ergò vanum est consilium, nec inutile artificium.

## PROPOSITIO IV.

*Genuinam Hebraicæ linguæ lectionem sex horarum  
spatio docere.*

*Hebraica  
lingua le-  
ctionem sex  
horarum  
spatio do-  
cere, & di-  
scere.*

**Q**ui linguam sanctam Hebraicam discere per præcepta à Grammaticis tradita vult, primum omnium legere ac scribere addiscat necesse est. Vtriusque notitiam supponit Schickardus in artificio suo. Cæterum non mediocris difficultas in eo sita est, ut quis rectè legat ac scribat, nec pauci qui ad illius linguæ studium accedunt, eâ deterrentur, ac pedem referunt. Viam nihilominus complantarunt multi egregij Grammaticarum Hebraicarum Scriptores. Post omnes ante biennium, Anno videlicet 1659 Excellentissimus Dominus *Ioannes Michael Dilherrus*, vir scriptis libris à multo jam tempore clarus, & apud Noricos Philosophiæ Professor publicus, edidit *Atrium linguæ sanctæ Hebraicæ*, in quo spondet, sex horarum spatio dictam linguæ lectionem addisci posse. Et quod spondet, non semel præstitit. Atrio adjunxit sequenti Anno 1660. ejusdem *Perisyllium*, quo Hebraicam Grammaticam exhibet.

Sex porro horas ita distribuit dictus Excellentissimus Auctor. Hora I. agit de consonantibus, & absolvitur duabus Regulis. Hora II. de quarundam consonantium affectionibus. Hora III. de vocalibus. Hora IV. de quibusdam vocalium brevissimis, & Dagesch. Hora V. de quarundam consonantium quiete, & vocalium inclusione. Hora VI. agit de Tono. Singulæ Horæ habent suas peculiare Regulas, adeo concinnè in expanso folio velut in Synopsi dispositas, ut unico intuitu comprehendi omnes, & brevissimo tempore perlegi queant. Synopsin ipsam dabimus in Technica nostra Curiosa.

## ANNOTATIO.

**M**inùs promissis Dilherrus, quàm Schickardus, ideo majorem fidem invenis apud lectores, & plus præstat reipsa: quod enim promissis,

*non*

non semel opere ipso prastitit, uti à viris fide dignissimis audio. Experimentiam quilibet in se, & in alijs facere haud difficulter potest, si modo sedulitas & constantia non desiderentur.

## PROPOSITIO V.

*Omnes omnium Mundi nationum linguas, & scribendi methodos, ad unam redigere, est possibile.*

IN Technica curiosa Artificium propolabo novum, quo omnium totius Mundi nationum & gentium linguæ, omnesque scribendi methodi, quantumvis diversæ, ad unam redigi queunt. Qua scribendi methodo fieri potest, ut quis solum callens idioma suum vernaculum, omnia aliarum gentium idiomata, eodem scribendi genere exposita, & explicata, intelligat; & unum solum eodem genere scribendo, ab omnibus nationum hominibus, qui idem callent artificium, intelligatur.

*Linguas omnes Mundi ad unam redigere.*

Occasionem Artificij excogitandi Romæ mihi præbuit vir doctus è Societate nostra Hispanus natione, qui Anno 1653. cum inibi essem, eadem in urbe, ubi negotiorum causâ tum versabatur, edidit in uno solum expanso folio simile Artificium, cui præfecit Epigraphen. *Arithmeticus Nomenclator, Mundi omnes nationes ad linguarum & sermonis unitatem invitans, Auctore Lingua (quod mirère) Hispano quodam verè (ut dicitur) muto.*

Artificium in eo consistit, ut quælibet natio vocabula sua eandem rem significantia, iisdem characteribus Arithmeticis exprimat; reductis tamen prius rebus omnibus, aut præcipuis quæ frequentius sermone aut scriptione exprimi solent, ad certas classes. Rem paucis insinuare quidem possem, at non pro dignitate explicare; ideo ad citatum locum tractationem rejicio.

## PROPOSITIO VI.

*Clavis convenientia linguarum.*

Linguarum  
omnium  
convenien-  
tia clavis,

**H**Oc eodem Anno 1660. quo hæc scribo, prodijt Francofurri ad Mænum libellus, cui sequentes præfixi sunt Tituli. *Clavis convenientia Linguarum. Character pro notitia linguarum universalis. Inventum Steganographicum hætenus inauditum, quo quilibet suam legendo vernaculam, diversas, imò omnes linguas, unius etiam dici informatione, explicare, & intelligere potest.* Auctor est Excellentissimus Dominus Ioannes Iacobus Becherus, Spirensis, Medicinæ Doctor. Artificium eò collinat, ut quælibet lingua reliquarum omnium sit clavis, & ut quilibet in sua vernacula legenda intelligat cæteras. Explicatur id ab Auctore in *descriptione Operis*; & tale est. *Primo loco* ponit Tabulam æri incisam; in cuius initio character est certis ductibus formatus, & Alphabeti litteris aliquot interpunctus. Idem character frequenter & ordinatim tota in Tabula exprimitur, ac certis punctis, lineolis, ac numeris distinguitur. Atque hæc est clavis, seu Character, qui Operi denominationem suprâ expositam tribuit. Huic annectit Tabulam aliam typis excusam, pro variationibus sensuum, ut ipse appellat. *Secundo loco* ponit Lexicon pro resolutione primæ partis Characteris, in quo tanquam in Nomenclatore disponit Alphabeti ordine quælibet latinæ linguæ vocabula, atque à primo versus ultimum progrediendo, unicuique apponit numerum aliquem Arithmeticum, naturali servata progressionē, ita nimirum, ut sequens numerus semper proxime antecedentem unitate superet. Hoc Lexicon vult transferri in alia idiomata, & vocabula correspondentia signari iisdem numeris, quibus signata sunt vocabula Lexici latini. Cuiusque deinde Lexici vocabula numeris prædicto modo signata, jubet disponi ordine Alphabeti per modum Indicis, appositis iisdem numeris, qui antea erant appositi. Itaque latino idiomate excepto, quodvis aliud idioma requirit duo Lexica, seu unum cum Indice.

Usum Clavis seu Characteris, & Lexici seu Nomenclatoris, ipse Auctor fusè explicat in dicto Libello. In Technica  
curio-

curiosa specimen aliquod Artis hujus dabimus, & breviter totum inventum explicabimus.

## PROPOSITIO VII.

### *Indicantur varia Artificia Cryptographica.*

**P** Athanasius Kircherus ante multos annos excogitavit Artificium, quod linguarum Artificium appellat, quo quilibet per varias columellarum combinationes ac permutationes, quod vis sibi antea ignotum idioma legere & intelligere potest. Indicaverat id olim Augustissimo Imperatori Ferdinando III. & Serenissimo Guilhelmo Leopoldo Archiduci, Cæsaris Fratri. Placuerat utrique; & quia ingeniosum simul, & utile magnis Principibus, censuerant non evulgandum. Hinc nunquam triennij spatio à dicto Auctore impetrare potui, ut vel per rimulam Artificium mihi ostenderet. Idem nuper auctum misit ad Augustissimum Cæsarem Leopoldum I. ejundemque Serenissimum Archiducem Guilelmum Leopoldum, & ab utroque tantâ fuit humanitate susceptum, ac tot laudibus, ob artis subtilitatem, unâ cum Inventore deprædicatum, ut sine rubore legere litteras non potuerit, ipso Kirchero in litteris ad me datis satente. Institi iterum ac tertio, ut quod præsens non potueram, absens obtinerem, sed repulsam iterum sum passus, prætexente Auctore inter causas alias Cæsaris prohibitionem. Nihil ergo de tam subtili & utili invento habeo quod dicam.

*Cryptographica artificia varia.*

In Magia nostra Cryptographica, quæ est liber I. partis 4. Magiæ, diximus, Ioannem Trithemium scivisse artem Steganographicam, qua verbis quibuscunque quæ absenti indicare volebat, substitueret alia quæcunque quidvis aliud significantia. Similem artem à P. Athanasio Kirchero excogitatam, evulgavimus nos loco citato Syntagm. 4. appellavimusque Cryptographiam Kircherianam Grammaticam, Arithmeticam, sive, novum, arcanissimum, ingeniosissimumque artificium, occultos animi conceptus tegendi sub verbis & signis quibuscunque, ope Abaci numeralis, & duplicis Alphabeti. Quod quidem fieri potest qua-



quavis linguâ, & quovis characterum aut signorum genere, adeoque secure, ut quamvis in aliorum manus Epistola veniat, nullam secreti occultati suspicionem mentiorum ingerat; aut si fortasse aliquo ex capite id suspicentur, nulla humanâ industriâ in ejus cognitionem venire queant.

De alio Steganographico artificio, à se excogitato, ita scribit ad me Nilsa Silestorum, die 9. Decembris præteriti anni 1660. *R. P. Georgius Behm*, omnibus Mathematicis Disciplinis excellentissimus, earundemque in diversis Universitatibus Professor Publicus. *Habeo præterea*, inquit, *Steganographiam sevē paratam, sed nunquam edendam; in qua decennis laboravi. Modi mei sunt partim communicati à me Excellentissimo Domino Burgravio Pragensi, qui me elementis hujus Artis imbuist; partim Serenissimo Leopoldo Episcopo nostro, qui me dictante eos unâ horâ scripsit in suo cubiculo Olomutij; partim Augustissimo Imperatori Ferdinando III. qui paulo ante suam mortem ad me scribi curavit, nullum adhuc perfectiorem modum meo esse inventum. Credo Excellentissimum Dominum Burgravium multos meorum modorum P. Kircheri communicasse, fortassis nomine suo. Et ille modus quem Reverentia vestra impiepsit, vocatque Kircherianum, cum meis aliquibus connexionem habet, sed valde adhuc imperfectus est. Hactenus ille, inter alia multa, quæ in dictis litteris insinuat de novis suis inventionibus.*

Magister Adamus Kocháňski è Societate nostra, Mathematicos in Moguntina Universitate Professor, cum legisset Cryptographiam nostram, novum excogitavit Artificium, sub quavis oratione, quamlibet aliam totidem, quin & pauciorum characterum absque suspicione occultandi. Hoc fortassis in Technica curiosa propalabimus.

## PROPOSITIO VIII.

*Tachy-graphia, seu modus breviter ac celeriter scribendi.*

*Tachy-graphia.*

IN Magia nostra Cryptographica, quæ habetur in parte 4. Magiæ lib. 1. Syntagma. 1. cap. 1. §. 5. diximus, receptum apud Ro-

manus



manos morem fuisse scribendi per litterarum aut notarum compendia; ejusque artis auctorem fuisse potissimum Mecænatem, teste *Dione* lib. 8 qui ait, invenisse eum primum quædam litterarum notas, quibus celerrimè scribi posset; easque per Acilium libertum publicasse. Et has in usu fuisse suo etiamnum tempore significat *Quintilianus* lib. undec. Cap. 1. Alij tamen, ut ibidem retulimus, Tyroni Ciceronis liberto ejusmodi notarum inventum attribuant; quod postmodum Acilius & alij ampliarint. Notarum Ciceronis, earum scilicet quas Tyroni ejus liberto attribui diximus, meminit *Joan. Trithemius* in Præfat. Polygraphiæ, & lib. 6. ejusdem Operis, ubi & nonnullas affert, & explicat. Meminit & *Petrus bembus*, ac *Iustus Lipsius* locis à nobis in dicta Cryptographia citatis. Eas notas integras, è vetustis libris ac Bibliothecis erutas, suisque notis illustratas, edidit *Ianus Gruterus*. Trithemius ait, se dictarum Notarum codicem non parvum reperisse Anno 1469 in quodam Ordinis sui (hoc est, S. Bened. &c.) Monasterio, vetustate neglectum: & biennio post Argentinæ in Bibliotheca majoris Ecclesiæ reperisse Psalterium integrum, iisdem notis exaratum. Ego quoque earundem notarum codicem à Grutero editum repertante annos aliquot in celebri quadam Bibliotheca à libris reliquis separatum. Putarat nimirum vir bonus, qui id fecerat, Magicis Characteribus scaterere librum, ac proinde ab alijs separandum, nè in curiosorum ac minus cautorum manus incideret. Harum notarum specimen dabimus in Thechnica curiosa.

Nunc qui celeriter scribere volunt, utuntur certis abbreviationibus seu abbreviaturis (sic appellant) vocabulorum, sed sine ulla ferè certa regula, modoque unicuique lubito: unde contingit, ut qui in scripta eorum incidit, non nisi post multam lectionem, & diuturnam combinationem ea legere possit. Alij scribunt dimidia vocabula, alij primas tantùm syllabas, aut initiales litteras. Quod quidem in scribendis rebus sæpe occurrentibus, ac ferè obvijs probo; in alijs minimè.

## PROPOSITIO IX.

*Tachy-graphia recentissima.**Tachy-  
graphia re-  
centis.*

**I**nventa est ante annos aliquot, & idiomate Anglicano in lucem emissâ, nunc verò recentissimè, Anno videlicet præcedenti 1660. latinitati donata, & Londini in Anglia Impressa, *Tachy-graphia nova*, sive exactissima & compendiosissima breviter scribendi methodus, Auctore *Thoma Schelton*. Exemplar unum (exiguus est libellus) misit nuper ad me, pro suo singulari erga rem litterariam affectu, Lugduno Batavorum Nobilissimus atque doctissimus Dominus *Wilhelmus Schröterus*, Germano- Francus, & Amicus sincerissimus.

Artificium exactè describam, & graphicè delineabo in Technica curiosa: nunc breviter tantum delibo.

*Primò* itaque pro litteris Alphabeti Latini (quo plerique Europæi utuntur, aut non multum absumili) ordinarijs, excogitavit Auctor alias quæ uno & eodem calami ductu ac tractu, pennâ nunquam è charta sublatâ, efformantur, exceptis solum litteris x & y, quas intactas relinquit. Præterea eodem characterè utitur ad scribendas litteras q & u, quòd semper sibi mutuò adhæreant, nec in ullo vocabulo reperiat q, quod non immediatè sequatur u.

*Secundò*, Duplices consonantes, ut br, cl, er, fl, fr, &c. ita ex antecedentibus novi Alphabeti characteribus efformat, ut unico etiam ductu exarari queant.

*Tertiò*, Simili cum cautela omnia reliqua, ut sunt vocalium usus, diphthongi, consonantes i, & u, notæ & signa quæ ad initium finemque spectant verborum plurium syllabarum, aliaque similia, ita disponit, ut dum scribuntur, calamus quam fieri potest rarissimè è charta tollatur.

*Quartò*, Non exprimit omnes litteras in quolibet vocabulo scribendo aliàs exprimi solitas, sed illas tantum, quæ ad sensum intelligendum necessariae sunt. Noununquam etiam integras  
sylla-

syllabas omittit. Omitto alia, & loco citato reservo. Vide etiam *Georgium Harstorfferum*, in *Delicijs Mathematicis*, to. 2. par. 1. q. 9. ubi ejusdem artis meminit.

## PROPOSITIO X.

*Palimpsestos ac Pugillares diu integros  
conservare.*

**P**alimpsestos voco membranas deletitias, è corio asinino cretato gyplato vè confectas, cujusmodi in usu sunt calculatōribus & musicis, illis in notandis delendisq; numeris, his in modulorum compositionibus. Pugillares sunt, tabellæ plicatiles è simili materia concinnatæ: hocque solū differunt à palimpsestis, quod illi bivaluæ sint & plicatiles, hi solā membrana expansā content.

*Pugillares  
conservare  
diu incor-  
ruptos.*

Utrique diu conservantur sine attritione, si subinde pumice expoliantur. *Schwenkerus* in *delicijs Mathem.* par. 14. quæst. 10.

## PROPOSITIO XI.

*Cretâ non facîle debiles litteras formare.*

**L**itteræ ac lineæ nostratæ cretâ, quâ in Germania utimur, in tabula lignea aut lapidea efformatæ, minimo attritu obliterantur, & confunduntur, cū tamen sæpe pretium sit operæ ut perdurent etiam tactæ, difficulterque deleantur, ut cū calculatores, qui calculorum loco nummis utuntur, intra abacum linearem disponendis, eum cretâ delineant.

*Cretâ for-  
mare litte-  
ras non fa-  
cile dele-  
biles.*

Si vis ergo ut arithmeticus abacus cretâ in mensa, aliavè tabula efformatus, aut lineæ litteræque quæcunque pertinaciter hæreant, ac non temere confundantur, aut deleantur, quantumvis incaute manibus aut nummis tangantur: intinge cretam cerevisiæ rubræ, eaque scribe, aut lineas formâ; hærebit

scriptura pertinaciter : cerevisia enim ob crassitiem ac tenacitatem suam loco aquæ glutinosæ est ; quæ & ipsa sine dubio eundem præstaret effectum. *Schvunterus* lo.cit. quæst. 4.

## PROPOSITIO XII.

*Calamos anserinos reddere duros, & ad scribendum aptos.*

*Calamos  
anserinos  
reddere du-  
ros.*

**C**alamis detrahe pennas, eosque intra calidos pone cineres. Post moram aliquam extrahe unum post alterum, & manu sinistrâ arreptum colloca supra genu, dexterâ verò impone calami parti vacuæ cultum, & preme, sinistrâque calamum extrahe. Indurescet, & simul clarâ quadam lineâ notabitur. Quæ lineâ quibuscunque in calamis reperitur, indicat dictâ ratione fuisse aptatos.

## PROPOSITIO XIII.

*Scriptam Epistolam intra ovum absconditam  
absenti transmittere.*

*Epistola in-  
tra ovum  
abscondere.*

**S**criptam Epistolam concide in segmenta oblonga, quorum quodlibet unam contineat lineam. Hæc segmenta à dorso signentur numeris, aut litteris Alphabeti, ut sciatur quod primum sit, quod secundum, &c. In ovi cortice fiat subtilis rimula tantæ capacitatis, ut prædicta segmenta singulatim intrudi queant. Inclusis segmentis occlude rimulam calce & albumine ovi, ut ea non appareat, & ovum amico absenti transmittes.

## PROPOSITIO XIV.

*In tenebris scribere.*

QVi noctu evigilant, & lumine destituti notare quidpiam  
 Quod aut in somno, aut in vigilia incidit, cupiunt, plum- *Scribere in  
tenebris.*  
 bagine ( pennâ enim & atramento minùs commodè id fit, cùm  
 sæpè penna atramentum reddat aut nimis parcè, aut nimis co-  
 piosè ) ut æquales forment lineas, nec aliæ in alias incurrant, ut  
 fieri in obscuro afolet; hac utantur arte. Chartam compli-  
 cent in frequentes & strictas plicas, quarum una alteri secun-  
 dùm latitudinem incumbat: tum scribant primam lineam in  
 prima ac suprema plica, eâque evolutâ secundam in secunda, &  
 hac iterum evolutâ tertiam in tertia. Plicæ dirigent manum &  
 plumbaginem, & à recta linea aberrare non permittent.

## PROPOSITIO XV.

*Indices rerum in libris contentarum Alphabeti  
ordine conficere.*

SUnt qui hoc utuntur modo; quem tamen minùs approbo. *Indices li-  
brorum  
conficere.*  
 Caplam præparant in 23. aut 24. loculamenta, pro littera-  
 rum numero discriminatam. Exscribunt deinde omnia quæ  
 in Indicem volunt conjicere, appositis paginarum numeris, ita  
 ut quælibet res aut sententia, quas notant, peculiarem lineam, aut  
 lineas ab alijs rerum lineis distinctas fortiantur. Demum ex-  
 scindunt singulas lineas scriptas; & quæ ab A inchoantur, con-  
 jiciunt in loculamentum A; quæ à B, in loculamentum B, &c.  
 His omnibus peractis, describunt iterum convenienti ordine  
 primò omnes chartulas in loculamento A contentas, deinde  
 reliquas in reliquis loculamentis: aut dictas chartas ordinatim  
 adglutinant novæ chartæ.

Insanus hic labor est, aut minimùm ridiculus. Ego à multis  
 jam annis ita procedo. I. In capite 23. aut 24. pagellatum noto

litteras Alphabeti. II. Ab initio libri usque ad finem evolvo librum, & prout quæque res aut sententia occurrit, noto eam in charta, quæ initialem rei scribendæ in capite gerit litteram. III. Percurro omnes sententias in charta a notatas, & ad marginem è regione cujusque sententiæ noto litteram quæ proximè post a sequitur in primo vocabulo, v.g. notavi hæc vocabula in pagina a: adulatio, accipiter, Abbas, afflictio, &c. noto è regione dictorum vocabulorum litteras d, c, b, ff, &c. Idem facio in omnibus alijs paginis. IV. Exscribo omnia vocabula ab a inchoata hoc ordine: Abbas, Accipiter, adulatio, afflictio, &c. notando primò omnia vocabula quæ post a habent b: tùm illa quæ post a habent c, deinde d, &c. Eadem ratione noto & exscribo vocabula aut sententias inchoatas à B, à C, à D, &c. Experientia deprehendi hunc esse omnium facillimum modum. Si quis faciliorem suggererit, cum gratiarum actione acceptabo.

## PROPOSITIO XVI.

*Experimentum novum opticum proponitur.*

*Exprimū  
sum priū  
k u s bre  
ponitur, &  
examina-  
tur.*

QVod olim paucis notum, ideoque magnæ admirationi erat phænomenum, quo species rerum per foramen, seu librum, seu vitro convexo munitum, in cubiculum obscurum immissæ, & chartâ albâ, aliòvè plano candido ac nitido exceptæ, repræsentant res extra cubiculum positas cum suis omnibus coloribus, lineamentis, motibus, inversas tamen; vulgare jam est, & extra ferè admirationem. Lis tamen, quam inter Philosophos excitavit, nondum compolita est. Sunt enim qui mordicus tenent, in casu illo species rerum chartâ exceptas videri ut quod, adeoque visivæ potentiæ objectum non solum lucem esse, & colorem, sed ipsas etiam colorum species: quibus & nos assentimur. Argumenta hujus sententiæ attulimus in *Thaumaturgo nostro Optico*, seu in 1. par. Magiæ lib. 1. ubi fusè & accuratè totum phænomenum explicavimus. Alij, qui cum veneranda Philosophorum Opticorum antiquitate solam lu-

cem



cem & colores pro potentia visiva objecto ut quod admittere decernunt, non species in prædicto casu, sed res ipsas reflexe videri asserunt.

Hoc ultimum inter allos defendit, & typo impressis, ac publicæ disputationi propositis Thesibus propugnavit, in alma Cæsarea ac Episcopali Vniversitate Olomucensi R. P. Georgius Behm, è Societate nostra. Opinionem suam stabilire nititur hoc novo phænomeno, in hunc sensum, tamen si non iisdem verbis, proposito. *Si per oclusarum fenestra valvarum foramen vel liberum, vel vitro convexo munitum, species objecti in obscurum cubiculum intrantes, in debita distantia speculo plano excipiantur, & speculum eo loci ita moveatur, vel tuus oculus ita collocetur, ut in eo speculo foramen valvæ, & post hoc videas objectum (quod quidem foramen in speculo dictâ ratione visum, citatus Auctor vocat foramen opticum;) apparet objectum illud in speculo plano visum, & per tubum, & sine tubo, situ recto, non inverso, uti in charta contingit. Rationem adsignat, quia in eo casu, non fit decussatio radiorum extra oculum. Ita ille in Thesibus citatis definit. 8. & phænomeno 2. Addit tamen phænom. 3. Species immixtas, seu per nûdum, seu munitum vitro foramen, pingere imaginem inversam: In chartæ quidem superficie nitidam, in speculi verò obscuram: atque rationem inversionis esse decussationem radiorum per foramen, vel vitrum. Non negat itaque, si alio loco inspicitur speculum, quod species per foramen immixtas exceptit, imaginem objecti apparere inversam.*

Опичес-  
кое  
фа-  
но-  
мен.

Hoc tamen discrimen agnoscit inter utramque imaginem, quòd inversa sit obscura, recta verò sit nitida. Item quòd per inversam & obscuram objectum non repræsentetur post speculum, per erectam verò & nitidam post speculum repræsentetur. Sic enim ait phænomeno 5. *Obscura illa imago in speculo plano non repræsentat objectum post speculum: at si basin communem specierum cum foramine optico jungas, apparebis nitidum objectum post speculum. Ex hac diversitate deducit Auctor citato phænom. 5. nitidam illam imaginem à speculi superficie levi oriri, obscuram à scabra. Item obscuram hanc recessu speculi à foramine & basi communi augeri, nitidam verò illam eodem recessu minui.*

PRO.



## PROPOSITIO XVII.

*Aliorum doctrina ex dicto experimento deducta proponitur.*

**E**X prædicto experimento ac phænomeno P. Behm deducit ac stabilit quatuor propositiones. Nam *Primò* ait, obscuram illam in speculo imaginem arguere, species colorum non videri ut quod. Nam *aliàs*, inquit, non daretur causa, cur quò lævius est speculum, eò magis obscuratur imago illa. At verò dicendo fieri hic reflexam visionem ipsius objecti, omnia perbellè salvantur.

*Secundò* ait, objectum situ recto visum in foramine optico, arguere, species colorum non videri ut quod. Nam *cur*, inquit, *obscura imago speculo excepta, & optico foramini optice unita rectificatur, cum aliàs extra foramen opticum etiam in speculo inversa appareat?* Ex quo infert, non posse salvari hoc phænomenon, nisi per duas superficies, unam scabram, alteram lævem: ijs autem admissis, omnia posse salvari viâ reflexâ.

*Tertiò* ait, Quòd objectum nitidum appareat post speculum, obscura in ipsa superficie speculi, arguere, species non esse objectum ut quod. Nam *cur*, inquit, *nitidum objectum apparet post speculum in foramine optico cum obscura imago in ipsa speculi superficie conspiciatur?* Profecto aliam rationem assignare haud poteris, nisi quòd à lævi superficie speculi reflexa species eam profunditatem representent, ab aspera autem non item. Ex quo iterum infert, omnia per reflexionem salvari posse, & deberè.

*Quartò* ait, quòd speculo magis ad foramen opticum promotò, obscuratur inversa imago, & alia nitida oriatur, arguere idem quod antea. Nam *si species*, inquit, *excepta speculo terminant visionem, non est ratio cur suffocatâ illâ imagine obscurâ, alia nitida in foramine optico exoriatur.*



Fig. I.





Fig. II.



## PROPOSITIO XVIII.

*Nostra doctrina ex prædicto phenomeno  
stabilitur.*

**A**Dmittimus Experimentum ac phænomenum novum hætenus expositum, videri nimirum rerum imaginem in speculo plano nunc situ recto, nunc inverso; modò obscurè, modò nitide: sed ex hoc mirificè stabilimus sententiam nostram, Quod ut manifestum fiat,

*Speculum  
in cubiculo  
obscurò spe-  
cies rerum  
excipiens,  
representat  
vas situ re-  
cto, & in-  
verso.*

*Dico*, Quando per ocellularum valvarum foramen species objecti in cubiculum obscurum admissæ, opposito speculo plano excipiuntur, & ad oculum eo loco positum reflectuntur, ut videatur in speculo & foramen, & objectum situ erecto; non videntur tunc species in speculo, sed foramen & objectum per reflexas species foraminis & objecti. Quando verò removeatur speculum, & apparet objectum obscurè & situ inverso; videmus ipsas species, & non objectum.

*Primum* concedunt adversarij, & ulterius ita explicatur, & confirmatur. Sit enim objectum *AB*, foramen *C*, speculum *DE*, radij directi per foramen in speculum trajecti *AG*, & *BF*, oculus aspicientis *H*, radij reflexi à speculo in oculum ad angulos æquales angulis incidentiæ, *FH* & *GH*. Quoniam igitur radius reflexus *HG* ducit oculum *H* in punctum *A*, & radius reflexus *HF* ducit eundem oculum in punctum *B*: necesse est, objectum videri situ erecto, ut in *Magia Catoptrica* probavimus I. par. Magiz lib. 6. Confirmatur I, quia objectum *AB* apparet retro speculum, ut adversarij concedunt. ergo eo modo apparet, quo per reflexam visionem videri debet. Confirmatur II, quò magis appropinquat speculum foramini *C*, eò objectum in speculo apparet minus, ut concedunt ultrò adversarij, cujus rei causa est, quòd tunc basis *FG* trianguli *CFG* sit semper minor ac minor. Confirmatur III, quia oculus *H* non è quocunq; loco videre potest foramen & objectum erectum in

*Vide  
Icon. XI.  
Fig. L*

*Q*

*specu-*

speculo, vel potius retrò speculum, sed tantum ex uno certo ac determinato, illo nimirum, ad quem reflectuntur radij FH & GH ad angulos æquales angulis incidentiæ; ergo dum ita videt, visione reflexâ videt.

Ex his apparet, etiam in hoc casu decussari species objecti in foramine. Fallum ergo est nullam hîc fieri decussationem, ut adversarij dicunt.

*Probo I.* Si manente oculo in H, removetur speculum à foramine C, apparet eadem imago objecti AB, non erecto, sed inverso situ, nec ita nitidè ut antea, sed obscurè: Ergo non videtur visione reflexâ ut antea, quia sola remotio speculi plani ab oculo non invertit imaginem objecti, ut ex Catoptriciis constat. Neque obscuritas imaginis arguit visionem reflexam, sed oritur ex remotione speculi à foramine C. Si non videtur imago illa visione reflexâ, ergo vel directâ, vel refractâ: non hac; quia nulla causa refractionis adest; ergo directâ: ergo non videtur objectum, quia hoc visione directâ videri non potest positum retro videntem, sed solum id quod ante eum est positum: In casu autem nostro non nisi imago in speculo depicta, id est, species objecti, sunt ante videntem posita.

*Probo II.* Imago eversa in speculo videtur ab oculo posito in quocunque loco ante speculum, erecta autem non nisi ab oculo posito in determinato loco: ergo discrimen est inter ambas visiones; si ergo prima est reflexa, secunda non erit reflexa, sed directâ. Si directâ, ergo non videtur nisi objectum ante oculos positum: at objectum ipsum A B non est positum ante oculos, sed sola imago objecti in speculum recepta; ergo, &c.

*Probo III.* Si imago inversa in speculo videtur visione reflexâ: ergo etiam imago inversa in charta, aliòvè plano candido, videtur reflexâ visione; ergo non nisi ex eo loco videri poterit ab oculo, ad quem reflectuntur radij è charta ad angulos æquales angulis incidentiæ. At quis non scit hoc esse fallum, cum in quocunque situ & loco sit oculus ante chartam, imò & retro chartam transparentem constitutus, adhuc videat imaginem illam inversam? Præterea quis unquam ausus fuit dicere, char-

chartam ordinariam, quantumvis etiam lævem, habere vlm reflectendi radios incidentes tam perfectè, ut per illos distinctè videatur objectum visione reflexà? Adde quòd in charta imago appareat nitidissima & clarissima, saltem longè clarior quàm in speculo; & eò apparet clarior, ac nitidior, quò obscurius est conclave, & quò minùs luminis per foramen intrat: cur ergo nunquam apparet retro chartam, sed semper & ubique in superficie chartæ? Certè non potest hìc recurri ad obscuritatem imaginis, cùm ea longè sit clarior quàm dum in speculo etiam erecta videtur. Omitto alia argumenta quæ afferre possem: hæc enim ad convincendum non obstinatum abundè sufficiunt.

## PROPOSITIO XIX.

*Occurritur evasionibus adversæ sententiæ.*

**E**X argumentis præcedenti propositione factis satis manifestè patet, imaginem inversam objecti in charta, & consequenter etiam in speculo, non videri visione reflexà, sed directà, atque adeo non objectum, sed species objecti videri ut quod.

Conantur tamen evadere contrarium sentientes, & argumentis à nobis factis occurrere.

*Ad primum argumentum nostrum*, quòd illa imago immissa- rum in conclave obscurum specierum videatur ex omni parte cubiculi, ideoque non videatur visione reflexà, in qua angulus incidentiæ debet esse æqualis angulo reflexionis, *Respondent*, chartam in qua imago inversa apparet, esse speculum scabrum, habens in qualibet parte myriadem parvulorum speculorum. Hinc licèt (ajunt) unum speculum neget reflexionem ex illa parte, adfunt tamen alia quæ suppleant, ideoque servatur æqualitas angulorum incidentiæ & reflexionis. Addunt, hoc idem efficaciter confirmari inde, quòd quò lævius est speculum, eò magis obscuretur imago illa. Quin & in charta bene lævigata idem accidere, quod obscurior nimirum imago sit, quàm in non lævigata.

Manet tamen adhuc firmum nostrum argumentum. Nam *Primò*, si charta est speculum scabrum, reflectens species objecti ad oculum in quocunque loco positum, propter multitudinem parvulorum speculorum in scabra illa superficie existentium; cur ergo apparet imago illa inversa? *Secundò*, si dicunt, apparere inversam propter multiplices & in se mutuo incurrentes reflexiones; quæro ego, cur ergo in speculo, etiam politissimo, si à foramine competenter removeatur, apparet inversa? *Tertiò*, quid faciat ad rem, quòd quò lævius est speculum, & quò magis lævigata charta, eò magis obscuretur imago? Hoc nullam arguit reflexam visionem, sed arguit majus lumen in superficie lævigata: quò autem majus est lumen, eò obscurior apparet imago in plano opposito quocunque excepta.

*Ad secundum argumentum nostrum*, quòd si à charta fieret specularis reflexio, deberet objectum post chartam apparere, sicut fit in speculis: *Respondens*, ob stare huic apparentiæ post chartam, seu retro chartam, nimiam parvitatem speculorum, quorum singula non reflectunt ad eundem locum nisi species alicujus particulæ objecti; ad eum modum quo in contusi vitri pulvisculis confusus solùm quidam splendor solis apparet, non totus sol: & hanc ajunt esse causam, quòd non appareat profunditas objecti.

Adhuc tamen manet robur argumenti nostri. Demus enim, ob dictam causam non apparere profunditatem objecti, si speculi rationem habeat charta; quæro tamen *primò*, cur imago apparet inversa? Quæro *secundò*, cur in speculo plano, & politissimo, non apparet imago eadem inversa retro speculum? cur item apparet inversa? Quæro *tertiò*, si singula parva specula in charta scabra non reflectunt ad eundem locum nisi species particulæ objecti, uti in contusi vitri pulvisculis fit: cur tam venusta, tam integra, tam distincta apparet imago objecti, cum omnibus ejus coloribus, motibus, situ, distantia, & similibus, inversa tamen?

*Ad tertium argumentum nostrum*, quòd oculo post chartam constituto adhuc videatur per chartam transparentem pictura seu imago objecti, cum tamen reflexio non possit retrorsum  
agi;



agi; Respondent, posse reflexionem etiam retrorsum agi, quando tam immensa copia particularum specularium concurrat, quarum una ab altera speciem excipit, & reflectit; præsertim quando sunt rotunda, & variaz figuræ specula, qualia sunt innumera in scabritie chartæ; adeoque pro illa debilitate apparentiæ, quæ post chartam sit, sufficere istam debilem reflexionem.

Hic temperare mihi non possum quin sincerè enuntiem quod sentio, responsionem scilicet hanc non cohærere cum principijs Catoptricæ Philosophiæ. Nam *primò*, si oculus retro chartam constitutus, videt imaginem objecti anteriori chartæ superficiæ ab objecto radiante impressam, in superficie posteriore chartæ tanquam in speculo; necesse est, ut imago anterior reflectatur *primùm* in specula lateralia antè posita; deinde ab his in alia specula retro chartam posita; tandem ab his reflectatur in posteriorem chartæ superficiem. At dato quòd scabrities chartæ efficiat tot parva specula in anteriore chartæ facie, quot sunt in ea inæqualitates & tubercula; ubi sunt aut eadem parva, aut magna specula retro chartam, quæ radios reflexos anteriorum excipiant, & in posteriorem chartæ superficiem reflectant? *Secundò*, si charta circumdetur limbo aliquo cuiuscunque materiæ, figuræ, polituræ, scabritie, ut nulla sit speculorum parvorum suspicio in limbo isto; adhuc apparet imago oculo retrò posito. Ergo non videtur visio reflexâ. *Tertiò*, charta oppacetur retrò, ut imago in anteriore superficie depicta transparenere non possit, & retrò adglutinetur aut applicetur alia charta ejusdem rationis cum anteriore; nulla imago apparebit in illa, non obstantibus innumeris parvis speculis in anteriore charta dispersis, ex adversarij mente. Ergo si in charta transparente apparet retrò, alia non apparet quàm illa quæ transparet. *Quartò*, sed devorentur omnia illa absurda, & in Catoptrici inaudita, quæ adversarius admittit: cur imago anteriori superficiæ chartæ imprimitur inverso situ? Omitto alia multa quæ huic evasioni opponi possent.

## PROPOSITIO XX.

*Satisfit argumentis contraria sententia.*

UT magis appareat inanitas argumentorum contrariæ sententia, tamen si illa breviter proposuerim propol. 17. præcedenti, placet ea iterum iisdem eorum verbis adducere. Ita ergo pro se, & contra nos

Arguunt primò. *Obscura phaenomeni tertij imago arguit, species colorum non videri ut quod.* Nam aliàs in hac sententia non daretur causa, cur quò lævius est speculum, eò magis obscuretur imago illa. At verò dicendo fieri hic reflexam visionem ipsius objecti, omnia per belle salvantur. Cùm enim imago illa ad sensum stabilis oriatur ex innumerorum specillorum scabra superficie reflexionibus, ita ut semper postulatum primum (quòd angulus incidentiæ sit æqualis angulo reflexionis) servetur, imminutà scabritie necesse est obscurari imaginem. Ita illi. Tertium porro phaenomenum quod citant, hoc est ex iisdem: *species immissa seu per nudum, seu munitum vitro foramen, pingunt imaginem inversam, in charta quidem superficie nitidam, in speculi obscuram.*

*Respondeo 1.* Obscuram illam imaginem non arguere, speciem non videri ut quod; neque arguere objectum videri reflexè. Nam reflexa visione non apparet objectum inversum in speculo plano, sed erectum ut est. *Respondeo 11.* Causam cur quò lævius est speculum, eò magis obscuretur imago, esse lumen speculi. Patet experientià. Nam primò, cæteris paribus, eò obscuriùs apparet imago in speculo, quò magis tersum, politum, reflexivum est speculum: quò autem magis tersum, politum, reflexivum, eò magis lumen recipit, & remittit. *Secundò,* in charta lævigata obicurior est imago, cæteris paribus, quàm in scabra; lævigata autem splendorior est, quàm scabra. *Tertiò,* & præcipuè, quia sive species in conclavi obscurato excipiantur speculo, sive charta, sive quocunque plano, cæteris omnibus manentibus eò redditur imago obscurior, quò plus luminis per foramen admittitur, adeo ut si radij solis feriant directè

directè foramen, imago planè evanescat. Signum ergo evidens & irrefragabile est, obscuritatem oriri à luminis majore copia. *Respondeo III.* Ex eo quòd quòd levius est speculum, eò magis obscuretur imago (undecunque tandem proveniat obscuritas illa) non rectè arguitur, fieri reflexam visionem, quàm diu manente objecto erecto, & nullà adhibita arte ad imaginem erigendam, imago apparet inversa, & sæpè jam diximus, & constat ex Catoptrici: nam reflexio facta à speculari corpore plano, sive parum, sive multum levigato, & sive clarè, sive obscurè representante objecti imaginem, non invertit situm imaginis. *Respondeo IV.* In charta debito situ collocata, apparet imago nitidissimè; si magis approximetur charta foramini, ubi majus lumen est, obscuratur imago, & tamen non minuitur scabrities chartæ; ergo obscuritas non oritur præcisè ex imminutione scabritiei, sed ex augmento luminis. Omitto alias impugnationes.

Arguunt secundò. *Objectum situ recto visum in foramine optico, arguit species colorum non videri ut quod.* Nam cur illa obscura imago speculo excepta, & optico foramini optice unita rectificatur, cum aliis extra foramen opticum etiam in speculo inversa appareat? Hocine est naturam objecti ut quod induere? Non igitur hoc phenomenon salvari potest, nisi per duas superficies, unam scabram, alteram levem. Quod si admisérus, nosser es: omnia enim poteris viâ reflexâ salvare. Ita illi.

*Respondeo I.* Dum objectum situ recto videtur in foramine optico, non videntur colorum species ut quod, sed ipsum objectum visione reflexâ, ut probavimus proposit. 18. *Respondeo II.* Ideo obscura imago speculo excepta rectificatur, si speculum & oculus sint alio loco aut situ quàm antea, quia species per foramen intromissæ ac decussatæ reflectuntur ad oculum efficiendo angulos reflexionis æquales angulis incidentiæ, & dirigunt oculum ad eadem puncta objecti, eodemque situ, à quibus & quo situ procedunt, ut diximus proposit. 18. *Respondeo III.* Oculo in alio situ constituto, species objecti quæ in foramine decussantur, & imaginem inversam pingunt in speculo, non reflectuntur ad oculum per angulos reflexionis æquales angulis inci-

incidentiæ, quia hoc non in quolibet situ contingere potest, ut ex Opticis & Catoptricis patet: sed illa ipsa imago inversa radiat directis radijs in oculum, unde percipitur ab oculo eodem situ, quo in speculo depicta est. *Respondeo IV.* Illationem illam, Non igitur hoc phenomenon salvari potest, nisi per duas superficies, unam scabram, alteram lævem, esse omninò impertinentem. Nam sermo est de eadem superficie speculi, in qua semel apparet reflexè objectum situ recto, semel imago objecti situ inverso. Si dicat, loqui se de superficie lævi speculi, & scabra chartæ, in quarum prima apparet imago erecta, in secunda verò inversa. Respondeo primò, in speculi superficie non apparere imaginem objecti, sed ipsum objectum. Respondeo secundò, etiam in speculi supercie apparere imaginem inversam; ergo tamen si admittamus duas superficies, scabram unam, lævem alteram, nihil habet adversarius.

## PROPOSITIO XXI.

*Imago qua in charta est inversa, non apparet erecta, si tubo optico inspicitur.*

*Species rerum in cubiculo ob-  
seno exceptas chartæ, non ap-  
parent erectæ, si tubo  
optico inspiciantur.*

Placet ulterius pergere, & alias duas Adversarij rationes proponit. 17. propositas minutius excutere & refutare, quia ex dictis facilis est responsio. Solùm noto, virum quendam doctissimum in Curfu suo Philosophico Disput. 4. de anima sect. 2. ad probandum, species colorum per foramen in cubiculum obscurum admissas, & chartâ oppositâ exceptas, non se, sed suum objectum repræsentare, & quidem reflexè; dicere, species illas repræsentare distantias rerum inter se. Hoc ut ostendat, sequentia subiicit verba: quia si quis per tubum eam chartam aspiciat, quia tunc omnia apparent recta, prout in se sunt (sine tubo enim ostenduntur inversa) videbit distinctissimè objecta illa, unum post aliud, prout sunt in se. Quod ita evidens est, ut unus ex his, qui com-

STRATUM

trarium sentiunt, dum ei hanc observationem dicerem, ac ostenderem, debueris sateri, omninò videri distantias objectorum inter se. Et res est tam certa, ut sola egeat experientiâ incredulus. Secundo idem ipsum ostendo. Quia si quis accedens prope valde ad chartam, eamque movens diligentius intetur: manifeste videbit, ea objecta apparere post chartam, & dum chartam movet, novos omnes & charta maculas apparere multò viciniore oculo, & quasi objecta illa moverentur: Atqui species illæ non sunt intra chartam, sed in prima superficie; ergo non se representant, sed sunt objectum, cum proportionem aliqua ad visionem in speculo.

Hæc ille. Quæ cum legisset vir alius doctissimus, & in Moguntina Univerſitate sacræ Theologiæ tunc Professor, nunc hujus Herſipolitani Collegij nostri Rector; sciretque omnino falsâ esse, & experientiæ à se & alijs millies factæ prorsus contraria; jussit Matheseos Professore ejusdem Moguntinæ Univerſitatis ad virum illum, & tunc & nunc etiam nunc superstitem, plurimisq; libris scriptis clarissimum, scribere, & mentem ejus exquirere, aut modum quo aspiciendum foret phænomenum tubo optico, ut erectum appareret, & quasi retro chartam. Respondit vir ille, id sibi dictum ab alijs qui experimento se deprehendisse asseruerant.

Crediderim ego, qui experimentum fecerat, & viro illi docto exposuerat, ac monstraverat, habuisse tubulum ex eorum genere, qui objecta invertunt, ut in Dioptricis nostris explicavimus. Cum ergo imago in charta inversa esset situ, visa per tubulum illum apparebat erecta. Quod aut non adverterat, aut oblitus fuerat vir ille doctus, dum Cursum suum scriberet.

Ad objectorum distantiam quod attinet, apparet quidem illa, quia si plura objecta simul in eadem charta pinguntur, apparent alia retro alia, adeo ut distinctè discernatur quænam illorum sint remotiora, quæ viciniora: at nullâ ratione apparent retro chartam, ut in speculis fit, sed in eadem superficie chartæ. Provoco ad experientiam, quam quilibet facere potest.

## PROPOSITIO XXII.

*Ridicula sententia circa præcedens phænomenum refellitur.*

*Ridicula  
sententia  
circa phæ-  
nomenum  
opticum in  
cubiculo  
obscurò.*

INCIDI ante annos aliquot in Philosophiam manuscriptam, & ab optimo alioquin Philosopho, at qui experientias omnes ridebat, & Mathematicorum ac maleficatorum Philosophorum somnia appellabat, conscriptam, fuitque in Univerſitate quadam celebri Discipulis dictatam, & explicatam. In ea cùm retulisset phænomenum specierum per foramen in obscurum conclave admissarum, & in opposita charta objectorum extrà existentium imaginem depingentium; & proposuisset, ac san- nis excepiſſet recentiorum Opticorum Philosophorum senten- tiam, dicentium nihil aliud tunc videri ab oculo quàm objecto- rum imaginem à speciebus depictam, hoc est, quàm ipsas spe- cies in charta terminatas; ut facilem, & uti rebatur, verissimam iniret viam, dicebat, in charta nihil apparere aliud quàm um- bras objectorum extrà existentium.

Nunquam viderat vir bonus experientiam, ac fortassis nè videre quidem dignatus fuerat, utpote figmentum Mathema- ticorum. Sed ò bone vir, si non credis Mathematicis, si non tot aliis oculatis testibus, Philosophis, Theologicis, Principi- bus; crede saltem oculis tuis, & tute ipse, nullius interventu, empiriſin institue. Videbis ipsissimos objectorum colores, distinctissimos, ac vivissimos; numerabis testorum tegulas, horo- logiorum lines, picturarum lineamenta. Vidistiñe unquam, umbras rerum ostendere earum colores? Vidistiñe aliquando umbras objectorum inversas? Quæro deinde, an scias versus quam plagam projiciantur umbræ rerum Soli oppositarum? Respondebis utique (nec enim tam ignarus es) versus plagam Soli oppositam, hoc est, si Sol existit in plaga Orientis, Meridiei, Occidentis, umbras projici versus Occidentem, Septentio- nem, Orientem. Rectè. Fac jam foramen in valva respiciente Septentrionè, & videbis Sole existente in meridie, ædium facies

quæ

*Imago vo-  
rum in cu-  
biculo ob-  
ſcuro, non  
sunt umbra-  
rum.*



quæ meridiem respiciunt, depictas in charta foramini opposita. Fac aliud in valva respiciente Ortum, videbis res Occasum respicientes apparere in charta. Si Occasum respicit valva foraminis, repræsentabuntur in charta res respicientes Ortum. Si ergo umbræ rerum in charta apparent, umbræ rerum plagam Solis respicient, non plagam Soli contrariam, ut tu asserebas, aut asserere debebas.

Legerat fortassis vir ille bonus, & non malus, ut dicebam, Philosophus, quod scribit vir doctus loco in præcedenti proposito, citato, his verbis: *Respondeo ergò primò, hanc experientiam (de qua nobis sermo est) aliquando contingere, quando lux reflexa ex aliquo corpore, vel radij ipsi solares per foramen ingrediuntur: tunc autem intra cubiculum non videntur aves, neque homines, eorumvè species sed illorum umbra: dum enim illa corpora interponuntur inter ipsum foramen & radios solis, vel lucis reflectentis: impediunt ingressum per illud foramen; ideoque causant intra cubiculum umbram sui, qua apparet ac si essent ipsi homines & aves, propter similitudinem umbræ in figura cum corpore cuius est; quod observavi sæpè. Ecce ergo in hoc casu umbra sola intus apparet, non species, aut objecta ipsa.*

Si hæc legerat, non debebat tam temerè universaliter pronuntiare, in omni casu umbras rerum in cubiculo apparere. Deinde debebat cautius legere, & ad examen vocare, quod vir ille doctus in casu aliquo particulari fieri asserit. Examine-

mus. Asserit I. *Experientiam aliquando contingere, quando lux reflexa ex aliquo corpore, vel radij ipsi solares, per foramen ingrediuntur; & tunc videri intra cubiculum umbras corporum.* Certus sum ego, eum nunquam vidisse imaginem, de qua loquimur, in cubiculo, quando radij solis per foramen ingrediuntur: tunc enim ob nimiam luminis affluentiam dissipatur omnis imago. Tunc ergo experimentum sumi debet, quando Solis radij non feriunt directè foramen.

Asserit II. *Eandem experientiam aliquando contingere quando lux reflexa ex aliquo corpore, per foramen ingreditur; & tunc simul videri umbras in cubiculo.* Certum est, & experientia quotidiana docet, si Sol existens in meridie, v. g. illuminet



parietem perpendiculariter erectum qui ipsum Solem respicit, lumen reflecti versus Solem, id est, versus Meridiem: & si tunc e regione parietis illuminati fiat foramen, ingreditur fortassis lumen reflexum, at umbra parietis illuminati in æternum non ingreditur, quia nullam umbram projicit versus foramen, quoniam nec versus Solem eam projicit. Quod autem dicitur de hoc lumine reflexo, de omnibus alijs intelligi debet. Vides ergo quæ absurda asserat vir doctus?

Asserit III. Dum inter Solem & foramen interponuntur corpora, impediri ingressum radiorum intra foramen, & ideo solas umbras ingredi, & apparere in cubiculis, similes ipsis corporibus quoad figuram. Addit, se hoc sæpius observasse. Si observavit, erat utique tota fenestra aut porta aperta, & sic experientiam non videbat de qua loquimur. Vidisse autem eum umbras corporum positorum inter Solem & foramen exiguum, præsertim vitro munitum; nunquam persuadebit.

## PROPOSITIO XXIII.

### *Aliud experimentum opticum novum.*

*Experimentum  
tuum opticum  
novum.*

*Vide  
Iconis XI.  
Fig. II.*

**A**llud experimentum opticum, antea mihi invisum, vidi quondam Romæ apud Dn. Eustachium Divini insignem Opticum, & in terendis tubospicillorum vitris egregiè versatum, ac jam dudum celebrem. Habebat is lamellam æream, longitudine ac latitudine ferè qualem apposita Figura ABC repræsentat; ad cujus utramque extremitatem erecta erant perpendiculariter pinnacidia, ut vocant, B & C; quorum illud, exiguum habebat in medio foraminulum D; hoc verò, foramen grano lentis æquale, cum inserto aciculæ capitatæ extremo, ita ut capitellum corresponderet medio foraminis, collum verò seu pedunculus insisteret inferiori foraminis orbitæ, prout in figura apparet.

Qui oculum admovebat foraminulo D, & visum dirigebat in foramen E, videbat aciculam capitatam non jam in foramine

mine E, sed inter E & D. Alia phænomena notavit P. Nicolaus Zucchi, refertque in Philosophia optica par. 2. tract. 3. cap. 6. sect. 2. in Parergo. Ego solum hoc quod retuli, notavi.

Quæritur causa hujus phænomeni. Citatus Auctor exponere conatur & hujus, & aliorum à se notatorum causas; quas ego tamen, ut verum fatear, non intelligo. Apparentiæ à me notatæ hanc causam refero, quòd aciculæ capitatæ radij in foramine D decussantur, & oculum penetrantes refringuntur, ac magis divaricantur: quia igitur oculus videt aciculam per radios illos refractos ac divaricatos, videt illam sub majori angulo quàm faciant radii eius directi ad foramen D; ideo apparere debet propius quàm revera sit, ibi nimirum, ubi radii refracti tantum distant à se invicem, quantum directi distant prope ipsam aciculam. Explicare rem non possum, nisi multa ex Opticis ac Dioptricis desumpta huc congeram. Vide itaque quæ dixi in 1. par. Magiæ lib. 2. & 9.

## PROPOSITIO XXIV.

*Fenestram papyraceam ut vitrea appareat,  
efficere.*

**A**Theoricis ad practica, à seriis ad ioco-seria seriis admixta revertimur. Solent in Italia & Hispania fenestræ non ex vitro, sed ex papyro transparente, aut etiam ex tela candida ac translucente confici, idque non in domibus tantùm tenuioris fortunæ hominum, sed divitum quoque ac potentum: quæ res Germanis nostris eas regiones adeuntibus, ac vitreis nostris fenestris assuetis, adeo apparet insolens, ut splendidissima palatia istiusmodi fenestris instructa non minùs rideant, quàm alii vestibus splendidis è vilissimo panno assutas lacinias riderent.

Si vis ergo ut papyraceæ ejusmodi fenestræ appareant procul aspectantibus vitreæ, sic operare. Sume papyrum ex officina ubi præparatur, quæ nullo adhuc glutine est imbuta; quali

*Fenestra  
papyracea  
ut vitrea  
videatur.*

nimirum plerumque Typographi utuntur. Misce deinde terebinthinæ partes sex, & masticis partes duas: liquefac, & papyrum extensam inunge, & resicari sine. Habebis quod quæreas. *Ex Secretis Kircherianis.* Orbiculos aut quadratula exprimere poteris lincis atramento, aliove colore antea in charta ductis.

## PROPOSITIO XXV.

*Vitreæ fenestram fingere è charta.*

*Fenestram  
vitream è  
charta fin-  
gere.*

**P**ictorum vernicem in aqua, quantum scutella capiat, coque ut ferveat, assidue movendo, donec aqua evanescat. Cum autem fuerit semicoctum, vitrum bene tritum injice. Papyrum deinde ad modum fenestræ vitreæ depinge, effringendo orbiculorum circulos, aut quadratulorum cancellos. Demum bitumine antea præparato inunge papyrum, & sicari sine. *Ex Secretis Kircherianis.*

## PROPOSITIO XXVI.

*Aliter vitreæ fenestram fingere in ligno.*

*Fenestram  
vitream in  
ligno fin-  
gere.*

**C**Hartam pergamenam hædinam sume, quæ sine calce sit præparata. Hanc subtiliter rade, donec satis sit pellucida & tenuis. Deinde in vas aliquod aquâ plenum illam immitte, ita ut pellis cooperta maneat aquis. In vas illud injice paulum mellis ad ignem despumati, ovorumque octo albumina, omniaque cum pelle intus revolve. Tandem, antequam arescat hæc mistura, illine lignis in quibus est mansura. Cum verò aruerit, pinge super eam quæ volueris, & pictorum vernice perunge. *Ex Secretis Kircherianis.*

## PROPOSITIO XXVII.

*Vitrum deaurare.*

**A**lbū unius ovi in scutella subige. Quo subactō, rejectâ-  
que spūmā, cum eo quod subsidit, vitrum deline, & siccari  
permittē: dein verò animæ halitu fove: pōst aurum foliatum  
superpone. Tandem his peractis, vernice pictorum madefac,  
& Solis radijs expone. Loco albuminis aliqui salivam jejuni  
hominis adhibent. *Ex Secretis Kircherianis.*

*Vitrum de-  
aurare.*

## PROPOSITIO XXVIII.

*Lineam meridianam lucente Sole invenire.*

**C**ommuni ac pænē vulgari modo meridianam lineam inve-  
niendi, praxin non contemnendam adjunxit vir doctus, &  
insignis Opticus, D. *Wilhelmus Hagen*, Clivenſis civitatis Secre-  
tarius, uti nuper ad me scribit his verbis: *In plano immobili bene-  
ficio libella horizonti parallelo, gnomonem ad angulos rectos varijs ex  
eodem centro circulis circumductis erexi: dum verò more consueto,  
tempore antemeridiano extremitatem termini umbra ex gnomone  
projecta circum quendam tangentem cum summa cura observarem;  
ex principijs opticis mihi incidit, umbra finem vix dari aut notari  
posse; ideoque pro abundanti cautela filum tenue, vel setam equinam  
ipsi stylo alligatam, per meditullium umbrae tangentis, ad circumfe-  
rentiam exteriorem, ad minus per diametrum pedalem distantem, pro-  
traxi, simulque eo momento Astrolabio vel Quadrante altitudinem  
Solis exactissimè indagavi: punctoque in predicta circumferentia  
notato, eadē prorsus methodo tempore pomeridiano, Sole in eadē  
altitudine constituto, secundum punctum investigavi, & in peripheria  
extima notavi. Hū ita peractis, arcus interceptus per filum ex dicto  
stylo ductum bifariam divisus, indubitatam lineam meridia-  
nam monstrabat.*

*Lineam  
meridianā  
lucente Sole  
invenire.*

PRO-

## PROPOSITIO XXIX.

*Ut statua lapidea flatu oris candelam extinctam accendere videatur.*

*Statua ut  
candelam  
accendat.*

**O**Ri statuæ sulphur inde, & candelam extinctam, atque adhuc fumigantem, ori statuæ admove. Confestim reaccendetur, putabiturque flatu oris resuscitatam flammam. Meminit hujus praxis à non nemine exhibitæ Galenus, aitque tunc miram videri defuisse, cum sulphure contactum murum, aut lapidem reperire spectantes.

## PROPOSITIO XXX.

*Idea Macrocosmi, sive Radius superioris sphaera.*

*Macrocos-  
mi idea.*

**E**ffode terram pinguem juxta rivos ad radices montium, ubi sunt fodinæ ☉ & ☽ (auri & argenti) decurrentes. Ex illa fac ☉ (salpetræ) quod bene sit ☿ (stanno) mistum hermetice calcinato. Postea immitte in retortam, cujus receptaculum sit vitreum in formam ovalem conflatum; in cujus fundo collocabis folia ☉ (auri.) Deinde subter retortam in fundo positam ignem accende, donec fumi seu vapores exeant; qui dicto ☉ (auro) adhærebunt; ignemque in eodem gradu serva tam diu, nè retrocedant. Tandem vas recipiens ablatum hermetice obtura, & in furnum huic negotio destinatum repone, supposito Δ (igne) lampadis, donec videatur representatum quod Natura in eo conspiciendum operatur, puta flores, arbores, fructus, frondes, solem, lunam, planetas, & reliquas stellas.

*Ex secretis Kircherianis, & Schvventero in Delicijs*

*par. 16. q. 1.*

PRO-

## PROPOSITIO XXXI.

*Serpentes, lacertas, aliaque similia animalia,  
incorrupta servare.*

**V**As vitreum amplum ac forte imple aquâ ardente, seu vino *Serpentes*  
adusto, aut aceto fortissimo, & in vas iniice vivos serpentes, *mortuos*  
lacertas, aliaque similia reptilia, obturaque vas nê elabuntur. *servare in-*  
Mortua apparebunt viva, & manebunt perpetuò incorrupta. *corruptos.*  
Vidi Romæ in Galerijs (ut vocant) Principum.

## PROPOSITIO XXXII.

*Mobile perpetuum Alchymisticum.*

**A**Ccipe amalgamatis q̄ (æris) drachmas v. aut vi. & amal- *Mobile per-*  
gamatis x̄ (stanni) tantundem. Tere omnia cum q̄ (Mer- *petuum*  
curij) sublimati drachmis x. aut xii. & pone supra marmôr in *Alchymi-*  
cella. Intra spatium quatuor horarum fiet instar olei oliva- *sticum.*  
rum. Hoc distilla, & in fine da ignem fortissimum: tunc sub-  
limabitur substantia sicca. Aqua distillata vicissim reasfunda-  
tur terræ in fundo alembici residuæ: & solve quod solvipotest;  
solutum filtra, deinde distilla: & apparebunt subtilissimi atomi;  
qui in vitro benè clauso in sicco asserventur: Et ecce mirabilia  
videbis.

*Ex Secretis Kircherianis, ubi appellatur mobile perpetuum,  
quod hætenus neque per aquam, neque per ignem, aut instru-  
menta inveniri potuit. Habetur etiam apud Schroventerum in  
Delicijs par. 16. quæst. 3. ut tradidimus in Mechanica  
Hydro-pneumatica par. 2. Classe 2.  
Machina 14.*

## PROPOSITIO XXXIII.

*Arbor Philosophica ad oculum crescens.**Arbor philosophica in phiala vitrea.*

**A**ccipe  $\mathfrak{D}$  (argenti) puri seu cupellati drachmam dimidiam, & solve in aquæ fortis drachma 1. Accipe item  $\mathfrak{E}$  (argenti vivi) drachmas 2. & solve in aquæ fortis drachma 1. Has duas materias commisce, & immitte intra vas vitreum, atque affunde aquæ communis libram unam, ac bene obtura. Videbis arborem quotidie ad oculum & notabiliter crescere, tam in trunco, quàm in ramis. *Ex Secretis Kircheranis.* Habet & *Schvvventerus* in Delicijs par. 16. Quæst. 4. sed vitiosè. Nonnemo Norinbergæ talem arborem arte chymicâ produxit, ut ad me scripsit D. Harstofferus.

## PROPOSITIO XXXIV.

*Arbor metallica in Phiala vitrea.**Arbor metallica in phiala vitrea.*

**A**rgentum pro magnitudine vasis vitrei, in quo arborem comparere & asservari cupis, dissolve in aqua regia; vaporeque abeunte, in fundo sedimentum quoddam unguenti ad instar residere comperies. Huic sedimento superaffunde aquam ab omnibus fæcibus bene depuratam, vasque vehementi motu circumduc, ut sedimentum aqua, quàm optimè fieri potest, circummiscetur. Hanc postea aquam in aliud vas vitreum infunde leniter, nè impurius aqua nitorem vitri inficiat. Huic adde argentum vivum, æquâ portione argenti; & statim argentum vivum attrahet argentum, coituque isto figura nascetur veluti arboris cujusdam infinitis ramis ornata, & magnâ admiratione visenda. *P. Athanasius Kircherus* lib. 3. Artis Magn. par. 2. cap. 4. quæst. 1. Experim. 2. ubi testatur se ejusmodi arborem vidisse Lugduni in Gallia apud eximium Chymicum, non sine stupore.

PRO-



## PROPOSITIO XXXV.

*Arbores, cruces, statua, aliaque similia,  
ex alumine.*

CUM P. Athanasius Kircherus (ut ipsemet scribit loco proxime citato, Experim. 3.) fodinas & officinas aluminarias Tolsæ lustraret, inter alia multa admiratione dignissima, arborem quoque vidit prorsus, ut apparebat, crystallinam, ab officinæ præfectis confectam, hac arte. Lapides fodinâ aluminis erutos, coctosque in calce, resolvunt aquâ frigidâ: calcem hanc coniungunt in fornacem, prægrandis cacabi figurâ efformatam, cujus fundus ex ære campano sit; validissimoque igne supposito, aquam in quam calx resolvitur, per canales in vasa quædam ex asseribus quernis, aut ilicinis (aliud enim lignum huic operi ineptum est) ruditer compacta diducunt; & ecce, lignum mox aquam attractam in alumen convertit, ita ut latera vasorum tota crystallina, seu adamantina, singulis particulis frustulisque aluminis in hexagonas figuras abeuntibus, esse videantur. Huic aquæ si lignum aut ramusculum quernum, cortice prius exutum, unâ nocte imponent; postero die impositum ramum aluminariâ incrustaturâ totum in crystallinam seu adamantinam arborem conversum reperiunt. Hoc eodem artificio cruces, & omnis generis figuras, ex querno prius ligno effiguratâ, alumine ita vestiunt, ut crystallinæ videantur. Crucem huiusmodi vidi apud dictum Auctorem in Museo suo asservatam. Hæc omnia in quovis fornaculo, fundo æneo constante, confici possunt.

*Arbor ex  
alumine.*

## PROPOSITIO XXXVI.

*Arbor instar cypressi intra phialam vitream.*

HOC inter cætera etiam mirabile prorsus se invenisse ait P. Athanasius Kircherus loco proxime citato, arboris videlicet cypressi adinstar productionem. Ita autem faciunt Chymici.

*Arbor in-  
star cypressi  
in phiala  
vitrea.*

S 2

Mercuri-

Mercurium præcipitatum per amalgamationes intra tres aut quatuor menses, forti igne addibito, dum conficiunt; iaveniunt, totam materiam in ipso vitro in pulchras quasdam excrefcencias cypressi instar excrefcere: quas ita foliatis, non sine inuentionum admiratione, spectandas proponunt.

## PROPOSITIO XXXVII.

*Elementarem mundum in globo aut ampulla vitrea exhibere:*

Vel

*Quatuor humores intra sphæram vitream ita librare, ut mundum elementarem referant.*


*Vide  
Icon. XII.  
Fig. I.  
Idea Elementaris  
mundi in  
phiala vitrea.*

**P**Raxin dedimus in 3. par. Magia lib. 5. syntagm. 2. Pragmat. 18. & consistit in eo, ut quatuor diversæ gravitatis & coloris liquores, qui quatuor Elementorum naturalem situm ac ordinem in Vniverso æmulentur, includantur intra sphæram vitream, aut ampullam oblongam; qui licet inter se motu & agitatione confundantur, ac veluti in chaos redigantur, unusquisque tamen sponte mox propriam sedem ac veluti sphæram sibi debitam repetet. Humores possunt esse sequentes.

Pro terra accipiatur antimonium crudum, vel etiam color ille cæruleus, quem smaltum in Italia vocant, exactè depuratus, & loco infimo ampullæ infundatur. Supra hunc, pro aqua, spiritus tartari infundatur. Supra hunc pro aere spiritus vini tertio rectificatus, qui & colore aërem refert. Supremo denique loco, pro igne seu æthere affundatur oleum de Beem, ut vocant Chymici, quod colore, levitate, ac subtilitate dictum elementum refert. Hi quatuor liquores ejus sunt naturæ, ut quomodo-cunque permisceantur & confundantur inter se, singuli tamen ad proprias & à principio sibi assignatas sedes redeant.

ANNO-





## ANNOTATIO I.

**A**mpullam cum quatuor liquoribus inclusis vidi Roma in Galeria Eminentiſſimi Cardinalis Vrsini, eâ formâ constructam, quam appositâ figurâ monstrat. P. Athanasius Kircherus in *Arte Magnet.* lib. 3. par. 2. cap. 3. Experim. 5. ubi eandem praxin tradit, ait posse similes quatuor liquores, quatuor Elementis quodammodo similes, extrahi chymico magisterio ex una & eadem simplici substantia. & se aliquando octo diversos liquores, quorum unus alterum continuâ serie transcenderes, ex diversis oleis & spiritibus fieri curasse, ijsque octo cælorum orbitas representasse, in ysdemque planetarum & fixarum stellarum corpora in orbem rotasse, magneticâ arte, ad Naturæ exemplar.

*Idea Orbium calorum in vitrea sphaera.*

## ANNOTATIO II.

**C**itato loco Magia inquisivimus, utrum quatuor liquores præparari queant, qui sphaera vitrea inclusi se mutuo sphaericè circumdent, ut unus medium obtineat, alter hunc sphaericè circumdet, tertius secundum, & quartus tertium. Cornelius Drebellius in Epistola de perpetui mobilis inventionem, ad Angliæ Regem, posse se id facere asserit. Athanasius verò Kircherus ait, si de unico humore in medio alterius globato sermo est, se non negare id fieri posse; & se certum quoddam olei genus scire, quod cuidam aquæ superaffusum, in globum sese contrahat, ut tali situ singula olei partes à violenta corrosione aquæ melius se defendant. Difficile tamen esse arbitratur, plures humores ita constituere, ut unus alterum sphaericè circumdet: In centro tamen terra & universi id fieri posse; imò necessariò ita fieri debere existimat. Unde ex K. reheri mente, si quis supradictos quatuor liquores circa mundi centrum ita disponeret, ut in ipso centro collocaret antimonium, deinde affunderet spiritum tartari, tum spiritum vini, ac tandem oleum de Beem; antimonium conflueret in globulum mundo concentricum, & circa hunc reliqui liquores conglobarentur, tum quia ad loca decliviora sublati impedimentis (quæ ibi nulla fore supponitur) confluerent, tum quia secundum omnes suas partes aequaliter à centro mundi distare affectarent, prout humidorum natura requirit. Atque hac ipsa humidorum natura est causa, cur idem extra mundi centrum in terræ aquæ

*Liquores varii vitrea phiala inclusi, an possint se mutuo circumdare sphaericè.*

globi superficie apud nos fieri non posse existimes Kircherius, ut loco cit. ostendi. Quid ego sentiam, vide loco citato.

## ANNOTATIO III.

Liquores  
varios sibi  
mutuo su-  
pernatant-  
es, videm  
vitro in-  
cludere,

Similem praxin diversos liquores eidem vitro infundendi, ut unus supernates alteri, sed oppido simplicem ac materialem, docet Schwennerus in Delicijs par. 13. Quasi. 49. ut lo. cit. etiam retuli: Iubet enim accipi vas vitreum cylindricum, quali passim Germans nostri, ut largiori haustu vini aut cerevisia se proluant, utuntur: eique infundi primo loco lac ad altitudinem duorum circiter digitorum: supra lac oleum aut butyrum liquefactum (hoc nimis simpliciter est dictum, putat enim butyrum mansurum liquidum ac fluidum, postquam refrigeris) supra hoc poni segmentum parvi instar orbiculi rotundum, aqualis cum vitro cylindrico diametri; supraque panem infundi cerevisiam (& quare non vinum, quod levius est?) supra hanc iterum oleum, aut butyrum liquefactum ac panis segmentum; supra hoc segmen- sum, vinum album, rubrum, spiritum vini, aut alios liquores, ita ta- men, ut semper oleum & butyrum liquefactum cum panis orbiculo, in- tercedat. Res est non magnorum sumptuum, nec magni laboris, & ex temporaneo apparatu inter computandum exhiberi potest.

## PROPOSITIO XXXVIII.

*Regionem aliquam in phiala representare.*

Regionem  
aliquam in  
phiala re-  
presentare.

Silicet oppida, castella, arbores, & similia. Praxin inveni inter Secresa Kircheriana, quam iisdem verbis refero: erit fortassis cui placebit opere exequi. Loco aliquorum characterum Chymicorum, quibus Typographi mei carent, pono ipsa nomina ex Oswaldi Crollij Basilica desumpta. Sic ergo ait.

Recipe aquam fortem seu separatoriam; In qua solve D, &,  
O, &, id est, argentum, Mercurium seu argentum vivum, au-  
rum, & æs seu cuprum. Postea seorsim solve in aqua separa-  
toria salpetram. Tandem solutiones confunde in phiala, pone-  
que

que in digestionem, vel ad Solem, donec crescant: quæ si creverint, extenuetur aqua. Deinde affunde aquam, & manebit. Aquæ separatoriæ sint ex auro, salpetra, & vitriolo; octo mensuræ.

## PROPOSITIO XXXIX.

*Antidotum ad pellendas febres.*

**R**ecipe dimidiam drachmam salis cardui benedicti, & pone *Febres de-  
pellere.*  
intra vitrum plenum aquâ distillatâ cardui benedicti. Da infirmo mane dum jejunos est, & bene eum cooperi in lecto, ut possit eò melius sudare, relinquendo eum sic opertum spatio duarum aut trium horarum. *Antido-  
tum contra  
febres.* Necessarium autem est, ut antequam potus ille accipiatur, emittatur sanguis prius; & si fieri potest, ut vena secetur durante paroxysmo. Hoc facto, eljciatur venenum, & febris. *Ex Secretis Kircherianis.*

## PROPOSITIO XL.

*Aliud Antidotum ad idem.*

**R**ecipe scrupulum unum florum sulphuris in aqua rosarum albarum. *Antidoti  
aliud con-  
tra febres.* *Ex Secretis Kircherianis.*

## PROPOSITIO XLI.

*Contra morsum viperarum.*

**R**ecipe cor, & linguam, & si vis, etiam caput viperæ, & pulveriza, & comede. Morsus viperarum non nocebit tibi, quàm diu non sumpseris aliud venenum, ut theriacam: tunc enim debes iterum uti eodem antidoto. *Antido-  
tum contra  
morsum  
viperarum.* *Ex eisdem Secretis.*

PRO-



## PROPOSITIO XLII.

*Antidotum contra dysenteriam, & omnem sanguinis fluxum per nares, anum, &c. & contra cholicam.*

*Antidotum contra omnem sanguinis fluxum.*

**R**Ecipe croci Martis grana decem usque ad 12, aut 14, secundum naturam & temperamentum ægotantis, & sume in aqua plantaginis. *Ex iisdem Secretis.*

## PROPOSITIO XLIII.

*Crocum Martis preparare.*

*Crocum Martis preparare.*

**C**Rocum autem Martis sic præparabis. Accipe limaturam ferri, bene mundatam, poneque in vase fictili intra fornurn reverberationis sine ulla additione, & relinque ibi per spatium 24. horarum; & si diutius ibidem manserit, melius erit. Deinde accipe dictam limaturam, & pone intra situlam aquæ, miscens bene baculo aliquo; & cum turbata fuerit aqua, pone illam sic turbatam intra aliud vas aut ollam cretaceam, ad coquendum, & sine ita coqui supra ignem, usque ad omnimodam expirationem aquæ; & habebis crocum Martis perfectissimum, quo uteris, ut dictum proposuit. antecedente.

Idem crocus est excellentissimum remedium contra hydroposin. *Ex Secretis Kircherianis.*

## PROPOSITIO XLIV.

*Podagra remedium.*

*Antidotum contra podagram.*

**A**Grippa lib. 2. Philosophiæ occultæ cap 15. ait, pedes testudinis conferre podagricis, ad alligatos ita, ut pes pedi, manus manui, dextro dexter, sinistro sinister alligetur,

PRO-

## PROPOSITIO XLV.

*Calculus in arenulas solvere.*

QUod hic subijcio antidotum, accepi Romæ à quodam Germano, fuitque sæpè cum successu optimo probatum. Dabo prius Germanico idiomate, deinde Latine reddam.

*Antidotum  
contra calculum.*

Kerffelsamen/ Anis/ Coriander/ Fenchelsamen/ ein jedes ein Loth; Petersiliensamen ein halb Loth; Süßholz; wey Loth; Steins brechensamen ein viertel Loth. Dieses alles mit einem viertel pfunde weissen Zuckers pulverisirt/ vnd v. mischt/ bey wachsenden Mohn/ fünff Morgen nüchtern ein  $\frac{1}{4}$  Loths mit warmen Wein oder Bier eingenommen/ vnd ein Stundt darauff gefast. Zerbricht vnd zermahlet den Stein/ treibt denselbigen wie Sand ohne Schmerzen ab/ vnd verhindert/ daß solcher nicht wider ansetzen kan.

Recipe semen chærofolij, anisum, coriandrum, semen fœniculi, uniuscujusque lotonem 1, semen apij seu petroselinij loton.  $\frac{1}{2}$ , glycerizæ lotones 2, semen saxifragiæ loton.  $\frac{1}{4}$ . Hæc omnia cum quadrante libræ sacchari candidi pulveriza, & misce; ac crescente lunâ diebus quinque mane jejunos sume lotonis  $\frac{1}{3}$  in vino calido, aut cerevisia, & unâ horâ jejuna. Rumpit & comminuit calculum, depellit iustar arenæ sine dolore, & nè iterum crescat, impedit.

## PROPOSITIO XLVI.

*Emplastrum & oleum contra pestem & febres pestilentes.*

AUctor sequentis antidoti dicitur esse D. Schilderer. A multis passim, in Belgio præsertim, cum fructu usurpari audio. Romæ à Germano quodam, qui è Belgio tulerat, didici. Emplastrum febrifugum appellant, & sic conicitur.

*Antidotum  
contra pestem.  
& febres pestilentes.*

T

Recipe

Recipe terebinthinæ Cypriæ unciam 1j. Liquefcat in vase cupreo super igne moderato. Huic injice araneorum vivarum, in locis mundis captarum, num. 10. Misceantur & agitentur cum pistillo ligneo, usque dum color terebinthinæ fiat cinereus, & vix aliquid de araneis deprehendatur. Tum iterum tepesactæ mixturæ adde telarum araneorum mundarum, quantum prædictæ aranearum texere; vel harum loco adhuc 19. araneas mediocres. Iterum fortiter agitentur, interea etiam immiscendo gummi Asphalti optimi pulverizati, salis armoniaci ana unciam unam & dimidiam. Terantur usque dum refrigeret materia, & acquirat consistentiam emplastri nigerrimi. Reponatur per dies 14. Tandem rursus ad ignem mollescat, & manibus oleo febrifugo malaxetur modicè.

*Oleum febrifugum sic preparatur.*

Recipe oleum nymphæarum, lumbricorum, rosarum hypericon, amygdalarum amararum, ana unciam unam. Mixtis impone Scorpiones vivos num. 10. Exponantur Soli donec moriantur Scorpiones. Tum etiam adde Theriacæ Venetæ optimæ unciam dimidiam. Relinquatur in solari per dies 14. Parentur autem hæc, si fieri potest, in ingressu Solis in signum m, vel ♄.

*Usus emplastri febrifugi hic est.*

Formentur inde emplastra magnitudinis quartæ partis thaleri, seu quantus est regalis Hispanicus: quæ auro obducta, corioque tecta, imponantur pulsibus utriusque carpi horâ unâ ante paroxysmum, relinquendo per novem dies: tunc eadem horâ in profluentem aquam projiciantur.

**ANNOTATIO.**

**O**B hoc quod ultimo loco additur. videri posset alicui superstitiosum antidotum. At ego existimo, additum, non quòd facias ad sanitatem inducendam, malum vè auferendum, sed tantum ut nè emplastrum, quod venenata traxit ad se qualitates, in propasulo maneat.

## PROPOSITIO XLVII.

*Herbas ac flores intra vitream phialam artificiosè producere.*

**D.** *Iacobus Dobrzenski de nigro ponte, amicus & fautor sincerus,* par. 3. Philosophiæ de fontibus Propos. 1. refert, se in itinere suo apud eximium quendam chymicum vidisse *flosculorum diversorum veram & non imaginariam, intra vitreas phialas productionem, qui ex liquida quadam & quasi uliginosa materia intra vitreas phialas hermetice clausas contenta, modico adhibito calore illic erigebantur. & in formalem plantam folijs & floribus onustam desinebant, tamque diu perdurabant, quam diu à calore fovebantur. Quâ autem id arte prædictus Chymicus effecisset, a se rescire non potuisse.* Tandem amicum quendam sibi charissimum pro ingenuitate sua secretum, sed non nisi sub secreti sigillo, sibi pandisse. Longo post tempore idem se reperisse in libro quodam Germanico, ideoque à fide obligata liber id proponit loc. cit. Propos. 2. estque illud idem quod nos proposuimus in Mechanica Hydro pneumatic par. 2. classe 1. cap. 6. Machina 8. & vocavimus *παραγενεσιαν* *casaream*, seu *Regenerationem plantarum in aquis phialæ inclusis ex cujuscunque planta semine.*

Germanici libri, cujus meminit *D. de nigro ponte*, Auctor est fortassis *D. Georgius Harstorfferus*, Patricius & Consul Norimbergensis, magnus olim amicus, nunc vita functus, qui secretum enarrat to. 2. Deliciarum Mathematicarum par. 9. q. 26. aitque ejusdem meminisse Quercetanus, & Gaffarellum in Curiosis, inauditis. Citato Mechanicæ nostræ loco diximus, secretum fuisse *P. Athanasio Kircher* transmissum à Cæsare FERDINANDO III. ideo Cæsareum vocavimus. At cum Auctores alij diu antea ejusdem meminissent, ut vidimus: Cæsari impositum, quicunque id profuso, ac recens invento, ut apparet, vendidit.

Experientiam, ut ibidem diximus, *P. Kircherus* non fecit, quia multum temporis requirit. Tentavit tamen *P. Balthasar*

*Herbas ac flores producere intra phialam vitream.*

*Conradus*, cùm viveret, Vratislaviæque Mathesin publicè doceret; at nullo successu. Fortassis quia non omnes in operando circumstantias, quæ multæ sunt, servaverat. Certè D. de nigro ponte non omnes enarrat quas nos & Harstorfferus habemus. Nostra verò & Harstorfferi descriptio in omnibus partibus conveniunt; quam & huc reponere non piget, addito solum uno aut altero vocabulo.

*Primò*, Accipe seminis plantæ cujusvis maturrimi, tempore & cælo serenis, libras quatuor; quæ in mortario (vitreo ait Harstorfferus) contusa, phialæ mundæ, & juxta plantæ *futura altitudinem capaci*, & quam optimè clausæ impones; & nè vel minimùm expiret, caveto, asservatâ quoque phialâ in loco munito ac calido.

*Secundò*, Hoc peracto, observabis tempus vespertinum cæli serenissimi, ut sequente nocte rorem decidentem colligas.

*Tertiò*, Phialam asservatam aperi, semen contusum comminutumque exlime, & super tabulam vitream extende. Hanc verò tabulam cum semine in horto aliquo, aut prato, sub dio libero expositam relinque; & nè aliquid roris abundantioris è tabula defluendo pereat, tabulam unâ cum semine in patina latiuscula collocabis. Sic fiet, ut ros copiosè supra semen decedens, ipsi commodiùs naturam suam nocturnis hisce macerationibus conferat.

*Quartò*, Eodem tempore ad rorem commodiùs excipiendum, quatuor palis affixum linteamen subtile & purissimum extendatur; quod madore nocturno imbutum, deinde in vitrum mundissimum ad octo circiter mensuras exprimatur.

*Quintò*, Porro semen imbutum rose nocturno, iterum phialæ suæ inclusum, nè quid inde expiret, aut calore solis extrahatur, ante solis ortum pristino loco reponatur.

*Sextò*, Ros ex lingeamine expressus, sæpissimè percoletur; colatus aliquoties distilletur, donec omnibus facibus, & terrestri immunditie immunis evadat. Fæces verò relictas calcinabis, & salem dabunt pulchrum visu; qui mox in rore distillato dissolvatur.

*Septimò*, Ros hoc sale imbutus semini in phiala asservato ad altitudinem trium digitorum affundatur: Deinde phiala hermetice cum vitro contuso & borace signata, in loco calido & humido asservetur; aut etiam sub fimo equino menstruo spatio condatur. Deinde exemptam phialam considera, & videbis semen ad instar gelatinæ transmutatum; spiritum cuticulæ instar varijs coloribus variegatæ supernatantem; & intra cuticulam & terram limosam, rorem de natura seminis existentem instar tegetis viridis.

*Octavò*, Phialam hanc ita sigillatam, per totam æstatem suspende in loco solis interdum, noctu lunæ reliquorumq; siderum radijs pervio. Cælo verò turbido, aut pluvioso, in loco sicco & calido asserva, donec pulsus nubibus serenitas demum affulserit; cui denique denuo eam expones.

Accidit nonnunquam, ut opus hoc mensibus ferè duobus, aut citius; aliquando post annum, juxta temporum constitutionem, absolvatur.

Cæterùm signa perfectionis operis hæc sunt. Limosa materia in fundo in altum contumescit; spiritus & cuticula indies decrescunt; totaque materia demum inspissatur: In vitro verò à reflexione solis subtiles nascuntur exhalationes & nebulae, plantæ excrescentis prima quædam rudimenta.

*Nonò*, Tandem ex tota illa in fundo subsistente materia, spirituque, cinis sit albo cærulea, & tunc successu temporis caulibus, herba, & flores producuntur in forma & specie seminis. Quæ species præsentem calorem compareret, eodem absente evanescens in chaos suum revertitur. Sed quoties ignem applicaveris, toties calore suscitata materia plantæ formam exhibet. Durabitque hac ratione, si vas bene obturatum fuerit, perpetuò.

## ANNOTATIO.

*V*ides quanti temporis ac laboris sit hac empyrissis, quamque accuratum ac sedulum requirat empyricum. Memini Roma Eminen-  
tissimum quendam Principem diu sollicitasse P. Ashanasium Kircherum, ut hanc sibi in phiala exhibitam palingenesiam concinnaret: at



maluit ille suâ se, quam in Museo asseruabat, spoliare, ac dicto Principi dono dare, quam pro nova concinnanda tam pertinacem laborem subire.

## PROPOSITIO XLVIII.

*Integram abietum silvam repente intra vitream phialam enatam exhibere.*

*Silva abietum intra phialam exhibere,*

**M**Odum docet suprà laudatus D. de nigro ponte lo. cit. his verbis. Recipe terebinthina vulgaris albiſſima libram 1½. Ponatur in retortam, admoto recipiente amplissimo, juncturis non lutatis, pro diversitate oleorum emanantium; & fiat distillatio ex arena. Ex libra una & semis terebinthina elicere poteris libram semis spiritus & olei. Postea mutato recipiente, immotâ retortâ auctiore igne elice uncias duas olei flavi. Tum vas adhuc calens mediocriter, ita ut materia in fundo retortæ restibilis adhuc sit fusa, ex abrupto auferatur, cavendo ruptionis ex frigore subito appellente periculum. Tum eo in loco, ubi materia in fundo retortæ restat, palma manus hinc inde leniter leviterque deducatur sursum & deorsum; & tandem refrigeratâ plenè matcriâ, viaebris innumeras abietum formas non sine strepitu erumpere, cum varijs fissuris per totam vasis circumferentiam, eâ proportionē & modulo, ut fissura illa abietum silvam praeserant, tantâ elegantia, ut magna fissura truncos, minores fissura ramos, minima folia & fructus denotent: solida autem & fissuris non intercepta materia occupat interstitium, quod pro aere existimatur. Hactenus ille.

## PROPOSITIO XLIX.

*Aqua mineralis mirabilis.*

*Aqua mineralis mirabilis.*

**I**dem qui antea laudatus D. de nigro ponte lo. cit. mentionem facit aquæ cujusdam mineralis, diversas in se virtutes continentis, eamque describit his verbis.

Recipe



*Recipe de minera bismuti libras novem, priusquam ullum ignem experta sit. Ponatur in retorta competente: magnæ, & capaci appositio recipiente, distilletur secundum gradus ignis per horas duodecim: ascendetque aqua quædam tota candida & dulcis. Hac iterum ac tertio rectificatur, magisque dulcescit.*

Hujus porrò aquæ assignat sequentes, sanè mirabiles, virtutes & operationes.

Primò. *Recipe hujus aqua libram unam, & in vitro competente reponere, ita tamen, ut tertia pars vitri vacua sit, clausoque probe vitro relinque in loco quieto, videbisque hujus aqua quantitatem semper in plenilunijs augeri, in novilunijs autem præter partem illam, que accreverat, amitti insuper aliam de prima sui quantitate, idque Lunæ cursum suum iterante semper continget. Hoc autem notabile, quod aqua illa sub parva æquè ac magna mole pondus primum nunquam immutet. Ex quo colligas, augmentum fieri per rarefactionem ob lunæ crescentis teporem; decrementum verò per condensationem ob decrefcentis lunæ frigus.*

Secundò. *In hanc aquam si quamcunque plantam, unà cum radice sua totaliter arefactam, ita ut in pulverem teri posset, solum quoad radicem immittas, ibidemque relinquantur horis tribus, aut quatuor; planta illa de novo virefcet quasi nunc primum de terra effret orta. Unde iterum colligas, quantam humectandi vim, Lunæ similem, habeat illa aqua.*

Tertiò. *Hujus item aqua quantitatem infunde in vitrum, & eidem adde aquam distillatam ex herba, aut flore quocunque; deinde residuum aquæ priori impleatur ad summam: & videbis non sine miraculo, intra duas aut tres dies crescentem inter medias aquas plantam ei similem, ex qua sal & aqua principio accepta erant. Et illa plantula moto vitro dissipatur, eodemque denuo quiescente*

*restituatur in præteritum  
statum.*

## PROPOSITIO L.

*Ut Lactuce semen intra breve tempus  
germinet.*

*Lactucam  
ex tempore  
producere.*

PRæcedentes praxes revocant in memoriam quod aliquando legi in libello quodam Germanico Secretorum selectorum, quâ nimirum ratione quis intra tempus brevissimum è Lactucæ semine in terram projecto, Lactucam producere queat.

I. Accipe, inquit, terram nigram & oppidò pinguem, eâ-que imple scutellam, aut aliud vas largum & amplum altitudine pollicis circiter. II. Accipe deinde semen Lactucæ, alteriusvè quod placuerit germinis, quantum satis est pro vasis capacitate, & macera per horas 24. in vino adusto, aut aceto fortissimo. III. Hoc semen maceratum sparge in prædictam terram. Intra horæ spatium germinabit Lactucam, quæ paulatim & notabiliter crescet, ac intra quatuor spatium adeo perficietur, ut possit erui, lavari, & ad comedendum præparari. Succedit tam in hyeme, quàm in æstate.

## PROPOSITIO LI.

*Ut faba, cucumeres, aliaque semina intra qua-  
tuor horas è terra germinent.*

Similem praxin docet *Harstorfferus* to. i. Deliciarum Mathem. par. 16. q. 6.

Accipe, inquit, fabas, aliudvè semen, pone intra oleum calidum, relinque per dies novem in eo, semina intra terram tempore meridiano. Intra paucas horas germinabunt, & crescent in non mediocrem altitudinem.

Simili arte intra quatuor horarum spatium cucumeres ac pepones florebut, si semen ponatur intra sanguinem adolescentis

centis aut juvenis ruffi, & in loco munito ac benè clauforelin-  
quatur fpatio dierum quatuordecim; deinde ad solem exsicce-  
tur, terra inſpergatur aquà calidà, & ſeminetur. Intra qua-  
tuor horas producentur folia & flores. Operatio tamen inſti-  
tui debet tempore æſtivo, & calido.

## ANNOTATIO.

**M**Emini me legiſſe in quadam Epiftola, qua Faſciculo temporum  
Werneri antiquiſſimo charactere adjuncta erat, cùm Imperator  
Treviriſ ad S. Maximinum cum multis Germania proceribus degeret,  
Triſthemium in menſa derepentè, ſpectantibus omnibus, planſulam  
quandam produxiſſe. Magnus quoque Albertus Colonia coram Im-  
peratore & Principibus alijs produxit ex tempore herbas & flores, &  
ob id opulentum prædium pro Monafterio ſuo accepit dono.

## PROPOSITIO LII.

*Pluvias & nives artiſicioſè ad imitationem  
Naturæ producere.*

**M**Odum præſcribit P. Athanaſius Kircherus lib. 3. de Arte Ma-  
gnet. par. 2. cap. 3. Experim. 1. in hunc ſenſum. Fiat ex la-  
minis ferreis hemiſphærium concavum duplicatum, unum ſci-  
licet ſupra alterum, ita ut inter utrumque ſit ſpatium vacuum:  
& utrumque ſimul binis aut quaternis columnis innitatur, ut  
aliquo modo in appoſita figura patet: in qua A B ſt tholus in-  
ferior, C D ſuperior, E F vacuum inter utrumque, G oſtiolum  
In ſuperiori tholo. His peractis, fiat ex ære vas H cum collo  
oblongo; quod humore ad mediocritatem ferè implebis: tholo  
verò duplicato, ſeu vacuo E F intra utrumque, per foramen ſeu  
oſtiolum G, injicies nives, aut fragmenta glaciæ, unà cum vitro,  
aut vitriolo, ad etiam aquam frigidiffimam; & habebis machi-  
nam ad prædicta meteora exhibenda præparatam.

Tempore igitur quo amicis experimentum pluvix exhi-  
bere vis, ſuppone ignem vaſi H; & rareſcet aqua vaſi incluſa; &

*Vide  
Icon XII.  
Fig. II  
Pluvia ar-  
tiſicioſa.*

vapores è colli orificio erumpentes, in cavitatem hemisphærij seu tholi A 18 impingent, atque à frigore ob superpositas nives & glaciem condensabuntur in aquam, guttatimque cum spectantium admiratione decident.

Ad hujus machinulæ exemplar fieri posset in ampliori aliquo loco tectum aut tabulatum ex laminis ferreis, aut cupreis, illudque nivibus & glacie insertum, in pavimento verò collocari vas aliud plenum ferventibus cineribus, aut silicibus prius candefactis. Huic enim vasi si aquam infuderis frigidam; resolve-tur ea in vapores, qui tabulato ferreo adhærentes, & à nivibus superstratis frigefacti ac resoluti in aquas, guttatim in pavimen-tum descendent.

Sanguineam in utroque casu pluviam exhibebis, si aquam minio, aut cinnabari dilues.

Si tholo folles apponas, quorum flatus per mæandros cavi-tatis glacie aut nivibus repletæ procedat: reddet ejuscemodi flatus in dicta cavitare aërem adeo frigidum, ut omnia statim in glaciem convertat. Vapor igitur in concavum tholi ascendens, eique adhærescens, & ad resolutionem dispositus, à flatu illo gelidissimo in nives converteretur, & floccorum instar decideret.

## PROPOSITIO LIII.

*Lapidem durum & crassum solo pugno  
frangere.*

*Lapidem  
durum &  
crassum pu-  
gno fran-  
gere.*

**C**ardanus lib. 17. de Variet. ait, lapidem palmi crassitudine, quem malleo frustra quis frangere tentet, solo pugni ictu frangi posse, si supra planum ligneum, aut lapideum erigatur ita, ut solus stet, nullo extrinseco sustentante adjutus, sive angulum cum plano subiecto faciat rectum, sive acutum: deinde pugno elevata pars percutiatur celeriter, ac fortiter, ut cum impetu plano illidatur. Rationem assignat, quòd aër inter planum & lapidem erectum non possit tam celeriter elabi, quàm celeriter erectus lapis planum tangit. Quoniam igitur duo corpora, aër

vide-

videlicet & lapis, se mutuò penetrare non possunt, nec simul esse in eodem loco; ut aër elabatur, necesse est lapidem frangi, ut elabendi locum habeat.

## ANNOTATIO I.

**S**imili modo, & simili de causa, ingentes etiam lapides malleis frangi possunt, si extremitatibus duabus fulcra subijciantur, & medio malleus cum impetu illidatur. Vidi ingentes & crassissimas columnas marmoreas per medium fractas, dum è lapicidina ad destinatum templum devehrentur, non alia de causa, quam quòd scytalis impositæ, & vehementius ob via inaequalitatem concussa, medium inter duas scytalas vehementi nisu deorsum tenderet.

## ANNOTATIO II.

**M**emini me alibi scripsisse, cùm Romani Artifices quidam trabes areas ingentes è Pantheo sublatas confringere niterentur, ut frustra furno fusorio inderent, & liquarent, nec tamen validissimis ac sæpè repetitis ictibus quicquam effecissent; P. Reinhardum Zieglerum, eximium Societatis nostræ in Germania Mathematicum, qui tunc Roma negotiorum causâ morabatur, transeuntem casu, & inutilem artificum laborem miseratum, jussisse ut infra trabem fulcris impositam excitarent ignem, & jam calefacta aquam frigidam affunderent, & tunc demum ictus infligerent; eoque facto, confestim trabem diffractam. Causam eodem loco adsignavi, metum scilicet vacui, quod Natura abhorret.

## ANNOTATIO III.

**N**on alio artificid utuntur, qui ingentes trium aut quatuor centenariorum lapides pectoribus suis impositos diffringi malleorum ictibus sinunt: jacens nimirum supini in terra, brachia à ventre versus faciem extenta pectori utrimque apprimunt, saxum oblongum brachijs superponi transversim jubent, & validissimos malleorum ictibus à duobus fortissimis socijs infligi, halitum interim continentes, & strophio vultum tegentes, nè frustulis dissilientibus ledantur.

## PROPOSITIO LIV.

*Silicem reddere mollem, ac instar cera tractabilem.*

*Silicem  
reddere  
mollem.*

**V**Arij varias præscribunt præces. Est qui silicem igni Injectum impensè jubet calefacere, & quasi ignire: Deinde misceri inter se aquam separatoriam, acetum, & sanguinem hircinum, affundique silici ut totus cooperiatur. Molliri tunc ait, adeo ut instar ceræ tractari queat, intrâque abscondi litteræ, aut pecuniæ, atque aliò deferri. Indurescere denuò, si lacti caprino imponatur.

Alius silicem Ignitum ut antea jubet immergi intra aquam tartari ferventem, & extractum denuò injici eidem aquæ, & relinqui per horæ dimidiæ spatium. Ait non solum reddi mollem, sed ductilem etiam, ut instar corij extendi queat.

## ANNOTATIO.

**I**Nfrà Propositione 60. Centuriæ 3. mentionem faciemus cujusdam Galli hydropota, Ioannis Royer nomine, qui variorum colorum ac saporum aquas epotas ex ore depromebat. Is famulum habebat Germanum natione, annorum circiter octodecim Adolescentem, qui antequam Dominus artem suam adhibere inchoaret, in theatrum prodibat, vini lagenam unâ, scutellam durissimus silicibus plenam alterâ manu tenens. Silices ostendebat palam omnibus, & miscendo concutiebat ut sonum ederent; vinum deinde affundebat, & singulatim omnes devorabat Absumptis omnibus descendebat, ventrem concutiebat, ut lapidum sonus clare exaudiretur, tangi se ab omnibus, qui vellent, sinebat, nec ullus erat qui dubitaret, quin revera absumpsisset, atque in stomachum trajecisset silices. Erant qui existimabant, adolescentem talis temperamenti sibi peculiaris stomachum habuisse, ut lapides digereret: alij indigestos reddere per secessum putabant.

PRO-



## PROPOSITIO LV.

*Ut characteres, aut verba quacunque, in charta scripta, & combusta, in manu scribentis appareant.*

**P**ENNâ recentem temperatâ, urinâq; tuâ recenti intinctâ, scribe in cava aut convexa manu sinistra quosvis characteres, aut verba, clâm alijs, attendendo diligenter ut ductus & verba bene omnia exprimantur, nec deinde sudando aut aliâ ratione deleantur. Cum jam amictis spectaculum exhibere cupis, scribe atramento in charta candida eisdem characteres, aut verba; & postquàm exsiccata fuerint, accende chartam, & projectam in mensam penitus combure. Residuum carbonem aut cinerem colloca supra eum locum manûs, ubi scripsisti antea characteres aut verba, ac tere; adhærebit pulvis urinæ, & verba antea in charta descripta apparebunt in manu, non sine spectantium stupore; præsertim si varias cruces & signa alia, in speciem superstitionis, præmiseris.

*Verba scripta in charta combusta ut in manu appareant.*

## PROPOSITIO LVI.

*Ut vas stanneum in hypocausto calido supra mensam positum, statim glaciæ constrictum mensæ adhæreat.*

**F**UNDO vasis stannei injice salem communem, aut salpetram comminutam, & vasis reliquum reple nive: deinde in hypocausto calido madefac partem aliquam mensæ, & supra eam sparge nivem, ac nivi apprime fundum vasis. Deprehendes paulò post fundum vasis adhæreere mensæ, constrictum glaciæ.

*Vas in hypocausto calido ut præ frigore mensæ adhærescat.*



## PROPOSITIO LVII.

*Ut aqua in hypocausto calido, aut æstate  
congelascet.*

*Aqua in  
hypocausto  
calido ut  
congelas-  
cet.*

**V**As vitreum ventricolum, & angusti colli ac oris, reple aquâ tepidâ, & diligenter obtura. Aliud deinde vas reple nivibus, sale communi, & salpetrâ mistis. Hisce nivibus sepeli vas vitreum aquâ plenum, ut undique sit tectum, idque vel in hypocausto calido hyemali tempore, vel in summis etiam æstatis caloribus. Post breve tempus invenies aquam penitus congelatam. Idem contingit, si vas stanneum, aut cupreum, aut cretaceum adhibeatur: facilius tamen & manifestè in vaso vitreo.

## PROPOSITIO LVIII.

*Ut canes pratercuntes urinam in aliquem  
mittant.*

*Canes ut  
mingant in  
aliquem.*

**P**anno aliquo absterge & frica genitalia canis sceminae, eo maximè tempore, quo masculorum consortium appetit; eoque panno terge & frica similiter, sed clanculum, alterius calceos, aut tibi alia. Quotquot canes masculi occurrent, odore allekti accedent, & elevato pede contra calceos mingent.

## PROPOSITIO LIX.

*Lepores in unum congregare locum.*

*Lepores in  
unum con-  
gregare.*

**A**ccepe Leporem sceminam prægnantem, & excissam matricem unâ cum catulis impone ollæ novæ, nè humor diffuat. Quotiescunque jam Lepores in unum vis congregare locum, & retibus capere; ollæ impone pedem Leporinum; hunc exemptum alliga calceo ita, ut dum ambulas, terram pes Leporinus contingat. Perambula deinde locum in quo Lepores esse nosti; dispone retia, suspende è palo aut stipite prædictam

Etam matricem cum catulis, altiori tamen loco, quàm ut ab accedentibus Leporibus attingi queat. His factis, quotquot Lepores in vicinis absconditi sunt locis, odorem vestigiorum tuorum sequentes, & ad suspensam matricem properantes, retia incurrent, & præda fient.

## PROPOSITIO LX.

*Venatorum, aliorumque jaculatorum secretum examinatur.*

**V**enatores, alijque qui jaculandi arte delectantur, varijs utuntur praxibus & secretis (ut ipsi appellant) ad ictus certitudinem procurandam, idque eò confidentius, & sine divinæ offensæ suspitione, quòd eadem libris typo evulgatis circumferuntur, & viris, ut apparet, doctis, approbantur. Vnum hîc examinare libet.

*Venatorum  
secretum  
examinatur,*

*Martinus Schmucken* in Thesauriolo Secretorum par. I. Secreto Naturali XI. modum docet præparandi sclopetum, quo avium quarumvis, in quas collineatur, colla glande plumbeâ, ictu infallibili traijciantur, & nullâ aliâ parte lædantur. Petere nimirum jubet à carnifice clavum, quo malefactoris rotæ impositi caput fuit rotæ affixum; & ex parte anteriore atque acuta, quæ caput transfixerat, fieri dioptram ac nodulum, & sclopeti dorso antè & retrò, ut fieri assolet, imponi, ad visum dirigendum. Præparari autem debent dicta dioptra & nodulus horâ Martis, ac sine igne. Hoc sclopeto, ait, quarumvis avium colla certo ictu traijciēs. Si tamen eodem sclopeto quis utatur in finem alium, ut ad metam attingendam, aut Lepores configendos; vim priorem perdet.

## ANNOTATIO.

**C**Itatus Auctor vocat se Medicinæ Licentiatum, prædictumq; Secretum numerat inter naturalia. Sed qualis qualis fuerit Medicus, malus certè aut nullus fuit Philosophus Non nego, clavum malefactoris sanguine tinctum atrahere ac retinere qualitates aliquas aut noxias, aut salutiferas: vim tamen illam de qua agimus, habere nullâ ratione potest. Neque enim dirigere potest sclopetum in avis collum, cum in venatoris pote-

potestate sit, quò libuerit, eam dirigere; alioquin illo etiam nò cooperante avis collum peteret. Neg. etiam avis collum in advolantem globum dirigere potest, alioquin similiter id faceret venatore in avis collum non collineante. Nec denique venatoris aut manus, aut oculos, aut imaginationem in avem dirigit, alioquin ratio nullae esset, cur a subito sclopeto in alium usum, vis illa continuò amitteretur. Malus ergo Genius est, qui aut sclopetum dirigit, aut glandem emissam ad collum avis defert, aut avem ad glandem advolantem. Primus qui opem à damone petiuit ad certos ictus, ex dicto clavo dioptram conficere est iussus. Illicitum ergo est remedium, utpote cum pacto implicito cum damone implicitum.

## PROPOSITIO LXI.

*Venatorum & jaculatorum incantatio  
examinatur.*

*Venatorum  
incantatio  
examina-  
tur.*

**I**dem Martinus Schmucken lo. cit. Secret. 12. ait, si quis pannum, quo venator aut jaculator sclopetum eluit, foramini in quercus trunco Orientem respiciente facto indat, foramenque cuneo è spina acuta (aut Hagendorn) obturet; venatorem illum ac jaculatorem dicto sclopeto nullum unquam ictum, quamdiu pannus ille absconditus manserit, facturum. Ad hanc incantationem evitandam, jubet pannos post eluta sclopera abijci in profluentem, aut comburi, aut in cloacas projici.

## ANNOTATIO.

**S**imile iudicium de hac incantatione formo. Pannus ille nidorem pulveris nitrati attrahit, ac retinet: sed nec sclopetum in metam aut bestiam directum avertere potest, nec bestiam aut metam aliò dvertere, nec jaculantis manum, visum, phantasiam perturbare alioquin idem efficeret, quocunque loco foret, maxime si non procul ahaesset. Cur enim foramini debet indid? cur foramini quercus? cur orientem respicientis lateris? certè haec causa cum relato effectù conne-  
xionem naturalem nullam habent.

PRO-

## PROPOSITIO LXII.

*Ut barba aut capitis pili, qua vis parte, & quantâ  
vis mensurâ, cuidam excidant.*

Multa circumferuntur apud Pedemontium, Portam, Wackerum, Mizaldum, & alios, quæ pilis è quavis corporis parte eradicandis utilia esse dicuntur. Quod hîc subijcimus ex lib. 3. Physicæ nostræ Curiosæ cap. 23. ubi id quoque retulimus, lepidum, & verissimum est, experiëntiâque comprobatum.

Vir mihi notissimus, è cujus ore historiam habeo, cùm Romæ brumali tempore sub vesperum domum ex Urbe revertisset, & clausis ad primum ingressum cubiculi fenestris ac valvis, illatoque lumine, ad studendum se composuisset; videt ingentem foricem ad valvas interiores cubiculi oberrantem, & quærentem exitum: ingressus enim absente Viro illo per fenestram apertam, inclusus manserat. Arripit ergo baculum qui fortè ad manum erat, & forici ad parietem arreptanti tam validum infligit ictum, ut sanguis per baculum ad manum usque momento temporis, percutiente id minimè advertente, magnâ copiâ deflueret, ac manum commacularet. Quo facto, abiicit per fenestram apertam foricem, & studia prosequitur, mentum cum maxilla dextera sustentans manu, cubito mensæ innixo, ut facere consueverunt, qui libros meditabundi legunt. Die sequenti, cùm primùm in conspectum venit Collegarum suorum, risu excipitur & cachinnis: erat enim (quod ipse non advertebat) menti pars dextera, dexteraque maxilla penitus depilis, pars verò reliqua hirsutie panè oblecta. Subitò igitur è conspectu hominum se subducit, & partem quoque alteram barbæ abradi novaculâ curat, antidotumque ad pilos recuperandos adhibet. At cùm pili jam crescerent, non minori quàm antea risu excipiebatur: erant enim qui de novo erumpebant, mollissimi instar lanæ, reliqui verò setarum in modum duri: nec parum expectandum fuit, donec ad æqualem utrique duri-tiem reducerentur.

Si ergo jocum alicui facere, & risui exponere vis, depilando ex parte tantum aut barbam, aut caput, foricum sanguine occulte eum illine.

## ANNOTATIO.

**M**izaldus ait, urinam murium, foricumque, pilosum locum reddere depilem: restitui vero pilos alparum sanguine, aut earundem pelle, si ei loco affricentur.

Weckerus lib. 5. Secretor. Cap. de Capillis minuendis, refert experimentum à rustico, & ait, ut pili cadant ex quocunque loco, nec amplius renascantur, efficere sterco felis siccum, tritum, & forti ateto ita mixtum, ut fiat veluti spissamentum, si illo locus pilosus saepius in die defricetur, & inungatur.

Idem efficere ait Alexius Pedemontius, si formicarum ova terantur cum hyoscyami & cicuta succo, vel vesperilionis & testudinis sanguine, eoque linimento locus inungatur.

## PROPOSITIO LXIII.

*Ut manus lavans ac tergens, eas denigret.*

*Manus & faciem lavando aqua ut quis denigret.*

**S**i ad convivij initium hospiti benè noto ac familiari, aut parassito jocum facere, reliquis risum movere cupis; hoc utere ludicro. Chalcantum seu vitriolum dissolve in aqua, qua manus lavandæ sunt ad mensæ initium; mantili verò quo detergendæ, insperge gallas in pulverem comminutas, & fursure mitas. Cui jocum facturus es, præbe ad lavandas manus prædictam aquam, & ad tergendas mantile. Quas quò magis absterget, eò apparebunt nigriores, non sine tergentis admiratione & indignatione, astantiumque risu.

Hoc idem ludicrum præscribit Porta lib. 14. Magiæ Natur. cap. 13. ad arcendos à mensis magnatum parasitos: jubet enim chalcantum & gallæ pilas conterî: arctiori cribro excerni, quò faciliùs tenuissimus pulvis excidat; inspergi eo pulvere mantile, ac deinde agitari, seu leniter ventilari, quò faciliùs quod hæsit,

hæsit, excidat, ac demum manibus teri, & fricari, usque dum optimè existimetur adhæsisse; deterſo demum, atque excusso quod non insedit, cum cænipeta seu parasitus manus & faciem jam madefactas habet. mantile quo abstergat, proijcere. Quod ubi aquam sentit, manus & faciem nigerrimo colore inficit, qui ægrè multis etiam lotionibus elui potest.

## PROPOSITIO LXIV.

*Vi assumptos in os cibos deglutire quis  
nequeat.*

Quæ huic effectui producendo præscribunt nonnulli, aut superstitiosa sunt, aut mendacia: quæ ex Porta subijcio, naturalia, ac vera.

*Cibus in  
os sumptos  
ut quis di-  
glutire non  
possit.*

Porta igitur lo. cit. ait, scriptum se reperisse, si acu, quâ mortui sæpe linteis obvoluti confarciantur, clam cænæ initio sub mensa figas, prohibere eam convivis esum, ut accumbentes potius tædeat cænæ, quàm edendi voluntas sit. At hoc falsum esse, & experientiæ repugnare, testatur idem; & meritò, cum nulla in ejusmodi acu vis naturalis ad prædictum effectum producendum appareat.

Eodem Portâ teste scribit Florentinus, & alij passim libellis germanico idiomate impressis qui circumferuntur de secretis. Ocimum (Basilicam aliqui appellant, Itali Basilicò, Germani Basiliusfraut) fœminis adeò adversari, tantâque cum eis discordiâ pugnare, ut si pultario, muliere insciâ, subjectum sit, nunquam manus ad cibum sumendum admoveat, priusquàm subductum sit. Sed hoc, ut benè advertit Porta, insigne est mendacium: nam cum eo & fœmina intercedit tanta familiaritas, ut non solum pensilibus in hortulis maximâ ferant & excolant diligentia, etiam ad illorum conclaviarum fenestras, quæ diu noctuque incolunt, sed frequentissimo etiam usu in obolij, & acetarijs, in Italia præsertim, & Sicilia, adhibeant.



Porta autem ad prædictum effectum hoc utitur remedio. *Herbæ, bella donna* vocatæ, radicis drachmam unam leniter contusam vini phialæ immergit, ac intermissis duodecim horis, aut paulò pluribus, ejusmodi vinum manè cyathi mensurâ secum pransuro propinat, ac post tres circiter horas ad mensam vocat. Tunc enim vel primum assumptum bolum nullo conatu aut labore deglutire potest, sine faucium læsione, aut dolore, ac vix potum admittere. Cùm cachinnatum satis ab assidentibus, si vult ut prandeat, bibatque; lactis aut aceti plusculum, & gargarizatum absorbere jubet, restituiturque in integrum, ac si nihil passus fuisset.

## PROPOSITIO LXV.

*Ut cibi omnes amarescant comedenti.*

*Cibi ut in ore amarescant.*

**S**I cultri laciem, mantilia quibus os abstergitur, orbis & cochlear colocynthidis carne sive medullâ perlinas, & hospitl cui illudere seu seridè, seu joco vis, apponas; quidquid cultro secuerit, quidquid imposuerit orbibus, quidquid cochleari hauserit, amarissimum evadet: & si mantili os absterferit, adhuc vehementiori amarore inficietur, nec quicquam amplius sumere volet. Res est nota multis.

## PROPOSITIO LXVI.

*Ut bibenti cyathus ori adhereat.*

*Bibenti cyathus ut ori adhaereat.*

**L**ACTE sicûs, & gummi tragacanthæ dissolutis, perline in circuitu supremum cyathi labrum, intus & extrâ, & sine rescari. Huic cyatho si vinum infundas, & alteri ebibendum præbeas; adglutinabitur labijs bibentis tam fortiter, ut non nisi cum difficultate divellatur. *Porta lib. 14. Magiæ Natural. cap. ult.*

PRO-



## PROPOSITIO LXVII.

*Carnes calida mensis appositæ ut sanguinosæ  
appareant.*

Suprà Centur. I. Proposit. 40. docuimus, quâ ratione carnes appareant verminosæ, ut cum nausea à nescio secreti repudientur. Nunc qua ratione sanguinosæ apparere incipiant, docebimus cum *Porta* loco cit. Ita nempe:

*Carnes  
mensis ap-  
positæ ut  
appareant  
sanguino-  
sæ.*

Sanguinem leporinum coctum, atque exsiccatum, & in pulverem crassiusculum redactum, sparge super carnes calidas mensis recenter illatas, seu elixæ sint, seu assæ. Hic calore & humiditate carnis eliquescent, & carnes apparebunt sanguinolentæ, & cum nausea ab alijs rejicientur, aut repudiabuntur; à te autem, qui secretum nosti, comedentur.

## PROPOSITIO LXVIII.

*Avem assuesfacere, ut quoties avolavit, ad  
te redeat.*

Avi cuicumque adhuc involucris partem rostri superioris abscondæ, ut sponte suâ cibum sumere nequeat, illamque cibum, quoties opus fuerit; assuescetque ut à te cibum petat, &umat. Volucris jam factæ permittite ut liberè in loco clauso circumvolitet; & quoties fame stimulante à te cibum petit, porrige. Tandem ita assuesfactam, post toleratam aliquandiu inediam, è fenestra dimitte. Avolabit quidem; sed brevi stimulantefame ad te redibit. Redeunti ergò prompte cibum porrige, iterumque dimitte. Quotiescunque famebit, ad te redibit, quoniam sola sine rostro superiori integro cibum sumere nequit.

*Avem as-  
suesfacere  
ut avolet,  
& redeat.*

## ANNOTATIO.

**M**artinus Schmucken praxin hanc refert in suo thesauriolo par. I. aitque se norisse qui sturnum eâ ratione instructum habebat, persuadebatque simplicioribus spiritum esse familiarem. Mahometis columba fuit alio modo assuefacta, nempe à tenera atate cibum ex impostoris aure sumpserat; unde quoties famebat, in noto sibi loco cibum querebat.

## PROPOSITIO LXIX.

*Ut chartacea icuncula sponte supra mensam  
ambulare videatur.*

*icuncula  
chartacea  
ut sponte  
supra men-  
sam ambu-  
let.*

**V**idi sæpe statuas, aut res alias, automato quodam artificio, occultoque dentatarum rotarum implexu ac n.otu, supra mensam deambulare, & varios huc illucque gyros efficere. Simile quid potest simplicissimo, ac facillimè parabili artificio exhiberi. Si enim è levi charta effingas icunculam intus cavam, & foris in pilciculum, aviculam, virunculum, aliamvè effigiem efformatam, intus verò abscondas scarabæum, cujus dorso icuncula sit leviter adglutinata: Discurret scarabæus per mensam, variosque huc illuc gyros exercebit, & cum ad mensæ crepidinem venerit, ut casura videatur icuncula, sponte reverteretur, & inchoatos discursus continuabit, magnâ eorum, quibus artificio in mentem non venit, admiratione ac delectatione.

Similiartificio exhiberi possunt lacertulæ, aut testudines, per muros discurrentes. Loco scarabæorum adhiberi possunt alia animalcula, ut lacertulæ, muscæ majores, &c.

PRO-

## PROPOSITIO LXX.

*Ut pisciculus exiguus scutellam aqua ebibere  
videatur.*

SOL æstivus rorem Majalem in vapores resolutum trahit sursum, & absumit. Si ergo noctibus Majalibus, linteis sub dio expansis, aut per gramina rore madefacta volutatis, rorem excipias, & in scutellam exprimas, scutellæque pisciculum vivum imponas, ac soli exponas; resolvetur aqua in vapores, & magna ex parte brevi tempore deficiet: unde ignari mysteriorum, & scutellam aquâ communi plenam existimantes, à pisciculo eam absorberi credent.

*Pisciculus  
ut scutel-  
lam aqua  
ebibat.*

## PROPOSITIO LXXI.

*Ut quis ovum recens è cubiculi fenestella diffi-  
culter projiciat.*

NOTUM est omnibus, ovum recens difficulter, & non nisi casu projici intra parietis foramen, à quo paucis passibus distas, posse. Æquè difficile est, idem ovum è cubiculo aut hypocausto per fenestellam apertam, à qua vix tribus passibus distes, projicere, si cubiculi ostium sit clausum. Causa est vitelli & albuminis fluidi inter projiciendum tremor, & aëris moti huc illucque agitatio, quæ ovum projectum à via, per quam ab impetu dirigitur, abripit. At si ostium sit apertum, facilius ejicitur, quoniam aër commotus per fenestellam cum impetu expellitur, & ovum secum abripit.

*Ovum ut  
quis diffi-  
culter ex  
fenestella  
projiciat.*

PRO-

## PROPOSITIO LXXIII.

*Ut quis gladium neque è vagina extrahere, neque extractum intra vaginam reponere queat.*

SI gladij longiusculi, intra vaginam conditi, manubrium apprehendas manu dexterâ, vaginæ verò extremum seu apicem manu sinistrâ; neque extrahere totum poteris gladium, neque extractum reponere: quoniam gladius & vagina simul in directum positi, longiorem efficiunt lineam, quàm utrumque brachium extensum.

*Gladium è vagina ne quæ extrahere nequeat.*

## PROPOSITIO LXXIV.

*Lineam meridianam sine Sole, & sine acu magnetica invenire.*

VARIjs modis id fieri potest. *Primò.* Imple scutellam aquâ, & acum communem, etiam magnete non illitam, longam tamen & subtilem, transversim dexterè colloca supra aquam, ut non mergatur. Natabit huc illucque, & in gyrum vertetur tam diu, donec una ejus extremitas versus polum arcticum, altera versus antarcticum sit directa. Si acus ob gravitatem, aquæ non supernatat, sed subsidit, infige eam exiguo suberis frustillo; & natabit.

*Meridianam lineam sine Sole reperire.*

*Secundò.* Filum ferreum, aliumvè æqualiter rotundum è chalybe aut ferro stylum, in ignem projice donec excandescat. Extractum, & refrigeratum infige suberis frusto, & transversum colloca supra aquam vale aliquo sufficientis amplitudinis exceptam, aut aliam quamcunque consistentem & quietam. Vertet se, ut acus antea, in gyrum, disponetque extremitatem unam versus Boream, alteram versus Austrum.

*Tertiò.* Veru, aut ferrum aliud longum, & æqualiter crassum, suspende per medium è filo, aut funiculo, & æquilibra.

Hærens in æquilibrio, post multos nunc ad dexteram, nunc ad sinistram repetitos gyros, tandem quiescet, & meridianæ loci tui lineæ congruet.

*Quartò.* Serrâ arboris truncum seca, ita ut sectio sit horizontali parallela. Videbis in suprema superficie multos circulos, sed excentricos, qui una ex parte magis, altera & opposita ex parte minùs sunt sibi vicini. Pars illa in qua laxiores sunt circuli, Austrum: pars altera, in qua arctiores sunt, Boream respicit: quoniam Australis aura, utpote caldior, circulos sibi obversos dilatat: Borealis verò aura, utpote frigidior, oppositos semicirculos constringit. Si igitur tam hos, quàm illos semicirculos divides bifariam, & divisionum puncta jungas lineâ rectâ; erit hæc, lineâ meridiana quæsitâ. Debet autem eligi arbor, quæ ordinariè à Sole fuerit liberè collustrata.

## PROPOSITIO LXXV.

*Doliolum fabricare, quod tres diversos liquores impermixtos, per idem foramen infundendos, & ex eodem epistomio depromendos, contineat.*

*Doliolum tres liquores ex eodem epistomio effundens.*

*Vide Icon, XIII, Fig. I.*

**I**nventum hoc pulcherrimum proponit *P. Ioannes Leurefchon* Gallico, & ex ipso *Gaspar Ens* latino idiomate, ille in Recreationibus Mathem. Proposit. 81. hic in Thaumaturgo Mathemat. Probl. 87. Quod propterea paulò distinctiùs explicatum huc transferre lubuit.

Fiat doliolum *AB*, in tres cellulas *C*, *D*, *E*, suis diaphragmatibus seu interstitijs discriminatum, destinatas totidem liquoribus infundendis, v. g. vino rubro, vino albo, cerevisiæ aut aquæ. Hi omnes ut impermixti infundantur per idem superius foramen, ut in alijs dolijs fieri assolet, & quilibet in sibi destinatam cellulam deriveatur; inædificetur dicto foramini obturamentum *FG* intus cavum, & tribus tubulis *HI*, *KL*, & *MN* instructu-





Fig. II.




Fig. III.




Fig. I.



structum, quorum primus derivetur in cellulam d, secundus in cellulam c, tertius in cellulam e. Et hi tubuli sint ab utraque parte aperti, osculaque h, k, & m desinant intra cavum & clausum obturamentum p g. Huic intrudatur infundibulum o, tribus instructum lateralibus foraminibus, quæ dictis tribus tubulorum osculis h, k, & m exactè respondeant; ita tamen, ut si unum foramen uni osculo obvertitur, illudque apertum relinquit, reliqua duo à reliquis duobus sint averfa, eaque claudant. Hac enim ratione fiet, ut si admoveas infundibuli foramen osculo h, & liquorem infundas per tubulum h i, influat in cellulam d, in reliquas verò cellulas nihil influat, quia oscula tubulorum in ipsas desinentium sunt clausa. Si verò admoveas foramen osculo k, liquor per k l influet in c. Si denique admoveas foramen osculo m, liquor per m n in e influet. Hac ergo ratione tres cellulae, per idem foramen superius dolioli, nempe per infundibulum o, tribus liquoribus impermixtis sunt repletae.

Uteosdem impermixtos depromas ex eodem epistomio x, inferre dolioli, in loco epistomij ordinarij, aliud obturamentum p t, intus cavum, & retro clausum, tribusque tubulis q, r, s, t v, utrimque apertis instructum, quorum oscula q, r, & t desinant in ipsam cavitatem obturamenti. Huic intrudatur epistomium x, perforatum per medium, habens tria lateralia foramina, respondentia tribus tubulorum osculis q, r, & t; ita tamen, ut si unum foramen uni osculo admoveatur, reliqua duo à reliquis duobus removeantur, ideoque hæc oscula claudantur. Si jam unum epistomij osculum admoveas uni tubulo, v. g. q r; effluet liquor cellulae c. Si alterum admoveas tubulo r s; reliqui duo tubuli erunt clausi, & liquor cellulae d effluet. Si denique tertium foramen admoveas tertio tubulo t v; effluet ex x liquor cellulae e.

## ANNOTATIO.

**H**oc artificium viam monstrat ingenioso ad multas alias huic similes inventiones excogitandas, poteritque fabricare cujuscunque forme vasa, quotcumque libuerit liquores continentia ac depromentia eodem ex foramine.

## PROPOSITIO LXXVI.

*Speculum planum ita situare, ut intuens nec se, nec  
objecta visui exposita videat, sed alia que non  
videntur sine speculo.*

*Speculum  
planum ut  
ostendas res  
non visas.*

**S**peculorum naturam, proprietates, mira ac prodigiosa phasmata fusè & ex fundamentis explicavimus, in Magia Cato- perica, hoc est, in lib. 6. 7. & 8. primæ partis Magiæ Universalis Naturæ & Artis. Ex ijs brevissimè nonnulla huc transcribam, in eorum gratiam qui aut dicto Opere carent, aut fusiùs scripta legere detrectant; aut quia theoricæ sunt praxibus immistæ, à lectione abhorrent, quam putant (falsò tamen) se sine Mathematica frustra tentare. Incipio à speculis planis, & à phænomeno in propositione exposito.

Multis ergo modis contingere potest, ut quis in speculo plano nec suam videat imaginem, nec eam quæ coram speculo est, & ab adstantibus videtur, aliam verò ab adstantibus non visam intueatur. Primò sic.

I. Speculum planum parieti aliquantulùm supra intuentium oculos appende, eique objectum aliquod, v. g. statuam tabulato insistentem, perpendiculariter oppone. Hæc ab intuentibus speculum non videtur, quia radij ejus in speculum perpendiculariter cadentes, non reflectuntur in oculos intuentium, sed revertuntur in ipsam statuam. Extra speculum tamen ab omnibus adstantibus videtur. Ipse quoque intuens speculum non videt in eo imaginem suam, quia radij ejus in speculum obliquè incidentes, reflectuntur sursum, non verò in oculos suos.

II. Retro dictam statuam, & retro tabulatum, paulò altiori loco quàm statua sit, dispone alia objecta, aut picturas, quæ tabulati & statuæ interpositione non appareant, radient tamen obliquè in speculum, cum sint altiora speculo. Hæc oculis certo loco constitutis, & speculum intuentibus apparebunt in speculo, quoniam radij deorsum in oculos reflectentur.

ANNO-

## ANNOTATIO I.

**H**Ac arte exhiberi possunt pulchra ac jucundissima spectacula. Nam si supra tabulatum colles picturam aut statuam quamcunque, retro verò colles illius qui speculum intuetur, picturam aut statuam cornibus deformem, aut aliter deformatam; aspiciet is se ipsum in speculo cornutum, aut aliter deformatum. Si supra tabulatum ponas circulum sculptum, aut pictum, retrò verò quadratum sculptum aut pictum, exhibebis in speculo quadraturam circuli. Si statua supra tabulatum posita adscribas nomen Alexandri, statua verò retrò posita nomen Caesaris; apparebit hujus nomen in speculo, non illius. Si denique horologij supra tabulatum collati index monstret horam 12. horologij verò retrò depicti index horam 4. videbis hanc, & non illam.

## ANNOTATIO II.

**S**I latente machinulâ per funes & trochleolas, sublatus prioribus objectis retro tabulatum dispositis, alia atque alia substituas; poteris eodem tempore varia exhibere phasmata, qua loco objecti supra tabulatum immobilis appareant intuentibus. Ingeniosus & industrius Catoptricus, imò & non Catoptricus, solâ observatione & experientiâ multa alia inveniet.

## PROPOSITIO LXXVII.

*Aliter speculum planum ita situare, ut intuens speculum, nec se ipsum videat, nec objectum à se visum, sed aliud à se non visum.*

**P**rimâ par. Magiæ univers. lib. 6. Syntagm. 1. cap. 2. Proposit. 4. docuimus hanc praxin.

I. Speculum planum appendatur muro, longè altiori loco tuâ statuâ, ita ut pars inferior muro adhærescat, superior verò à muro removeatur, ac deorsum spectet, possitque per funiculum & trochleolam magis aut minus removeri.

*Speculum  
planū ali-  
ter situare  
ut repræ-  
sentet non  
visū.*

II. Ante murum & ante speculum statuatur tabula ( aut aliquid simile ) & retro inter murum & tabulam, collocentur duo aut tria objecta, unum altiori loco quàm alterum; quæ tamen à stante ante tabulam videri nequeant.

III. Supra tabulam colloca quodvis objectum, diversum ab ijs quæ retro sunt: & stans ante tabulam & speculum, in loco quem experientia docebit, jubet alium speculum attractâ aut remissâ chordâ tam diu elevare ac deprimere parte suâ superiore, hoc est, eam tam diu muro admove re, aut removere ab eodem, donec nec te, nec objectum supra tabulam collocatum videas, cernas tamen objecta retro tabulam collocata, in uno quidem loco unum, in altero alterum.

IV. Quicumque ergo stabunt in locis à te repertis ( dummodò non sint notabiliter te longioris aut brevioris staturæ ) nec se videbunt in speculo, nec objectum supra tabulam positum, sed alia à se extra speculum non visa.

## PROPOSITIO LXXVIII.

*Adhuc aliter speculum planum situare, ut intuens nec se, nec imaginem expositam videat, non verò expositam videat.*

*Speculum planum adhuc aliter statuerunt non visa monstrat.*

**H**ANe etiam praxin docuimus lo. cit. Propos. 6. & in hoc consistit.

I. In pariete, loco paulum altiore quàm statura hominis sit, affigatur speculum planum, non inclinatum, sed parieti parallelum.

II. In pariete altero è regione speculi fiat fenestella, humiliore loco quàm speculum sit, quæ tamen coronide adstructâ, aut aliâ ratione ita occultetur, ut à stantibus in cubiculo videri nequeat.

III. Intra dictam fenestellam colloca picturam aliquam, aut quodcunque objectum, quod per ipsam in speculum radiare queat: in ipso verò cubiculo è regione speculi pone objectum

jectum aliud, æquè altum ac speculum, aut etiam minùs altum.

I V. His factis, stans antefspeculum, non videbit seipsum in speculo, quia radij ipsius non reflectuatur ex speculo in oculum ejus; sed sursum: nec etiam videbit objectum è regione aut à latere speculi positum, propter eandem causam: sed videbit objectum intra fenestellam positum, ob contrariam rationem.

## ANNOTATIO.

Possset tamen speculum etiam inclinari ad murum, & ita disponi, ut ad quemcunque angulum, seu ad quamcunque inclinationem accommodari possset. Et tunc possset ita elevari ac deprimi funiculo ac trochleolâ, ut intuens speculum, & eodem loco manens, nunc videret in speculo se, sed non imaginem retro fenestellam, nunc verò hanc imaginem, & non seipsum. Hoc pacto exhiberi possset illusio illa Catoptrica, de qua lo. cit. qua Italus Florentinus quibusdam adstantium exhibebat eorum propriam imaginem, alijs verò imaginem retro fenestellam, averso vultu, & nigris capillis; dicebatque legitimos esse quibus sua, illegitimos quibus hac apparebat imago.

## PROPOSITIO LXXIX.

*In speculis planis representare, quæ extrâ non apparent.*

I. Fiat imago striata, seu lignea, seu chartacea, eo artificio, quod docui in 1. par. Magiæ univers. lib. 1. par. 1. cap. 7. pragmat. 1. 2. & 3. in qua videlicet pictura non apparet, nisi planum striatum aspicias à latere.

*Speculo plani  
non res extrâ  
non appa-  
rentes re-  
presentantur.*

II. Appende speculum planum parieti, ita ut sit inclinatum ad parietem, & caput speculi deorsum pendeat, pedes verò parieti hæreant. Pendeat verò loco paulò altiori quàm hominis statura sit.

III. Ante



III. Ante speculum colloca strlatam imaginem, ita ut pictura stris adpicta respiciat planum speculi, & in ipsum perfectè radiet, exactèque in ipso exprimatur.

Hoc facto intuens speculum videbit in eo imaginem, quæ extrà non apparet. In aliquo etiam situ nec seipsum videbit.

*Aliter.*

Speculum planum colloca horizonti parallelum, supra mensam, aut scamnum, ut planum speculari sursum spectet. In tabulato cubiculi fac foramen, quod ab adstantibus mensæ & speculo non faciliè videatur. Intra foramen dispone objectum illustre, quod per foramen radiet intra speculum.

## PROPOSITIO LXXX.

*Impudens mendacium, aut superstitio non-nemini.*

*Mendaciū  
aut super-  
stitio in-  
geni.*

Quidam cujus nomini parco, inter alia impudentissima mendacia, aut superstitiones à se in libello quodam edito pro-palatas, præmissâ magnâ verborum pompâ ad fidem sibi apud simpliciores conciliandam, secretum proponit, ut ipse ait, pulcherrimum, ad experiendum naturaliter, si quis è familia aliqua, ut pater, mater, filius, aut alius quivis ejusdem familiæ hæres (hæres enim debet esse, non alius) abisset in regionem longinquam, num adhuc vivat, aut mortuus sit.

Accipe, inquit, herbam à Botanicis telephium, & crassulam dictam, Germanicè Wundkraut/ Fettehenne/ & aliquibus in locis Knäbleinskraut; non est tamen orchis, seu species satyrij, quod similiter à Botanicis appellatur Knabenkraut. Habet folia crassa & pingua, in radice multos nodos, & crescit ad altitudinem duarum spicamarum. Vondiesem Kraut brich em Stengel ab/ vnd stecke ihn vnter des Hausi Tach/ eâ animi intentione, an einen Orth hin; hoc est, Hujus herbæ accipe caulem seu scapum unum, & eâ animi intentione (ut scilicet scias, num persona absens vivat, aut mortua sit) colloca quodam in loco infra tectum domus.

domus. Si vivit persona, pergit caulis ille crescere ad manus longitudinem, manet viridis per aliquod tempus, acquirit nova folia in parte superiore, tametsi inferiora paulatim marcescant. Sin mortua est persona, hæc non contingunt, sed statim incipit herba flaccescere, & siccare.

Hoc verissimum esse, ait Auctor, & jam aliquoties experimentiâ comprobatum. Ego autem dico, aut impudentissimum esse mendacium, aut aniles fabulas; aut si contingit, quod ait Auctor, casu id evenit, quia nimirum cùm viveret adhuc persona, herba ea fuit illo tempore abscissa, eoque loco abscondita, ut ob humorum abundantiam antea habitam, & ab aëre humido attractam, virere & crescere per aliquod tempus potuerit. Potuit etiam dæmonis ope id contingere. Hæc omnia si absint, nulli naturali causæ ejusmodi effectus, stando in Philosophiæ communis principijs, fuisse potest, ideoque miraculosus foret, ac soli Deo præter Naturæ leges operanti adscribendus. At quis credat, Deum ad quorumvis curiosorum hujusmodi hominum signa posita, miraculum edere?

## ANNOTATIO.

**M**ajorum veri similitudinem habet quod idem Auctor affert experimentum, ad experiendum, quinam eodem in loco, eandemque ad mensam discumbentium, occultam contra se foveant inimicitiam. Accipi nimirum jubet linguam vulturis, alligarique nuda planta pedis sinistri; dexterâ verò manu gestari radicem verbenæ, seu verbenacæ (Risse seu frautwurzel) effossam die Solis manè horâ ante Solis ortum, quæ est hora Martis. Hisce rebus instructus, ait, si mensæ accumbas cum alijs, non multò post illi qui occulto erga te odio flagrant, eadem in mensâ & loco manere nequeunt, sed abscedere coguntur. Hoc inquam majorem similitudinem veri habet: quoniam nudâ & calidâ pedis plantâ, nudâque ac calidâ manûs volâ, dictarum rerum effluvia virtutum excitantur, & undique sparguntur, corporaque dissidentium penetrantia, antipaticum effectum mirificè augens. Nihil tamen affirmo, nisi certius quid mihi de prædicto effectû constet: Auctori enim alijs in rebus superstitiosus tam credulo, minimè credo.

## PROPOSITIO LXXXI.

*Ut aqua in vinum converti videatur,  
efficere.*

*Aquam in  
vinū con-  
vertere.*

**P**hialam vitream, alteriusvè materiæ, habentem collum oblongum ac gracile, osculumque angustum, reple aquâ fontanâ, & osculo pollice obturato inverte phialam, nè aqua effluat: collum deinde immerge vino per foramen superius dolij pleni, & post aliquod temporis spatium extrahe. Invenies phialam plenam vino, putabitque ignarus secret, aquam in vinum conversam. Ita docuimus *par. 3. Magia nostra lib. 5. Syntagm. 2. Pragmat. 22, ex Portalib. 18. Magia cap. 3.* Ratio ex Hydrostaticis patet: quia enim aqua gravior est quàm vinum, fit, ut ex inversa phiala effluat, & pondere suo infra vinum descendat, vinumque levitate suâ ascendat intra ipsam, & aquæ effluenti succedat, ad vacuum impediendum, nec cessetur, donec tota descenderit aqua, & tantundem ascenderit vini. Et hoc adeo fit manifestè, ut si vinum sit rubrum, videas id per mediam aquam ascendere, usque ad fundum phialæ inversæ, & aquam descendere vicissim ad fundum vasis vinum continentis.

## ANNOTATIO.

**S**chwenterus in *Delicijs Physico-Mathem. Par. 13. quest. 34. ait,* idem tentari posse vino rubro & albo. *Sed nisi vinum alterutrum sit altero notabiliter levius, nullus sequetur effectus. Sequetur tamen, si vinum sit album, & aqua colore aliquo luculenter tincta.*

## PROPOSITIO LXXXII.

*Tres ova numero inequalia aequè carè vendere, & tamen eandem pecunia summam referre possunt.*

Mulieres rusticæ tres ova venalia ad forum conferunt, numero inæqualia, una nimirum 10, altera 30, tertia 50; & quælibet illarum ova singula æquali vendit pretio, nec unâ plus minusvè refert pecuniâ, quàm altera; hoc modo. Primò quælibet vendit 7 ova pro eadem certa pecunia, v. g. pro uno bacio,

*Ova inæqualia numero aequè carè vendere, & eandem pretium reportare.*

Ova venalia.	Ova vendita:	Nummi:	Ova residua.	Nummi.
10.	7.	1.	3.	9.
30.	28.	4.	2.	6.
50.	49.	7.	1.	3.

quæ habuit 30, vendit 28, accipit nummos 4, retinet 2. ova: & quæ habuit 50. ova, vendit 49, accipit nummos 7, & retinet 1. ovum, prout in apposito laterculo apparet. Augent deinde pretium, & unanimi consensu exigunt, & accipiunt pro singulis ovibus tres nummos. Prima ergo pro tribus ovibus residuis accipit 9. nummos, secunda pro 2. ovibus residuis accipit 6. nummos, tertia pro 1. residuo accipit 3. nummos. Habebit ergo prima nummos 10, & totidem secunda, nec plures tertia. *Huic praxi similis est qua sequitur.*

## PROPOSITIO LXXXIII.

*Ex diverso numero margaritarum eodem pretio distractarum à tribus, reportari potest à singulis eadem pecunia summa.*

Primus habet 10. margaritas, secundus 20, tertius 30. Primò convenit inter illos, ut singuli vendant 6. pro uno aureo.

*Margaritarum numero inæquales aequè carè vendere, & eodem pretio reportare.*

Primus igitur pro 6. venditis habebit unum aureum, & retinebit 4. margaritas. Secundus pro 18. venditis habebit 3. aureos, & retinebit 1. margaritas. Tertius pro venditis omnibus 30. habebit 5. aureos, & nihil retinebit. Postea conveniunt inter se primus ac secundus, ut quilibet vendat singulas margaritas residuas pro singulis aureis. Itaque primus pro 4. residuis accipiet adhuc 4. aureos, & secundus pro 2. residuis adhuc aureos 2, sicque singuli habebunt 5. aureos.

Marga. venal.	marga: venditæ	aurei	marga: residuæ	au- rei
10.	6.	1.	4.	4
20.	18.	3.	2.	2
30.	30.	5.	0.	0

## PROPOSITIO LXXXIV.

*De famulo misso ad colligenda poma ex horto  
certâ conditione.*

*Poma certâ  
conditione  
à famulo  
collecta.*

**D**ominus quidam mittit famulum ad viridarium, ut poma colligat hac lege. Debet famulus transire per tres portas, & ad primam dare telonario medietatem pomorum collectorum, ac insuper unum; ad secundam verò medietatem residuorum, & unum; ad tertiam deniq; medietatem residuorum, & unum; tandemque retinere debet unum solum pomum, & domino adferre. Quæritur, quot colligere debeat? *Respondeo*, 22: sic enim si ad primam portam relinquat 11. & unum, retinebit 10; si ad secundam relinquat 5, & 1, retinebit 4; si denique ad tertiam relinquat 2, & 1, retinebit 1. Inspice appositum exemplum, In quo A est prima porta, B secunda, C tertia, D Dominus famuli. Ratio est, quia 1. pomum quod Domino defert, unâ cum illo uno quod ultra medietatem relinquit ad tertiam portam, debet esse medietas illorum quæ habuit ad portam prædictam, ac proinde ibidem habere debet 4: hæc 4 iterum cum illo 1. quod reliquit ad secundam portam, debet medietas esse illorum quæ habuit ad dictam portam

A.	B.	C.	D.
12.	10.	4.	1.
11. 1.	5. 1.	2. 1.	

portam secundam; ergo ibidem habere debuit 10: hæc iterum cum 1. illo quod reliquit ad primam portam, debent esse medietat illorum quæ ad primam portam habuit; ergo ibidem habere debuit 22.

## ANNOTATIO.

**S**i Domino adferenda essent quatuor poma, deberes colligere 46: si quinque, 94, &c. Hinc patet, quid faciendum, si ad singulas portas relinquenda esset medietas & duo, vel tria, vel quatuor, &c. Item si relinquere deberet tertiam partem & unum, vel duo, &c.

## PROPOSITIO LXXXV.

*De septem portis urbis à septem capitaneis occupandis certâ conditione.*

**S**unt octo portæ alicujus urbis, nempe A, B, C, D, E, F, G, H: ex singulis ad alias duas sunt duæ viæ, nimirum ex A in D & F, ex B in E & G, ex C in H & F, ex D in A & G, ex E in B & H, ex F in A & C, ex G in B & D, ex H denique in C & E. Omnes autem viæ sunt rectæ. Harum portarum septem occupandæ sunt à septem Capitaneis, hæc observatâ conditione, ut nullus ingrediatur per portam jam occupatam ab altero; nec ullus occupet portam per quam ipse ingreditur, sed per unam duarum viarum pergat directè ad aliquam occupandam. Quæritur, quomodo, & quo ordine ingredi debeant?

*Vide  
Icon. XIII.  
Fig. II.  
Porta urbis  
certâ con-  
ditione oc-  
cupanda à  
septem ca-  
pitaneis.*

*Respondet*, si primus ingrediatur per quamcunque, & occupet unam duarum ad quas binæ viæ ducunt: Secundus verò ingressus per alteram præcedentium duarum, occupet illam per quam ingressus est primus, & tertius illam per quam ingressus est secundus, & sic deinceps; fiet quod petitur. Ponamus igitur primum intrare per A, & occupare D: ingreditur ergo secundus per F, & occupabit A; tertius per C occupabit F, quartus per H occupabit C, quintus per E occupabit H, sextus per B occupabit E, septimus per G occupabit B; octava porta G manebit libera.



## PROPOSITIO LXXXVI.

*Novem nummos certâ conditione in Pentagono disponere.*

*Vide  
Icon. XIII.  
Fig. III.  
Nummos  
certâ loca  
in Pentagono  
disponere.*

**I**N pentagono lineis descripto sunt decem loca, nempe (ut in appositâ figura apparet) quinque anguli, A, B, C, D, E, & quinque puncta intersectionis F, G, H, I, K. Supra novem ex his decem locis collocare debes novem nummos, aut lapillos, hac conditione, ut incipias ab uno angulo, aut puncto, & per lineam rectam procedendo numeres tria loca in eadem linea occurrentia, nummumque relinques in tertio loco proximè occurrente, & tamen nunquam incipias numerare à loco in quo jam collocatus est nummus, nec unquam inter numerandum transilias plus quàm unum locum in quo jam est nummus. Quæritur, qua methodo instituenda sit operatio?

*Respondeo*, id in æternum non futurum, nisi servetur hæc cautela, ut post relictum primum nummum in aliquo loco, relinques secundum nummum in eo loco, à quo cum primo inchoasti numerare: & tertium in eo, à quo cum secundo inchoasti numerare, & sic deinceps. Ponamus itaque te inchoasse cum primo nummo ab A, & reliquisse illum in I; inchoabis cum secundo ab H, & relinques in A; cum tertio à D, & relinques in H; cum quarto à G, & relinques in D; cum quinto à B, & relinques in G; cum sexto à K, & relinques in B; cum septimo ab E, & relinques in K; cum octavo ab F, & relinques in E; cum nono à C, & relinques in F. Locus ergo C manet vacuus.

## ANNOTATIO.

**I**nchoari primâ vice potest à quocunque angulo, aut puncto intersectionis.

PRO-

## PROPOSITIO LXXXVII.

*De Iudeo suffurante margaritas è cruce  
oppignorata.*

**I**udeo oppignorata fuit crux, ornata 25 margaritis, ita dispositis, ut in capite & pede sint 9, in brachio dextero & pede item 9, in brachio sinistro & pede similiter 9 margaritæ. Iudeus confirmavit scripto, accepisse se crucem cum margaritis dicto modo dispositis, sed non addidit numerum margaritarum simul. Vult suffurari 2, imò 4, aut 6, aut 8, aut 10, aut 12, aut 14, & restituere crucem cum margaritis dicto modo dispositis. Quæritur quomodo illas debeat disponere?

*Margari-  
tis è cruce  
oppignora-  
ta suffura-  
re.*

A	B	C	D	E	F	G	H
8	7	6	5	4	3	2	1
8†8	7†7	6†6	5†5	4†4	3†3	2†2	1†1
1	2	3	4	5	6	7	8

Ponamus margaritas in cruce oppignorata fuisse dispositas ut apparet in A, ita ut in universum fuerint 25; qui tamen numerus in scripto non fuit expressus, ut dixi. Si velit suffurari duas, disponat ut in B; si quatuor, disponat ut in C; si sex, ut in D; si octo, ut in E; si decem, ut in F; si duodecim, ut in G; si quatuordecim velit suffurari, disponat illas, ut in H.

## PROPOSITIO LXXXVIII.

*Novem rebus in quadratum dispositis, ita ut in  
singulis lateribus & diametris sint tres, adijcere tres  
alias ita dispositas, ut in singulis lateribus ac dia-  
metris sint quatuor, ac etiam  
plures.*

Novem

*Novem  
numeros  
certâ lege  
disponere.*

**N**OVEM res disponantur ut apparet in prima figura; erunt in singulis lateribus A B, B C, C D, D A, & in diametris A C, B D, tres res. Adjiciantur tres aliæ, prout in secunda figura apparet; erunt in singulis lateribus, & in diametro A C quatuor res, in diametro verò B D erunt sex.

Prima figura.

A		B
O	O	O
O	O	O
O	O	O
D		C

Secunda fig.

A		B
O	O	OO
O	OO	O
OO	O	O
D		C

## PROPOSITIO LXXXIX.

*Quam quis rem ex multis tetigerit, aut mente conceperit, divinare.*

*Divinare  
quam quis  
rem ex  
multis at-  
tigerit.*

**A**Lij, sed nullo pænè artificio, certè exiguo ingenio, sic procedunt. Res propositas disponunt in figuram quadratam, aut parallelogrammam, prout in appositâ figurâ apparet; & quærunt primò, in quo ordine transversali; secundò in quo ordine perpendiculari res tacta inveniatur. Res, in qua duo illi ordines concurrunt, est illa quæ fuit tacta. Tetigerit exempli gratiâ, aut conceperit alius quispiam L. Quærunt primò, in quo ordine transversali sit res tacta; & respondetur in tertio. Quærunt iterum, in quo ordine perpendiculari sit eadem res; & respondetur in tertio. Hinc colligunt, L esse rem illam, quia L est in communi concursu duorum prædictorum ordinum. *Sed, ut dixi, simplicissimus est hic modus; qui sequitur, est ingeniosior, & magis occultus.*

A.	B.	C.	D.
E.	F.	G.	H.
I.	K.	L.	M.
N.	O.	P.	Q.

Nomina personarum, aut aliarum rerum propositarum, quorum unam alius quispiam tetigit, aut mente concepit, scribantur in tabellis, aut chartis; aut loco nominum notentur litteræ Alphabeti; & chartæ disponantur in figuram quadratam, aut parallelogrammam, prout in prima figura apparet. Quære jam, in qua serie

Prima Figura.

A.	B.	C.	D.
E.	F.	G.	H.
I.	K.	L.	M.
N.	O.	P.	Q.

trans.

transversali, si res tacta, aut cogitata. Si tacta res F. Respon-  
debitur itaque esse in secunda serie. Colli-  
ge omnes chartas, incipiendo ab A, & supra  
A pone B, supra B pone C, supra C pone D,  
deinde E, F, G, & c. ita ut suprema & ultima  
charta sit Q. Deinde explica iterum char-  
tas, & pone primo loco Q, secundo P, tertio  
O, & c. prout in secunda Figura apparet. Quære jam iterum,  
in qua serie perpendiculari sit res tacta, aut cogitata. Respon-  
debitur esse in tertia: Signum est igitur rem tactam esse F, quo-  
niam illa est in communi concursu duarum serierum: nam quæ  
antea erat secunda series transversalis à capite; nunc est secunda  
transversalis à calce; ergo illa res, in quam concurrunt series tertias  
perpendicularis, nempe F, est res tacta, vel cogitata.

## Secunda Figura.

Q. P. O. N.

M. L. K. I.

H. G. F. E.

D. C. B. A.

## ANNOTATIO.

*H*is modis in utraque praxi explicatis divinabis, quam quis chartam  
luforiam ex toto cumulo tetigerit, aut mente conceperit.

## PROPOSITIO XC.

*Quam quis rem, aut chartam luforiam, ex 15. teti-  
gerit, aut mente conceperit, divi-  
nare.*

*H*anc Propositionem apud alios etiam Auctores invenies, sed  
malè solutam; nec enim juxta ipsorum praxin in omni casu  
ac dispositione invenitur quod quæritur, ut consideranti pate-  
bit. Nostra solutio est universalis, infallibilis, & facilis, funda-  
turque in ratione præcedenti Propof. adsignata de communi  
concursu, & c.

Ex 15. igitur chartis, aut rebus in charta notatis, cogitave-  
rit quispiam E. Dispone I. chartas omnes in tres series, quarum

Aa

quæ-

*Divinatio  
quæ quis  
chartam  
luforiam  
tetigerit.*

quolibet contineat quinque chartas, prout apparet in prima figura: & quære, in quam serie transversa reperiatur charta notata; respondebitur, esse in prima serie. Collige igitur omnes chartas, incipiendo vel à secunda, vel à tertia serie, ut prima series sit in medio inter secundam & tertiam. Nos hinc incipimus à secunda. II. His factis, dispone iterum chartas omnes in tres series, prout in Secunda Figura apparet; & quære, in quam serie perpendiculari sit charta notata; respondebitur, esse in prima. Et licet jam sciat quanam sit res de qua queritur (nempe E, in qua sit concursus duarum serierum) tamen ad occultandum magis artificium, collige iterum omnes series perpendiculares, incipiendo vel à secunda, vel à tertia, &c. prima autem series, in qua reperitur charta notata, sit in medio inter tertiam & quartam. Nos hinc incipimus à secunda serie perpendiculari. III. His etiam factis, dispone iterum omnes chartas in tres series perpendiculares, prout in Tertia Figura apparet. Eritque semper ac infallibiliter octava res, hoc est, media in secunda ac media serie, illa quæ queritur.

## Prima Figura.

A.	B.	C.	D.	E.
F.	G.	H.	I.	K.
L.	M.	N.	O.	P.

## Secunda Figura.

P.	O.	N.	M.	L.
E.	D.	C.	B.	A.
K.	I.	H.	G.	F.

## Tertia Figura.

O.	N.	P.	M.	L.
D.	C.	E.	B.	A.
I.	H.	K.	G.	F.

## ANNOTATIO.

**N**on est necessarium, factâ collectione chartarum post secundam dispositionem in Secunda Figura factam, disponere illas iterum in Tertiam Fig. quia infallibiliter octava ex toto cumulo post secundam collectionem factâ, est res qua queritur, siue incipias à prima illius cumuli, siue ab ultima.

## PROPOSITIO XCI.

*De modo reddendi equum claudum, figendo clavos in terram ab ipso calcata, an sit naturalis.*

Quidam in *Theſaurio Secretorum* Par. 1. q. 3. modum præſcribit efficiendi ut equus, etiam procul diſtans, & non tactus, reddatur claudus, quando & quàm diu placuerit operanti. Jubeſt tres clavos è ſolea ferrea, ſeu integra, ſeu fracta, alicubi reſerta, aut ubique accepta, extrahere, & alium clavum ex ſarcophago in quo cadaver humanum corruptum fuit. Hos clavos jubet figere in terra, ubi veſtigium reliquit equus qui claudus eſt reddendus; atque conſeſtim equum incipere claudicare illo pede, quo veſtigium impreſſit; & tam diu durare claudicationem, donec clavi è terra extrahantur; his verò extractis, ſtatim ceſſare. Ita *Martinus Schmiück* Lipſienſis, *Medicina Licentiaſus* loco citato:

*Equū reddendi claudum modus ſuperſtitioſus.*

Ajo tamen hoc minimè naturaliter fieri, ſi fiat, ſed ope Diaboli, qui poſita clavorum iſtorum infixione tanquam ſigno ex pacto, alio occulto modo equum reddit claudum; qui tamen modus à Diabolo occultè adhibitus naturalis eſt. Itaque dum dico, priorem modum non eſſe naturalem, non aſſero effectum claudicationis eſſe ſupra vires Naturæ, ſed non fieri ex vi & virtute remedij adhibiti occultè à dæmone. Ratio eſt, quia clavi iſti in terram defixi, nullum influxum phyſicum habent in equum, utpote diſtantes, & extra ſphæram activitatis clavorum conſtitutum. Adde quòd etiam ſi equus ſit præſens, nil tamen clavus in eum influere poteſt.

## PROPOSITIO XCII.

*Super aquas lacuum ac fluminum ambulare.*

Eſt hoc arte hydroſtaticâ, ope cingulorum pneumaticorum, eo modo, quem explicavi Par. 3. *Magia lib. 5. Syntagm. 2. Pragmat. 13.* in hunc ſenſum. Ex corio bubalino, aut taurino

*Ambulare ſupra aquas.*



fiat cingulum duplicatum, & instar intestini confutum, latum sesquipalmo circiter, aut amplius; longitudinis tantæ, ut lumbos circumdare, & claudi arctè suls fibulis queat. Hinc & inde ab utraque lumborum parte affluantur cingulo duo ex canina pelle utres in vesicarum modum efformati, eâ arte, ut nec aqua penetrare intrò, nec aër intus conclusus exire possit. Vtrique utri insigatur fistula lignea, cujus interius orificium platismatio seu venuli, ut vocant, instruat, exterius verò orificium cuneolo, seu alio obturamento exemptili. Hæ fistulæ sint tantæ longitudinis, ut cingulo præcincti os ad orificia exteriora applicari, & inspirato aëre vesicæ unâ cum cingulo inflari queant. Hisce ita constitutis, qui pneumatici cinguli ope supra aquas, vel potius intra aquas ambulare desiderat, eo lumbos præcingat, utres seu vesicas affutas inflet per fistulas, fistularumque ora obturet, pedum soleis plumbea pondera certâ proportionē alliget, ut erectum in aquis corpus perseveret, nec depronetur in latus prævalente extantis corporis, ac capitis pondere; & ut quamcunque in partem se vertere possit, talos pianulis quibusdam seu remis obarmet, sicque instructus flumina, lacus, aliasque quascunque aquas consistentes, & à fluctibus liberas ingrediat; ambulabit in illis sine submersionis periculo, tranabitque instar anseris, anatis, cygni, mergi, alteriusvè aquaticæ avis, adeò ut caput galeâ, pectus ferreo thorace munire, tormenta-rium pulverem, sclopetum, hastam gestare queat.

Ratio est, quia tota moles ex corpore humano & cingulo inflato composita, levior est quàm æqualis moles aquæ, ac proinde mergi intra aquam non potest nisi tanta pars corporis, quanta est moles aquæ æqualem habens gravitatem cum tota prædicta mole ex humano corpore & inflato cingulo composita, ut ex Archimede docuimus lo. cit. Syntagm. 1. Hypothesi 7. Mergetur itaque ad summum usque ad cingulum: quare crura muniri possunt ocreis ad umbilicum usque pertingentibus, contra aquæ humiditatem. Hujusmodi armatus apparatus nescio qui Danicæ Rex, unâ cum aulico quodam ad milliære integrum per lacum ambulavit, *Schvventero teste in Delicj's Physico-Mathem. Par. 13. q. 16.*

## ANNOTATIO.

POSSUNT pneumatica hæc cingula fieri tanta latitudinis, & utres tanta capacitatis, tantæque aëris inspirati mole onerari, ut aquea moles totum hominis hujusmodi cingulo obarmati pondus longè superet gravitate, ac proinde non solum hominem aquæ aliquò usque immersum, ac veluti sedentem, sed etiam erectum, & toto ferè corpore extra aquas extantem teneat, seu jacere lubeat, seu sedere, seu ambulare. POSSUNT præterea eadem cingula cum utribus eorum obarmari laminis ferreis, ut, sagissis vel sclopetis resistant.

## PROPOSITIO CIII.

*Quot quis nummos in marsupio habeat,  
divinare.*

MULTIS modis id fieri potest: omnium facillimus ac simplicissimus hic est. I. Jube numerum nummorum triplicare. II. Triplum dividere in duas partes æquales sine fractione, si fieri potest; sin minùs, addere unitatem, ac dividere. III. Dimidium iterum triplicare. IV. A triplo hoc ultimo abicere 9. quoties fieri potest. Pro singulis novenarijs computa 2, pro unitate addita computa 1, & habebis numerum nummorum.

*Divinare  
quot quis  
habeat  
nummos in  
marsupio.*

EXEMPLVM. Habeat quis 4 aureos. Jube triplicare numerum aureorum; habebit 12: jube triplum dimidiare; habebit 6: jube dimidium iterum triplicare; habebit 18: jube abicere 9 quoties potest; abiciet bis novem. Computa ergo pro quolibet novenario 2, & dic ipsum habere 4. aureos.

ALIVD. Habeat 7. nummos: triplicet nummos; habebit 21: dividat triplum in duas partes æquales; dicet non posse fieri: addat ergo unitatem, & habebit 22: cujus dimidium sunt 11: hoc dimidium iterum triplicet; habebit 33: abiciat novenarios, dividendo 33 per 9; abiciet tres novenarios. Pro singulis ergo novenarijs computabis 2, & pro unitate addita computabis 1, & dices, eum habere 7 nummos.

ALIVD. Habeat 2 nummos: triplum sunt 6, dimidium 3, triplum hujus dimidij sunt 9: habet ergo duos nummos.

ALIVD. Habeat 1. nummum: triplum sunt 3; quod quia dividi in duas partes æquales nequit, addatur unum, fiunt 4: cujus dimidium sunt 2, & hujus triplum 6. Quoniam igitur à sex non possunt abijci 9, & antea fuit addita unitas ad triplum; dic illum habere 1. nummum.

## ·ANNO TATIO.

**R**atio hujus praxis clara est: quia dum numerus primo acceptus, multiplicatur per 3, & productum iterum per 3; idem est ac si numerus primo acceptus multiplicaretur per 9. Si ergo ultimum productum dividatur per 9, redit in Quoto numerus primo acceptus. At quoniam primo productum dimidiatur, & dimidiatum multiplicatur per 3; ideo duplicari debet ultimus Quotus.

## PROPOSITIO XCIV.

*Ut surdus instrumenti musici sonum percipiat, efficere.*

*Surdus instrumenti sonum ut percipiat.*

**A**Ccipe chelym, aut testudinem, aliudvè sonorum instrumentum musicum, quod longum habeat collum; & extremam colli partem jube surdum dentibus apprehendere, ac stringere, tu verò instrumentum in sonum incita, chordas plectro aut arcu setaceo percurrando. Percipiet surdus sonum, & harmoniam, mirificæque se delectari ostendet, ac præ gaudio exultabit, ut non semelexperienti docuit. Rationem adsignavi in *Parte 2. Magia lib. 3. Syntagm. 4. pragm. 4.* quòd in oris palato foramen est, per quod externus aër cum interno ac implantato intra acusticum Organum aëre communicat: sonus igitur per instrumentum excitatus, vel ejus species, tum per commotum externum cum sono aërem, tum per instrumenti collum porosum, aut cavum, delatæ intra os surdi, & dictum foramen palati subintrantes, internum aërem, nervumque acusticum afficiunt, & in eo sensationem causant.

PRO-

## PROPOSITIO XCV.

*Face noctu absentibus, facem tamen videntibus, loqui.*

**M**ulti sunt modi absentibus, qui tamen signa aliqua videre, aut audire possunt, loquendi. Aliquos indicabo.

*Loqui absentibus noctu facem.*

Face noctu fieri potest in hunc modum, Litteras Alphabeti distribue in binis tabulis, aut chartis, & numeros appone, prout in appposito diagrammate apparet. Unam illarum trade amico abeunti, alteram retine. Cum loqui noctu vis absenti, facem ostende, ut advertat amicus, te velle loqui, & attendat. Sint itaque significanda hæc verba: *Cavete*. Quære in tabula tua

1.	2.	3.	4.	5.	6.
A.	B.	C.	D.	E.	F.
7.	8.	9.	10.	11.	12.
G.	H.	I.	K.	L.	M.
13.	14.	15.	16.	17.	18.
N.	O.	P.	Q.	R.	S.
19.	20.	21.	22.	23.	24.
T.	V.	X.	Y.	Z.	W.

litteram c; quæ quia adscriptum habet numerum 3, eleva ter facem, aut à dextera versus sinistram move, ac deinde parumper quiesce, aut facem absconde: Interim amicus quæret in tabula sua numerum 3, & scribet c. Iterum quære in tabula tua litteram a, & eleva semel facem, ac quiesce, aut facem absconde: amicus interim quæret in sua 1, & scribet a. Rursus quære in tabula v, & eleva vigesies facem: amicus interim quæret 20, & notabit v. Eodem modo procedes usque ad ultimam litteram verbi *Cavete*. Nec aliter respondebit tibi amicus.

## ANNOTATIO.

**H**ic modus vulgaris est. Alphabetum potest aliter in utraque tabula, tua videlicet & amici, disponi non servato ordine naturali litterarum, nè alij videntes motum facile veniant in cognitionem litterarum quas significas. Possunt omitti aliqua littera, ut K, Y; nam pro K potest servire C, & pro Y littera I. Modus hic usus esse potest tempore obsidionis.

PRO-

## PROPOSITIO XCVI.

*Idem facilius efficere pluribus facibus.*

*Loqui ab-  
sentibus no-  
tis plu-  
ribus faci-  
bus.*

**F**AC duas tabulas ejusmodi, quo hinc vides; unam pro te, alte-  
ram pro absente amico. Cùm significare vis litteram colum-  
næ primæ perpendicularis; elevatam alti-  
quam diu tene unam facem: cùm litte-  
ram in secunda, in tertia, in quarta co-  
lumna perpendiculari significare vis;  
elevatas tene duas, aut tres, aut quatuor  
faces. His factis, cùm significare vis lit-  
teram contentam in transversali colum-  
na prima, aut secunda, aut tertia, quarta,  
quinta, sexta; move facem à dextera  
versus sinistram semel, aut bis, aut ter,  
aut quater, aut quinquies, aut sexies.

	I.	II.	III.	IV.
1	A	G	N	T
2	B	H	O	V
3	C	I	P	X
4	D	K	Q	Y
5	E	L	R	Z
6	F	M	S	W

**E**XEMPLVM. Vis significare hæc verba: *Cras erumpemus.*  
Quia prima littera c, est in prima columna perpendiculari, ele-  
va unam facem; & quia est in tertia columna transversali, move  
eam ter à dextera ad sinistram. Iterum quia secunda littera r,  
est in tertia columna perpendiculari, eleva tres faces; & quia est  
in quinta columna transversali, quinquies move unam, aut  
omnes tres, à dextera ad sinistram. Eodem modo procede in  
reliquis litteris significandis.

## ANNOTATIO.

**L**Oco duarum, trium, quatuor facium, posset elevari ac deprimi una  
bis, ter, quater. Ratio operationis est concursus ductus perpendicu-  
laris & transversalis in eadem littera.

PRO-

## PROPOSITIO XCVII.

*Sono seu noctu, seu interdiu, absentibus aliquid significare.*

MULTIS modis id fieri potest. *Primò*, unico instrumento, v. g. campanâ, tubâ, percussione mallei, &c. Si enim tabula Alphabetaria disponatur prout apparet in Propos. 95, & pro A detur unum signum, pro B duo, pro C tria, &c. & post quamlibet litteram indicatam aliquam diu quiescat; cognoscat absens ex numero signorum litteras. *Secundò*, pluribus instrumentis, v. g. campanâ, tubâ, malleo, & alijs simul. Si enim disponatur tabula Alphabeti prout apparet in Propos. 96. & ad significandas litteras columnæ primæ perpendicularis adhibeatur campana, ad secundæ columnæ litteras tuba, ad tertiæ columnæ lituus, ad quartæ aliud; ac deinde ad indicandum cedantur tres ictus campanæ, ad indicandum L quinque soni tubæ, ad indicandum O duo soni litui, &c. intelliget absens quod indicatum fuerit. *Non immoror diutius, quia res facile intelligitur.*

*Loqui absentibus sono diversarum rerum.*

## PROPOSITIO XCVIII.

*Trium rerum quam quilibet ex tribus hominibus tetigerit, aut acceperit, divinare.*

SINT tres quæcunque res, A, E, I; quarum A tu vocabis primam, E secundam, I tertiam. Sint item tres homines, Andreas, Joannes, Petrus; quorum Andream vocabis primum, Joannem vocabis secundum, Petrum denique tertium. Expone in mensa 24. res quæcunque, v. g. nummos, nuces, lapillos, &c. & ex illis da primo unum, secundo duos, tertio tres nummos. Deinde recede, & jube unumquemque accipere clâm rem unam ex tribus; & dic, ut qui accepit

1. II. III.
A. E. I.

*Divinare quâ trium rerum quilibet ex tribus tetigerit.*

Bb

rem



rem primam A, sumat tot nummos ex residuis, quot ei dedisti; qui verò secundam rem E accepit, sumat duplum eorum quos dedisti; qui denique tertiam rem I accepit, sumat quadruplum eorum quos dedisti ipsi. His factis, accede, & vide quot nummi sint in mensa residui; qui quidem non possunt esse plures, quàm aut 1, aut 2, aut 3, aut 5, aut 6, aut 7. Ex his colliges quis primam rem acceperit, quis secundam, quis tertiam, si vocabula & syllabas sequentis versus consideres.

Salve	certa	animæ	femita	vita	quies.
1	2	3	4	5	6

Primum hujus versus vocabulum servit, si ex nummis remansit unus in mensa; secundum, si duo; tertium, si tres, &c. prima syllaba uniuscujusque vocabuli significat primam personam, secunda secundam, tertia (si adest) tertiam. Vocalis A in quolibet vocabulo significat primam rem, E secundam, I tertiam. Itaque si remansit in mensa unus nummus; considera primum vocabulum, *Salve*, & dic, primum hominem accepisse primam rem A, secundum secundam E, tertium tertiam I, & sic consequenter. Si remanserunt septem nummi, primus homo accepit tertiam I, secundus secundam E, tertius primam A. Si quinque nummi remanserunt; primus accepit secundam rem E, secundus tertiam I, tertius primam A.

## PROPOSITIO XCIX.

*Aliter tres res apud tres homines absconditas reperire.*

*Divinare  
aliter quò-  
vem ex tri-  
bus quili-  
bus trium  
hominum  
astigerit.*

RES sint A prima, B secunda, C tertia. Personæ sint I. II. III. Personæ I. dentur 12 nummi, personæ II. 24, personæ III. 36. Porro res posunt abscondi sex modis, & inveniri, ut apparet in appposita tabella. Is qui abscondit A, subtrahat ex suo numero  $\frac{1}{2}$ , seu medietatem; qui abscondit B, subtrahat  $\frac{2}{3}$ ,

A.	B.	C.
I.	II.	III.
12.	24.	36.

seu

seu duas tertias; qui abscondit c, subtrahat 3, seu tres quartas; Residuorum summæ proferantur, aut indicentur tibi; quæ summæ non possunt esse alia, quàm aut 23, aut 24, aut 25, aut 27, aut 28, aut 29; quibus hic adscriptæ sunt res, prout à prima, vel secunda, vel tertia per-

I.	II.	III.	Summæ
A.	B.	C.	23.
A.	C.	B.	24.
B.	A.	C.	25.
B.	C.	A.	28.
C.	A.	B.	27.
C.	B.	A.	29.

sonæ fuerint absconditæ. Itaque si remanent 23; primus accipit rem primam A, secundus rem secundam B, tertius rem tertiam C. Si remanent 27; primus accipit rem tertiam C, secundus primam A, tertius secundam B.

## PROPOSITIO C.

*Aliter divinare quis ex tribus personis trium rerum quamlibet acceperit.*

Res sint ut antea A prima, B secunda, C tertia. Personæ item sint I. II. III. Cuilibet personæ detur unus ex novem sequentibus numeris digitis, 1. 2. 3. 4. 5. 6. 7. 8. 9. quicumque ille sit, ad libitum: & quælibet persona accipiat atque abscondat unam ex tribus rebus, A, B, C, quamcumque voluerit. Absconditis rebus, dic ut is qui accipit A, duplicet suum numerum digitum quem accipit; duplicato addat 5; summam multiplicet per 5, producto addat 10, & insuper numerum ejus qui accipit B; denique hanc summam multiplicet per 10, & producto addat numerum ejus qui accipit C, & revelet hoc ultimum productum; ex quo tu auferes 350, & remanebunt ordine tres numeri digiti, quos tribus personis antea dedisti; quorum primus seu sinister est illius personæ, quæ accipit A, secundus illius quæ accipit B, tertius illius quæ accipit C.

EXEMPLUM. Prima persona acceperit à te 5, secunda 7, tertia 9: acceperitque prima persona rem A,

A. B. C.	I. II. III.
5.	9.
B. A. C.	
10	
5	
15	
75	
10	
85	
7	
92	
10.	
920	
9	
929	
350	
579	
A. B. C.	

*Divinare  
item ad-  
huc aliter.*

secunda rem B, tertia rem C. Qui accepit rem A, duplicet suum numerum, & habebit 10; huic addat 5, & habebit 15; hoc multiplicet per 5, & habebit 75; huic addat 10, & habebit 85; huic addat numerum illius qui accepit rem B, nempe 7, & habebit 92; hoc multiplicet per 10, habebit 920; addat huic numerum ejus qui accepit rem C, nimirum 9, & habebit 929. Hunc ultimum numerum tibi revelet, & tu subtrahe ex illo 350, remanebuntque 579. Hunc numerum resolve in tres digitos, significabitque primus ad sinistram, primam personam accepisse rem A; secundus secundam accepisse rem B; tertius tertiam accepisse rem C.

## ANNOTATIO.

**D**Ecuplatis ultimis posset omitti cum additione ultimi digiti; & tunc ex summa ultimo promulgata deberent subtrahi 35, & remanerent duo numeri digiti pro duabus rebus & personis; quibus habitus habetur etiam tertia res, & persona.





# IOCO-SERIO- RUM NATURÆ

ET ARTIS,

*Sive*

## MAGIÆ NATURALIS MISCELLANÆ

### CENTURIA III.

#### Prooemium.

**D**ivinationes Arithmetica per numeros,  
rerumque ingeniose ac mirabiles dispo-  
sitiones, combinationesque per eosdem,  
adeo visa sunt quovis tempore omni-  
bus, doctis aequè ac indoctis, jucunda, & solida volu-  
ptatis plena, ut gravissimi Scriptores, perfectissimiq;  
Philosophi ac Mathematici in ijs versari non fue-  
rint dedignati. Hos inter sunt Venerabilis Beda,  
Hieronymus Cardanus, Joannes Butco, Gemma

*Frisius, Christophorus Clavius, Christophorus Rudolphus, Jacobus Coburgius, Henricus Grammaticus, Marius Bettinus, alijque; & quotquot Physica ac Mathematica Ludicra ac Recreationes vel ad propriam, vel ad aliorum delectationem scripsere, cum P. Joanne Leureschon è Societate nostra, Daniele Schuentero, Georgio Philippo Harstorffero, Gaspare Ens, & si qui sunt alij. Nec ergo alienum ab instituto nostro esse, nec ingratum Lectori Curioso existimamus, quòd ex innumerabilibus quæ eo in genere occurrunt, faciliora, ac jucundiora, & quæ facillimè vel ex memoria, vel sine molesta calculatione, quovis tempore & loco, in honesta doctorum etiam hominum conversatione exhiberi reipsa possunt, inter alia multa, in præcedenti Centuria paulò antè in medium attulimus, & in hac præsentì afferimus. Ne verò tedium Lectori crearemus, non omnia simul eundem in locum ordine congegimus, sed varijs alijs, seu serijs, seu ludicris, quæ inter meditandum, ac scribendum occurrerunt, interserimus. Idem porrò servabimus. Hinc ergo ordimur.*

## PROPOSITIO I.

*Numerum punctorum duarum alearum singulatim pronuntiare.*

**A**lij aliter & per multas ambages quaestionem hanc solvunt; *Alearum puncta pronuntia divinare,* ego brevissimè, ac facillimè sic procedo. Duplicetur prioris alearum numerus punctorum, quæ eminent; adjunctisque 5, multiplicetur summa proveniens per 5, ac sumæ productæ addatur numerus punctorum secundæ alearum. Ex hac ultima summa tibi manifestata, si auferas 25, remanent duo numeri digiti, quorum sinister numerat puncta prioris alearum, dexter verò puncta posterioris.

**EXEMPLUM.** Puncta primæ alearum sint 3, secundæ 4. Duplicentur 3, fiunt 6; addantur 5, fiunt 11; multiplicentur hæc per 5, fiunt 55; addantur puncta posterioris alearum, nempe 4, fiunt 59; subtrahantur ab his 25, remanent 34; horum sinister numerus 3 dat puncta primæ alearum, dexter 4 dat puncta secundæ alearum. Eodem modo procede in omnibus alijs exemplis. *Ratio patet ex dictis precedenti Centuriâ.*

* *	* *
6	
11	
55	
59	
34	

## PROPOSITIO II.

*Horas Astronomicas quovis tempore, sole lucente, è manibus discere.*

**N**atura, quæ nihil imperfectum, aut otiosum, præsertim in homine fecit, voluit & ejus sinistræ manui horologium inesse. Rem varij variè explicant, & aliam praxin pro ætate, aliam pro hyeme præscribunt; sed, ut consideranti patet, aut malè, aut inutilliter. Ego facillimam ac universalem praxin trado, sed pro horis Astronomicis, seu à meridie & media nocte, quibus

*Horas à manibus discere.*

Hispa.



Hispani, Galli, Germani, alijsque plerique Europæi utuntur, Italis exceptis. Praxis hæc est. Quovis anni tempore, ac die, dieique horâ, sole lucente extende manum sinistram, ita ut palma in dexteram partem spectet. Deinde inter pollicem, & indicem digitum directè supra lineam vitæ constitue stipulam rectam, cujus pars prominens versus palmam adæquet indicis longitudinem, & angulos rectos ex omni parte cum manu constituat. His factis, a versus à sole tam diu corpus totum cum manu extenta flecte huc atque illuc, donec extremitas umbræ, quam tuberculus pollicis in volam manûs projicit, coæquetur penitus lineæ vitæ, ac veluti ab ea absumatur. His etiam factis, vide in quem digitum cadat umbra stipulæ, & habebis horam quæsitam, dummodò scias quâ horâ circiter Sol illo die exoritur. Nam si cadat in extremitatem indicis, est hora ortus Solis, v. g. hora sexta; si in extremitatem medijs digiti, est hora proxima ab ortu Solis, v. g. septima; si in extremitatem annularis, est octava; si in extremitatem minimi digiti, est nona; si in primam juncturam ejusdem minimi (inchoando ab ejus extremitate) est decima; si in secundam juncturam, est undecima; si in tertiam, est duodecima, seu merides. Post meridiem, si iterum cadat umbra in secundam minimi digiti juncturam, est hora prima; si in primam, est secunda; si in extremitatem minimi digiti, est tertia; si in extremitatem annularis, est quarta, &c. Si horâ quintâ Sol oritur, aut horâ septimâ, eodem modo horæ numerantur; sed tunc merides seu hora duodecima cadit, in primo casu in primam lineam quæ occurrit in vola post minimum digitum; in secundo verò casu in tertiam juncturam prædicti digiti.

### PROPOSITIO III.

*Horas Astronomicas circa æquinoctium è manibus discere.*

*Horas Astronomicas à manibus discere.*

**A** Liter, sed solum circa æquinoctium, horas Astronomicas ex manibus disces, si contractis reliquis digitis erigas perpendicu-




Fig. I.



Fig. II.



Fig. III.



diculariter duos indices, duos verò pollices extentos conjungas in unam lineam rectam horizonti parallelam, prout aliquo modo in appposito schemate apparet, in quo  $AB$ , &  $BC$  sunt indices erecti. at  $BE$ , &  $CE$  sunt pollices extenti atque conjuncti extremitatibus suis  $E$ . Stantibus hoc situ digitis, si unum, v. g.  $BC$ , obveras soli, ut umbra ejus cadat in  $AB$ , aut in  $BC$ ; dilces horam quæ sitam. Nam si umbræ extremitas cadit in  $A$ , nimirum in extremitatem alterius digiti, est hora sexta matutina; si in primam juncturam indicis  $AB$ , est hora septima; si in secundam, est octava; si in tertiam, est nona; si in lineam vitæ, est decima; si in juncturam pollicis cum palma, est undecima; si in alteram juncturam pollicis, est duodecima: postquam in verso ordine reditur iisdem vestigijs ad primam, secundam, &c.

Vide  
Icon. XIV.  
Fig. II.

## PROPOSITIO IV.

*Horologium hydraulicum exiguis impensis  
conficere.*

**A**ccipe vas cujuscunque materiæ & formæ, quod aquam continere queat; in ejusque fundo epistomium seu claviculam versatilem infige, atque ita tempera, ut aqua infusa effluere possit spatio 24 horarum. In vasis summitate adapta rotam versatilem, cujus axis ex altera parte manum habeat cum digito indice extenso, qui vasis latus externum, aut tabulam vasi affixam radat. Rotæ circumduc funiculum in gyrum, & funiculi extremitati alliga corticem, corticique impone plumbum, ita ut aquæ superficies suprema sustineat corticem cum plumbo. His factis, audito pulsu horæ duodecimæ alicujus horologii, aperi foramen aut clavem versatilem vasis: mox effluet aqua; cum aqua subsidente subsidet cortex cum plumbo, trahetque funiculum, & vertet rotam cum manu axis extremitati infixæ; tu interim elapsis singulis horis nota in vasis latere aut tabula affixa totidem spatia horaria quæ manûs index percurrit, donec totum circulum compleveris; & habebis horologium præparatum. Quotiescunque enim vas aquâ impleveris, & rotâ con-

Horologii  
hydraulicū  
exiguis im-  
pensis fa-  
cere.

Vide  
Icon XIV.  
Fig. III.

voluntà manūs indicem horæ duodecimæ in tabula signatæ ad aptaveris, moxque epistomium aperueris; toties aquæ fluxus 24 horarum spatio perdurabit, & index singulas horas in tabula percurrat.

## ANNOTATIO.

**N**osandum tamen, spatia horarum in vasis latere aut tabula signata, non posse esse inter se aqualia, quia aquæ fluxus aqualis non est, sed eò plus aqua effluit horario spatio, quò plenius fueris vas; eò minùs, quò inanius. Itaque horarum spatia omnia erunt inæqualia, ac paulatim decrescent, prioraq; erunt maxima, posteriora verò minima. Similia horologia construere docuimus in Mechanica Hydraulico pneumatica Par. 2. Classe 1. cap. 4. ubi egimus de Machinis hydraulicis qua aqua lapsu naturali sunt. Loco aqua posset adhiberi arena exigua, qua è fundo vasis efflueret spatio 24 (aut quolibet aliarum) horarum: sed tunc index non percurreret ordinate ac regulariter spatia horaria distributa in tabula, quia suprema arene superficies non subsideret ordinate, secumq; traheret corticem cum plumbo, aut plumbum sine cortice.

## PROPOSITIO V.

*Horologium hydraulico-magneticum  
construere.*

*Horologium  
hydraulico-  
magneticum.*

**H**orologium aliud aquæ & magnetis ope, quod magnam in admirationem spectatores rapiat, facillimè, & nullis ferè impensis, conficies in hunc modum. Fac ex quavis materia quæ aquam continere queat (chalybe & ferro excepto) receptaculum concavum oblongam in formam columnæ quadrangulæ; & uni ejus lateri secundum longitudinem exciso insere laminam subtilissimam ex ebano, aut ære, seu orichalco connectam. Fundo receptaculi adapta epistomium seu versatilem claviculam ut antea, quam ita temperare queas, ut aqua infusa spatio 24 horarum effluat. Repleto receptaculo impone aquæ corticem cum frusto magnetis validi, cujus polus robustior radat

tadat laminam receptaculi lateri insertam; exterius verò è regione magnetis applica manum ex levi charta effigiatam ac pictam, aut lacertulam, aliudvè simile animalculum, cui infixâ sit acus chalybea ad magnetem priùs adstricta. Chartacea hæc manus cum à magnete attracta, adhærebit laminæ nemine sustentante, sequeturque magnetis motum sursum ac deorsum. Si itaque repleto aquâ receptaculo, magnetemque cortici imposito, ac manu exterius applicatâ, aperueris epistomium; effluet sensim aqua, cortexque cum magnete subsidet, & secum trahet deorsum chartaceam manum, quæ singulis horarij spatij temporis certâ laminæ spatia percurret. Quare si, ut antea dictum, notaveris, ac numeros apposueris; habebis horologium hydraulico-magneticum perfectum. Quod, si iptra murum absconderis, ut nihil præter laminam cum chartaceo indice appareat; magnam in admirationem rapiet spectatores, uti millies ipsemet vidi Romæ in Musæo Kircheriano, ubi simile horologium spectantibus exhibebam.

## ANNOTATIO.

*Vide qua scribimus loco proximè citato Machina XV. Hic etiam spatia horaria, in lamina notata, inæqualia sunt, propter causam in præcedenti Propositione dictam.*

## PROPOSITIO VI.

*Aliud hydraulicum horologium facillimè conficere.*

**A**ccipe vas oblongum cujuscunque formæ, aquâ plenum, quod in fundo foramen habeat, aut epistomium, è quo aqua spatio 12, aut 24 horarum effluat tota. Aquæ superficiei supremæ impone corticem, & cortici impone virgam ligneam perpendiculariter erectam, quæ dum aquâ effluente, & cortice subidente subsidet, vasis latus interiùs radat. Audito igitur horo-

*Horologium hydraulicum aliud.*



logij cujusdam campanarij pulsu, aut inversâ clepsydâ, laxa foramen seu epistomium vasis; & ubi virga erecta vasis labrum supremum attingit, designa in ea circulum, aut lineam, & horæ numerum adscribe. Idem fac elapsis singulis horis, designando toties in virga subsidente circulum, aut lineam ibi, ubi ea supremum vasis labrum attingit, quoties horæ pulsum audieris, donec tota effluerit è vase aqua; & habebis in virgæ longitudine designata 12 aut 24. horaria spatia, inter se inæqualia. Quacunque igitur horâ vas impleveris, & epistomium laxaveris; monstrabit vasis labrum post singulas horas elapsas alium, atque alium in virga subsidente circulum ac numerum; unde scies quot à primo fluxu horæ transiverint.

## ANNOTATIO.

**S**i virga erecta perpendiculariter intra vas, vadat parietem proximum, aut tabulam longam vasis lateri affixam; poteris notare horaria spatia, quæ virga descendens summus percurrit, in pariete, aut in affixa tabula. Lucundius autem spectaculum exhibebis, si cortici aqua innatanti imponas levem statuam nautæ stantis aut sedentis velut in naviculâ, cum virgâ præsensâ quæ murum aut tabulam vasi affixam vadat: tunc enim aqua effluente, aut virgâ subsidente, nauta monstrabit horas. Talem Machinam dedimus in Mechanica Hydraulico-pneumatica loco suprâ cit. & appellavimus Nautam Hydro-Horologum.

## PROPOSITIO VII.

*Lacti an aqua sit immixta, deprehendere.*

*Aqua an  
lactis sit im-  
mixta, de-  
prehendere,*

**I**uncum, aut stylum acutum lacti infige, & extrahe, ac lac adhærens super unguem distilla. Si citò ab ungue defluerit, aquam immixtam habet; si aliquandiu perstiterit in ungue, purum est. Causa cuius patet.

PRO-

## PROPOSITIO VIII.

*Utrum vino admista sit aqua, cognoscere.*

**M**Odum tradidimus Par. 3. *Magia lib. 5. Syntagm. 2. Pragmat. 13.* *Aqua an vino sit im-*  
*mista, co-*  
*cognoscere.*  
 Ex Porta lib. 18. *Magia cap. 6.* ubi jubet vino, de quo dubita-  
 tur an aquam habeat admistam, imponi malum, aut pyrum: si  
 mergitur pomum, vinum est impermistum; si vino superfluitabis, vi-  
 num permistum eris, quia vino aqua densior est. Citato loco *Magiæ*  
 nostræ, typographi errore, pro densior, habetur levior. Malè  
 ergo docent Democritus, Pedemontius, & Weckerus, quos  
 cit. loco adduximus, purum esse vinum, si pyrum supernatet;  
 impurum, si mergatur,

## ANNOTATIO.

*Musto an admista sit aqua, cognoscere.*

**C**ontrario modo deprehenditur, an musto admista sit aqua: quia enim *Aqua an*  
*musto sit*  
*admista,*  
*cognoscere.*  
 mustum recens, & nondum defacatum, crassum est ac viscosum,  
 ideoq; ponderosius quàm si admistam habeat aquam; ideo puro inje-  
 ctum pyrum supernatat, in impuro mergitur. Eundem effectum in  
 musto præstari docet Weckerus ex Georgio Valla, si ovum imponatur:  
 si enim hoc statim descendit, aquosum est mustum; sin contra, purum.  
 Ad utrumque effectum alij requirunt pyra sylvestria.

## PROPOSITIO IX.

*Aquam à vino separare multis modis.*

**P**rimus modus. Panni linei, vel potiùs lanei, aut gossopini laci-  
 niam seu fasciam strictam dolio aut vasi immerge, quod vi-  
 num aquà mixtum continet, ita ut una fasciæ pars vino super-  
 natet, altera extra vas prominens pendeat deorsum, & longior  
 sit quàm pars altera. Quoniam igitur vinum, utpote levius aquà,  
 superiorem vasis locum occupat, ascendet id per fasciam, &

*Aquam à*  
*vino sepa-*  
*rare.*

foras exstillabit, nec cessabit stillatio, quàm diu pars interior fasciæ humorem attingit, & nihilominus brevior remanet quàm exterior. Ubi ex colore, aut sapore deprehenderis vinum effluxisse, & aquam remansisse aut solam, aut modico adhuc vino permixtam: extrahe fasciam, alioquin & aquam extrahet. Ita docuimus *par. 3. Magia lib. 5. Syntagm. 2. Pragmaticæ 22. ex Porta lib. 18. Magiæ Natural. cap. 4. Cardanus lib. 5. subtilis* & alij, quos sequitur Weckerus, docent primo loco aquam extrahi: sed errant, ob rationem insinuatam.

*Secundus modus.* Vasculo ex materia foraminulenta seu porosa, cujusmodi est hedera, confecto infunde vinum aquâ permixtum. Exstillabit post tempus aliquod aqua, vino remanente: nam aqua subtilior est vino, idcircoque illi, non huic, transitum concedunt poris vasis. Eundem effectum præstat olla nova vitro non obducta. Ita docuimus ibidem ex eodem Porta. *Plinius lib. 16. Natural. Histor. cap. 35. & Cato* apud Portam, ajunt vinum de vase hederaceo exstillare, aquam verò remanere, idque naturæ hederæ adscribunt, quæ vinum continere nequeat. Sed contrarium docet & ratio, & experientia.

*Tertius modus.* Porta loco citato refert ex Democrito, quosdam spongiâ novâ, oleo imbutâ, osculum vasis vinum aquâ permixtum continentis obturare, & vas inclinare, & tunc solam aquam effluere. Rationem assignat, quòd spongia foraminosa sit, & satis aperta, oleo autem imbuta impediatur nè liquor tam facile exstillet foras. Quoniam igitur aqua subtilior est vino, illa primò exstillat. Idem Porta loc. cit. ex Africano jubet alumen liquidum in dolum vini mittere, & spongiâ oleo imbutâ osculum obturare, ac inclinare ut effluat: atque solam aquam effluere, eò quòd alumen constringat liquores, ut modicè permeent. *Alios modos lege in Magiâ nostrâ, vel apud*

*Portam, locis citatis.*

## PROPOSITIO X.

*Annulum à tumefacto digito avellere.*

**D**ocet Id. Cardanus lib. 13. de Varietate rerum cap. 63. his verbis. *Annulum à digito tumefacto avellere.*  
 Si cui annulus in digito intrusus, digito tumente ita hæreat, ut avelli non possit, filum acui indito; sub annulo acum aut filum ducito; parte alterâ filum digito circumvoluto, atque tories, & adeo diligenter, ut totus nodus ac pars digiti nodum & annulum interjacentes filo circumdetur, nec pars ulla videri possit; demum acu subductâ, reliquâ parte circumages, filum velociter; ita annulus super filum sensim translatus, nodum superabit, exibatque. Sed cave nè moram interponas; nam facile digitus adeo intumescet, ut dolore excitato annulus educi nequeat. Filum itaque & longum esse debet, ut parti digiti inter annulum ac nodum circumvolutum, eam totam tegat; & fortè, nè dum inter annulum & digitum circumagitur velociter, rumperetur; & nihilominus subtile, ut per acus subtilis foramen transeat. Præstat itaque ut duplicetur filum, & factâ circa digitum complicatione abscindatur acus; sic enim duplicatum, circumagi poteris inter digitum & annulum. Acus cum filo ita ductus debet sub annulo, ut foramen acus respiciat digiti initium, cuspi finem.

## PROPOSITIO XI.

*Vitrum in gyrum à summo ad imum circulariter secare.*

**V**itrei vasis labrum prius carbone aliquo tange, ac deinde favillâ intinge. Tum quâ parte vitrum scissuram aliquam ostendit, incipe sectionem ferro ardente mucronato, aut palmis incenso, quâ parte velis secare procedendo.

Cardanus lib. 13. Varietat. cap. 63. hunc docet modum. *Vitrum dividias, filum sulphure & oleo imbue, locum circumda, accende, repete, donec locus optimè incaluerit: inde statim filo alio aquâ frigidâ madefacto rursus circumdabis; frangitur enim eo loco, ac si divisum fuerit adamante.* Namque & adamante certius & exactius dividitur, sed longiore tempore opus est. Et rursus rotâ ancâ & smiride.

PRO

## PROPOSITIO XII.

*Sanguinis fluxum è naribus aut vulneribus  
sistere.*

*Sanguinis  
fluxum si-  
stere.*

Multa sunt quæ sanguinem sistere dicuntur, quæ tamen adhibita sæpe effectu carent. Inter alia est os hippodami, seu equi marini, manu compressum donec incalcescat. Hæmarites item, qui lapis est ferrugineus exterius, intus colorem ferri refert, & à sanguine nomen duxit; quem refert *Cardanus lib. de gemmis & coloribus*, sistere sanguinem, etiam ex pulmonibus manantem. Præterea Chrysolithus, qui aurei coloris, gemma est, unde & nomen duxit; quem idem *Cardanus* ibidem refert sanguinem è vulnere fluentem sistere, si superalligetur. Mirabilem virtutem. ad sanguinem sistendum, quam habere dicitur os animalculi in Java Insula, quod sionium vocat *Maphæus*, *Cabim incolæ*, de prædicavimus *Par. 4. Magia lib. 4. Syntagma. 2. cap. 7.* Sed his omisissis, accipe non minùs ridiculam, quàm facilem sanguinis è naribus fluentis sistendi rationem.

Cùm essem Panormi Siciliæ urbe primariâ, vir quidam magni nominis tantam sanguinis copiam, & tam continuò è naribus emittebat, ut nullis artibus, ac remedijs, quæ terni, quaternivè præstantissimi Medici à Principe, cui charus erat patiens, submissi adhibebant, posset sisti. Audiit hoc agricola qui in domo eadem tunc commorabatur, petijtque sibi ut liceret remedium adhibere facile, & prorsus infallibile. Obtentio consensu, stabulum ingreditur, & asini stercus calidum strophio involutum, ad patientem deferit, nasoque applicat: qui mox ut factorem inspiravit, fluxus omnis momento temporis cessavit.

## ANNOTATIO.

*Alia alia adhibens remedia, sed prorsus superstitiosa.* Antonius Mizaldus Centuria I. Mirabilium Naturæ Num 14. ait, sanguinem è naribus fluentem sisti, si eodem sanguine in fronte illius qui

qui sanguinem stillat, scribantur hac verba: Consummatum est. Addis id à multis probatum esse. Cardanus lib. 18. Subtilit. narrat sibi contigisse. cum aliquando vulnerato labio sanguis nullâ arte posset cohiberi, pronuntiasset ter hac verba: Sanguis, mane in me, sicut fecit Christus in se: Sanguis, mane in mea vena, sicut Christus in sua poena: Sanguis mane fixus, sicut Christus quando fuit crucifixus. His prolatis verbis, ait illico se admirante cessasse Sanguinis effluuium, nescireq. se an verba, an fides profuerint. Causam examinat in libro 2. Contradicentium tract. 2. Nos in Magia nostra Phono- Jatriæ Par. 2. Magiæ lib. 5. & in Magia Medica Par. 4. Magiæ lib. 4. diximus, verba nudè sumpta nullam vim naturalem habere, ad similes effectus producendos. Superstitiosa ergo est, ut diximus, hac curatio.

## PROPOSITIO XIII.

*Argenti vivi mirabiles motus exhibere.*

**A**rgentum vivum vitreo, aut lapideo vasculo inclusum, ut non possit respirare, signi admoveatur, vas dirumpit, & non secus ac pyrius pulvis crepitum edit: immisum verò intra aquam ferventem, mirum in modum huc atque illic agitur, non sine spectantium, & causam ignorantium admiratione. Experimentum fecit Romæ P. Kircherus in cubiculo domestico, ubi cum intra vasculum incaluisset Mercurius, ad fornacem usque vasculum iustulit, & post librationes aliquot cum fragore diffregit.

*Argenti  
vivi mirabi-  
les motus  
exhibere.*

## ANNOTATIO.

**A**rgentum vivum (ut hic illud adducam ludi ad propositionem non spectet) coagulatur succo limonis aut salivâ motitatum; dissolvitur verò iterum, si in aceto elixetur.

*Argentum  
vivum  
coagulare.*



## PROPOSITIO XIV.

*Candelam in aqua ardentem, aut aquâ inextinguibilem conficere.*

*Candelam  
in aqua  
ardentem  
facere.*

PLurimas praxes tradidimus in *Magia Pyrotechnica Par. 4. Magia nostra*. His unam aut alteram addere lubet. Candelam itaque quæ in aquâ ardeat, hoc modo facies. In amphora superius stricta, & inferius latâ, pone sextarium vini veteris, & adde uncias duas utriusque sulphuris, hoc est, vivi, & mortui, & tantundem aluminis, & salis crassi tantundem. De coquantur simul, donec pars tertia consumatur. Hoc liquore illita candela, ardebit in aqua.

Quòd si capillum, vel pannum eodem liquore aspergas, admotâ flammâ ardebit sine detrimento. Idem efficies aquâ vitæ, & alijs modis in *Pyrotechnica* explicatis.

Aliter aquâ inextinguibilem candelam sic efformabis. Liquefac terebinthinam simul cum sulphure, & aquâ vitæ, & oleo sulphuris vivi. Misce hæc omnia, & liquore illine candelam; ardebit, nec extingui poterit, donec consumatur.

## PROPOSITIO XV.

*Pedis & colli humani mensuram è manu conyicere.*

*Mensuram  
pedis & col-  
li humani  
è manu  
conyicere.*

Pedis mensuram dat filum, quod à carpo manus incipit, (quoniam nimirum manus brachio committitur) & digitorum medium à radice circumdat, reditque ad eum, unde digressum est, locum. Colli mensuram ostendit filum duplex brachio circumductum in ea parte, quâ manus conjungitur brachio.

PRO-

## PROPOSITIO XVI.

*De famulo portante poma ad amicum  
Domini sui.*

**D**Uo loca, A & B, distant inter se 30 stadijs. Petrus in A existens, mittit ad Paulum amicum suum, existentem in B, 90 poma, per famulum suum, his conditionibus. 1. ut famulus distribuat poma in tria canistra, ita ut in singulis sint 30: 2. ut per vices eundo ac redeundo canistra ferat, nec plus tamen quam unum canistrum unâ vice portet: ut in singulis stadijs absumat unum pomum, & ab amico accipiat tot aureos, quot poma ipsi defert. Queritur, an possibile sit, ut non absumat omnia; & quo ordine sint ferenda, ut ad amicum deferat quàm plurima.

*Poma triâ  
condicione  
de loco in  
locum por-  
tata.*

Ferat primò ab A usque ad C, per stadia 20, unum canistrum: Absumat igitur 20 poma, & in C remanebunt 10. Ferat secundò ab A usque ad C, alte-

	10.	10.	10.	
A			C	B
			10.	20.
			10.	
			10.	
			30.	

rum canistrum: Absumat iterum 20, & in C relinquet 10. Ferat tertio ab A ad C tertium canistrum: absumatque denuo 20 & remanebunt 10. Residua ergo erunt in C poma 30: Ferat quarto in C usque ad B, per stadia 10, poma 30: absumat igitur 10, & amico in B dabit 20, ab eoque accipiet totidem aureos.

*Vel aliter sic.* Ferat tribus vicib<sup>9</sup> tres sportulas ab A usque ad C per 10 stadia: absumat ergo singulis vicib<sup>9</sup> 10, & totidem vicibus re-

	10.	15.	5.	
A		C	D	B
	20.	15.		25.
	30.	15.		
	60.	30.		

linquet in C 20, ac proinde in universum 60. Hæc 60. ferat duabus vicibus ex C in D, per 15 stadia: absumat igitur bis 15, id est, 30; & in D relinquet bis 15, seu 30. Hæc 30 ferat unâ

vice ex D in B per 5 stadia; absumptis igitur 5 pomis, deferet 25 ad amicum in B.

## PROPOSITIO XVII.

*De 90. modijs frumenti in tribus navibus per  
30 telonia deportandis.*

*Frumentū  
certā con-  
ditione de  
loco in lo-  
cum ave-  
ctum.*

EX præcedenti solutione patet solutio præsentis Propositionis. Nonaginta modij frumenti, distributi a  
naves, deportandi sunt per 30 telonia, & in singu  
naulo solvendus est unus modius. Quæritur, quomodo insti-  
tuenda sit navigatio, ut quàm minimùm solvatur? Tribus vici-  
bus ducat tres naves ad decimum telonium. Ibi ergo absum-  
perit modios ter 10, id est, 30, & remanebunt ter 20, id est, 60.  
Hos 60 modios impositos duabus navibus, devehat duabus  
navigationibus, per alia quindecim telonia, usque ad 25 telo-  
nium: absumet igitur bis 15, seu 30, & remanebunt 30 modij.  
Hos 30 modios uni navi impositos devehat unicâ navigatione  
per quinque residua telonia: absumet igitur 5, & retinebit 25.

## PROPOSITIO XVIII.

*De portante 100 margaritas decem vicibus  
per 10. milliaria.*

*Margari-  
tar certā  
conditione  
de loco in  
locum por-  
tave.*

Margaritæ 100 deportandæ sunt 10 vicibus per 10 milliaria,  
& in singulis solvenda est una pro vectigali. Quomodo  
procedendum, ut supersint aliquæ? Primo portet decem vici-  
bus 10 margaritas ad 2 milliaria, nimirum ab A usque  
ad B: perdet igitur in B 20 margaritas & retine-  
bit 80. Has ferat alijs octo vicibus ad 8 millia-  
ria, nempe à B in C: perdet igitur in C 64 marga-  
ritas, & remanebunt 16.

A	2	B	8	C
A	5	B	5	C

*Aliter*

*Aliter cum majori lucro.* Deportet illas dicto modo primo per 5 milliaria, & postea per alia 5: remanebunt post prima itinera margaritæ 50; post secunda verò itinera remanebunt 25.

## PROPOSITIO XIX.

*Dividere aqualiter doliolum octo amphorarum vini, ope duorum doliorum vacuorum, quorum unum capax est quinque, alterum trium amphorarum.*

**S**unt tria dolia, A, B, C, quorum primum A continet ampho-  
rarum vini 8, secundum B 5, tertium C 3. Primum est plenum, duo reliqua sunt vacua. Dividenda sunt octo illæ amphoræ in duas æquales partes, ita ut tam in A, quam in B, sint quatuor amphoræ, idque ope duorum doliorum B & C. I. ex A impleatur C, & C evacuetur in B, eruntque in B tres amphoræ. II. ex A impleatur iterum C, & C evacuetur in B; eruntque in B quinque amphoræ, & una in C. III. Evacuetur B in A, & C in B, eritque in B una amphora. IV. Ex A repleatur C, & C evacuetur in B; eruntque in B quatuor amphoræ (nam antea continebat unam,) & in A remanebunt totidem.

Doliolum octo amphorarum aqualiter certâ condicione dividere.

A.	B.	C.
8.	5.	3.

## PROPOSITIO XX.

*Dividere doliolum 12. amphorarum aqualiter, ope duorum, quorum unum 5, alterum 7 amphorarum est capax.*

**D**oliolum A sit plenum, & contineat 12 amphoras. B & C sint vacua, & B contineat 7, C 5 amphoras. Divisio facienda est, ut in A remaneant 6, & in B totidem amphoræ.

Doliolum duodecim amphorarum certâ condicione dividere.

A.	B.	C.
12.	7.	5.

I. Ex A impleatur C, & effundatur in B; iterumque ex A impleatur C, & effundatur ex C in B quod potest, eruntque in A amphoræ 2, in B 7, in C 3. II. Refundatur B in A, & C in B; eruntque in A 9, in B 3 amphoræ. III. Iterum ex A repleatur C, & ex C effundatur in B quod potest; eruntque in A 4 amphoræ, in B 7, in C 1. IV. Refundatur B in A, & C in B; eritque in B 1 amphora, in A vero 11. V. Tandem ex A repleatur C, & effundatur in B; eruntque tam in A, quàm in B 6 amphoræ.

## PROPOSITIO XXI.

*Res triginta tali ordine disponere, ut nonam quamq;  
rejciendo sola maneant que placent.*

*Res aliquas  
tali ordine  
disponere,  
ut sortitio-  
ne ejciantur  
quæ  
voluerit.*

SUNT in navi aliquâ nimis onustâ, & ob marinos fluctus periclitante, 30 vectores, quorum 15 sunt Christiani, reliqui Turcæ; vultque navarchus Christianus, ad navim exonerandam, partem dimidiam in mare proijcere, cupitque ita illos disponere, ut nonum quemque in ordine ejciendo, soli Turcæ præcipitentur, & Christiani remaneant. Fiet id, si à Christianis incipiendo, tot collocet in ordine alternatim Christianos ac Turcas, quotum inter quinque vocales locum tenet quælibet vocalis hujus versus: *Populeam virgam mater regina tenebat.* In quo versu prima vocalis *o* tenet quartum locum, secunda *u*, quintum, tertia *e* secundum, quarta *a* primum, &c. Collocabit igitur primo loco quatuor Christianos, secundo quinque Turcas, tertio duos Christianos, quarto unum Turcam, &c. Dispositi ergo erunt, prout in sequent serie apparet, in qua C significat Christianos, T Turcas, CCCCTTTTTCCTCCCTCTTCCTTCTTCCT. Si itaque incipiat à primo C numerare novem, finietur numeratio in quinto T; post quod si pergat numerare iterum novem, cadet finis numerationis in octavam T &c.

## ANNO TATIO.

**S**i alius sit numerus rerum, & lubeat rejicere quoscunque quoto placet loco, v.g. ex rebus 24 octavam quamque, donec remaneant sex; dispone in una serie 24 calculos, aut scribe 24 virgulas, & incipiendo numerare à primâ dele semper octavam, donec sex tandem supersint; & videbis quo ordine disponenda sint res: nam eo loco quo reperiuntur virgula deleta, collocari debent res rejicienda. Sic si essent in navi 30 Indæ, & 2. Christiani, vellesq. ejicere septimum quemque, donec 16 fuissent precipitati; scies quo loco Christiani sint collocandi, si dicto modo scripseris 32 virgulas, & septimam quamque deleveris, donec deleta fuerint 16.

## PROPOSITIO XXII.

*Cacum docere ut scribat.*

**T**abula ænea cavis litteris ordine Alphabeti cæletur: In eâ cæcus stylum per singula deducat elementa, memoriâ tenens illorum ordinem, donec longâ edoctus consuetudine calamo discat eadem exarare. Ita Cardanus lib. 17. *Subtilis*. ubi refert ex Erasmo, aliquot, etsi magno labore, rectè tamen sic scribere didicisse. Indiget res hæc assiduo primùm monitore, longâque consuetudine. Et quantò stylus acutior fuerit, & litura seu cælatura tenuior, eò facilius & melius discunt.

*Cacum docere scribere.*

## ANNO TATIO I.

**C**itato loco refert Cardanus, vidisse se quempiam, qui cum brachijs omninò careret, dextro pede hastam vibrabat, & ad scopum collimabat, suebat vestem, edebat, scribebat, & in acum filum immittebat. Olaus Wormius etiam in Musæo Wormiano lib. 4. cap. 12. testatur, fuisse Hafnia Danorum faminam quandam Anglam, brachijs destitutam, qua calamo scriptorio ore apprehenso, se vidente, his litteris nomen suum in charta expressit: ELISABETH SIMSON. Anno 1620. Ore præterea nervisse eleganter, filum linguâ acui intrussisse, aliæque multa ore præstisse, qua alij manibus solent. Idem Wormius

*Scribentes sine manibus.*

*ibidem*



*ibidem refert, habere se in Museo suo membranam, in qua totus Cathedismus Germanico idiomate, Anno M. DC. XLVI. exaratus fuit à quodam Ioanne Kuhn, atatis Anno XLI. qui in quavis manu unicum tantum habebat digitum, litteris satis eleganter depictis, tam minio, quàm atramento. Vide plura exempla in Physica Curiosa lib. 3.*

## ANNOTATIO II.

*Qua ratione surdus monochordo exhibere possit omnes consonantias, aliq; quævis intervalla musica: item qua ratione mutus, imò surdus & mutus docere possit musicas consonantias, si nimirum monochordum successivè attemperet in omnes consonantias, & chorda pulsata sonum imitari jubeat discipulum; docuimus ex Bettino Pat. 2. Magiæ lib. 6. Syntagm. 2. Pragmat. 1.*

## PROPOSITIO XXIII.

*Metiri altitudines perpendiculariter erectas,  
ex umbra ipsarum.*

*Vide  
Icon XV.  
Fig. I.  
Metiri  
altitudines  
umbræ.*

*Sit mensuranda altitudo perpendicularis AB, v. g. turris, columna, arbor, domus, &c. I. Sole lucente erige perpendiculariter baculum DE cujuscunque longitudinis, divisum in decem æquales partes, & vide quot talium partium sit umbra ejus EF; sitque v. g. octo partium. II. Metire umbram BC turris in pedibus, quæ sit 40. pedum v. g. III. Dic per regulam Proportionum, quam regulam Trium Arithmetici vocant. Umbra FE 8 partium, dat altitudinem ED 10. partium; quid dat umbra CB 40 pedum? Factâ operatione, quotus dabit 50 pro altitudine AB. Ratio est. quia duo triangula ABC, DEF, sunt æquiangula, ut consideranti patet, ac proinde habent latera circa æquales angulos proportionalia, ideoque, per Proposit. 4. lib. 6. Element. Euclid. ut FE ad ED, ita est CB ad BA.*



Fig. I




Fig. II



Fig. III.



Fig. VI.



## ANNO TATIO.

**P**RO baculo potes uti filio in 10. aequales partes diviso. annexum habente pondus: si enim filum manu teneas, ut pondus leviter terram contingat, & videas quot partium sit umbra fili, & quot pedum umbra altitudinis erectæ: idem invenies per Regulam Trium. Potes etiam in asserculo describere ex uno eodemque centro multos circulos, æqualiter inter se distantes, & in dicto centro erigere perpendiculariter stylum in 10. aequales partes divisum.

*Aliter idem efficere sine arithmetica.* Sit ut antea altitudo  $AB$ , quæ projiciat umbram  $BC$ . I. Erige perpendiculariter baculum  $DE$  longum præcisè uno pede: qui projiciat umbram  $EF$ . II. Accipe alium baculum æqualem umbræ  $EF$ , illoque metire umbram  $BC$  turris. Dico, quoties hic secundus baculus  $EF$  continetur in umbra  $BC$ , toties primum baculum  $DE$  contineri in altitudine  $AB$ . *Ratio est eadem qua antea.*

## PROPOSITIO XXIV.

*Metiri latitudinem fluvij, aut fossæ, sine instrumentis geometricis.*

**P**rimò pileo. Sit mensuranda latitudo  $AE$  fluvij. I. Stans erectus ad  $A$  ripam fluvij, respice ad alteram  $E$ , & pileum capiti impositum tam diu deprime, donec radius visualis ex oculo tuo egrediens, & ad ripam alteram  $E$  terminatus, radat extremum limbum pilei. II. Manente eodem corporis erecti situ, verte te, & in plantæ nota signum  $D$  in quod terminatur idem radius visualis. III. Metire spatium inter  $A$  & signum  $D$  notatum: huic enim æqualis erit latitudo fluvij. *Rem melius intelliges ex sequenti praxi.*

*Vide  
Icon. XV;  
Fig. II.*

Secundò, baculo & bacillo. Sit, ut antea, mensuranda latitudo  $AE$ . I. Ad ripam  $A$  fluminis erige perpendiculariter baculum  $AB$ ; & fissura facta in  $B$ , impone ei bacillum  $FB$   $C$ . II. Applicato oculo ad  $F$ , respice supra dorsum bacilli, eumque tam

*Vide  
Icon. XV.  
Fig. III.*

$Ee$

diu

diu intra fissuram eleva ac deprime, donec radius visualis cadat in alteram ripam E. III. Immoto manente angulo C B A, verte baculum, & per bacilli dorsum F c respice in D. Distantia A D. erit æqualis latitudini A E fluminis.

Vide  
Icon. XV.  
Fig. IV.

Tertiò *umbra*. I. Stans ad ripam A, erige perticam ac deprime tam diu, donec extrema umbra ipsius cadat in E. II. Recede versus D cum pertica ut antea erecta, donec extrema umbra ipsius cadat in A. Spatium D A, erit æquale spatio A E.

## PROPOSITIO XXV.

*Utrum annus propositus sit Bissextilis,  
invenire.*

Annum  
bissextilem  
invenire.

**N**umerum anni propositi à Christi Nativitate divide per 4. si nihil remanet, annus est Bissextilis; si remanet 1, est primus annus post Bissextilem: si 2, est secundus: si 3, est tertius. Quotus indicat numerum annorum Bissextilium post Christi Nativitatem elapsorum. **EXEMPLVM.** Annum Christi 1660, divide per 4; reperiēs in Quoto 415, & nihil remanet; est ergo annus prædictus Bissextilis. Si annum 1661 divides per 4, remanet 1; quod signum est eum esse annum primum post proximè elapsum Bissextilem. Si præsentem annum 1662. per 4. divides, remanent 2; Igitur est secundus post ultimum Bissextilem. *Ratio hujus praxiſ est, quia annus primus aë Christiana fuit primus post Bissextilem. Vide quæ diximus in Cursu Mathem. lib. 10. par. 4. reg. 1. & 2. Regula hac servit pro utroque Calendario.*

## PROPOSITIO XXVI.

*Aureum numerum quovis anno proposito  
invenire.*

Annum  
aureum  
invenire.

**A**nus Christi propositis addatur 1, & summa dividatur per 19; residuum erit aureus numerus anni propositi. Si nihil rema-

remanet, erit aureus numerus 19: Quotus ostendit numerum cyclorum integrorum ab anno æram Christi proximè præcedente usque ad propositum elapsorum. **EXEMPLVM.** Sit propositus annus Christi 1659: Adde 1, sunt 1660: hæc divide per 19, habebis pro residuo 7, pro Quoto verò 87. Aureus ergo numerus anni Christi 1659, est 7; & elapsi sunt à Christo nato 87 integri cycli Lûnares. *Vide quæ diximus lo. cit. Reg. 3. Regula servit pro utroque Calendario.*

## PROPOSITIO XXVII.

*Epaetam veterem quovis anno invenire.*

**A**Ureus numerus anni dati ducatur in 11; productum dividatur per 30; residuum divisionis indicat Epaetam quaesitam; si nihil residuum est, Epaeta erit 30. **EXEMPLVM.** Cupio scire Epaetam veterem anni 1659: Aureus numerus est 7, ut vidimus; quo ducto in 11, producuntur 77; his per 30 divisus, restant 17 pro Epaeta dicti anni. *Vide quæ diximus lo. cit. Regula 10.*

*Epaetam  
veterem  
invenire.*

## PROPOSITIO XXVIII.

*Epaetam novam quovis anno reperire.*

**A**B Epaeta veteri detrahantur dies quibus Calendarium vetus superat novum (qui sunt toto hoc sæculo 1600, usque ad sequens sæculum 1700, dies decem; deinceps verò erunt plures, ut diximus lo. cit. Reg. 4) additis 30, quando subtractio fieri nequit; quod remanet, erit Epaeta nova qua sita. **EXEMPLVM.** Volo scire Epaetam novam anni 1659: Epaeta vetus est 17, ut vidimus; dies quibus Calendarium novum à veteri discrepat, sunt 10: his subtractis ab 17, remanent 7 pro Epaeta nova prædicti anni. *Vide quæ diximus lo. cit. Reg. 11.*

*Epaetam  
novam in-  
venire.*



## PROPOSITIO XXIX.

*Ætatem Luna quovis die mensis invenire.**Luna ætatem invenire.*

**N**umerus Epactæ currentis anni, numerus dierum currentis mensis, & numerus mensium à Martio inclusivè elapsorum, addantur in unam summam: si summa resultans est minor quàm 30, indicat ætatem Lunæ illo die; si major, abijciantur 30, & residuum indicat ætatem Lunæ. In Januario tamen, & Febuario, aut non addendus est numerus mensium à Martio elapsorum, aut assumenda Epacta anni præcedentis. **EXEMPLVM.** Volo scire ætatem Lunæ diei 25 Aprilis anni 1659. Epacta est 7, & Aprilis est mensis secundus à Martio. Addantur igitur 7, 25, & 2, fiunt 34; & abjectis 30, remanent 4: Igitur die 25 Aprilis erat dies quartus Lunæ, id est, quartus dies à Novilunio. *vide qua diximus locis. Reg. 21. Hac regula indicat diem ætatis Lunæ præter propter, & quidem semper diem completum.*

## PROPOSITIO XXX.

*Novilunium quovis mense invenire.**Novilunium invenire.*

**A** Die ætatis Lunæ numera retrò usque ad unitatem, aut post usque ad triginta; & habebis diem novilunij antecedentis, aut subsequents.

*Alter.* In Januario subtrahæ Epactam anni currentis ex 30, in Febuario & Martio adde Epactæ eidem 1, in Aprili 2, in Maio 3, in Junio 4, &c. & summam subtrahæ ex 30; si summa subtrahenda major est quàm 30, subtrahæ illam ex 60: residuus numerus indicat diem novilunij mensis currentis.

## Monitio ad Lectorem.

**D**um hac scribo, moneor de errore enormi deprehensò in *Cursu Mathematico Lib. 11. Par. 4. Regula 19, ubi habetur, proximam feri-*

*riam*

riam quartam post Dominicam Septuagesima esse Diem Cinerum. Erroris causa est Typographa, qui lineam integram in ea Regula omisit; quod dum imprimeretur, non fuit à Correctore notatum. Sic ergo debet corrigi.

A termino Paschali, seu à XIV. Læna in Calendario inventa, descendatur usque ad proximam Litteram Dominicalem, & incidetur in diem Pascha. Ab hoc si numerentur retro in antecedentia hebdomada 9, incidetur in Dominicam Septuagesima; quam sequitur Dominica Septuagesimæ; tum Quinquagesima; post quam proxima feria quarta est dies Cinerum, &c.

## PROPOSITIO XXXI.

*Numerum Indictionis quolibet anno  
regerire.*

ANnis Christi addantur, & summa dividatur per 15, eritque residuum numerus Indictionis currentis. Si nihil remanet, Indictio est 15. Indiction invenire. EXEMPLVM. Cupio scire numerum Indictionis anni 1659: addo 3, & conflo 1662; quibus divisus per 15, restant 12 pro numero quæsito. *Vide huc diximus lo. cit. Regula 7.*

## PROPOSITIO XXXII.

*Qui menses habeant dies 30, aut 31, invenire.*

POLlicem, medium, & auricularem manus sinistræ erige, reliquos duos digitos deprime. Deinde pollicis attribue Martium, Indici Aprilem, medio Majum, annulari Junium, auriculari Julium, iterumque pollicis Augustum, indici Septembrem, medio Octobrem, annulari Novembrem, auriculari Decembrem, tandemque pollicis iterum Januarium, indici Februarium. Menses qui cadunt supra digitos erectos, habent dies 31 qui verò cadunt supra diditos depressos, habent dies 30, ex-

*Mensis quilibet quot dies habeat, invenire.*

cepto Februario, qui in anno communi habet dies 28, in anno Bissextili dies 29.

## PROPOSITIO XXXIII.

*Litteram Dominicalem veterem invenire.*

*Litteram  
Dominica-  
lem veterem  
invenire.*

**A**Nnis Christi propositis addandus 5, & numerus Bissextorum præteritorum per Propositionem 25 repertus; summa dividatur per 7; residuum subtrahatur ex 8; vel si nihil restet, subtrahantur 7 ex 8; reliquum indicabit litteram Dominicalem quæsitam: nam 1 significat litteram A, 2 litteram B, 3 C, 4 D, 5 E, 6 F, 7 G. **EXEMPLVM.** Cupio scire litteram Dominicalem veterem anni 1659: addantur 5, & numerus Bissextorum præteritorum 414, eritque summa 1078; quâ per 7 divisâ, restant 6: subtractis ergo 6 ex 8, remanent 2; quod signum est, litteram B esse Dominicalem annidati.

## ANNOTATIO.

**I**N anno Bissextili littera Dominicalis per hanc Regulam inventa indicat diem Dominicam solum usque ad 15. Februarij, post quem assumenda est proximè præcedens, nempe in casu proposito littera A. Vide quæ diximus lo. cit. Reg. 12.

## PROPOSITIO XXXIV.

*Litteram Dominicalem novam invenire.*

*Litteram  
Dominica-  
lem novam  
invenire.*

**E**X summa annorum Christi, Bissextorum, & quinque, tollantur dies quibus Calendarium vetus superat novum; reliquum dividatur per 7; quod restat, subtrahatur ex 8; vel si nihil restat, subtrahantur 7 ex 8; eritque residuum index litteræ Dominicalis novæ. **EXEMPLVM.** Cupio scire litteram Dominicalem novam anni 1659: addantur ipsi 414, & 5; & ex summa 1078. tollantur 10, remanent 1068; quibus per 6 divisus, restant 3; his ab 8 subtractis, remanent 5. Ergo littera Dominicalis nova est E, Vide quæ diximus lo. cit. Reg. 13.

PRO-

## PROPOSITIO XXXV.

*Calendas Nonas, & Idus in diebus ordinarijs mensium memoriter exhibere; & è contra hos ab illis denominare.*

Sciendum quot quilibet mensis habeat dies, quot Nonas, & quot Idus: Item quibus diebus mensium sit initium Calendarum, Nonarum, ac Iduum. Antiqui Romani, quos etiam nunc sequuntur docti, primum cujusque mensis diem vocant Calendas, dein quintum, aut septimum Nonas, demum decimum tertium, aut decimum quintum Idus; reliquos verò dies retrogrado ordine à Nonis, Idibus, & Calendis denominant. Nonæ in Martio, Majo, Julio, & Octobri incipiunt die septimo, in reliquis mensibus die quinto; unde quatuor prædicti menses habent 6 dies ante Nonas, reliqui verò habent quatuor dies. Initium Iduum in omnibus mensibus est de octo diebus post initium Nonarum. Post Idus reliqui dies à Calendis sequentis mensis denominantur. His suppositis.

*Calendas  
Nonas, &  
Idus me-  
moriter  
scire.*

I. Si dies propositos in illis mensibus, qui quatuor Nonas habent, subtraxeris ex 6, in illis verò, qui sex Nonas habent, ex 8; relinquuntur Nonæ quæ sitæ. Si contrà Nonas propositas ex 6 aut 8 subtraxeris, relinquuntur dies quæ sitæ. Sic quartus dies Octobris est 4 Nonas Octobris, quia 4 ex 8 subtractis relinquuntur 4: contrà verò quintus Nonas Octobris est dies tertius Octobris, quia 5 ex 8 subtractis relinquuntur 3.

II. Si dies propositos in illis mensibus, qui quatuor Nonas habent, subtraxeris ex 14, in reliquis ex 16; relinquuntur Idus quæ sitæ: contrà verò si Idus propositas subtraxeris ex 14, vel ex 16, relinquuntur dies quæ sitæ. Sic nonus dies Octobris est 7 Idus Octobris, quia 9 ex 16 subtractis relinquuntur 7: contrà verò sextus Idus Octobris cadit in diem decimum Octobris, quia subtractis 6 ex 16, relinquuntur 10.

III. Sidies propositos subtraxeris ex summa facta ex numero dierum mensis dati, & 2, relinquuntur Calendæ mensis sequentis: si contrà Calendas propositas subtraxeris ex eadem summa, relinquuntur dies mensis præcedentis. Sic dies 24 Octobris cadit in 9 Calendas Novembris, quia 24 subtractis ex 33, hoc est, ex summa dierum Octobris & binario, remanent 9: contrà verò 9 Calendas Novembris cadit in 24 Octobris, quia 9 subtractis ex 33, restant 24. *Vide qua diximus lo. cit. Reg. 20.*

## PROPOSITIO XXXVI.

*Quo die cujuslibet mensis Sol in signa Zodiaci ingrediatur, agnoscere.*

*Soli ingressum in signa Zodiaci agnoscere,*

ORdo signorum duodecim Zodiaci his duobus antiquis etiam utilitatis versibus exprimitur:

*Sunt Aries, Taurus, Gemini, Cancer, Leo, Virgo,*

*Libraque, Scorpius, Arcitenens, Caper, Amphora, Pisces*

In Arietem Sol ingreditur in Martio, in Taurum in Aprili, in Geminos in Majo, &c. Quo autem cujuslibet mensis die id fiat, docent sequentes versus:

*Inclita Laus Iustis Impenditur: Hæresis Horret:*

*Grandia Gesta Gerens Felici Gaudet Honore.*

In his versibus sunt 12 dictiones, quarum prima deputatur Januario, secunda Februario, tertia Martio, &c. & ratio habetur tantum primæ cujuslibet dictionis litteræ: si enim numerus, quem prima littera in Alphabeto habet, subtrahatur ex 30, restat dies quo Sol signum ingreditur. Sic quia tertia dictio primi versus præcedentis deputatur Martio, & in Martio Sol ingreditur in Arietem, primaque littera tertiæ illius dictionis est I, quæ nonum locum in Alphabeto obtinebit; si subtrahantur 9 ex 30, remanent 21: Sol ergo ingreditur in Arietem

21. Martij.

PRO-

## PROPOSITIO XXXVII.

*Locum Solis in Zodiaco invenire quolibet die.*

Si scire cupis in quo loco Zodiaci, hoc est, in quo signo, & in quoto gradu signi sit Sol quolibet die mensis; discipe primò ex præcedenti Proposit. quo mense, & quo die mensis, Sol quodlibet signum Zodiaci ingredietur. Deinde adde numerum illum, quem prima littera posteriorum versuum in Alphabeto habet, diebus propriis mensis dati, & dabit summa gradum signi quæsitum. Quòd si summa superet 30, abijciantur 30, & residuum indicabit gradum. **EXEMPLUM.** Cupio scire, ubi Sol versetur die 29 Septembris. Mense Septembris respondet vox, *Gerens*, estque ejus prima littera G septima in Alphabeto. Adde ergo 7 ad 29, & habeo 36; abjectis 30, restant 6; igitur Sol 29 Septembris est in sexto gradu Libræ. Die verò tertio Septembris Sol est in decimo gradu Virginis, &c.

*Solis locum  
in Zodiaco  
invenire.*

## PROPOSITIO XXXVIII.

*Locum Lunæ in Zodiaco invenire quovis die.*

Duplicetur ætas Lunæ, hoc est, dies à novilunio præcedente usque ad diem, pro quo locus Lunæ quæritur, elapsi, duplicatum dividatur per 5, & dabit quotus signa, residui verò sextuplum gradus quibus Luna à Sole distat. **EXEMPLUM.** Cupio scire in quo loco fuerit Luna die 18 Octobris anni 1618. Sol die 18. Octob. est in 24 gradu Libræ; novilunium præcedens cecidit in primum Octobris, ergo ætas Lunæ fuit tunc dierum 17, nam à primo Octobris usque ad 18, sunt dies 17; duplicum 17 est 34; quod per 5 divisum, reddit 6, & restant 4; quorum sextuplum facit 24: si ergo à loco Solis secundum signorum seriem

*Lunæ locum  
in Zodiaco  
invenire.*



numeravero sex signa, & 24 gradus, incidam in 18. gradum Tauri, in quo Luna dicto die versabitur.

## PROPOSITIO XXXIX.

*Aquam ex uno montis latere, per verticem, in alterum latus deducere.*

*Vide  
Icon. XVI.  
Fig. I.*

*Aquam per  
montis ver-  
ticem de-  
ducere,*

**S**It mons A B C, & fons in A, cujus aquam per verticem B velis deducere in locum C, qui sit humilior quàm A. Fac tubum, qui à fonte A per verticem B pertingat usque ad C, cujus unum orificium sit immersum fonti A, alterum desinat in C, & in vertice habeat epistomium B. Obtura utrumque orificium, & perimple tubum aquâ, ac diligenter claude. Aperi deinde simul utrumque orificium; defluetque aqua ex C; & nè detur vacuum in tubo, sequetur aqua ex A, nec cessabit fluxus, quàm diu orificium A immersum fuerit aquæ,

## ANNOTATIO.

**S**ciendum tamen, praxin hanc non succedere nisi in exigua aliqua machina. Vnde si per montem aliquem verum deducere ex uno in alterum latus aquam prædicto modo tentabis, plenum & operam perdes. Causa est, quia aqua propter metum vacui, vel potius propter pressionem aëris incumbentis, non potest elevari nisi ad certam ac determinatam altitudinem, ut in Mechanica Hydraulico pneumat. insinuvimus, & dicemus in Technica Curiosa lib. 4. Scrivit hoc Excellentissimus Dominus, & in Mathematicis insigniter versatus, Dn. Baro VVirtz, Suedica Corona Generalis, & Pomerania Gubernator, cum Stockholmy in Suecia nescio quis Ingeniarius assernisset, velle se prædicto artificio aquam ex uno montis, in dictâ Urbe siti latere, per verticem, ad latus alterum deducere. Negavit dictus Excellentissimus Dominus id fieri posse. Deposuit uterque coram Serenissima Regina Christina mille ducatos, qui victoricerent. Tentata res fuit à altero, & omni studio procurata, sed vano labore. Vicit ergo Excellentissimus Baro, & manifestum omnibus fecit, quid discriminu inter verum ac solidum Mathe-



Fig II.



Fig I.



Fig III.



*Mathematicum, interque nudum Mechanicum intercedat. Hac ex ore Excellentissimi Domini Habzi, Suecica Corona Consiliarij. & per Franconiæ, Tractumque Rheni Legati. Cum hac limitatione intelligenda sunt quæ scripsimus in Mechanica Par. 1. Protheor. 4. cap. 2. Proposition. 11.*

## PROPOSITIO XL.

*Dolium per os inferius, ubi epistomium est, implere.*

**S**edolium  $A$ , implendum per os  $B$ . Infige ori  $B$  tubum curvum  $B C D$ , cujus crus  $C D$  altius sit quàm dolium. Si per  $D$  vinum infundas, replebis dolium. Si tubus  $B C D$  vitreus ac transparent erit, poteris deprehendere quò usque præcisè dolium sit exinanitum; nam vinum effluens ex  $B$ , ad tantam altitudinem ascendet in crure  $C D$ , ad quantam ascenderit in dolio: *Vide Icon. XVI. Fig. II. Dolium per os inferius implere.*

## PROPOSITIO XLI.

*Fontem Heronis construere.*

**F**lat vas vitreum aut stanneum  $A B C D$ , diaphragmate seu interstitio  $E F$  discriminatum in duas partes, cujus operculum  $A B$  sit instar pelvis nonnihil concavum. Fiant deinde tres tubi angusti ex cupro, aut stanno, plumbovè, utrimque aperti; nempe primò tubus  $G H$ , qui transeat per operculum  $A B$ , & per diaphragma  $E F$ , ac fundum  $C D$  non attingat: secundò tubus  $I K$ , transiens per diaphragma  $E F$ , & operculum  $A B$  supra non attingens: tertio tubus  $L M$ , transiens per operculum  $A B$ , & desinens in angustissimum osculum  $M$ , ac diaphragma  $E F$  non attingens. Vas  $A B C D$  impleatur aquâ per foramen  $N$  operculi. quod deinde diligenter claudatur. His factis, si vis ut saliat fons, infunde scyphum aquæ supra operculum; quæ per tubum  $G H$  descendens expellet aërem ex vase  $E F C D$ , per tubum  $I K$ , in vas  $A B E F$ ; aër verò premens aquam dicti vasis  $A B E F$ , expellet ipsam per tubum  $L M$  in altum: hæc relabens in operculum, descendens per  $G H$ , & tam diu animabit fontem in saltum, quàm diu fuerit aqua in vase  $A B E F$ . *Vide Icon. XVI. Fig. III. Fontem Heronis construere.*

## ANNOTATIO.

**T**ribus GH debet esse longior quàm LM. Cessante saltu, & vase EF CD impleto, potest depromi aqua per epistomium D, & iterum impleri vas AB EF per foramen N. Potest item inverti fons, ut aqua vasis EF CD defluat per tubum KI in vas AB EF. Vocatur fons Hero- nis ab auctore qui fuit Hero Alexandrinus.

## PROPOSITIO XLII.

*Quem quis numerum, abjectis alijs, reti-  
nuerit, divinare.*

*Divinare  
quem quis  
numerum,  
abjectu  
alijs, reti-  
nuerit.*

**V**T facilius ac brevius rem explicem, eam per modum dialogi inter Magistrum ac Discipulum proponam. *Magister.* Accipe tibi secretò numerum quem libuerit. *Discipulus.* Accepi. M. totidem tibi dat Cicero. D. Accepto. M. Ego tibi do quantum jam habes. D. Accepto etiam. M. Junge omnes numeros in summam. D. Junxi, & habeo 20. M. Dimidium abijce. D. Abjeci. M. Redde tuum Ciceroni. D. Reddidi. M. Remanent tibi quinque. D. Ita est, sed quomodo id scire potuisti? M. Quia servato hoc ordine, semper remanet tibi dimidium illius quod ego tibi dedi, quodcunque illud sit, sive 10, sive 12 &c. quia itaque acceperas 5, & acceptis à Cicero totidem, habebas 10; & acceptis 10 à me, habebas 20: si auferas dimidium, remanet tibi id quod ego dedi tibi: cujus dimidium acceperas à Cicero- ne, & alterum à te.

## ANNOTATIO

**H**anc regulam inveni inter secreta manuscripta P. Kircheri. Non est tamen universalis. Talem sic ego reddo. Accipe numerum quemcunque, ut 6: adde totidem, habes 12: quantum habes, tibi do; habes 24. Quod cum mihi manifestas, ego abijcio dimidium, & dimidium dimidij, & habeo numerum à te acceptum.

PRO-

## PROPOSITIO XLIII.

*Animalium quorundam speciales proprietates, &  
ex ijs Secreta varia.*

I. SI juvenum naribus & ore obstructis fuste percussum occideris, & in umbra ramis coopertum posueris; apium examina nascentur eximia. *Animalia  
speciales  
proprietates.*

II. Si chelas demas cancro, & corpus reliquum terræ mandes; exibit scorpium.

III. Pili è caudis equorum in aquam pluviam fossis ac scrobibus exceptam decedentes, animantur, & in graciles ac longos vermes convertuntur. Ipsemet vidi non semel Parnormi in Sicilia.

IV. Ex equorum cadaveribus nascuntur crabrones; & ex asinis vespæ.

V. Lupi si hominem vident, raucedinem inducere creduntur, ita ut clariare homo nequeat. Causam adsignant hanc, quòd lupus voracissimus est, & tantum cibi, si copia suppetat, sumit, quantum tribus diebus sufficit; cùmque os aperit, aërem proximum inficit halitu suo indigesto & crasso, infectus autem aër alium inficit, donec ad hominem perveniat, eumque raucum reddat, juxta illud Virgilianum: *Lupi Mærim videre priores*. Cardanus lib. 18. de Subtilit. ait, causam hujus rei esse in oculis Lupi, qui habeant quid homini aversum, quo spiritus cohibetur, nec potest fieri violenta illa spiritus exsufflatio quæ ad vocem necessaria est. Hic tamen effectus raucedinis non semper in homine viso à lupo contingit, uti experientia constat; ideo fortassis, quia aut non semper indigestum halitum effluit lopus; aut quia non semper homo est intra activitatis sphaeram constitutus. Et hæc fortassis causa est, cur vulgò credatur, hominem prius à lupo visum reddi raucum, non verò si ipse prius lupum videat.

VI. Lupum ajunt maximè lapides extimescere. Quare si quando per lapidosa saxa cogatur ire, suspensio incedit gradu: & si lupo viso lapides complodas, fugit. Causa fortassis est natu-



ralis antipathia, inde orta, quòd læsus lapidis icu, vermes gignit læthales. Plura dedimus in Phÿsica Curioſa lib. 7.

## PROPOSITIO XLIV.

*Muscas & culices arcere, aut capere.*

*Musca &  
culices ar-  
cere,*

**M**usca non lædunt equum, si equi pilos madefeceris succo foliorum cucurbitæ.

Reticulis e filo ferreo aut lineo fenestræ oppansis arcentur muscæ & culices; timent enim nè alas impliceant. Hoc remedio passim Siculi utuntur in æstate.

Spongia aceto imbuta, si ex fastigio domus suspendatur, omnes culices allicit, ut congregati demergi queant.

## PROPOSITIO XLV.

*Apum examen in montibus aut sylvis invenire, aut ex arborum cavitatibus elicere.*

*Apum exa-  
mina in  
sylvis in-  
venire.*

**S**i apum examina in montibus aut sylvis invenire cupis, vade ad vicinos rivulos aut lacunas, è quibus apes hibern; cape nonnullas, & intra fistulam conclude; dimitte unam, eamque avolantem sequere, volat enim versus cavitatem suam; si eam perdideris antequam cavitatem deprehendas, dimitte alteram, tum tertiam, ac reliquas, donec unam ad cavitatem suam se recipientem videas.

Examen apum ex arboris cavitare ultra ullum arboris detrimentum sic elicies. Fistulam ex canna, aliavè materia elaboratam accipito, tantæ capacitatis, ut uni api ingressum facilem præbeat: in altera ejus extremitate setas aliquot uno aut duobus digitis longas intus adglutinato, eandemque extremitatem intra cavitatem immitto, curatoque nè aliundè quàm per fistulam apes exire è cavea queant: sic enim exeuntes singulatim apes, eò unde egressæ fuerunt, redire non poterunt, impediante scilicet regressum setarum asperitate. Longè tamen melius erit, leve aliquid foramini oppandere, quod exeunte apiculâ aperiat, & egressâ claudatur, nè redire

queat.

PRO-

## PROPOSITIO XLVI.

*Serpentes capere, aut fugare.*

**S**erpentes vini incontinentes sunt, ideo aliqui vino in fistilibus ad sepes deposito venantur; ebrii enim capiuntur.

*Serpentes  
capere, aut  
fugare.*

Serpentes fugiunt è loco, ubi ablynthium, aut artemisiā, aut abrotinum circa eum plantaveris, aut melius fraxini cineribus locum consperleris.

Succo etiam radiculae seu raphani perunctis manibus, tute tractari posse serpentes ajunt. Vide Proposit. ultimam hujus Centuriae.

## PROPOSITIO XLVII.

*Pulices, Cimices, Pediculos perimere, aut fugare.*

**C**alcem vivam cribrato, & locum pulicibus infestum aspergito; necabuntur pulices. Item sub lecto scrobem facito, & sanguine caprino aut hircino repleto; pulices omnes qui in lecto & vestibus sunt, eò congregabuntur.

*Pulices, ci-  
mices, pedi-  
culos fu-  
gare.*

Pinguedo herinacij, si per dies novem ad solem eam posueris, cimices omnes in se congregare dicitur. Thymus etiam (Germanis Imnfrant) odiosus est illis.

Ad enecandos pediculos recipe unciam unam & semis saponis nigri, & drachmam sulphuris, & tantundem staphysagriae; misce & fac unguentum, eoque unge loca pediculosa in vestibus, aut corpore.

## ANNOTATIO.

**S**taphysagria, seu staphys, quae latinus pituitaris, & pedicularis, Germanis etiam siffrant dicitur, visis est caliculis nigris, ac rectis folijs laevibus, folliculos verius quam acinos ferens, virides similes ciceri.

Argen.

Argentum vivum mixtum cum butyro, aut sapone nigro, aut malo tosto, pediculos, lendes, pulices, mulcas, & omnia similia tollit.

Axungia porcina, argentum vivum, & salvia, mixta simul, & ad unguentum redacta, pediculos tollunt, si partes obsessæ illo inungantur. *Item* unguentum ex sapone Veneto, & argento vivo mortificato. *Item* Amaranthi flores in lixivio decocti, si cum illo caput abluatur. *Item* unguentum ex pomo ad molliem cocto, & mundato à corticibus ac seminibus, & ex argento vivo. *Item* unguentum ex oleo communi unc. 3. ceræ unc. 1. staphysagriæ drachm. 1. argenti vivi extincti cum saliva jejunii drachm. 3. *Item* unguentum ex Sandaracha dram. 1. staphysagria drachm. 2. confectum cum aceto & oleo.

## PROPOSITIO XLVIII.

*Quoties res quacunque mutari inter se queant ostendere, si omnes sint diversæ.*

*Combinari  
quoties in-  
ter se pos-  
sint rei.*

PERmutari res inter se (prout hoc loco de permutatione rerum loquimur) dicuntur, quando dato rerum numero quocunque, accipiuntur omnes simul, ac ita miscentur, & variè disponuntur inter se, ut semper habeant alium ordinem, idque toties, quoties fieri potest. Ut si sint quatuor litteræ, a, b, c, d, & ita permisceantur ac disponantur, ut semper alio ordine se mutuò sequantur, prout in apposito schemate apparet, in quo alius est ordo, a, b, c, d, & alius a, b, d, c, &c. Et res quidem permiscendæ dicto modo, vel sunt omnes inter se diversæ, ut in apposito exemplo; vel aliquæ ex illis sunt similes, hoc est, bis, ter, aut sæpius sumuntur in eodem numero aut serie rerum. Nos hæc solum in primo casu loquimur.

A. B. C. D.	C. A. B. D.
A. B. D. C.	C. A. D. B.
A. C. B. D.	C. B. A. D.
A. C. D. B.	C. B. D. A.
A. D. B. C.	C. D. A. B.
A. D. C. B.	C. D. B. A.
B. A. C. D.	D. A. B. C.
B. A. D. C.	D. A. C. B.
B. C. A. D.	D. B. A. C.
B. C. D. A.	D. B. C. A.
B. D. A. C.	D. C. A. B.
B. D. C. A.	D. C. B. A.

Regu-

Regula igitur ad cognoscendas quotcunque inter se diversarum rerum permutationes, hæc est. Dato quocungq. numero rerum permutandarum, scribantur in serie naturali tot numeri, ab unitate incipiendo, quos res sunt propositæ, & inter se invicem multiplicentur (hoc est, Primus multiplicetur per secundum, & summa producta, per tertium, & summa producta iterum per quartum, &c.) ultima summa producta est numerus omnium permutationum possibilium. Sint permutandæ inter se res viginti quatuor: scribantur in serie naturali viginti quatuor numeri, prout apparet in columna A B

A	
	1
	2
	3
	4
	5
	6
24	7
120	8
720	9
5040	10
40320	11
362880	12
3628800	13
39916800	14
479001600	15
6227020800	16
87278291200	17
1307674368000	18
20922789888000	19
315687428096000	20
6402373705728000	21
121645100408832000	22
2432902008176640000	23
51090942071709440000	24
3124000727776076800000	
25852016738884976640000	
6200448401743239439360000	
B	

appositæ tabellæ: deinde multiplicetur 1 per 2, fiunt 2; iterum multiplicentur 2 per 3, fiunt 6; iterum multiplicentur 6 per 4, fiunt 24; iterum multiplicentur 24 per 5, fiunt 120; hæc per 6, fiunt 720; hæc per 7, fiunt 5040: & sic ulterius progredere usque ad 24, & habebis numerum positum è regione numeri 24. Tot ergo vicibus permutari possunt res viginti quatuor, quot exprimit dictus numerus, Ex eadem tabella apparet, res

duas permutari posse solum duabus vicibus, ut *ab*, *ba* res tres sex vicibus, ut *aci*, *aic*, *cai*, *cia*, *iac*, *ica*. Quatuor autem res possunt permutari viginti quatuor vicibus; & quinque res centum viginti vicibus, &c.

## PROPOSITIO XLIX.

### *Paradoxa varia circa rerum permutationes.*

*Combina-  
tiones para-  
doxa re-  
rum.*

**E**X tradita regula, uti & ex appositâ tabella, solvi possunt quæ sita varia, quorum solutiones merito paradoxæ videri queant, verissima tamen sunt. Nonnulla indico.

I. Si dominus aliquis, sex habens satellites, procedere vellet in publicum uno die toties, quoties mutare possent satellites ordinem inter se, procedere deberet 720 vicibus, hoc est, spatio 24 horarum intra bina quælibet minuta horaria semel. Nam 24 horæ multiplicatæ per 60 minuta horaria, faciunt minuta 1440; quæ divisa per 2, dant 720.

II. Si idem dominus haberet decem satellites, velletque tot diebus prodire in publicum, quot vicibus possent ordinem inter se permutare; vivere deberet diebus 3628800, seu annis 9941, & diebus 335, computando dies 365 pro uno anno.

III. Si quis hospites duodecim excipere vellet convivio tot diebus, quoties alio atque alio ordine possent accumbere mensæ, ita ut nunquam eodem ordine federent; mille sæcula, hoc est, centies annorum millia non sufficerent; requirerentur enim dies & convivia 479001600, hoc est, quadringenti & septuaginta novem milliones dierum & conviviorum, ac insuper mille & sexcenta; anni verò plusquam 1311434, hoc est, plus quàm annorum millena millia, trecenta & undecim millia, quadringenta, & triginta quatuor.

IV. Litteræ viginti quatuor Alphabeti Græci aut Germanici, toties mutari inter se possunt (ita ut omnes series seu ordines permutationum sint inter se diversæ, & in nulla serie plus quàm semel ponatur eadem littera) ut mille milliones

Scripto-

Scriptorum, mille annorum millionibus non possent scribere omnes permutationes prædictas, licet singuli quotidie absolverent 40 paginas quarum unaquæque contineret 40 diversos ordines seu series 24 litterarum. Nam quia unus Scriptor uno die scribit 40 paginas, quarum singulæ continent 40 ordines diversos litterarum viginti quatuor; si ducantur 40 in 40, fiunt diversi ordines 1600, quos uno die scribet unus Scriptor. Ergo si demus anno dies 366 (hoc est, plures quàm ei debeantur) scribet Scriptor unus anno uno ordines seu permutationes dictarum litterarum 585600; fit enim hic numerus ex 1600 ductis in 366. Annis igitur 1000000000, hoc est, mille millionibus annorum, scribet unus permutationes 585600000000000; hic enim numerus oritur ex 585600 ductis in 1000000000. Quare si mille annorum millionibus Scriptor unus scribat permutationes seu ordines diversos prædictos, Scriptorum mille milliones eodem tempore, videlicet mille annorum millionibus, scribent mutationes diversas 585600000000000000000000; hic enim numerus resultat, si præcedens permutationum numerus multiplicetur per 1000000000, hoc est, per mille milliones. Hic autem ultimus numerus est minor quàm numerus vigesimo quarto loco collocatus in præcedenti tabula.

V. Si viginti tres litteræ Alphabeti Latini sumantur primò singulæ, deinde binæ, tum ternæ, post quaternæ, quinæ, senæ, septenæ, & sic deinceps, usque ad numerum vigesimum tertium, & fiant tot dictiones, quoties dictis modis combinari ac permutari possunt; habebis combinationes ac permutationes, ac proinde dictiones (sive utiles, sive inutiles) 70273067330330098091155, hoc est, septuaginta millium, ducentorum, & septuaginta trium millionum millionum millionum; sexaginta septem millium, trecentorum, & triginta millionum millionum; trecentorum, triginta millium, nonaginta octo millionum; nonaginta unus millium, centum, & quinquaginta quinque dictionum, quarum nulla sibi similem habeat, nullaque littera in eadem dictione repetatur. Nam quando singulæ sumuntur litteræ, sunt dictiones seu acceptiones diversæ 23; cum verò binæ pro una dictione conjunguntur,



fiunt combinationes ac dictiones vices bis viginti tres, hoc est, 506; cum ternæ conjunguntur pro una dictione, fiunt dictiones 10626, &c. Litterarum porrò summa, quæ in supradictis combinationibus seu dictionibus continentur, est 1546007491267262147905433, hoc est, mille quadrimillionum; quingentarum, quadraginta sex millium, & septemtrimillionum; quadringentarum & nonaginta unius millium bimillionum; ducentarum & sexaginta septem bimillionum; ducentarum & sexaginta duarum millium millionum; centum & quadraginta septem millionum; nongentarum & quinque millium; quadringentarum & triginta trium.

Hujus tam inexplicabilis ferè numeri litteræ omnes si in codices colligantur, quorum quilibet contineat quingentas paginas, seu mille facies, in qualibet verò facie sint centum versus seu lineæ, & in quavis linea sint sexaginta litteræ; continebit quælibet facies centies sexaginta litteras, hoc est, 6000; quæ ductæ in 1000 facies, producant 6000000, id est, sex milliones litterarum unius codicis: per hunc numerum si numerum litterarum antea positum dividerimus, exibat numerus codicum illis litteris complendorum, videlicet 257667915211210357, id est, ducentorum quinquaginta septem millium, sexcentorum sexaginta septem millionum millium; nongentorum quindecim millium, ducentorum undecim millionum; ducentorum decem millium, trecentorum quinquaginta septem; & ultra quinque milliones litterarum adhuc supersunt, quæ pauciores sunt quàm ut unum librum compleant. Si jam hos libros distribuere vellemus in Bibliothecas, & cujuslibet libri crassitieci demus quadrantein pedis Romani antiqui, latitudini tres quadrantes, longitudini sesquipedem; bibliothecas verò statuamus esse quadratas undique, id est, cubicas, quarum singula latera sint, quadringentorum, triginta duorum pedum; tot hujusmodi bibliothecæ requirerentur, quot non caperet tota in Orbe superficies Terræ, ut in *Magia Arithmetica par. 3. lib. 8.* demonstravimus ex Guldino; ubi etiam multa alia paradoxa arithmetica circa permutationes & combinationes rerum reperies, uti & Regulas combinationum quarumcunque inveniendarum.

## PROPOSITIO L.

*Dato quovis vocabulo, aut vocabulis, anagramma facere.*

**V**el omnes litteræ in dato vocabulo vel vocabulis sunt inter se diversæ, & nulla plùs quàm semel ponitur; vel aliquæ sunt inter se similes, hoc est, sæpius quàm semel ponuntur.

I. Quando omnes litteræ sunt inter se diversæ. *Quære omnes permutationes possibiles illarum, per Regulam Proposit. 48. præced. & in una aut pluribus illarum reperies anagramma, si apta sunt vocabula ad id pariendum.*

II. Quando non omnes litteræ sunt inter se similes, sed una aut plures sæpius ponuntur quàm semel, Numerus permutationum omnium litterarum dividatur per numerum permutationum quas subire possunt litteræ inter se similes inter illas contentæ; quotiens dabit numerum permutationum quæsitum: quas si scripseris, in una aut pluribus illarum reperies anagramma, si apta sunt vocabula quæ anagramma pariant. Quinque igitur litteræ hujus vocabuli, **JESUS**, permutari possunt sexagies: nam quia quinque litteræ dicti vocabuli, juxta præcedentis Proposit. 48. Regulam, permutari possunt 120 vicibus, & inter illas quinque sunt duæ similes, nempe **SS**, numerus autem permutationis duarum rerum est 2, quia duæ res permutari possunt bis; ideo si dividantur 120 per 2, quotiens 60 indicat, dictas quinque litteras permutari posse sexagies. Alia exempla, unà cum tabula pro permutatione rerum non omnino diversarum, vide in *Magia nostra Arithmetica lo. cit.*

Facilius tamen fiunt anagrammata, si dati vocabuli litteræ singulæ scribantur in separatis chartulis, & hæ toties combinentur aliter atque aliter, donec congruum aliud vocabulum emergat,

*Anagrammata facere per combinationes litterarum.*

## PROPOSITIO LI.

*Clavem sera mathematica reperire, & seram  
aperire.*

*Seram Mathematicam  
aperire.*

*Vide  
Iconis  
XVII. Fig.  
I. II. III.  
& IV.*

Solent artifices ex orichalco seras quasdam eâ arte ac subtilitate concinnare, ut clave aliâ non sit opus ad illas vel claudendas, vel referandas, quàm certâ litterarum combinatione. Fiunt hoc modo. Circa cylindrum solidum ex orichalco, in medio à basi una usque ad alteram secundum longitudinem perforatum, fiunt ex eadem materia tres quatuorve, aut plures annuli versatiles, incisuram tenuem habentes singuli, æqualem incisuræ à basi A B Figuræ secundæ; inter quas ordine recto dispositas inditur clavis D C Figuræ tertiæ, foramini & incisuræ A B congruens, habens denticulos quatuor, aut plures, pro numero annulorum, ita crassos & extantes, ut incisurarum ordinem rectum faciliè pertranseant. Intrusa clava, in convexa basis utriusque, & singulorum annulorum intermediorum superficie insculpunt litteras, certum aliquod nomen, v. g. Petrus, Albert, &c. exprimentes. In iisdem superficiebus alias deinde litteras ad libitum insculpunt. His factis, si vel unus annulus eorum dimoveatur ab eo situ, quo nomen *Petrus* exprimitur; clauditur sera, nec unquam referari potest, nisi à conscio artificij & tesseræ, omnes annuli restituantur in eum situm, ut litteræ singulorum unâ cum duarum extremarum basium litteris, nomen *Petrus* recto ordine expriment. Has placet appellare seras Mathematicas, quoniam non sine mathematico artificio constructui, claudi, & aperiiri possunt.

Vt igitur perdisâ aut ignoratâ tesserâ, eam reperias, faciendæ sunt omnes omnium litterarum combinationes, & quâlibet factâ tentanda est clavis extractio, donec veniatur ad unam, quæ tesserales litteras, & consequenter annulorum incisuras, recto ordine restituat. Combinationes porro ita institui debent. Videatur quot in qualibet basi, & in quolibet annulo sint litteræ. Sint v. g. sex. Combinetur igitur primò quælibet primi annuli littera cum omnibus sex litteris primæ basis, & habebis sex

lex



Fig. II.



Fig. III.



Fig. IV.





sex combinationes, hoc est, 36; quæ scribantur. Combinentur secundò quælibet secundi annuli litteræ cum omnibus 36 combinationibus notatis, & habebis sexies triginta sex combinationes, hoc est, 216; quæ etiam notentur. Combinentur tertio quælibet tertij annuli litteræ cum omnibus 216 combinationibus notatis, & habebis sexies 216 combinationes, hoc est, 1296; quæ similiter notentur. Tandem cum his omnibus combinentur singulæ quinti annuli litteræ, & necessariò emerget combinatio illa quæ nomen tesserale exprimat. *Ratio hujus rei per se patet ex ipso modo operandi.*

## PROPOSITIO LII.

*Maculas è vestibus, pannis, libris, alijsque rebus abolere.*

O Lei maculas è vestibus, pannis, & libris abolebis, si supra macularum locum calcem vivam in pulverem comminutam, aut ossa combusta ac in pulverem contusa, sparseris; nam post non longum temporis spatium ita oleum exugitur, ut nè vestigium ampliùs appareat. *Iser faciebam die quodam per Siciliam hyberno tempore, & noctu ad Collegium Sicilianum Societatis nostræ diverteram: cum venis ad me quidam ex domesticis qui eodem tempore, dum ad mensam in cubiculo stunderes, lucernam olei casu supra librum novum, & elegantissimè compactum (erat à Tomus in folio P. Stephani Fagundæ in præcepta Ecclesiæ) effuderat, totumque ferè librum interiùs atque exteriùs commaculaverat; querisq; remedium ad eluendas maculas. Suadeo, confestim ut calcem vivam inspergeres. Ait, nullam ejus copiam in Collegio esse, nec extra inquiri per urbem posse, nocte prohibente. Suadeo iterum, ossa ut comburas, & in pulverem contundas, eoque pulvere loca omnia macularum inspergat, & per noctem relinquat. Fit quod jussèrã, & manè nullum apparet macularum vestigium, nisi quòd olei odor adhuc percipiebatur, qui tamen paulatim deinde evanuit.*

*Maculas  
abolere è  
vestibus,  
libris, &c.*

*Alio in loco dum supplicantium ordo per templum Collegij nostri duceretur, qui vexillum præferebat ex serico affabrè contextum, impetis incautus in lampadem è templi tholo suspensam, & oleo effuso totum commaculavit vexillum. Sed vivà calce, ut jussèram, inspersà macula evanuit.*

Non.



Nonnemo hæc præscribit remedia ad varias maculas & varijs rebus eluendas. Si maculas è vestibus abolere vis (*inquit*) unge eam malsâ gypsi recentis, & solis radijs ad siccandum gypsum expone, post verò aquâ communi ablue. Si autem macula picea sit, veterem caseum mandito, quo locum fricato probe, post verò illâ aquâ abluito. Vestium vel pileorum pingue auferitur, si pane calido fricabis. Si ex panno rubro maculam detergere vis; lotio humano lavabis, post aquâ purâ communi. Si ex auro textis vestibus; lotio humano non recenti, sed per dies aliquot servato locum lavabis optimè, & panno melle uncto illines; post spatium verò unius horæ aquâ modicè calefactâ & sapone locum abluito. Si è panno aut bombice evellere cupis maculas; decoque metretas tres aquæ, cum cinere excubrato, & felle bovino, in ipsoque fervoris initio inijce unciam aluminis, & totidem tartari vivi albi, & hac lotionem elue macularum locum. Si vini macula panno lineo infederit (rubri videlicet vini) eam tepidâ aquâ & sapone lavato, aut omphaciâ; antè verò quàm linteum exsiccet, sulphuris fumo locum suffumiga.

Atramenti maculas in linteo elues, si melle puro maculam unges, & solis radijs paululùm exponas, post verò succo limonium abluas. Si ceram sericeis vestibus instillatam auferre vis, igni admoveo, & cultello sensim radito, post verò panno nigro amygdalarum amararum oleo tincto locum detergito. *Ex Secretis Kircherianis.*

## PROPOSITIO LIII.

*Tapetes emundare, ac renovare.*

*Tapetes renovare.*

AD tapetes emundandos sume aluminis libram dimidiam optimè pulverizatâ, & in libras sexdecim lotij merge, ac igni expone, ut modicè ferveat: deinde libræ tartari semissem accipe, eique salis pugillos duos immisce, simul contunde, papyro involve, igni prunisque superpone, donec formam unam recipiant: optimè combusta iterum contunde, & pulverem cum lotio prædicto misce, optimè agitando, ac deinde quiescere permittito,

mittito. Hoc liquore panno rubro madefacto tapetes absterge, cum parietibus pendent; post verò plicatos in arctum locum, inter tabulas scilicet, reponere naturalis diei spatium; tandem siccare permitte, & quod cupis, jam eris adeptus. Idem efficies album vinum inspergendo, & plicatos per aliquot dierum spatium relinquendo, & hoc iterum vini munus tribuendo. Ita: *Secreta manuscripta, quæ Roma apud P. Kircherum reperi.*

## PROPOSITIO LIV.

*Maculas omnis generis è rebus diversis eluere.*

**P**Lacet his subjungere modòs alios, quos *Alexius Pedemontanus* locis varijs suorum Secretorum, & *Veckerus* ex ipso lib. 2. cap. 3. proponit.

*Maculas omnis generis è diversis rebus eluere.*

*Globulos conficere ad eluendas maculas olei, & pinguedinis.* Accipe saponem nigrum seu mollem, & cineres vitium subtiliter cribratos, & melle optimè: adde deinde pulverem aluminis adusti, & tartari vivi, iterumque misce, & globulos confice. His maculas inunge, & eluentur. *Alexius lib. 2.*

*Ad omnis generis maculas eluendas è pannis quibuscunque.* Accipe salem communem optimè tritum, & saponem nigrum; misce inter se quàm optimè. Hac misturâ inunge maculas, & cum siccatæ fuerint, lava eas primùm lixivio, deinde aquâ tepidâ, & evanescunt maculæ. *Alexius ibid.*

*Ad maculas è pannis sericis, auro intertextis, laneis, lineis, alijsq; è rebus eluendas.* Ossa pedum anteriorum vervecis combure, & in pulverem redige, & serva. Deinde cum eluenda est macula, pannum extende, locum maculæ aquâ limpidâ paulùm madefac, ac pulverem prædictum insperge, & soli expone: ubi siccatu fuerit pannus, iterum aquâ humecta, & pulverem ut priùs insperge, ac soli expone ut exsiccetur. Eâdem operatione sæpius repetitâ, elue locum maculæ aquâ clarâ, ac pulverem omnem absterge, & evanescet macula. Idem eveniet, si maculæ locum

Hh

felle

felle bovino inficias, ac deinde aquâ eluas. *Alexius ibid. in fine libri.* Plura lege apud prædictos Auctores.

## PROPOSITIO LV.

*Maculas è vestibus, pannis, linteis aliter eluere.*

*Maculas è  
vestibus  
aliter elue-  
re.*

**S**Equentes praxes proponit *Ioannes Iacobus VVeckerus lib. 12. Secretor. cap. 3. ex libro quodam Germanico, & alijs.*

*Ad maculâs panni eluendas.* R. cineris fagi quantum satis; cum aqua frigida fiat lixivium, cui adde parum amurcæ vini, & parum luti ulsi ex clibano: misce, fiatque lixivium, quo panni maculati laventur.

*Ad maculato linteo candido colorem restituumdum.* R. aluminis fæcum unc. 4. pelliculas aquæ num. 2. ebuliant ad quartæ partis consumptionem; cui deinde adde smegmatis albi frustulatim secti, nec non aluminis, unc. 1. relinquuntur per duos dies, utere tandem.

*Ad vinum ex panno quovis tollendum.* R. lixivij ex cineribus fagi parati, & fæcum vini albi, ana q. s. (*hoc est, tantum ex uno, quantum ex altero, & utriusque simul quantum satis est.*) His immerge pannum, & per noctem relinque. Tandem ablue, & soli siccandum expone.

*Ad maculas astringenti è panno tollendas.* Pannum prius aceto acerrimo lava, exprimendo benè cum manibus, & fricando: deinde cum aqua & sapone.

## PROPOSITIO LVI.

*Rotam vitæ & mortis construere.*

*Rotam vi-  
tæ & mor-  
tis con-  
struere.  
Vide  
Iconismū  
XVIII.*

**P** *Athanasius Kircherus to. 2. Oedipi Ægyptiaci, Classe XL. cap. 9.* Rotam quandam depingit, & explicat, quam alij Rotam Vitæ & Mortis, alij Sphæram Biantis appellant. Rotam constructam exhibet appositum schema, Explicatio hæc est.

*Intra*





Intra duos extremos circulos, seu duas circulares fascias, spectatur Alphabetum onomatomaticum cum numeris, singulis litteris correspondentibus. Intra duos reliquos ac intimos circulos continentur characteres septem Planetarum cum numeris, singulis planetis appropriatis. Intimum circulare ac centrale spatium continet tres columnas perpendiculares, transversali diametro  $AB$  interstrictas, numerisque refertas: quorum ij, qui supra diametrum  $AB$  sunt, vocantur felices; reliqui qui infra  $AB$  diametrum sunt, infelices, & numeri mortis nuncupantur. Distinctionis gratiâ illi colore rubro, hi nigro scribi solent.

*Uſus Rotæ hæc eſt.* De vita aut morte, felici aut infelici eventu alicujus consultaturi, quærunt litteras nominis illius in extimo ac primo circulo; & numeros singulis litteris adscriptos colligunt in unam summam: huic addunt numerum mensis, diei, & horæ: summam totam dividunt per 30, & residuum quærunt in columnis perpendiculis Rotæ. Et si quidem residuum reperitur supra diametrum  $AB$  inter numeros rubros, vitam, aut prosperum successum promittunt; si infra diametrum reperiatur, mortem, aut infelicem denuntiant successum.

EXEMPLVM I. Volunt scire, utrum quis in regione longinqua vivus sit, an mortuus. Eruunt absentis nomen, & numerum nominis ex duobus ultimis circulis; huic addunt numerum mensis, & numerum diei: unum mensis, quibus discessit: totam summam dividunt per 30, & residuum quærunt in columnis Rotæ. Et si quidem supra diametrum  $AB$  reperitur, pronuntiant absentem vivere; si verò infra diametrum reperitur, dicunt esse mortuum. Aliqui etiam addunt ad summam numerum anni currentis.

EXEMPLVM II. Volunt scire utrum captivus sit à carcere liberandus. Accipiunt numerum nominis captivi, & anni, mensis, ac diei quo captus fuit: quibus collectis in unam summam, addunt numerum nominis civitatis & patriæ: summam totalem dividunt per 30. Residuum reperiunt supra diametrum  $AB$ , denotat liberationem, infra reperiunt, significat contrarium.



## ANNOTATIO.

**V**anissima est hac Rota, ejusque usus. Vanitatem ostendemus in Technica Curiosa.

## PROPOSITIO LVII.

*Rotam aliam divinationis vitæ & mortis  
construere.*

*Rota alia  
vitæ &  
mortis.*

*Vide  
Iconismū  
XIX.*


**C**itatus præcedenti Propositione P. Kircherus ait, Rotam ibi descriptam irrepsisse inter opera Venerabilis Bedæ to. 2. pag. 348. Ego planè aliam invenio inter dicti Auctoris Opera Tomo 2. circa finem, unà cum Epistola Petosyris ad Necephum Regem Ægypti de divinatione mortis & vitæ. Rotam exprimit appositum schema. Usus constat ex citata Epistola, quam subijcio.

De his quæ à me ad humana vitæ cautelam inventa sunt, unumquodque me tibi mittere non piguit. Superest ut tu in his per inspiratam tibi divinitus prudentiam operando, laborem impendas, certus quòd decumbentium, vel fugitivorum, vel monomachorum, vel aliorum similium eventibus non fallacem poteris capere præscientiam, si argumentum regulare, quod scriptura subjeci, diligenter inspexeris.

Consulturus igitur, sic facito. Sume nomen vel decumbentis, vel in fugam lapsi, vel depugnaturi, vel alterius cujuscunque, de quo inquiris, & collige numerum ejus. Deinde Lunam considera, quota fuerit eà die, qua vel ager decubuit, vel fugitivus elapsus est, & quota futura sit, cum monomachus pugnaturus est, & cetera hujusmodi: numerumque regularem, qui ei Luna adscriptus est, numero nominis adjunge. Tum summam quæ ex his conficitur, per 23 divide: & numerum, qui super fuerit, collige, inspectaque Figurâ, quæ in loco idem numerus sit positus, inquire.

Si cum inveneris in ζωὴ μακάριη. & de agro agitur, citò convalescet; si de fugitivo, citò revertetur; si de gladiatore, vincet. Si autem in μὴ ζωὴ: omnia hac difficiliùs evenient. Si autem in ζωὴ μίση: licet profferum, difficilem tamen exitum habitura sunt. Quòd si in eo loco





loco fuerit, in quo  $\Theta\alpha\nu\alpha\lambda$  &  $\mu\epsilon\gamma\alpha\lambda\lambda$  inscriptus est; ager post longam infirmitatem morietur, fugitivus diu quasitus non invenietur, gladiator tamen difficile superabitur. Eadem in  $\mu\epsilon\sigma\sigma\epsilon$   $\Theta\alpha\nu\alpha\lambda$  celeriora fient; & in  $\mu\epsilon\lambda\lambda\alpha$   $\Theta\alpha\nu\alpha\lambda$  celerrima.

Ponatur exempli gratiâ pugna Hectoris & Achillis. Luna erit decima septima, quæ habet numerum regularem DCCCXCIII. Achillei nomen habet M CCLXXVI; qui simul juncti faciunt MM. C. LXIX. Hos partiire per XXIX; & quod supersuerit, id est, triginta tria, quare in forma regulari, & invenies illud in eo loco, ubi scribitur  $\zeta\omega\eta$   $\mu\epsilon\gamma\alpha\lambda\lambda$ . Si idem de Hectore feceris, invenies residuum numerum in  $\mu\epsilon\lambda\lambda\alpha$   $\Theta\alpha\nu\alpha\lambda$ ; quæ positio numerorum, Victorem Achillem, & Hectorem victum significat absque ambiguitate. Est & alius modus. Si numerus Luna fuerit in  $\Theta\alpha\tau\epsilon\gamma\iota\omega$ , & numerus hominis in  $\pi\epsilon\tau\epsilon\gamma\epsilon\iota\omega$ , periculi tamen quidem homo, evadet tamen. E contrario, si hominis numerus in  $\Theta\alpha\tau\epsilon\gamma\iota\omega$ ; sub specie prosperorum adversa consingent. At verò si uterque numerus, hominis videlicet ac Luna, supra Horizontem fueris reperiatur, procul dubio prospera pollicentur: sed, si ambos infra Horizontem esse conspiceris, adversa omnia proveniens.

## ANNOTATIO.

**H**Actenus Epistola: cui apud Bedam subijcitur ordo naturalis dierum Luna ab 1, usque ad 29; & cuilibet diei adjiciuntur ad latus correspondentes certi numeri, qui debent servari ac dividi per 29; & hisce ad latus adjiciuntur residua, si dividantur per 29.

Est hac Rota aquæ vana ac præcedens, uti ostendemus in Technica Curiosa.

## PROPOSITIO LVIII.

Ut quis natandi ignarus, diu supra aquas sustentetur, sine periculo submersionis.

**I**N præcedenti Centuria, Propos. 92. docuimus modum supra aquas lacuum aut fluminum ambulandi; nunc modum damus ut quis, si natare nesciat, sustentare se tamen sine submersionis periculo queat.

*Natandi  
ignarus  
quomodo  
supra aquâ  
se sustentet.*

Fac utrem coriaceum qui aëre inflato extendi queat instar pilæ lusoriæ; & adfue cingulum quod totum corpus à dorso ad pectus circumdet. Infla deinde utrem prædictum, & cingulo te præcinge, ut pila inflata dorso superincumbat inter humeros; & aquis te committe. Extabit eaput cum pila extra aquas, nec submergèris.

## ANNOTATIO.

**H**Ac industria utuntur qui primùm natandi artem addiscere cupiunt. In Sicilia, qui in mari natare discunt, utuntur duabus cucurbitis exsiccatis, intus vacuis, & benè obturatis, quas alligant utrique brachio propè humeros.

## PROPOSITIO LIX.

*Quæ hora sit ubi vis terrarum, ex globo aut  
mappa geographica universali  
cognoscere.*

*Hora ubi  
quæ terra-  
rum eodem  
momento  
scire.*

**I**N globo, aut in mappa seu charta Geographica universali, quare locum, in quo operationem instituis. Omnia loca quæ sunt in eodem semimeridiano supero (hoc est, supr. horizon-tem tui loci existente) habent eandem horam, quam tu numeras in tuo loco: ut si in tuo loco est hora duodecima, in omnibus similiter est hora duodecima. Omnia verò loca quæ sunt in semimeridiano remoto à tuo versus Ortum 15 gradibus, numerant unam horam plùs; & quæ sunt in semimeridiano remoto 30 gradibus versus Ortum, numerant duas horas plùs; & quæ in semimeridiano 45 gradibus remoto sunt, tres horas plùs numerant, &c. verbo, quot quindenis gradibus aliquis semimeridianus à tuo distat versus Ortum, tot horas plùs numerant loca sub aut in illo existentia. Itaque si in tuo loco est hora 12, in alijs locis sub semi-meridiano 15 gradibus versus Ortum re-  
moto

moto erit hora 1; & in ijs quæ sunt sub semimeridiano 30 gradibus remoto, erit hora 2, &c.

E contrario omnia loca quæ sunt sub semimeridiano 15, 30, 45, &c. gradibus versus Occasum remoto, numerant unam, duas, tres, &c. horas minùs quàm tu in tuo loco: Ut si apud te est hora 1, apud illos est hora 12, 11, 10. &c.

*Ratio est, quia Sol singulâ horâ ascendit supra horizontem, & descendit infra, 15 gradibus in Æquatore numeratis. Hinc omnibus locis quæ sunt 15 gradibus orientalisora quàm tuus locus, oritur & occidit Sol unâ horâ citiùs quàm tu; & ijs quæ sunt 15 gradibus occidentalisora, tardiùs unâ horâ oritur & occidit.*

## ANNOTATIO I.

**L**oquor primò de horis aequalibus, in quarum 24 quilibet dies naturalis dividitur; non de inaequalibus, in quarum 12 quilibet dies artificialis, & qualibet nox artificialis olim ab antiquis, præsertim Iudeis dividebantur, unde & hora antiqua, ac Iudaica appellantur. Nec loquor de Chinesibus horis, quarum quælibet duabus aequalibus nostris æquatur. Loquor secundo tantùm de horis Astronomicis, inchoatis à Meridie, aut Media nocte; non verò de Italicis, quæ ab occasu Solis, nec de Babilonicis, quæ ab ortu Solis inchoantur.

Ex dictis in Propositione patet, quæ loca habeant citiùs aut tardiùs ortum & occasum Solis, ac Meridiem, quàm tuus locus, horâ dimidiâ, hora quadrante, &c. nempe quorum Meridianus distat à tuo gradibus  $7\frac{1}{2}$ , gradibus  $3\frac{1}{4}$ , seu gradibus 3. & 45 minutis, &c.

## ANNOTATIO II.

**S**i scis quæ sit quolibet in loco hora, seu diei, seu noctis, datâ horâ loci tui, scire potes quibus in locis Catholici Sacerdotes, aut Religiosi per totum orbem dispersi celebrent, cantent in choro, prandcant, meditentur divina, aliæque exercitia Religiosi status propriâ obcant.



## PROPOSITIO LX.

*Diverforum colorum ac saporum aquas ex ore  
depromere.*

*Aquas di-  
verforum  
colorum  
ac saporum  
ex ore de-  
promere.*

IN Mechanica Hydraulico- pneumatica par. 2. cap. 6. Machi-  
na 7. mentionem feci variorum Hydropotarum, qui instar  
agytarum ac circumforaneorum vagantes per orbem, quæstus  
causâ, ingentem aquæ copiam inspectante populo ebibunt, &  
paulò post epotam aquam exspuunt, spectatoribusque porri-  
gunt vinum, cerevisiam, acetum (in speciem) & omnis gene-  
ris aquas odoriferas; Cùm tamen revera nihil aliud eijciant ex  
ore, quàm illam ipsam aquam quam ebiberunt, in varios colo-  
res atque odores mutatam. Quæ autem id arte aliqui efficiant,  
ibidem explicavi.

Inter alios Hydropotas mentionem ibidem feci cujusdam  
Galli, nomine Joannis Royer, qui omnes alios, quotquot ante  
se fuerant, superare videbatur. Nam arte ab alijs prorsus di-  
versâ depromebat è stomacho, post epotam magnâ quantitate  
aquam, duodecim aut quatuordecim diverforum colorum  
aquas, quæ vina ac cerevisias repræsentabant: item aquas odo-  
riferas diversissimas, vinum adustum, aliosque liquores, lactucas,  
flores omnis generis, & similia. Fontem præterea salientem  
exhibebat, proijciendo aquam ex ore in altum per non medio-  
cre temporis spatium. Exhibuerat quoque Ratisbonæ in Co-  
mitijs Imperialibus, coram S. C. Majestate FERDINANDO III.  
fontem igneum.

Hæc, & plura alia loco citato de dicto Ioanne Royer, ejus-  
que artificio dixi; modum tamen quo id perficit, non manife-  
stavi, quoniam secreti fide obstrictus eram. Secreti enim fide  
petitâ, & datâ, rem P. Athanasio Kircherò & mihi Romæ, in  
Museo Kircheriano, manifestaverat, & artem privatim coram  
solis duobus nobis exercuerat. Causa cur secretum postularet,  
fuit, nè alij in cognitionem ejusdem artis venirent, ipseque quæ-  
stu quem inde colligebat, defraudaretur. At quoniam multi  
ab eo

ab eo tempore anni sunt elapsi, & probabile est eum vitâ excessisse: (non enim diuturnæ possunt esse vitæ qui ejusmodi artem exercent, ut ex dicendis patebit:) solum me reor secreti obligatione. Itaque in Curiosorum Naturæ & Artis scrutatorum gratiam cum bono Deo, rem totam hîc pandam; quæ ita se habet.

Coquebat in aqua fontana ac pura lignum brasilicum, sandalum citrinum (sandalum di citro vocabat ipse Italico idiomate) & lignum Campesi (ut vocabat.) Hæc omnia reddunt aquam ruberrimi coloris, vel potius instar sanguinis draconum subnigram, faciuntque aptissimam ad tingendos quosvis liquores quibus affunditur. Aqua autem cui ista sunt incocta, si poterit, præsertim in copia, provocat ad vomitum, solvit alvum, & tingit etiam urinam, si poterit à jejuno, & deinde cibus sumatur. Huic eidem aquæ si affundatur aqua communis limpida; tingitur hæc mox in ruberrimum & quasi subnigrum colorem, ipsimet aquæ coctæ similem, & refert vinum illud quod Lacrymas Neapolitanas appellant Itali: est enim hoc vinum quasi subnigri coloris, ut draconum sanguis. Si eidem aquæ coctæ, cui affusum est jam aliquid aquæ communis, plus affundatur; tingitur totum in colorem minus nigrum, & magis rubrum. Si adhuc plus affunditur; redditur totum clarius, & minus rubrum. Si adhuc plus; adhuc magis clarum, minusque rubrum redditur. Si copiosissima affundatur aqua; induit colorem cerevisiæ. Si addatur acetum, & succus limonum, & spiritus vini; aqua tincta acquirit laporem vini.

Dictam hanc aquam ruberrimam semper habebat paratam, & in lagenis circumferebat; aliquanto enim tempore conservatur. Eo die quo spectaculum exhibere volebat, comedeat aliquot horis antè quàm inchoaret, cibos facillè digestibiles, ut horâ constitutâ digestio esset facta. Tempore destinato deferrebat in theatrum vas aquâ frigidâ, aliudque aquâ calidâ plenum, multosque cyathos vitreos. Deinde regressus intèr, immediatè antè quàm spectaculum exhibendum erat, bibebat duos aut tres circiter scyphos mediocres prædictæ aquæ coctæ, in loco secreto, & clàm alijs. Tum procedebat in publicum,

temperabat aquam frigidam cum calida, ebibebat aliquot scyphos aquæ temperatæ communis, v. g. sex, septem, octo, &c. quæ aquæ rubræ in stomacho addita ac mista, statim tingeatur in colorem magis vel minùs rubrum, prout majori vel minori copiâ biberat aquam temperatam communem. Epotam aquam, & jam tinctam in stomacho, exspuebat in scyphum summâ facilitate, & referebat colorem vini desiderati. Si deinde volebat exspuere vinum alterius coloris, & minùs rubrum; ebibebat unum adhuc alterumvè scyphum aquæ temperatæ communis, eamque paulò pòst ut antea exspuebat, tinctam jam in stomacho. Hoc toties repetebat, bibendo novam aquam, iterumque in colorem alium tinctam exspuendo, donec duodecim aut quatuordecim diversorù colorum vina exspulset: quæ omnia in separatis scyphis asservabat. Omnes scyphos hisce coloratis diversimode aquis plenos evacuabat usque ad medietatem, & exspuendo denuò replebat omnes ordine dispositos, ita ut singuli eosdem quas antea colores exhiberent. Faciebat autem hoc, exspuendo non diversi, sed ejusdem coloris aquam, quia modica illa aqua tincta quæ in scyphis usque ad medietatem evacuatis remanserat, tam est efficax ad tingendum, ut aquam modicè tinctam superaffusam convertat in suum colorem.

Vt aquas odoriferas exspueret, ita procedebat. Frustulum spongiz madefaciebat in quinta essentia (ut vocant) rei odoratæ, cujus odorem volebat exhibere, illudque dextere spectantibus non advertentibus imponebat ori; & hausto uno aut altero scypho aquæ, antequam deglutiret, dentibus comprimebat, & aquam reddebat odoriferam in ipso ore; ac deinde tractam in stomachum, iterum paulò pòst exspuebat.

Aliquando etiam deglutiebat illud frustulum, maxime si alij volebant explorare num aliquid in ore absconditum foret; & tunc aqua in ipso stomacho reddebatur odorifera.

Flores, & lactucarum folia tenuissimo filo ligabat, & deglutiebat integra, ac deinde exspuebat in patinam, dextere solvebat

vebat filum, explicabat flores & folia, & porrigebat spectato-  
ribus.

Tandem ebibebat ingentem copiam aquæ tepidæ, & eja-  
culabatur illam in altum iuxta fontis, unâ cum floribus & folijs  
adhuc in stomacho delitescenibus.

Antequam autem flores & lactucas eijceret, discedebat  
è theatro, & in loco secreto herbasillas jam antea paratas deglu-  
tiebat integras, ac revertebatur.

Qua arte ignem evomuerit coram S. C. Majestate Ratis-  
bonæ, aperuit quidem nobis; at mente excidit. Addidit ta-  
men, se os egregiè ambussisse, ideoque ab illo tempore experi-  
mentum nunquam iterasse. Hæc sunt quæ circa hydropotæ  
artificium dicenda occurrerant.

## PROPOSITIO LXI.

*Luem Veneream curare remedio Tartaris  
usitato.*

QVAM difficilis simul & pretiosæ curationis sit Venerea lues, Antidoti  
Tardaro-  
rum contra  
luem Vene-  
ream.  
sciunt Medici. Certe Hieronymus Capivaccius lib. de Lue  
Venerea cap. 12. in fine (teste Henrico Salmuth par. 1. memo-  
rabil. tit. 1. pag. mihi 45.) gloriatur, se ultra octodecim millia  
Coronatorum è dicti morbi curatione lucratum. Multi multa  
præscribunt remedia: Tartari Præcenses, apud quos etiam  
locum invenit morbus ille, hoc simplicissimo, quod subijciam,  
utuntur.

Remedium communicavit, qui olim morbo illo, non  
vltio suo, sed contagione contracto laboraverat, & à  
Tartaro Medico curatus fuerat. Luber propalare, quo-  
niam nonnullis fortasse prodesse poterit, quibus sumptus  
non supererunt ad pretiosiora adhibenda. Ita autem se  
habet,

I. Ager in indusio proximus lecto assideat, gausape testus à vertice ad usque terram defluente.

II. Infra illud ponatur vivis cum carbonibus focus, cui contusum minutum, non tamen ad pulveres usque, cinnabari, quantitatem duorum aut trium granorum piperis non excedens, iniiciatur. Moveantur quandoque carbonēs, ut facilius totum cinabari in exhalationem abeat.

III. Nè dentibus noceat exhalatio, teneatur frustum panis aliquantum indurati intra dentes anteriores, pressis firmiter labris.

IV. Post sesqui horæ quadrantem sese ad lectum proximum, gausape semper testus, deponi curet; ibique accipiat haustum vini cremati ex aniso, aut ex frumento solo.

Hæc cura per dies duodecim circiter continetur. Quibus elapsis, non cinnabari, sed vas supponatur pedibus ægri modo suprâ dicto testis, aquâ calidâ plenum, eique lateres igniti ingerantur, cum folijs herbæ quæ Polonis Koziel, Latinis Caperdicitur, ut sudor provocetur. Quo tempore adhibetur herba, eodem inungatur æger humano adipe calido, semel indies; quod potissimum fieri potest vespere.

V. Potus ægri erit calidus, ita ut teporem superet; uti etiam hypocaustum, in quo curandus. Nihil autem præter cerevisiam bibat.

Huic morbo pellendo sufficit tempus duarum, aut ad summum trium septimanarum; ac proinde curationem ultra tres septimanas prolongari non est necesse.

VI. Intra & post tempus curationis ægro cerevisiâ contento, abstinendum erit duodecim vel amplius septimanis quàm diligenter à lacte, caseo, melle, cæpis, allio, uvis, nucibus, alijsque fructibus (non tamen prunis) aromatibus, carne porcinâ, & ovinâ, anseribus, anatibus, hordeo, cicere, brassicâ, pis, piscibus omnis generis præter Iquareas, qui hîc terrarum ægrè reperiuntur. Cibos salubres noverit esse pullos gallinarum, gallos, capones, carnem bubulam, & vitulinam, aliaque id genus.

*Notandum quoque est Primò, quæ dicta sunt de cibis vetitis, intelli-*

intelligenda etiam de ferculis ab illis derivatis, ut dum dico abstinendum esse à melle & aromatibus, intelligo esse quoque temperandum ægro à mulso, ferculis aromatibus conditis. In butyro tamen, licet à lacte defumatur, æger nullum habeat scrupulum.

*Notandum Secundò*, post tempus curationis non necessitari ægrum ad hypocaustum calidum, uti nec ad cerevisiam calidam; intra tempus tamen strictè necessitari.

*Notandum Tertiò*, ægro necessarium vini cremati ex aniso, vel ex solo frumento haultum, ad minimum uno bimestri, semel indies, aut bis, manè nimirum, & vesperi.

*Notandum Quartò*, ægro abstinendum à speculationibus ingeniosis ad minimum uno bimestri.

*Notandum Quintò*, nisi æger in præscriptis sit accuratus, & vel unicum non impleat præceptum; oleum & operam perdere. Non tamen desperet, sed iterum recrudescenti morbo eadem medelâ prudentiùs occurrat,

## ANNOTATIO.

**N** Edici dispiant, utrum aliqua ex præscriptis apud Tartaros servandis, commutari queant in alia in alijs extra Tartariam regionibus. Equidem credo, si Tartari vinâ haberent generosa, loco vini cremati adhibebunt.

## PROPOSITIO LXII.

*Dentium dolores facillimo remedio sanare.*

**A** Ccipe allij caput dimidium, aut minus, & tere in mortario, aut cultro supra lapidem. Adde croci pulverizati quantum satis est, (sufficit autem quantum capi potest supra cultri apicem) & melle. Confice inde emplastrum, & liga supra pulsum brachij partis affectæ. Intra viginti quatuor horarum spatium cessabit omnis dolor, nec redibit. Si pustulæ aut vesiculæ oriantur in brachio; acum cum filo transadige, & exprime, ac butyro inunge; sanabuntur.

*Antidoti  
contra den-  
tium dolo-  
rem.*



## ANNOTATIO I.

**D**idici hoc remedium ante annos aliquot à viro Religiosissimo, qui id sapius tum in se, tum in alijs expertus fuerat. Non ita pridem Collegarum meorum quispiam diro vexabatur dolore dentium: adhibuit idem remedium, & intra 24. horarum spatium dolor omnis abscessit, nec hactenus rediit.

## ANNOTATIO II.

**Q**uoniam multos frequenter vexat idem dolor, lubet alia nonnulla facillima remedia, ex alijs collecta, huc transcribere.

Cardanus lib. 8. de Variet. cap. 44. de se scribit, mirabili modo aliquando dentium dolorem sedatum.

Nuper, inquit, dolor acerbissimus duos ultimos maxilla sinistra superiores ejus partis dentes affligebat, & maxillam totam, adeo ut os excuti videretur: tum etiam oculum, & aurem, & nasi partem eandem vehementer urgebat, nec ullo auxilio ascedebat, sed intermittens quandoque revertebatur. Dexterâ manu dentes apprehendebam, distrahebam; nihil perficiebam. Tandem casu aliquo inveni, quod ubi sinistrâ manu leviter apprehendissem dentem qui magis vexabat, ita ut pollice partem exteriorem, indice interiorem comprehenderem, statim non solum dolor illius dentis, sed & totius partis sedabatur. Illud verâ mirabilis, quod quanto levius tangebam, tanto celerius ac perfectius dolor sedabatur. Fiebat autem hæc sedatio confestim. Et hoc cum rediret dolor, sæpius plusquam vicies sum expertus, donec sic sponte abscessit, & liberatus sum. Hæc Cardanus, dicens causam latere.

Idem Cardanus eodem libro & capite, ait dentium doloribus mederi, inter indicem & pollicem medicamentum imponere quod bullas excitet, quale cortex medius vitis alba, vel ligustri exterior, vel ranunculi (cujus radix rotunda est) ipsa radix quoque hyoschiami decocti canaliculo super dentem deductus; inde vs. aquâ impletur.

A viro quodam docto audiui, crui bufoni vino resectum, & ad Solem exsiccatum, si denti applicetur, dolorem statim pelleret propter  
Jug.

*singularem symphathiam, vel potiùs antipathiam. Hoc idem refert Weckerus lib 5. ex Cardano dicente (locum non citat) dentium dolori prodesse plerumque, si dentes coxarum ossibus bufonis tangantur: antipathiam enim esse.*

*Weckerus lo. cit. jubet accipi ligni guajaci M. l. aqua ardens q. s. misceri, & in ore teneri.*

## PROPOSITIO LXIII.

*Alio facillimo remedio dentium dolores  
sanare.*

**N**Ovi & qui præscripsit remedium quod sequitur, & qui eo cum fructu usus est, vivitque adhuc uterque dum hæc scribo.

Romæ vir magnæ auctoritatis, & senilis ætatis, acerbissimo dentium dolore vexabatur, nec ullum malo suo remedium, cum multa tentasset, inveniebat; unde dies & noctes insomnes ducere cogebatur. Hunc convenit officij gratiâ vir alius doctus, sed tabaci helluo, cujus folia continuo ferè masticabat, & pulverem per nares attrahebat, nunquam satur. Audiverat hic, mancipium viri Principis dominum suum liberasse aliquando à simili dolore, solâ tabaci applicatione. Suadet ergo ægroto, tabaci frustulum ut denti qui maximè dolebat, superponeret; sed rejicitur; abhorrebat enim Vir ille delicias hujusmodi sordidas. Instat nihilominus hic, tandemque persuadet; & extracto è pera tabacco Brasiliæ, in cylindrum convolutum, frustillum abripit, & dolenti denti imponit, ægro jam minùs ægè id ferente. Non diu post minui dolor incepit, itaque paulatim decrevit, ut evanuerit prorsus, nec ab illo tempore (quantum scio) redierit.

*Autidocil  
alind con-  
tra dentiū  
dolorum.*

*Autidocil  
alind con-  
tra dentiū  
dolorum.*

## PROPOSITIO LXIV.

*Adhuc alio facili remedio dentium dolori  
mederi.*

*Antid-  
otum adhuc  
aliud con-  
tra dentiū  
dolorem.*

**M**izaldus apud Weckerum loco proximè citato, provocans ad experientiam in se ipso factam, ait in *ιδουαλγία* seu dentium dolore, nullum præsentius remedium inveniri emplastro, facto ex pice vulgari, aut resina liquefacta, cum pulvere aluminis, & nucis quam gallam nuncupant, si arteriæ temporali paulò supra dentem excruciatum, calidum apponatur, & ibidem pernoctare sinatur, vel dies aliquot gestetur. Addit tamen, hoc remedium maximè locum habere in scarificatione dentium maxillarium, & superioris ordinis.

## PROPOSITIO LXV.

*Dentium stuporem abigere.*

*Dentium  
stuporem  
depellere.*

**D**entium stuporem, quem Græci *αιμωδία* vocant, portulaca manla dissolvit, teste Aphrodisæo, inquit *Wveckerus* lib. 5. Secretor. Idem asserit *Porta* lib. 8. Magiæ Natur. cap. 5. dicens, ad dentium *αιμωδία* tollendam expertum se esse portulacam prodeste.

Eundem stuporem tollit salis defricatio, vel quidpiam recentis casei ovilli dentibus stupefactis attritum.

## PROPOSITIO LXVI.

*Aër etiam intra aërem ponderari potest.*

§. 1. *Proponitur nostra sententia.*

**S**æpe jam alibi dixi (ut in Mechanica pneumatica par. 1. Protheoria 4. cap. 6. propos. 1. & in Magia par. 3. lib. 4. Syntag. 3. Pragmatia 10. aërem esse simpliciter gravem, & tantum secundum quid levem, nimirum respectu corporis gravioris infra se. Iisdem

lisdem locis asserui, explorari posse pondus aëris, & multis experimentis fuisse exploratum ab aliquibus. Nam *primò*, vesica aëre plena, aut uter plenus aëre, gravior est, quàm vesica & uter aëre vacuus, & flaccidus, ut deprehendit P. Joannes Baptista Ricciolus, Galilæus Galilæi, Joannes Chrylostomus Magnenus, & alij. *Secundò*, Æolopila aëre in suo statu naturali plena, plùs ponderat, quàm aëre per calefactionem rarefacto repleta, ut deprehendit Marinus Merseñnus. *Tertiò*, & luculentissimè id deprehensum fuit sæpissimè per Experimentum Magdeburgicum, quod describo & examino in fine Mechanicæ Hydro-pneumaticæ, iterumque in Magia par 2. citata, lib. 7. Syntagm. 1. cap. 6. nam recipiens seu vas vitreum aëre plenum, est ante exantlationem manifestissimè & notabilissimè gravius, quàm post exantlationem, quando vel solum exiguum ac vehementer rarefactum aërem continet, ut ego existimo; vel rarissimum æthera, ut putant alij. Omitto alia plurima Experimenta, locis citatis adducta; &

Dico, aërem rectè ponderari posse, si vas quodcunque aëre in suo naturali statu consistente plenum, expendatur primùm balance, staterâ, aliòvè quocunque ponderatorio instrumento, & pondus repertum notetur; deinde aëre extracto iterum ponderetur, & pondus notetur. Erit enim pondus secundo loco repertum, minus, quàm pondus primo loco repertum. Differentia igitur inter utrumque pondus, erit pondus aëris, qui antea in vase erat.

§ II. *Impugnatur à Clarissimo Deusingio sententia nostra de aëris ponderatione.*

**H**anc sententiam de aëris gravitate prædictis praxibus deprehensa, quæ stetit hucusque inconcussa, evertere conatur Vir Clarissimus D. Antonius Deusingius, Medicinæ ac Philosophiæ Doctor, illiusque in Academia Gröningæ & Omlandæ Professor primarius ac meritisimus, Celsissimique Principis Gubernatoris, ac Provinciæ, Archiatet, in *Disquisitione Physico-Mathematica Gemina de Vacuo*, hoc ipso anno 1661. in lucem edita, &

Nobilissimo Viro Domino Philippo Ernesto Vegelin de Claerbergen, Celsissimi Principis Guilielmi Friderici, Principis Nassovix, &c. Gubernatoris & Capitanei Generalis Frisix, Gröningæ, Ommelandix, Drentix, &c. Aulae Præfecto, ac Consiliario primario dedicata; qui eam vix editam pio suo singulari erga Litteras ac Litteratos affectu mihi transmittere est dignatus.

In Disquisitione ergo secunda, sect. 2. cùm cap. 1. 2. & 3. Clarissimus Denfingius Magdeburgense experimentum excitata Mechanica nostra proposuisset; ait cap. 4. in Epicrisi F. aëris pondus prædicto Experimento explorari non posse, etiamsi, ut ego asserueram, Recipiens post evacuatum aërem levior sit, quàm erat antequàm evacuaretur. Nec enim existimat Recipientem ideo leviozem deprehendi, quòd aëre evacuatus sit; nec aëre plenum ideo graviozem existere, quòd contentus in ipso aër pondus adaugeat; sed rationem ejus rei aliunde petendam esse putat. Causam suæ assertionis adsignat, quòd *aër in aëre non gravitet, nec levitet: nec propter aërem contentum gravior sit Recipiens triginta amphoras continens, quàm continens amphoram unam, dum in aëre pondus exploratur: quin imò (addit) facilius fortè feretur deorsum, veluti item facilius movebitur tum sursum, tum ad latera) vas continens unam duntaxat aëris amphoram, quàm continens plures. Pergit, & rationem adsignans cur Recipiens evacuatus minùs ponderet, quàm plenus, ait:*

*Ratio cur minùs ponderet Recipiens evacuatus, petenda est ab habitudine circumstantis aëris mutata: quò enim is compactior seu densior redditus est, eò minùs gravitas pondus idem, quàm antè, dum esset aër rarior seu minùs compactus: veluti navis onusta minùs altè mergitur in aqua marina, quàm in fluviali. Dum ergo circa Recipientem aëre evacuatum, aër ambiens densior compactiorque existit (secundùm antè demonstrata) idem Recipientis pondus, lanci impostum, aërem densiorem sibi circumstantem minùs deprimit, quàm antè exanilationem deprimeret rariorem: at interim lanx altera ad bilancem opposita in aëre versatur non aquè compacto atque is est qui*

qui proximè Recipientem circumstat; quare validius aequali pondere deprimitur. Non autem duntaxat deorsum difficilius movetur Recipiens aëre evacuatus, ut ita levior videatur; sed etiam revera difficilius sursum potest moveri, propter eandem rationem, nempe ob aërem compactionem, unde & idem Recipiens post aërem evacuatum gravior factus posset videri. Sic & difficilius movetur ad latera, propter causam eandem.

Aërem autem qui circumstat Recipientem evacuatam, mutatum esse, ac densiorem factum, magisque compressum, inde probat, quòd dum è Recipiente per antliam pneumaticam extrahitur aër, in ejus locum per vitri poros subingrediuntur partes ætheris quæ circumstanti aëri erant admixtæ; æthere autem recedente, aëris partes coeunt, & constipantur, atque adeo aër condensatur, efficitque ut eadem Recipiens gravitas eum jam difficilius ac minùs deprimat, quàm antea. Clarissimi Viri verba Epicurisi hæc sunt: *Condensatur autem imprimis aër, ubi proximè, coarctatione factâ, vim patitur, reliquo quantum fieri potest statum suum naturalem servante; sicque aër qui unaquaque vitro viciniissimus existit, præ reliquo distantiore per corporis intra vitrum contenti exantlationem, atque ætheris in spatium illius ingressum, quàm maximè condensatur. Dumque vitrum exantlatum de loco in locum transfertur, is qui derelicto spatio vicinus est aër, in naturalem statum per expansionis nisum se denuò vindicat (veluti nave provelctâ assurgunt illicò aqua partes paulò antè pondere navis pressa) æthere aliunde, quò nempe vitrum transfertur, inter ejus particulas vicissim subeunt; sicque perpetuò circa vitrum ipsum quòcumque translatus condensatio corporis proximè assumptis major contingit, remotiore interim à violenta compactione, per insitum quasi elaterem seipsum vindi-*  
*cante.*



§. III. *Impugnatur sententia Clarissimi Deusingij,  
& nostra stabilitur.*

**I**N hoc discursu duo præcipuè agit Vir Clarissimus, ut sententiam nostram de aëris ponderatione oppugnet. *Primò*, negat Recipientem aëre plenum esse graviolem, quàm eundem aëre evacuatum, eò quòd aër intra aërem non gravitat. Quia tamen experientia constat, si tam plenus, quàm evacuatus Recipiens expendantur ad balancem, illum magis deprimere suam lancem, ac descendere in aëre, quàm hunc; ait *Secundò*, id evenire, quòd in secundo calu densior sit aër circumstans, quàm antea erat. Utrumque examino, &

Dico I. Etiam aër intra aërem gravitat, si vasi includatur, & à reliquo aëre circumstante discontinuetur; dummodò aër inclusus, & aër in quo ponderatio fit, sint ejusdem densitatis, aut raritatis. Probo à pari. Tametsi aqua intra aquam non gravitet, nec partes superiores premant inferiores sibi subjectas, ut benè probat *Stevinus* lib. 4. Staticæ Proposit. I. & nos fuse stabilivimus in *Magia* par. 3. lib. 5. Syntag 3. Erom 3. tamen si vasi includatur pars aquæ, gravitat intra ipsam. Ergo & aër tametsi intra aërem non gravitet, tamen si pars aëris includatur vasi, gravitat intra aërem. Consequentia clara est, quia eodem modo de utroque elemento discurrendum est, ipso etiam *Deusingio* fatente. Antecedens ergo probatur. Dolum aquâ plenum, & aquæ impositum, magis mergitur, quàm dolum aëre plenum, ut quotidiana experientia docet; ergò dolum cum aqua gravius est, quàm dolum cum aëre, ergo non solum dolum gravat, sed etiam aqua quæ in dolo est. Item si vas cretaceum aut cupreum subtus in fundo perforatum, suprâ verò apertum, imponatur aquæ ita erectum, ut fundus perforatus aquæ superficiei contingat, demergitur vas aliquantulum; deinde ingredienti paulatim aquâ, magis ac magis demergitur; tandem cùm plenum est aquâ, penitus submergitur & insidit: hoc autem non fit, nisi quia ponderi vasis accedit pondus aquæ; ergo aqua

intra

intra aquam gravitat. Omitto alias probationes, quoniam hæc sufficere existimo; & concludo, etiam aërem vasi inclusum gravitare unâ cum vase in aëre; quod probare volebam. Corrupte ergo fundamentum contrariæ sententiæ.

Dico II. Quod Recipiens aëre plenus, & bilanci impositus, magis descendat in aëre, quàm idem Recipiens aëre evacuatus, siue ex toto (si fieri potest) siue ex parte; non evenit, inde, quòd in primo casu aër circumstantis sit rarior, in secundo verò densior. Probatur I. quia revera Recipiens aëre plenus, est gravior, quàm non plenus, ut jam probavi. II. quia gratis adstruitur illa densitas aëris circa Recipientem, cùm nec antea adfuerint, nec postea absint ætheris particulae, quarum absentia densitatem illam inducat, ut alibi probabo. III. Dato etiam quòd aër ubique interperfas habeat ætheris particulas, & quòd in casu nostro illæ, quæ aëri Recipientem circumstanti immixtæ erant, per vitri poros fuerint ingressæ, atque ob id circumstantis aëris partes fuerint constipatæ, & condensatæ, ideoque Recipientem prohibeant descendere quantum antea descendebat; tamen aër ille qui semel Recipientem circumstat, non semper eum circumstat, sed continuò fluctuat ac recedit, accedente alio atque alio, quàm diu aër in conclavi eodem, in quo Experimentum capitur, ventilatur ab intrantibus, egredientibus, huc illuc commeanantibus. Ergo etiam si in principio, antequam constipatus aër depellitur, non descendat ut antea, tamen abscedente illo descendere debet, & redeunte ascendere, & quidem satis sensibilibiter, quantum scilicet 31 lotones bilancem deprimere possunt. Nunquam autem notatum fuit, Recipientem evacuatum aliquando descendisse, & aliquando non.

§. IV. *Occurritur evasioni contra nos  
sentientium.*

Dicit quispiam, recedente aëre condensato, & adventente novo aëre rariore, hunc statim condensari circa Recipientem, quia ille qui recessit, nititur se reducere ad statum suum naturalem, & ideo partes ætheris quæ sunt in aëre novo adventente,

ente, sequuntur aërem condensatum qui recessit, sicque novus Recipientem circumstans condensatur. Sed quis hoc credit? Aër condensatus, & in statu violento constitutus, dum Recipientem circumstabat, non minùs nitebatur se reducere ad suum nativum statum, quàm dum depulsus est: cur ergo partes ætheris in aëre vicino antea non confluebant ad ipsum, & nunc confluunt?

Pergo, & quæro, si Recipiens evacuatus transfertur de loco in locum, hoc est, recedit ab aëre condensato ad aërem non condensatum, gravitatnè, hoc est, descenditnè magis in aëre novo, quàm antea? Respondet Vir clarissimus, non descendere, quia (ut §. præced. vidimus ex ipso) aër circumstans à Recipiente relictus, vindicat se in naturalem statum per expansionis nîsum, æthere aliunde adveniente, nempe à loco in quem Recipiens translatus fuit. Sed quæro ut antea, cur aër ille condensatus qui Recipientem circumstabat, antea non vindicavit se ad naturalem statum per expansionis nîsum. æthere ab eodem loco, aut aliunde adveniente? Erat enim aër in statu violento, & aderat expansionis nîsus, & æther in vicino aëre, poteratque æther ad condensatum aërem commeare. Quare ergo antea non commeabat eò, & nunc post translationem Recipientis commeat?

Mibi profectò longè probabilius videtur, aërem Recipienti inclusum, gravitare in aëre, propter rationes à me §. 3. allatas, quàm aërem qui Recipientem circumstat, etiam translato Recipiente de loco in locum, esse condensatum, & ideo Recipientem non degravare tantum, quantum antea aëre plenus degravabat.

## PROPOSITIO LXVII.

*Pisces ut ad aqua superficiem ascendant, & manibus capiantur.*

*Pisces ut ad aqua superficiem ascendant.*

**M**ulti multa præscribunt. Siculos vidi hac simplicissimâ uti arte. Taxifasciculum injciunt intra aquam piscium fraccem,

cem, & non diu pòst pisces omnes qui aquam illam degustarunt, ascendunt ad aquæ superficiem, velut stupidi, aut ebrii, ut manibus capi queant.

## ANNOTATIO I.

**S**ed cavendum nè major quàm par est, taxi copia injiciatur, nè pisces non solùm obstupefiant, sed intoxicentur, & comedentibus lethum adferant, ut illis contigit quos in *Physica Curiosa* lib. 3. cap. 28. retuli. Sicili habitabam, urbe quatuor passuum millibus à mari, quod Siciliam & Melitam Insulam interfluit, distante. In hoc mare fluviolus exiguus qui Collegij nostri pradia interluit, & ad ejusdem Collegij Patres spectat, sese exonerat, ideoque pisces è vicino mari, aquarum dulcedine illecti, agminatim quovis tempore eò confluunt. Die quodam viri tres primarij urbis, quos novi, unà cum famulo piscandi gratià, nobis ignorantibus, eò se conferunt: injectæque in aquam majori copià taxi, aquam & pisces per imprudentiam intoxicans, & captos, varijsque modis in suburbano pradio preparados absument. Sed mox domum reversi, & ardentissimâ febre correpti, ad unum omnes intra triduum, excepto famulo (qui mirabiliter evasit, ut citato loco narravi) è vita excedunt.

## ANNOTATIO II.

**T**axus, Græcis σμίλαξ, Italiâ Tasso, Germaniâ Erb-ebaum dicta, arbor est abietis similis, baccaque ferens quibus lethale venenum inest. Vide Plinium lib. 16. *Histor. Natur.* cap. 10. Sunt qui putent, venena ob id olim taxica dicta, quæ nunc toxica vocamus.

## PROPOSITIO LXVIII.

*Alijs modis pisces allicere, & capere.**Pisces allicere, & capere.*

**L**ibet & alios nonnullos modos, è Cardano & alijs descriptos, apponere.

*Cardanus lib. 14.* Subtilit. In fine, In hunc sensum scribit. Pisces quoque cibo capiuntur. Cibus igitur quatuor debet habere conditiones. *Primò*, sit odoratus, ut procul alliciat eos. Talia sunt anisum, panacis succus, & omnibus melius cyminum. *Secundò*, sit jucundi saporis, ut edentes invitet, & fallat. Talia sunt sanguis, præsertim suillus; caseus, præcipuè caprinus; panis, maximè triticeus; papiliones, melioresque inter eos fulvi. *Tertiò* sit caput feriens, ut celeriter vim veneni ad illud ferat. Talia sunt aqua ardens, seu vinum adustum, & sæx vini. *Quartò*, sit veneficus, qui attonitos reddat. Talis est flos naltæ, quam calendulam vocant, quòd singulo mense floreat: nam herba hæc, cujus lutei sunt flores, in frustra concisa prægrandes etiam horæ spatio reddit attonitos. Est præterea calx, quæ & si aquam corrigat, occidit tamen pisces. Est tithymali cujuscunque succus. Est utraque nux, vomica, & quæ methel seu somnifera dicitur. Sed nihil præstantius eo fructu, qui ex Oriente vehitur, & cogolum vocant, estque nigra bacca, persimilis laurinæ, sed minor ac rotundior.

Idem *Cardanus ibidem*: *Compositio nostra*, inquit, *ad pisces capiendos experta*, Baccarum Orientalium quadrans uncia, cymini & aqua ardentis singulorum sextans, casei uncia, farina uncia tres, digerantur confusa in pastillos. Eandem compositionem præscribit *Mizaldus* apud *VVeckerum lib. 7. Secretor. cap. 1.* dicens: Si ex ooculis ab Oriente allatis, cum cymino, caseo vetustissimo, farina tritici, & vino, in spissamentum coactis, formantur spherulae magnitudinis pisi, & piscosis amnibus quietâ aquâ injiciantur; quotquot pisces degustabunt ex illis, illico stupefacti, & velut inebriati, ad ripas dissilient, & ita manibus capi facile poterunt. *Experientiâ multisies probatum est.* Præscribit & *Porta lib. 15. Magiæ Natur. cap. 10.* eundem hunc

hunc modum, sed paulò accuratiùs; aitque eo pisces citiùs, quàm alijs modis, in mari enecari: *Sed hoc modo;* inquit, citiùs enecabimus in mari. Gallarum orientalium quarta uncia pars, cæci uncia, farina fabacea uncia tres: misceantur hæc omnia aqua vitæ: ex ea missura fiant globuli ut ciceres. Manè antequam aurora illucescat, in mare projiciantur, mox tribus horis elapsis redi ad locum: nam omnes qui escam acceperint, aut mortuos, aut ebr os reperies, vel in sublimi, vel in mari resplendere; quos hamato conto accipies. Aqua vita additur, quia celeriter ad caput fertur: Galla orientales veneficum, eos stupidos reddens: fabacea farina illex esca suo sapore invitat: casum odore longè congregat.

## PROPOSITIO LXIX.

*Nè quis ex largo vini potu inebrietur,  
efficere.*

**L**arga vini compositio, & bibendi certamina, quæ apud antiquos in usu erant, necdum abolita sunt. Minus tamen nunc apud Germanos nostros, quàm ante hæc in usu esse audio. Hoc constat, è multis Principum Germanorum aulis exulare penitus ebrietatem. Si qua tamen occasione largiùs cuiquam in convivio, aut extemporali compositione aliqua bibendum foret, his se remedijs contra ebrietatem munire poterit, quæ collegit ex varijs *Porta, Cardanus, Veckerus, & alij.*

*Cato* apud *Portam* jubet convivij initio, ac fine, crudæ brassicæ quatuor vel quinque cymas comedere; dicens hoc & crapulam sedare, & vini noxam restinguere, & quasi nihil comedere ac biberis, efficere. Addit, Ægyptios ante omnem cibum brassicam elixam comedisse, itaque se ad compositiones præparasse. Sybaritæ quoque, quorum mensæ & convivia in proverbium abierunt, antequàm potitarent, brassicarum esu se muniebant, teste *Timæo* apud *Portam* lib. 14. *Magiæ Naturæ*, cap. 12. Idem remedium præscribunt alij multi.

*Africanus* apud eundem *Portam* jubet convivio & compositio præmittere tres vel quatuor amygdalas amaras, quæ



niam exsiccant, & humiditates absumunt, & vinolentiam propulsant. Narrat *Plutarchus*, Medicum fuisse apud *Drusum*, qui cum prius quinas tenasvè amygdalas esitaret, in bibendi certamine semper victor evaserit.

Eundem exsiccationis, & ab ebrietate præservationis effectum ait *Porta* ex *Theophrasto* præstare pumicis farinam, si eam potator initio præsumat. Sic Eudemum in vigesimas secundas vices durasse, demum balneum Ingressum nihil rejecisse, ac ita cænasse, ut si non bibisset. Hinc ajunt si ejusmodi farina, aliavè exsiccativa, in cadum multi bullientem injiciantur, statim vini fervorem sedari.

Prisci ad pellendam ebrietatem apponebant in fine mensarum lactucas, quoniam insitam frigiditatem maximam habent. Hunc morem adhuc vigere audio in convivij Germanorum.

*Porta* lo. cit. ait, porrum discutere ebrietatem. Et crocum qui præsumperit, non sentire ebrietatem. Et violas, rosas, ac hederam, si in corollas concinnentur, & capitibus imponantur, sedare ebrietatem.

Hirundinis quoque rostri cinis, cum myrrha tritus, & vino quod bibitur, Insperlus, securos præstat temulentos, teste eodem *Porta* ex *Plinio*.

*Cardanus* lib. 8. varietat. cap. 44. ait, ebrietati resistere absinthium, amygdalas, & caules præmansos.

## PROPOSITIO LXX.

### *Alia contra ebrietatum antidota.*

*Ebrietas  
viranda  
alia reme-  
dia.*

**A**lexius *Pedemontanus* par. 1. lib. 1. Secretor. circa finem, Italico idiomate, aliud contra ebrietatem antidotum proponit his verbis: *Primieramente avanti che uno mangi, cio è quando si hà da mettere à tavola, per un quarto d' hora inanzi mangiare pigli due ò tre mandole d' ossa di persiche, ò altre mandole amare comuni. Poi beva un mezzo bicchiero, ò meno, d' oglio d' oliva, ò ancora di mandole dolci. Et pos mangi quanto vuole, e beva à suo piacere,*

piacere: che non si potrà imbracciare. Et se poi che hà mangiato, si sentisse molto gravato della testa, e di stomaco: beva un poco di succo di cavoli, ò verze, con un poco di zucchero, se ve lo vuol mettere; e starà benissimo, come se non havesse bevuto nulla. Che è secreto per il quale molti si han conservato l'honore, e la sanità.

Aliud adhuc antidotum refert ex eodem Alexio (quod tamen in meo Italico exemplari non invenio) Weckerus his verbis: Recipe succi caulium alborum, succi granatorum acrium, singul. unc. 2. aceti unc. 1. Bulliant simul aliquamdiu, & fiat Syrupus, de quo sumatur uncia una antequam bibatur.

Omitto multa alia quæ citatus Wecherus habet. Omitto & quæ in Germanicis quibusdam Libellis circumferuntur; sunt enim vitiosæ ex prædicto, alijsque Auctoribus excerpta.

## PROPOSITIO LXXI.

*Ope fasciculi chartarum lusoriarum occultè scribere.*

- I. FASCICULI chartarum lusoriarum folia disporie certo ordine, qui tibi & amico absenti notus sit, ita ut ambo sciatis quod primo, quod secundo, tertio, &c. loco collocandum sit folium. Cryptographicum artificium.
- II. Collocatas chartas, & in fasciculum iterum collectas, mensæ tam diu allide (ut à lusoribus fieri solet) donec omnia folia invicem undiquaque adæquentur.
- III. In circuitu fasciculi scribe atramento aut rubricâ secretum quod alteri communicare vis; iterumque misce inter se folia, ut alio ordine à priori diverso collocentur, iterumque in fasciculum collige, & amico absenti trans mitte. Hoc facto, cum omnia folia sint inter se diverso ordine permista, necesse est ut etiam verba omnia quæ per circuitum scripta erant, variè dissipentur, adeo ut à nullo mortali legi queant.
- IV. Si amicus absens accepto fasciculo folia omnia collocet denuo eo ordine, quo ab alio collocata fuerant, antequam in circuitu scriberet; redintegrabuntur omnia vocabula antea scripta, ut perfectè legi queant. Ita GUSTAVUS Selenius in sua Cryptographia.

## PROPOSITIO LXXII.

*Ocrea nè aquam transmittant.*

**H**alinitrum ceræ liquefactæ mixtum, prohibet nè omnino ocreæ transmittant aquam, si ad ignem eâ mixturâ diligenter imbuantur. Oportet autem halinitrum esse tenuissimè contritum. Si ceræ pingue quidpiam admiscueris, adhuc melius erit. *Ex Secretis Kircherianis manuscriptis.*

## PROPOSITIO LXXIII.

*Lectum pneumaticum conficere.*

*Lectum  
pneumaticum.*

**E**X corio consue cervicalia, & culcitræ eâ industriâ, ut inspiratum ventum seu aërem contineant. Hæc aëre syringe pneumaticâ inspirato imple, spiracula diligenter claudere, linteaminibus operi. Habebis lectum stratum, mollem æquè, ac pro æstivo tempore frigidiusculum. Iter facturus exprime aërem inflatum, & saccos vacuos faciliè vehes, ac pro data oportunitate iterum inflabis.

## ANNOTATIO.

**S**unt hujusmodi lecti apud multos in usu, præsertim in regionibus calidioribus. In navibus majoribus utuntur lectis pensilibus è crassiore tela. Alicubi in America funibus alligant retia quatuor suis extremitatibus ad totidem arbores, aut stipites, ut à venatorum animalium morsibus sese defendant.

## PROPOSITIO LXXIV.

*Depictas imagines renovare.*

*Picturæ  
renovare.*

**M**isce cum ovi unius albumine vinum album, & panno laneo unge depictam tabulam, aut telam; eritq; imago illustrior quàm antea. *Ex Secretis Kircherianis manuscriptis.*

PRO-

## PROPOSITIO LXXV.

*Aliter picturas illustrare.*

**A** Lexius Pedemontanus hanc aliam præscripsit rationem. Recipe resinæ crassæ & albæ libram unam, gummi uncias duas, terebinthinæ Venetæ unciam unam, olei lini uncias duas. Resina primò ad ignem lique scat, & coletur; gummi in oleo communi sinatur, donec mollescat: quod cùm fuerit percolatum, misceantur omnia simul, & coquantur igne lento, miscendo continuè, quousque ritè omnia fuerint permista; & serventur ad usum. Hac misturâ si pictura aliqua munda fuerit illita, splendida ac pulcherrima evadet.

*Picturas  
illustrare.*

## PROPOSITIO LXXVI.

*Adhuc aliter picturas renovare, ac illustrare.*

**R** Ecipe olibani masculi, & gummi juniperi, singulorum quantum satis. Misce, & fiat pulvis: cui addatur terebinthinæ Venetæ quantum satis esse videtur, & misceantur omnia bene ad ignem; deinde colentur, ac servantur. Cùm uti volueris hac misturâ, priùs calefiat, deinde pictura leviter illinatur; evadet nitida, & citò siccabitur. *VVeckerus lib. 16. Secretorum, ubi plurima alia ad picturam spectantia.*

*Picturas  
aliter reno-  
vare. &  
illustrare.*

## PROPOSITIO LXXVII.

*Arma nè rubigine obducantur.*

**A** Ccipe ramenta plumbi, & pone ea in oleo per dies novem ad Solem & aërem, & hac misturâ inunge arma, eruntque à rubige immunia. *Ex Secretis Kircherianis manuscriptis.*

*Rubiginem  
à ferro pro-  
hibere.*

## PROPOSITIO LXXVIII.

*Rubiginem ferro eximere.**Rubiginem  
ferro exi-  
mere,*

**F**erro rubiginem è vestigio adimit, illique splendorem conciliat, oleum tartari. *Alexius Pedemontanus.*

## ANNOTATIO.

**I**dem oleum tartari lentigines emaculat in facie: omnesque postulas fædas, quæ frontem mentumque deformant, abolet vi absterforiâ. Idem Alexius.

## PROPOSITIO LXXIX.

*Parietes incrustatos eximiè dealbare, ac splendidos reddere.**Parietes de-  
albare,*

**S**i parietes cupis novo & admirando modo dealbare, chartam pergamenam albam in minutissima frustula dissecato, in aqua per dies duos macerato, ad ignem coquito, donec fiat gluten. Hoc parietem perline spongiâ, & cum exsiccatus fuerit, lævi quodam saxo levigato.

## ANNOTATIO.

**N**ovi in Sicilia virum Religiosum, qui statuas è communi & arena-  
ceo lapide gypso obducebat, ac deinde reddebat splendidas, ut mar-  
moreæ apparent. Secretum nemini communicare volebat. Fortassis  
ab hoc diversum non erat. Similibus secretis nonnulli magnas acqui-  
runt opes. Novi ibidem virum alium secularẽ qui statuas omnis  
generis, & formæ, & magnitudinis è gypso conficiebat, ac ita nescio quo  
artificio levigabat, ut similiter marmoreæ apparent,  
magno suo lucro.

PRO-

## PROPOSITIO LXXX.

*Moribundi, ac sensu auditus destituti,  
ut audiant.*

**V**trum novi Religiosissimum, ac magnum Dei gloriæ, salutis-  
que animarum zelatorem. Hic cum moribundis (quos *Moribundi  
auditu de-  
stituti ut  
audiant.*  
frequens adibat) adlisteret, notaretque auditu jam destitutos,  
nullam ut per aures vocem amplius admitterent, os eorum ver-  
tici admovebat, verbaque quæ audiri ab ægris cupiebat, non  
contentiore quàm antea voce enuntiabat. Percipiebantur ea,  
distincte ab ægris omnia, ut ex nutu & signis alijs colligebatur.

Causam hujus rei subministrat auditivæ potentia: œcono-  
mia, quam diligenter proposuimus in *Magia par.* 2. lib. 1. Syn-  
tagm. 1. In moribundis enim auris internæ meatus ac ductus,  
quibus sonus externus per tympanum ad ærem usque implan-  
tatum deferri deberet, morbo vitiatum sunt, atque obstructi, ideo-  
que sono transitum non concedunt. Concedit tamen capitis  
cutis porosa, & cranium itidem porosum: unde is ad ærem im-  
plantatum, & acustici nervi extremum deferretur, & ab anima  
vitaliter percipitur.

## PROPOSITIO LXXXI.

*Telum sine vinculis pendens in aëre.*

**C**ardanus lib. 12. Variet. cap. 58 ait, litteris mandatum se in-  
venire, in *Diana Ephesia templo Cupidinis telum nullis retentum  
laqueis pendisse.* Addit modum quo id factum fuisse putet,  
& quo ab alijs etiam effici queat, dicens: *Quod si cui ingenium  
amulari libuerit, facile id assequetur. Leni ferro arundinem pro  
hasta adycito, lapidemque Herculeum cubiti magnitudine excavatum  
eximia bonitatis inserito testudini templi: appositumque spiculum per  
plura sacula sponte pendere videbitur, neque id magno miraculo.*  
Hæc Cardanus. Quæ tamen Scaliger, Cardani exagitator,  
sine censura non sineret abire. Si enim eximie bonitatis esse  
opor-

*Telum sine  
vinculis  
pendens in  
aëre.*



oporteat magnetem, cur cubiti magnitudinem habeat? Non molis magnitudo, sed virium attractivarum præstantia magnetem commendat. Præterea cur excavatum esse oportet magnetem? Hoc tamen fortasse non fuerit ablonum. Excavatam requirit, ut testudinis seu fornicis templi, quem excavatum supponit, cavæ formæ cogruat, nè artificium notetur, si protuberet.

## ANNOTATIO.

*Statua an  
ope magneti  
in aëre  
possi suspen  
dendi.*

**I**N *Magia par. 4. lib. 3. Syntagm. 6. cap. 4. Pragmat. 2. varias retulimus historias ex Plinio, Ruffino, Beda, & alijs, de statuis & simulacris in aëre pendulis ope magnetis, quas tamen, aliasque omnes quæ circumferuntur, falsas esse putat P. Kircherus, omninoque impossibile existimat, statuas dictâ arte suspendi posse in aëre. Ego citato loco existimavi, & etiamnum existimo, levem aliquam statuam ferro vestitam, in aëre suspendi à magnete de super imminente, non esse quidem impossibile, quoniam vis magnetis sursum trahens ac tenens ferrum, potest esse tanta, quanta est vis gravitatis statua deorsum trahens idem ferrum: esse tamen difficillimum, quia virtutis illius utriusque contemperatio consistit ferè in indivisibili, & minimâ aëris agitatione, aut etiam alteratione, dissolvitur. Idem iudicium esto de telo in aëre suspendendo.*

## PROPOSITIO LXXXII.

### *Secretum Cryptographicum.*

*Cryptographi  
cūm seu  
telum.*

**I**N *Cryptographia nostra, quæ habetur lib. 1. patris 4. Magiæ, quamplurimas præscripsimus Cryptographicas praxes. Labet his adungere sequentem ex Cardano lib. 12. variet. cap. 61. dicente amicum quendam suum eâ usum. Sic autem instituitur.*

*Diluitur tantum atramenti scriptori in aqua, ut vix scriptâ epistolâ vestigium nigredinis appareat. Qua siccata, super eadem verba, isdemque literis alia, ex carbone salicis & aqua pluvia spissata, scribitur, quæ verum atramentum refert. Vbi siccata fuerit, transmissaque, libeatque legere; galla aqua incoquitur, inpositâque spongiâ, se  
expres*

*expressâ mediocriter, detergitur epistola nuper conscripta. quod carbo nec lacrymâ, nec gallâ adhareat, reliqua prior emergit, cum galla colore & tenacitate affigatur charta, & obumbretur.*

## PROPOSITIO LXXXIII.

*Oculus hominis, & aliorum animalium,  
reparari potest.*

**P**ater hoc ex nuperrimo experimento Pragæ facto, quod inde scripsit Excellentissimus Dominus Doctor Marcus Marci Viennam Austriæ, ad Reverendissimum Dominum Aloysium Kinnerum, & hic Viennâ Suerinum in Ducatu Megapolitano, ad Clarissimum atque Doctissimum Virum Dn. Joannem Chrysoftomum Egenfeldt, Serenissimi Ducis Megapolitani Consiliarium; qui id ipsum nuper admodum, nempe ad 4. Idus Januarij præsentis anni 1662. inde ad me, inter alia, scripsit in hæc verba.

*Oculus destructus reparari potest.*

*Sed ad alia scribenda me convertito. Litteris proximè ad me datis Dn. Kinner de Löwventhurn ad me perscribit; quod ut Rever. Vestra nuntiem, operæ pretium est. Contigit hoc Praga apud Dominum Doctorem Marcum Marci, Virum à doctrina celebrem. Rev. Vestra procul dubio notum. Adpono ejusdem verba quibus ad Kinnerum usus. Ante dies octo in viis me quadam persona nobilis ex terris peregrinis Angliam repetens, honoris gratiâ: atque inter ceteros discursus incidit mentio de oculis restituendis. Affirmabat verò, oculum erutum posse restitui; & si vellem, mox demonstraturum in quovis animali. Iussi adferri anserem, qui occidi debuit. Ille verò lancetâ oculum discepsit, ut humor aqueus totus efflueret: mox humorem crystallinum, unâ cum vitreo digitis expressit ut loco oculi nihil nisi foramen adesset: in quod de aliqua aqua, quam secum habebas, modicum instillavit: & ecce oculus subito impleri capis, & intra quadrantem hora fuit perfectus, qualis antè fuit. quem anserem in hodiernum diem servo, & alijs ostendo. Quid ad hæc? Hæc Marcus. Rescripsit Dominus Kinner. se dubitare utrum anser videat. & opinari oculum quoad speciem solummodo exteriorcm restitutum esse, partibus internis etiamnum destructis. Marcus*

verò respondit, anferem quidem videre, sed minùs perfectè, ob cicatricem in pelliculu non sat æqualiter coalitam; quod futurum ipse Artifex prædixisset, qui inter operandum fassus fuit suum errorem. Hæc ille. Quidquid sit, si visus ita restitutus sit, rem summâ admiratione dignam censeo. De qua Rev. Vestra judicium expecto.

Hactenus Dominus Egenfeldt. Ad quæ Respondeo I. humorem aqueum ex oculo expressum restitui medicamine, nihil esse novi: nam, ut dixi in *Magia Natur.* 1. par. lib. 2. qui est de Prælusionibus Opticis, Præluf. 1. art. 7 probavit id experienciâ P. Nicolaus Cabeus è Societate nostra, in agno, cujus utrumque oculum acutâ lanceolâ perforavit, totumq; humorem aqueum expressit, & vulneri deinde applicavit vittam madefactam succo chelidonij majoris (celidonium ipse vocat cum Italis) ac postridie deprehendit, agnum habere oculos sanos, & aquâ turgentibus, videreque ut priùs. Ex quo confirmatur opinio, dictum humorem generari ac nutriri seu restaurari à spiritibus animalibus, dum conrescunt in parte anteriori oculi. Si ergo chelidonij succo adhibito, aqueus humor, salvis adhuc oculi tunicis, restaurari potest; poterit & eodem, aut alio, restaurari vitreus, & crystallinus.

Respondeo II. ut omnes tres humores ex oculo expressi restaurentur medicamine applicato, probabilius mihi videri, tumicas seu pelliculas, quibus involuti sunt, debere manere illasas; & ira contigisse in anfore. Et de Retina quidem clara res est, cum ex communiore & certa sententia visio in illa fiat per modum picturæ, ut citato Libro *Magiæ* fusè probavi. De Aranea quoque, cui crystallinus involutus innatat cæteris humoribus, non videtur dubitari posse, quoniam ad amplitudinem & formam dictæ Aranæ restaurari ac formari debet dictus humor destructus.

Respondeo III. non posse verè asseri, erutum oculum posse restitui; sed tantùm, oculum vulnere aliquo ita destructum, ut humores effluerint, posse sanari. Hoc ultimum tantùm, non primum, probat allata experientia Pragæ  
facta.

## PROPOSITIO LXXXIV.

*Possibile est, ut duo eodem anno, die, & horâ nati,  
post unum aut plures annos moriantur eâdem horâ,  
& tamen inæquali dierum numero  
vixerint.*

**N** Ascantur hîc duo gemelli, Anno 1661, die 15. Novemb. horâ 10, ante meridiem, dum hæc scribo. Proficiscatur post annos aliquot unus illorum versus orientales plagas, circum-  
eatque totum terraqueum globum, ac post unum aut plures annos huc revertatur, & eadem horâ moriatur uterque. Primus qui abiverat, unum diem vitæ plus numerabit, quàm alter qui hîc mansit. Ratio est, quia dum distat hîc versus Orientales regiones gradibus 15, inchoat diem eundem unâ horâ citiùs quàm alter hîc; dum distat 30 gradibus, duabus horis citiùs; dum 180 gradibus, seu semicirculo distat, duodecim horis citiùs; dum pergit, donec distet 360 gradibus, hoc est, quando huc revertitur, peracto circuitu, horis viginti quatuor citiùs diem eundem inchoat. Si ergo qui hîc sublitit, numerat annos, v.g. 30, dies 4 vitæ suæ, alter qui abiverat, & redijt, numerat annos 30, dies 5 vitæ suæ.

*Chrono-  
gici par-  
adoxum.*

## ANNOTATIO.

**Q**uod contingere posse diximus, contigit non semel ijs, qui è Lusitania aut Anglia solventes, Orientales Indias petiverunt, & trans-  
misso mari Pacifico, fretoque Magellanico, eò, unde discesserant, redive-  
runt. Anno 1590, die 20. Septemb. discessi ex Hispania navis una,  
qua postea à tam celebri eventu Victoria fuit vocata, navarcho atque  
ductore Ioanne Sebastiano Cano Nicola, Guesaria Provincia Guipuz-  
coa, reversaque est anno 1592, die 6. Septemb. numerarunt vectores  
qui in navi redierunt, unum diem plus, quàm in Hispania numeraba-  
tur.

*Qui discedunt versus plagas Occidentales, & terraqueo globo circumnavigato revertuntur, numerant unum diem minus, idque ob contrariam rationem, quia videlicet ij, qui 15 gradibus distant versus Occidentem, unâ horâ tardiùs inchoant diem, quàm hic existentes, &c.*

*Cardanus lib. 12. Varies. cap. 62. longam & operosam hujus rei demonstrationem adornat. Sed non est opus tanto molimine, cum ratio satis sit clara.*

## PROPOSITIO LXXXV.

*Iter equestre celeriter conficere.*

*Iter eque-  
stre celeri-  
ter con-  
ficere.*

**C**ardanus lib. 13. Varlet. cap. 63. modum præscribit, quo quis celeriter fugere, aut fugientem insequi queat, atque in septem præcepis consistere. Primò, eligat equum levem, latioribusque assuetum, & super omnia mitem: multis enim equi insolentia exitio fuit. Secundò, singulis equi soleis, loco octo clavorum, affigat quatuordecim, nè per montes, quibus atteri solent clavi, euntibus, aut per tenacius lutum, excidant soleæ. Tertiò, qui equitat, secum deferat carnes pavonum, aut corvorum, modicè salitas, siccatasque ac tritas, proprii usus causâ. Quartò panem quoque aridum, non solum sibi, sed equo utilem. Quintò machinam igneam, quæ rotâ exonerari soleat, multiplicemque, ut commodum ususque postulaverit. Sextò, cingulum quoque coriaceum, quale descripsimus suprâ Centur. 2. Propos. 92. si contingat non vadolum flumen transire. Septimo denique nôrit optinè iter,

## ANNOTATIO.

**I**N *Physica curiosa lib. 8. cap. 34. quod est de Equo, diximus, Sarmatas longinqua itinera obisuros celeriter, equis cibum adimere pridie, & ita per centena passuum millia continuo cursu ijs insidere. Turcas quoque iter agentes, interdum equos non pascere sed solum potare, quoties aquam inveniunt. Ex Saxone quoque Grammatico retulimus, Valdemarum eâ nocte, quam belli infensa est dies qua Sueonem illi.*

Danorum regem vicit, præcipisse franatos stare equos sine pastu, nè satiæ græves, minùs ad cursum essent apti. Inedia ergo velocitatem addebat hisce equis; nostris auferis: inde major ferè apud nos equorum, quàm equantium cura. Tartarorum tamen militum equi, macilentis ac leves, exiguo. & ferè ubivis obvio pastu contenti etiamnum sunt; nec carnem, etiam crudam, aut semicottam, aut semiasatam recusant. Idem, Paulo Veneto teste, ut loco citato quoque retulimus, cum prædandi causâ excurrunt in regiones illas Septentrionales, quibus Sol mensibus aliquot non apparet in hyeme, equas adhibent ad iter, quas pulli sequuntur. Cum ad regionis inimici ingressum perveniunt, pullos sub custodia commilitonum relinquunt, ipsi cum equabus pergunt, & prædis onustilaxant habenas: hæc pullorum desiderio per tenebras rectâ ad pullos, & celerrimè revertuntur: amant etenim equæ matres impense pullos. Hoc sciens olim Darius Persarum Rex, equas à partu recenter ad pugnas periculosas ducebat, domi relictiis pullis, ut cum fugere necessarium foret, equæ pullorum amore quàm celerrimè domum properarent.

## PROPOSITIO LXXXVI.

*In itineribus per vias incognitas ad locum destinatum sine duce pervenire, ope pyxidule magneticae.*

CUM anno 1633, juvenis è Belgio per Picardiam, Campaniam, Burgundiam, Helvetiam, Æmiliam, aliasque Italiæ regiones Romam, indeque Neapolim, ac in Siciliam, cum alijs duobus è Societate nostra Religiosis juvenibus proficisceretur, plerùmque sine viarum duce; hac ratione per vias antea incognitas ad destinatum quotidie locum perveniebam. Acum habebam magneticam, pyxidulæ, cui sciathericum adpictum erat horologium, inclutam. Cum discedendum erat de loco uno ad alterum; ex alijs viarum expertis, aut è tabulis Geographicis quas in Collegijs nostris reperiēbam, cognoscebam loci, ad quem tendendum erat, situm respectu loci è quo discedebam,

*Itæ per loca incognita ope pyxidule magneticæ perferre.*



bam, num Meridiem Ortumvè respiceret, num inter utramque plagam medius esset, aut unam magis quàm alteram accederet. Exponebam deinde pyxidulam meam, videbamq; quem angulum linea ex loco ad locum mente ducta efficeret prater propter. Hunc observabam, & toto in itinere observare inter eundem statuebam. Quotiescunque igitur in itinere bivium occurrebat, aut dubium de recta via oriebatur, deerantque quos interrogarem; pyxidulam deproiebam, ac um supra meridiana fundo pyxididis adpictam lineam librabam, angulum antea notatum observabam, & ex illo observato, quorsum eundem, determinabam, felici successu: nec enim unquam errasse me memini, nisi cum Vefontione digressi, per sylvam nescio ad quem locum versum Meridiem pergebamus. Causa erroris fuit via, quam ad sylvæ ingressum elegeramus, quæ per circuitum ad urbem, unde digressi fueramus, nos reduxisset, nisi errorem paulò post deprehensum correxissemus.

## ANNOTATIO.

*Similem praxin præscribit Cardanus lib. 13. Variet. cap. 63. Iubet enim locum, è quo disceditur, pro centro statuere, & circulo descripto, aut mente concepto, constituere situm loci ad quem tenditur, & Meridiei lineam; quam ex Solis ortu occasuque jubet venari, saltem prater propter: error enim trisum aut quatuor graduum (ac etiam plurimum) hoc in negotio nihil obest, ut bene monet Cardanus. Quod si pro his omnibus tabellam regionis illius, per quam transeundum, depictam quæ habet, longè facilius ac melius res succedet. His statutis, si iter de die agitur, jubet oculo Solis locum observare in calo, & dici horam mente aut horologio conijcere, iterque illius ratione habitâ ad locum dirigere. Est autem, si Meridiem quis respicit, Ortus à lava, Occasus à dextra: si autem Orientem respicit, Meridies à dextra est, Septentrio à sinistra. Nocturno si iter agitur, Lunam, aut stellam aliquam cognitam oportet habere ducem. Hac Cardanus, addens quid faciendum, si de via quis declinare cogitur.*

## PROPOSITIO LXXXVII.

*Escharoticum preparare, quod celerrimè cutim  
perforat.*

**E**Scharotica medicamenta, quæ Græci ἐσχαρωτικά φάρμακα appellunt, sunt caustica quæ vim habent escharam, hoc est, crustam inducendi: Eschara enim, ἐσχαρά, Græcis dicitur crusta sive durities illa, quæ vulneribus per cauteria quædam induci solet, cùm sanguis aliter sisti non potest. Prodest autem non raro, ejusmodi escharotica habere præparata, quoniam cutem subinde aut carnem celeriter erodere ac perforare volumus, nec tamen satis sectioni fidimus. Quod sequitur, præscribit Cardanus lib.13. Variet. cap.63. dicens esse efficacissimum: ex aqua enim saponis, aut lixivio tinctorum, quod ex cineribus roboris fit, conficitur hoc modo.

*Escharoti-  
cum quod  
cutem colo-  
riter per-  
forat.*

Libra duodecim lixivij acerrimi super calcem vivam, & roboris cinerem superfunduntur, permittunturque destillare: inde super aliam calcem & cinerem denuò infunditur, repetiturque donec ovum sustineat aqua. Inde adduntur calchanti uncia singula in singulas libras, aut dimidium, & in aneo lebetæ sensim spissatur, donec extractum cogatur in pastillos: cochleari enim sensim extrahitur. Hoc in octava parte hora, si rectè præparatum fuerit, perforat. Hactenus Cardanus.

## ANNOTATIO.

**N**Ovi Italum, qui quolibet ferè semestri novum sibi ipsi facillimè, ac sine dolore ferè, cauterium aperiebat, antiquis claudis ac sanari permissis: unde tibiae, coxendices, brachia habebat undique cauteriata. Quæ autem adhiberet medicamenta, aut instrumenta, præter virgas sarmentorum vitis accensas, nescio.

PRO.

## PROPOSITIO LXXXVIII.

*Pelles, & Coria à corruptione servare.**Pelles &  
coria à cor-  
ruptione  
servare.*

**P**Lacet & hoc addere ex Cardano, loco proximè citato, quoniam multis non parum utilitatis asferre potest, aut à damno non leviliberare.

Pelles siccas, aut in Sole diligenter siccatas, excusso pulvere in arcis loco sicco collocabis. Sufficiet semel in anno aëri sereno exposuisse. Melius servantur sibi similibus: nam laneis immixtæ eroduntur à tinels, à lineis humedantur. Hæc Cardanus. Proderit & subinde bacillis excutere pelles.

Coria loco mundo & altiore à terra servari debent, ut nè udo, nec pulvere tangantur, præsertim quæ tincta sunt: hæc enim duo corrumpere omnia solent, velut & laneos pannos. Pulvis enim erodit, & blattas procreat: udum autem affert situm, & ex situ putredinem. Ventus ergo qui refrigerat & siccatur, utilis; qui pulverulentus est (qualis Ecnephias, ac Typhon) aut humidus (qualis Auster, & à mari) corrumpit omnia, ut etiam laneos pannos. Quod si validus sit, assiduusque, nec expers acris qualitatis; etiam ferrum exterit. Drepani in Sicilia vidi plerosque ferreos fenestrarum clathros erosos, ob salinas urbi vicinas.

## PROPOSITIO LXXXIX.

*Murem ad alios mures devorandos assuefacere.**Murem  
alios mures  
devoret.*

**P**ELLium, & coriorum, omnisque generis vestium pestes sunt mures, & blattæ. Ad mures pellendos, aut capiendos, præses multæ passim notæ sunt. Hic unam præseribo, jucundam simul, & utilem; juvat enim miscere utile dulci, & ludicra serijs.

Ollam, aut cacabum, aliudvè simile vas lubitæ magnitudinis accipe, ejusque orificium patulum pergamenâ aut comuni

muni chartâ operi, ac liga quàm strictissimè. In medio chartæ in crucis formam duas fac incisuras tantum hiantes, ut mus incidere per eas in ollam queat. E dicta charta suspende intra ollam frustum lardi assati, eamque expone in loco muribus frequentato. Qui percepto lardi odore, agminatim accurrent, & consensâ properè ollâ, per hiantes rimas incident, nec regredi poterunt, lævi vasis cavitare ascensum prohibente. Post captos nonnullos claude vas, aut à loco remove, nè pluribus aditus pateat. Non multò post, fame stimulatî mures devorabunt se mutuò, donec absumptis omnibus unicus tantùm supersit, nempe omnium robustissimus ac valentissimus. Hunc dimitte liberum. Et quoniam muribus devorandis adfuetus est, undique illos, tanquam gratissimum sibi pabulum, conquiret, ac devorabit, nec permittet eodem secum loco aut domo stabulari.

## ANNOTATIO.

*Q*ui mures necare conantur venenatî escis, caveant nè hominibus exitium creent. Quodam in Collegio nostro Sicilia, ut mures qui pistrinum infestabant, necaret Pistor, uva passa grana non pauca arsenico repleta, iterumque clausa, alicubi in pistrino exposuerat, non pramonito socio. Absente pistore intrat pro more socius, & inventa grana (qua quod lota prius, splendebant, & quod veneno infarcta, surgidiora solito erant, tantoq; magis orexin excitabant) obliquis ad unum omnia. Vix absumpserat, cum insolito symptomate corripitur, ac prostrernitur, ac paulò post à pistore superveniente cum morte ferè lactari deprehenditur. Cognito igitur, quod contigerat, quoniam exposita paulò ante venenata grana nullibi viscebantur amplius, theriacam aliâque alexipharmaca contra venenum adhibet, & socium servat.

## PROPOSITIO XC.

*Alijs modis ac remedijs mures aut necare,  
aut fugare.*

*Q*uoniam de murium nec e sermonem institui, lubet adhuc unum aut alterum ex alijs significare antidotum.

Na

Paxa-

*Mures necare, hunc fugare.*

*Paxamius* apud *Weckerum* lib. 6. Secretor. cap. 17. ait, mures necari veratro cum polenta objecto, aut silvestris cucumeris semine cum veratro nigro, & colocynthide, & polenta.

Eisdem fugari ait, si calchantus, & origanum, & apij semen, & nigella suffumgetur.

Si verò cinerem quercinum cavernæ apposueris, incineras to scabie infestari, & necari.

Si ferri limaturam (hoc est,amenta ferri limâ detrita) fermento immixto posueris, eâ gustatâ mori.

Idem *Paxamius* apud eundem *Weckerum* testatur, si unico mure apprehenso caput ipsius excoriaveris, & dimiseris, reliquos fugari.

Novi virum doctum, & etiamnum vivum, dum hæc scribo, qui hac ratione mures fugavit. Infestabant frequentes Collegij nostri Erfordensis partem unam mures, nec ullo remedio abigi aut extirpari poterant. Cæpit is unum, & vivum assatum in loco à muribus infestato exposuit; confestimque reliqui ita disparuerunt, ut nê unus remanserit.

## ANNOTATIO.

**V**eratrum est elleborum quod duplex est, album quod vomitione, & nigrum quod ventris exoneratione, noxia detrahit, si modicè sumatur. Colocynthis est sylvestris cucurbita genus, mediocris pile magnitudine fructum ferens, purgationibus alvi accommodatum. Origanum herba illa est, quam Germani nostri *Welgenuth* vocant. Apium, agreste videlicet, quod cicuta folijs est, nostris wilder Eywich dicitur. Nigella frutex est, à Græcis μελανθιον dictus.

## PROPOSITIO XCI.

*Chartam pergamenam reddere translucidam  
instar vitri.*

*Pergamena  
chartâ red-  
dere trans-  
lucidam.*

**C**Harta pergamena translucida fit ut vitrum, nec tamen fragilis redditur, si super ferrum læve calidiusculum sensim lacrymâ

crymâ abietis aut laricis imbuatur. *Item aliter*, candidis ovorum, lacrymâque Arabicâ, & melle despumato, *Cardanus* lib. 13, Variet. cap. 63.

## PROPOSITIO XCII.

*Colorem rubrum ad scribendum efficere.*

**E**Xpertus est Cardanus, brasiliū lignum in scobem redactum, & oleo tartari immisum, statim efficere atramentum rubrum pro scribendo, & quod fuci vim obtineat. Id contin- *Colorem  
rubrum ad  
scribendū  
efficere.*  
gere ait, quoniam id oleum acre est, & tenuissimum, mediâ quadam substantiâ inter oleum & aquam ardentem. Ita citatus Auctor lo. cit.

## PROPOSITIO XCIII.

*Catoptrica experimenta varia.*

**D**E Catoptrica fusè egimus in 1. par. Magiæ, ubi innumera pænè experimenta, jucunda æquè ac mira, attulimus in medium. Hic alia nonnulla, ibidem omiſsa, addemus. *Catoptrica  
experimenta.*

I. Fiunt specula quæ repræsentant homines juniores quàm sunt, dum videlicet rugas faciei non ostendunt, & ejusdem colorem reddunt rubicundum ac vividum. Rugas non ostendunt, quæcunq; non sunt omnino exquisita atque polita, splendida tamen. Rubrum colorem faciei repræsentant, si crystallo, dum funditur, aliquid rubri immisceatur. Hujusmodi specula fiunt & arte, & casu.

II. Fiunt alia, quæ detegunt omnia quæ in conclavi aliquo geruntur, tametsi alioquin sine speculo videri in eo loco conclavis nequeant. Horum compositio talis est. Duo specula plana ex crystallo, æqualia ad unguem, jungantur ita, ut unius longitudo longitudini alterius ad amussim hæreat, & circa axem possit velut integumentum circumvolvi, sic ut superficies unius cum alterius superficie quandoque unum planum efficiat,



quandoque angulum obtusum, rectum, acutum, ut libuerit. Hoc speculum in sublimi è directo loci latentis suspenditur, ita ut speculi unius facies immobilis plano tuo perpendicularis immineat, alterius autem facies mobilis locum latentem respiciat. Hoc facto, videbis quidquid geritur in loco illo latente, modò lux ad sit quod objecta illuminet, circumvoluto speculo mobili, donec talem faciat angulum cum immobili, ut rerum species ab hoc receptæ reflectantur ab illo in oculos tuos. Quem quidem angulum docebit te experientia melius, quàm præcepta.

III. Locum obscurum si inspicere cupias, colloca è directo loci amphoram magnam vitream, aquà plenam, & lumen ante amphoram, ita ut hæc media sit inter locum & lumen. Deinde omni alio lumine sublato, oculum tuum colloca eo in loco, ubi amphora lumen non impediat; locum tamen inspicere possis: videbisque cuncta ut in clara luce.

IV. Specula quædam plana repræsentant rem eandem bis, nempe duos nasos, quaternas aures, binas facies pro una, aliaque similia. *Cardanus* lib. 4. subtilit. conatur hujus rei causam reddere, & mirabilem conficit demonstrationem, ut ipse appellat. Nos in *Catoptrici* nostris 1. par. Magiæ diximus, causam esse duplicem reflexionem ejusdem rei, quarum una fiat in superficie speculi, altera in profunditate cum refractione radiorum reflexorum. Itaque non omnia specula plana exhibent prædictum effectum, sed illa tantum, quæ speciebus præbent transitum ad aliquam usque profunditatem; cujusmodi sunt specula crystallina, non chalybea, nec marmorea.

## PROPOSITIO XCIV.




### *Aliud Catoptricum experimentum.*

*Catoptricum  
experimentum aliud.*

*Vide  
Icon. XX.  
Fig. I.*

POSSUNT planis speculis homines exhiberi volantes. Hoc ut fiat, quatuor sunt necessaria, nimirum ut moveantur homines; ut brachia agitent; ut in sublimi pendeant; ut corpus totum cum capite, brachijs, & pedibus pavimento æquidistet, ut

in





in avibus volantibus. Duo priora præstare potest ipse homo, reliqua duo speculum efficiet, hac ratione. Fiant duo ligna levia æqualia, ad angulū rectum instar gnomonis juncta, & ita statuantur in conclavi, ut angulus rectus in sublimi sit. Juxta angulum intus duo magna specula plana ex adverso æquali altitudine suspendantur. Ab his cū tantum abscedes, ut in altero calcaneum ad unguem assequaris; ex motu secundū rectam lineam, & brachiorum jactatione, volantem inspicere videberis.

## ANNOTATIO.

*PRAXIN hanc præscribit Cardanus lib. 4. subtil. at satis obscure: quæ ego ita illustro. Sit angulus rectus, ex lignis instar gnomonis compactus, aut ex tabulis ad angulum rectum conjunctis, ABC. Suspendantur intus duo specula plana majora, quæ se mutuo faciebz specularibus respiciant, unum nimirum in AB, alterum in CB. Stet homo unus in D, ita ut radiet in speculum ex CB suspensum, totusque sibi ipsi, aut alteri in D prope ipsum consistenti, appareat in dicto speculo CB. Radiabit ejus imago ē speculo CB, in speculum AB, ut videri queat ab alio stante ex adverso ad partes E. Recedat hic versus E tantum, ut videat totam imaginem hominis stantis in D, expressam in speculo AB. Apparebit is in situ quasi parallelo pavimento DE; & si brachia agitet instar volantis, volare videbitur: pronus quidem, si consistent in D vertat dorsum speculo CB; supinus verò, si faciem vertat speculo CB.*

## PROPOSITIO XCV.

*Ædificium construere quod hyberno etiam Sole multum calefiat.*

**I**D fieri posse ait Cardanus lib. 4. subtil. si ædificium non sit rectum ad horizontem perpendiculariter, sed ita ut Solem hyemalem semper ad perpendicularum excipiat. Proponam prius praxin quam præscripsit; deinde paucis eam examinabo. Sic ergo discurret Cardanus, supponens locum, in quo ædificandum est, latitudinem habere graduum 44½.

*Ædificium quod hyeme multum à Sole calefiat.*

Vide  
Icon. XX.  
Fig. II.

*Sit habitatio nostra in A, super plano A F perpendicularis è nostro vertice ad centrum terra, A B, quam constat distare ab Æquinoctij circulo partibus XLIII, & mediâ: ab hyemali igitur distabis partibus LXVIII. Fiat igitur circuli pars quarta RCF, & fiat BC partium XXII ex his quibus BF est XC. Distabis igitur punctus C partibus nonaginta ab hyemali Tropico. Quare cum Sol ibi erit, erectâ planâ aut cavâ cylindricâ superficie AC, in meridie radios perpendiculares excipiet. Fiat etiam arcus CE partium XLII, & juxta declinationem cujusque diei Solis describantur partes, & moles AC retrò agatur, sicque perpetuo anno radios perpendiculares excipiet, ut ante tempus olera & fructus habere possis, reddaturque jucunda magis. Hæc Cardanus, quæ lubet paulum examinare, & melius explicare.*

## ANNOTATIO I.

Vide  
Icon. XX.  
Fig. III.

*VT melius intelligatur mens Cardani, sit semimeridianus FBG loci A, habentis elevationem poli grad.  $45\frac{1}{2}$ . & consequenter latitudinem, seu elevationem aquatoris, grad.  $44\frac{1}{2}$ . In hoc semimeridiano, punctum verticale sit B, quadrans meridionalis sit BG, quadrans vero borealis sit BF. Quoniam igitur circulus æquinoctialis distat à vertice B  $44\frac{1}{2}$ , distabit Tropicus Capricorni, seu circulus brumalis HA, ab eodem vertice B, gradibus 68, ac proinde Tropicus Capricorni HA, erit elevatus supra horizontem FAG, gradibus 22. Si jam in A sit domus, vel hortus, aliusvè quicunque locus, qui cupiat habere toto anno Solis radios perpendiculares, erigatur planum AC, faciens cum AB angulum BAC equalem angulo HAG, nimirum gradum 22, & ipsi AC plano superstruatur adificium, aut hortus; erit dictum planum cum adificiis aut horto superstrueto remotum à Tropico Capricorni AH gradibus 30, ideoque excipiet radios Solis existentis in dicto Tropico perpendiculariter, seu ad angulos rectos. Si ulterius diebus singulis toto anno, quantum elevatur Sol versus B in quadrante GB, tantum deprimatur planum AG versus F, in quadrante BF; distabit perpetuò planum AC 90 gradibus à Sole, semperque excipiet, in meridie saltem, radios Solis orthogonallyter.*

## ANNOTATIO II.

**S** Caligero Exercitat. 85. in Cardanum, non placet sequi consilium Cardani in hyemali edificio fabricando. Etenim paries ille (inquit) quem tu vis hyemali sustendi radio, in meum caput corruet. Tales heliocaminos tibi fabricato. Est nihilominus ingeniosa inventio Cardani, & posset saltem pro hortis extruendis adhiberi, quamvis non sine sumptibus. At cum planum  $AC$ , & ipse hortus totus, esset inclinatus ad horizontem  $EG$ ; arbores, frutices, herbarum ac florum culmi, quem angulum facerent cum plano  $AC$  & usque eundem quem faciunt nunc cum plano montis alicujus habente similem inclinationem. Sed quemcunque facerent, cum planum illud perpetuo aliter atque aliter inclinandum foret, forent & arbores ac frutices perpetuo inclinandi. Taceo alia incommoda.

## PROPOSITIO CXIV.

*Anemocaminum fabricare.*

**I**N Perfici sinus freto insula est, ac urbs splendidissima, Armuzia nomine, in vigesimo septimo elevati poligradu, adeo sterilis, adeoque nihilominus rebus omnibus abundans, ut nulla in Orbe terrarum civitas esse credatur, in qua sic divitiæ cum paupertate, copia cum sterilitate, commoda cum incommodis, arte naturam superante, sint conjuncta. Excrevit enim urbs, ob loci situm, portusque Insulæ geminos, in emporium earum mercium omnium, quæ ex Oriente, Occidente, Aquilone, & Austro devehuntur. Est, præter cætera mala, æstus tanta vis, ut ardere omnia videantur, nec usquam alibi tantus sit, nè sub ipso quidem Æquatore. Hinc mira loci siccitas, quanta & meri salis ac sulphuris, è quibus duobus tota Insula composita videtur. Certè fluvij ipsi æstate in salem, uti apud nos hyeme in glaciem concresecunt. Æstui intolerabili ars utique mederi hoc modo solet. In ædium atrijs è frigida thermæ fiunt: in ijs collo tenus & temperandi æstus, & conciliandi soporis causâ, velut in liquidis culcitris, versâ in delicias necessitate, pernoctant. Ita legi in Vita P. Gasparis Barzæi, scripta à P. Nicolao Trigaultio, quorum prior aliquot in ea Insula & urbe annis vitam traduxit.

*Anemocaminum fabricare.*

*Vide Icon, XXI: Fig. I.*

Aliud



Aliud ad refrigerandas ædes, quo ejusdem loci incolæ uti dicuntur, prodit Scaliger Exercit. 85. in Cardanum. Nam tubos à tecto excitant, extantes admodum, ad alvei figuram latioris: quorum paries exterior oram habet summam nihilo, quam sunt domus parietes, altiores; latera, & murum, qui à tergo est, valde. Quare exceptos ventos haud transmittit illud tergum, sed ventus à fronte & lateribus impeditus demittit sese per canales ad canacula: quorum contignationes perfossa, atque pervia sunt. Ita quatuor ex partibus constructis illis alveis, potiuntur vento quovis cujuscunque regionis. Hosce tubos vocat Scaliger *Anemocaminos*, non quòd ventos efflent, sed excipiant. Schema hujusmodi *Anemocaminorum* tale apponit Scaliger; in quo A B est murus à tergo, A C & B D sunt muri ab utroque latere, E est pars anterior tubi per modum alvei ante aperti.

## ANNOTATIO.

IN *Mechanica Hydro- pneumatica* par. 2. Classe. 3. *Machina* 1. *Pragmat.* 1. 2. 3. 4. & 5. *varios præscripsi modos fabricandi cameras Æolias, qua ventum subministrent ex aquarum lapsu, aut follum inflatione, pro organis hydraulicis. Similes camera ventum subministrare possunt cubiculis æstivis temporibus, si alia desint media. De eadem materia, quo scilicet modo ventus in cubiculo generandus, egi in Magia par. 3. lib. 7. Syntagm. 2. Experim. 2.*

## PROPOSITIO XCVII.

*Caminum fabricare qui fumum egredientem non remittat.*

*Caminum  
qui fumum  
non remit-  
tat.*

*Vide Teon.  
XXXI.  
Fig. II,*

Commune malum est, nostris præsertim in regionibus, quod camini subinde fumos non emittant, sed remittant, domosque aut conclavia impleant. Quod quidem duplici de causa contingere solet, aut quia egredi prohibetur fumus, aut quia repellitur. Egredi prohibetur vel ob copiam nimiam, ut dum viridia comburuntur ligna; vel ob celeritatem motus, ut dum pro-

Fig. i



Fig. ii





propter flammæ multitudinem celerius propellitur, quàm ut simulegredi queat; vel ob camini angustiam, præsertim in imo, ut omnem non recipiat. Repulsus sit à ventis; quibus dum occurrit in exitu, retrogreditur. Huic malo ut occurreretur, varia excogitata sunt remedia, sed ferè sine fructu. *Cardanus* lib. 2. Subtilit. hoc excogitavit. In quatuor partibus camini quadrilateri, spectantibus quatuor Mundi plagas cardinales, Orientem, Occidentem, Meridiem, Septentrionem, jubet poni binos canales fictiles, quorum unus sursum, alter tendat deorsum, ut in apposito schemate apparet. Hoc enim fiet, ut ex quacunque parte ventus perfleret, semper aliqua tamen spiracula seu canales liberi maneant, per quos fumus sine impedimento egrediatur. Nam si sursum perflat in uno aut pluribus lateribus, egreditur per canalem superiorem; si deorsum, per inferiorem erumpet. Octo autem ventos simul flare, quator inferius tendentes, & quatuor superius, impossibile est. Quod tamen ni fiat, fumus minimè potest retrò pelli. Addit *Cardanus*, Id etiam experimento ad amissim comprobatum fuisse. Adjuvat autem non parum latitudo faucium in imo. Plerùmque etiam tutiores canales declives tantùm, quoniam rarò venti ex imo in altum feruntur, sed ex alto ad ima. *Sed tutior omnibus est caminus vaginâ cinctus.*

## PROPOSITIO XCVIII.

*Ex digitorum articulis aureum numerum quovis  
anno currentem invenire, pro utroque  
Calendario.*

*Aureum  
numerus  
ex digitorum  
articulis  
invenire.*

**I**N Cursu Mathematico lib. xi. part. 4. ubi de computu Ecclesiastico egimus, pleraque omnia quæ ad Ecclesiasticum Calendarium, seu Novum, seu Veterem spectant, triplici viâ facile expediri posse diximus, nimirum per Arithmeticam, per Dactylisimum,

lissimum, seu digitorum articulos, & per tabulas in eum finem constructas. Primam solam viam ibidem explicavimus: hinc secundam in aurei numeri & Epactæ inventionem insinuabimus, in eorum gratiam, qui jucundis hisce, nec in utilibus Regulis ac Praxibus delectantur; præsertim cum è Matheseos fontibus derivatæ sint, & à præstantibus Mathematicis ingeniosissimè excogitatæ; ac turpe sit horum studiorum Candidatos ignorare, quod sæpe alij ab ijs prorsus alieni se scire gloriantur. Scripsit ea de re perpulchrum Libellum *Christophorus Clavius*, quem computum Ecclesiasticum intulavit, & suo præclaro Operi de Calendario Gregoriano adjunxit. De eadem re scripsit quatuor Libros integros *Pompeius Læpius*, & Dactylismum Ecclesiasticum appellavit, quòd operationes pleræque ope digitorum (quos dactylos à Græca appellant voce) atque articulo humanæ manus peragantur.

Ad aurei igitur numeri inventionem quod attinet, diximus citato Libro xi. par. 3. cap. 8. cuilibet anno in Ecclesiastico Calendario attribui unum ex 19 numeris inchoatis ab 1. usque ad 19; eaque revolutione post annos quoslibet decem & novem peractâ, iterum rediri ad 1. ita ut quolibet anno aliquis ex novendecim numeris sit in usu. Atque hanc 19. annorum revolutionem appellari cyclum Decennovenalem Aurei numeri; & numerum cuilibet anno attributum, vocari numerum Aureum, ibidem asseruimus.

Qua autem ratione Aureus numerus, qui quolibet anno sit in usu in Calendario Ecclesiastico, reperiri queat per Arithmeticam, docuimus lib. cit. par. 4. Regula 3. & suprà hac Centuria 3. Propos. 26.

Eundem Aureum numerum per digitorum articulos memoriter ut cognoscas, *Nota*, nos hoc loco dividere cujuslibet digiti articulos in internos, & externos, & ipsam quoque summam seu extremitatem digitorum unâ cum ungue sumere pro articulo. Itaque in quolibet digito constituimus  
septem

septem articulos, nimirum tres internos, à radice digiti usque ad ejus extremitatem, deinde ipsam extremitatem cum ungue pro quarto, demum tres externos sub ungue immediate inchoatos usque ad externam radicem. Hoc notato, sic procede.

I. In articulis quatuor digitorum sinistrae manus, pollice omisso, colloca annos centesimos ab ortu Christi Salvatoris, hoc modo. In radice, sive primo articulo digiti Indicis interioris colloca annum 0, in radice digiti Medij annum 100, in radice digiti annularis annum 200, in radice digiti auricularis annum 300. In secundo deinde articulo Indicis colloca annum 400, in secundo articulo digiti Medij annum 500, in secundo articulo Annularis annum 600, in secundo articulo auricularis annum 700. In tertio articulo Indicis annum 800, in tertio articulo Medij annum 900, in tertio articulo digiti Annularis annum 1000, in tertio Auricularis annum 1100. Posthæc in quarto articulo Indicis, hoc est, in ejus extremitate colloca annum 1200, in quarto Medij annum 1300, in quarto Annularis 1400, in quarto Auricularis 1500. Deinde in quinto articulo Indicis (qui est exterior proximè sub ungue) colloca annum 1600, in quinto Medij annum 1700, in quinto Annularis 1800. Et quoniam hætenus centesimi anni collocati sunt in 19 articulis, quot nimirum sunt aurei numeri; redeundum est ad radicem Indicis interiorem, ibique ponendus est annus 1900, in radice deinde digiti Medij 2000, & sic deinceps, revertendo semper post articulum decimum nonum ad radicem Indicis interiorem.

Hæc ratione collocati anni centesimi occupant in Indice, in Medio, & in Annulari digito, quinque articulos, nempe in singulis tres internos, extremitatem cum unguibus, & unum externum ungui proximum, in Auriculari verò digito occupant quatuor solùm articulos, nimirum tres internos, & extremitatem cum ungue,



	A	B	C	D	
I	1600 5	1700 10	1800 15		I
H	1200 4	1300 9	1400 14	1500 19	H
G	800 3	900 8	1000 13	1100 18	G
F	400 2	500 7	600 12	700 17	F
E	0 1	100 6	200 11	300 16	E

Sint in appposito schema-  
te sinistræ manûs, digitus  
Index A, Medius B, Annu-  
laris C, Auricularis D. Sint  
tres articuli interni E, F, G,  
extremitas cum ungue H,  
externus post unguem I.

Erunt ergo centesimi  
anni in ijs dispositi ut sche-  
ma monstrat. Collocatio-  
nis rationem dabimus in  
Annotationibus.

II. Collocatis hac ratio-

ne annis centesimis in prædictis 19 articulis, dispone in ijsdem  
omnes 19 aureos numeros ita, ut in primo interno Indicis arti-  
culo, ubi est 0, collocetur 1, in secundo 2, in tertio 3, & sic  
deinceps, prout schema monstrat.

III. His factis, sic invenies aureum numerum cuilibet  
anno proposito debitum. Si datus annus est centesimus ali-  
quis: quære ejus sedem inter 19 articulos; numerus enim inven-  
to centesimo adscriptus, seu attributus, erit aureus numerus  
eidem centesimo debitus. Si verò datus annus non est cente-  
simus aliquis, sed alius quicumque: quære in articulis aureum  
numerus illius centesimi, qui proximè antecedit annum da-  
tum, modo jam dicto: deinde ab aureo illo numero in articulis  
invento perge per reliquos numeros aureos in orbem nume-  
rare, toties addendo alium: atque alium, quot annos habes supra  
centesimum à quo incepisti: numerus articulo in quem cadit  
finis annorum supra centesimum datorum adscriptus, est au-  
reus numerus illius anni.

EXEMPLVM I. Sit Inveniendus aureus numerus anni  
1600. Sedes hujus anni est articulus 1 Indicis A, cui adscriptus  
est numerus 5. Itaque 5 est numerus aureus anni 1600.

EXEMPLVM II. Sit iterum Inveniendus aureus nume-  
rus anni 1604. Quære sedem anni 1600, qui est, ut dixi, arti-  
culus

culus i digiti Indicis A, etque adscriptus est aureus numerus 5. Quia igitur ultra annos 1600 supersunt adhuc 4 anni usque ad annum 1604 datum; perge à numero aureo 5 ordine naturali numerare adhuc quatuor aureos numeros in quatuor articulis Medij digiti B, ab articulo E usque ad H, & invenies 9. Hic ergo est numerus aureus anni 1604.

EXEMPLVM III. Sit tertio inveniendus numerus aureus anni 1660. Quare, ut antea, sedem anni 1600, & numero ipsi subscripto adde adhuc 60. numeros ordine naturali in reliquis articulis numeratos, inchoando primum annum ab articulo 6, nempe ab E Medij digiti B, & pergendo ad 7, 8, 9, &c. usque ad 19, & post 19 redeundo ad 1, iterumque in orbem cundo, donec numerando percurreris sexaginta articulos. Caderet annus sexagesimus in articulum G digiti Medij B, cui adscriptus est numerus 8. Itaque 8 est numerus aureus anni 1660.

## ANNOTATIO I.

**H**Ac arte invenies, anno primo Christi nati aureum numerum fuisse 2: nam proximè præcedens centesimus fuit 0 centesimus Christi, cui adscripta est 1, quam proximè sequitur in sequenti articulo numerus 2. Itaque anno immediatè ante Christi nativitatem, aureus numerus (qui jam tum in usu erat) fuit 1: anno 19 Christi, fuit 19: anno 20 Christi fuit iterum 1: anno 27 fuit 8, &c.

## ANNOTATIO II.

**A**Nno Christi centesimo 0, posito in articulo E prope radicem Indicis A (hinc enim ordiri placuit potius quàm aliunde) subsequentes centesimi cadunt in articulos prædictos, & in Schemate exhibitos: quia si ab articulo E Indicis A, in quem cadit primus Christi annus, pergas ordine naturali sursum per reliquos articulos, tam Indicis, quàm reliquorum digitorum, usque ad articulum decimum nonum inclusivè, & redeundo ad 1, toties percurras eosdem 19 articulos, donec pervenias ad centesimos: caderet primus centesimus in infimum internum articulum digiti Medij, secundus centesimus in infimum internum Annularis, & reliqui in reliquos, prout diximus, & prout figura monstrat.

## ANNOTATIO III.

**A**D inveniendas sedes in articulis reliquorum centesimorum annorum ultra novendecim centesimos jam assignatos, nè cogamur sæpe percurrere 19 illos articulos sinistra manus, satis est si edificentur sedes 19 dictorum centesimorum ab 0 usque ad annum 900. His enim cognitis, facile sedes cujusvis subsequentium centesimorum, quantumvis magnorum, invenies hac ratione. Ex numero annorum centesimorum propositorum aufer 20 quoties potes, & reliquo numero tot unitates adde, quoties ablata sunt 20. Nam ubi centesimus hujus summa sedem habet, ibi erit sedes centesimi propositi.

**EXEMPLVM.** Quarenda sit sedes anni 4900. Ex numero 49 (qui est numerus centesimorum, reliqui enim ad dexteram significant denitates ac unitates) auferuntur 20 bis, & remanent 9. Huic ergo residuo 9, addenda sunt 2 (propter bis 20 ablata) ut fiant 11. Et quia undecimus centesimus, id est, annus 1100, sedem habet in tertio articulo interiore Auricularis digiti, collocabitur ibidem annus 4900.

**ALIUD.** Sit quarenda sedes anni 9700. Ex numero 97. centesimorum rejici possunt 20 quater, & remanent 17; quibus si addantur 4, propter quater 20 abjecta, fiunt 21. Ab his iterum si auferantur 20, remanet 1; cui si addatur 1, propter 20 semel abjecta, fiunt 2. Quoniam igitur annus 200. collocatur in radice Annularis digiti, ponendus est ibidem annus 9700 propositus. Eadem est ratio de alijs annis.

## ANNOTATIO IV.

**C**Ausa cur numeri 19 in 19 articulis modo explicato collocentur, hanc assignamus cum Clavio. Quia proximo anno ante Christum natum fuit aureus numerus 1, collocandus est aureus numerus 1 in radice Indicis, ubi positus fuit annus Domini 0, hoc est, annus qui Christi ortum proxime antecessit. Quoniam verò cyclus auri numeri quinquies in 100 annis continetur, & consequenter percurfis omnibus 19 articulis reditur ad articulum, qui habet numerum 1. & super-

*Supersunt 5: si hac 5 numeres in subsequentibus ordine articulis Indicis, cadit numerus aureus 6 in radicem digiti Medij, in qua est annus 100 post Christum natum. Rursus quoniam in subsequentibus centum annis ab anno 100 usque ad 200 continetur cyclus aurei numeri quinquies, & remanent iterum 5: si hac numerentur in articulis post numerum 6 jam collocatum in dicta radice digiti Medij, cadent 11 in radicem interiorem digiti annularis. Simili de causa reliqui omnes numeri aurei in articulis 19 collocati, cadent in dictos articulos, quilibet in locum illum quem occupat in superiori schemate.*

## PROPOSITIO XCIX.

*Epactam cujuslibet anni propositi invenire.*

**E**Pactæ, ut vidimus lib. xi. Cursus Mathem. sunt dies quibus Solaris annus quolibet anno superat Lunarem. Primo enim anno, si simul inchoentur Solaris & Lunaris annus, absolute Lunari supersunt ex Solari dies 11; secundo anno dies 12 (hoc est, bis 11; tertio anno dies 33, hoc est, abjectis 30, propter causam lo. cit. explicatam, dies 3; quarto dies 14, &c. Sunt aut 30 Epactæ in Calendario descriptæ, quarum tamen 19 tantum in usu sunt, illæ nimirum, quæ singulis 19 aureis numeris, varijs temporibus, respondent, ut ibidem explicavimus. Harum sedes in Calendario demonstrat Novilunia Ecclesiastica. Quæ autem Epacta quolibet anno proposito respondeat aureo numero illius anni, & toto illo anno singulis mensibus Novilunia ostendat, tum ante, tum post Calendarii correctionem, in pollice manus sinistræ sic invenies.

*Epactam ex  
digitorum  
articulis  
reperire.*

I. In Pollicis sinistri extremitate, in articulo medio, & in infimo, colloca 19 aureos numeros hoc ordine. In extremitate pone 1; in medio articulo, 2; in imo, 3; deinde rursus in extremitate colloca 4; in articulo medio, 5; in imo, 6; in summo iterum Pollice 7, & sic deinceps usque ad 19 (ita ut ultimus numerus 19 cadat in extremum Pollicis, in quod ceciderat primus)

aut

aut usque ad illum numerum ex 19, qui anno proposito, cujus Epactam quaeris, est aureus numerus.

II. Aureo numero cujuslibet in Pollicis extremitate collocato adde 10; aureo verò numero collocato in medio articulo, adde 20, aureo denique numero posito in imo articulo, nihil adjunge. Numerus enim ex aureo numero currente, & ex numero addito conflatus (abjectis priùs 30, si numerus conflatus major est quàm 30) est Epacta anni propositi ante Calendarij correctionem.

III. Ab Epactis hoc modo inventis subtrahere 10, & relinquentur Epactæ cum eisdem aureis numeris post Calendarij correctionem, usque ad annum 1700 exclusivè. Ab anno 1700 usque ad 1900 exclusivè subtrahere 11; post hunc verò 12, &c. Si subtractio fieri nequit, adde priùs 30 ad Epactam veterem inventam.

EXEMPLVM I. Anno 1599 aureus numerus per Regulam præcedentem inventus, fuit 4. Qui numerus 4, quia cadit in extremitate Pollicis, si addo ei 10, habeo 14, & si à 14 subtraham 10, habeo 4 pro Epacta anni propositi.

EXEMPLVM II. Aureus numerus anni 1660 est 8: qui quia cadit in articulum medij Pollicis, adduntur ei 20, & fiunt 28; & si à 28 subtraham 10, habeo 18 pro Epacta dicti anni.

EXEMPLVM III. Anno 2314, aureus numerus est 16 incidens in extremitatem Pollicis. Additis ergo 10, fiunt 26; ablatisque 14 (tot enim diebus novilunia tunc retrocesserunt, & non 10 tantum diebus, sicut hoc sæculo) remanent 12 pro Epacta propositi anni.

## ANNOTATIO I.

**H**OC sæculo decimo sexto usque ad annum 1700, subtrahi debens ab Epacta veteris dies 10, propter 10 dies simul exemptos è Calendario correcto, quibus decem diebus Lunationes seriùs contingunt nunc, quàm ante correctionem Calendarij. Ab anno 1700, quia propter omissionem Bissexti tunc Lunationes adhuc uno die seriùs contingunt, auferri debent 11, idque usque ad annum 1900 exclusivè: post quem subtrahi

trahi debent 12 dies, propter aliam Bissexti omissionem. At anno 1800, quanquam dies intercalaris omittitur, tamen non fit mutatio in Epactis, Luna aequatione id exigente, ut declarat Clavius in Calendario Gregoriano cap. xi. num. 8. ideoque tantum 11 detrahi debent ut ab anno 1700.

## ANNOTATIO II.

Quando Epacta 25 procreatur à numero aureo majore quàm 11, sumi debet illa quæ in Calendario notata est diverso colore, aut diverso characterè. Epactis quoque 19, diverso colore aut characterè adscripta ultimo diei Decembris, tunc est in usu, quando ab aureo numero 19 gignitur, ut contigit annis 1595, & 1614, & 1633, & 1652; contingetque anno 1671, & anno 1690, & nunquam amplius, nisi post usum 30 linearum Epactarum tabulæ expansæ, ut Clavius docet lo. cit. cap. 12. num. 14.

## PROPOSITIO C.

*Lignum vulnerarium, seu mira Fraxini  
virtutes.*

Claudam hanc centuriam narratione & commendatione mirabilium ac pænè innumerabilium virtutum, quas fraxino attribui deprehendo à varijs Auctoribus, confirmatas frequenti experienciâ, magno quorundam commodo, præsertim in curatione vulnerum, quam ob causam ab aliquibus *Lignum vulnerarium* appellatur. Recensebo prius formam arboris, tametsi notissimæ; deinde virtutes ligni, corticis, foliorum, succi, & omnium quæ originem ab arbore habent.

*Fraxini  
mira vir-  
tutes.*

### §. I. *Fraxini forma, & species.*

FRAXINUS, quam Græci *μελίαν*, Itali *Frassino*, Galli *Fresne*, Hispani *Fresno*, Germani *Eschenbaum*, *Waldeschem*, *Lauweschem*, appellant, arbor est notissima, non apud antiquos tantum, sed apud nos quoque tota in Europa. *Theophrastus* lib. 4. cap. xi. apud *Matthiolum* in cap. 92, libri 1. *Dioscor.* duo ejus genera

*Fraxini  
forma &  
species.*



esse testatur: unum excelsum, procerumque, lignum habens candidum, crassivenium, nervatum, mollius, euodius, ac crispus: alterum humilius, minùs auctile; scabrius, durius, & flavius. Addit, folia esse laurinis folijs similia, in acutius tamen coacta, & ambitu leniter serrata, ramulumque totum (quem unum folium putaveris, quòd simul cuncta folia ferat) singulari pediculo, & singulis folijs conjugatim, velut per genicula pendentibus constare, amplo intervallo conjugationibus distinctis, perinde atque in sorbo: & ferre fructum in siliquis minutum, nucolum, qualem amygdalæ, gustu subamarum.

Plinius quoque lib. 16. Natural. Histor. cap. 13. cùm dixisset, Fraxinum esse arborem proceram, ac teretem, folioque pennatam, multumque Homeri præconio, & Achilles hastâ nobilitatam; addit, Græcos duo ejus genera facere: longam & enodem unam; brevem, durio rem, fulcioremque, & laurinis folijs alteram. Alij, eodem Plinio teste, in campestre & montanam dividunt; ajuntque campestre esse crispam, montanam verò spissam. Videtur tamen Plinius Fraxinum cum Taxo confudisse, cùm dicat, Græcos prodidisse, Fraxini folia esse jumentis mortifera, cæteris ruminantium innoxia. Quæ tamen de Taxo, non de Fraxino Theophrastus prodidit, dicens: *si jumenta (ut ferunt) taxi folia comederint, emoriantur: si ruminantia, nihil incommodi patiuntur.* Matthiolus loco cit. credit, Plinium deceptum fuisse nominum vicinitate; nam Græcis Fraxinus *μηλιά*, taxus verò *σμίλαξ*, & *μίλα* appellatur. Addit, Plinij errorem claram in Italia experientiam comprobare; siquidem taxi folijs, non Fraxini, jumenta non ruminantia necantur.

Humilem fraxinum ait Matthiolus cit. loco vocari à quibusdam. Ornum, & Orneoglossam, ab ipsius fructus figura, quæ linguæ imaginem refert: ob eamque causam in

Officinis vocari avis linguam.

§ II. *Quo tempore cadenda fraxinus, ut virtutes ipsi attributas obtineat.*

**V**irtutes tot ac tantæ fraxino, ubi vis licet obvia arbori, à Botaniciis, Naturalis Historiæ Scriptoribus, Medicis, aliisque varijs Auctoribus (ut sunt Dioscorides, Plinius, Matthiolum, Dothoneus, Lonicerus, Herbarium Lugdunense, Bonitius, Brunfeldius, Jonstonus, & alij quot & quantæ vix ulli aliarum, seu nostrarum, seu peregrinarum arborum, plantarum, herbarum, ac lignorum tribuuntur. Est qui triginta septem virtutes collegit, & ad me misit, iudiciumque meum requisivit. Quas antequam enumerem,

*Fraxinus quando cadenda debeat, ut virtutes habeat.*

Notandum, velle nonnullos, præcipuas virtutes quæ ligno fraxini tribuuntur, tunc solum convenire illi, si cadatur hora primâ qua Sol ingreditur in Leonem. Alij tamen volunt, fraxini lignum, folia, virgas, corticem, succum, &c. virtutes omnes enumerandas obtinere, quocumque cadatur tempore: ut tamen ligni vulnerari vim habeat (de qua paulò post) necessarium esse ut dicto tempore ac hora cadatur.

Sunt qui volunt, cadendum dictum lignum Lunâ existente in Virgine, horâ duodecimâ post mediam noctem, idque fieri posse singulis mensibus. Addunt, sufficere, si sub initium dictæ horæ instigatur unus (aut ut alij, tres) ictus arbori, dummodò eadem deinde die abscindatur; præstare tamen ajunt, si cæsis hæc fiat die & Lunâ crescente, & arbore folijs ornatâ. Sequuntur nunc virtutes.

§. III. *Fraxini virtutes contra vulnera, morbos, venena, dolores varios, aliaque mala corporis.*

**V**irtutes porrò triginta septem, quas dixi fraxino attribui, sunt sequentes, ex varijs Auctoribus collectæ, & frequenti experientia confirmatæ.

*Fraxini virtutes triginta septem.*

1. Sanat lenteriam, colicos & uteri seu matricis dolores, si corpus diligenter ac frequenter fraxini ligno primùm, deinde sputo deorsum radatur ac demulceatur.

2. Sanguinem è naribus fluentem sistit, si dicto ligno radatur, & aquâ frigidâ lavetur facies; manūque illius lateris, in quo nares stillant, idem lignum teneatur donec incalcescat.

3. Vulnus acceptum non putrescit, & sanatur celeriter, si statim ligno illo radatur seu mulceatur, aquâ frigidâ eluatur, obligetur, ac mundum servetur. Experimento proprio id confirmo. Præterito anno cùm sciurum domesticum ac cicurem aliàs, sed me incio ab alio exacerbatum verberibus, attractarem manu dexterâ; momentò dentes Indici digito infligit, & primum articulum ab utraque parte perforat. Statim ergo sanguinem exprimo, atque exsugo, salivâ bene abluo, & fasciollâ mundâ obliquo, ac die illius reliquo (erat circa vesperum) à scriptione inquit abstinere, sollicitus interim, nè secutus tumor aut dolor digiti scribendi facultatem per dies aliquot adimeret: at sequenti die manè tumor nullus, & vix vulneris locus apparuit, nec ullum scribendi impedimentum sensi. Eodem anno cùm Scholasticorum nostrorum unus manum graviter læsisset, & neglectâ curatione inflammationem magnam cum ingenti dolore contraxisset; accepto ab humaniorum litterarum Professore, cui affectam manum ostenderat, ligno fraxineo, eam diligenter & frequenter radit, & brevi tempore, nullo alio remedio adhibito, perfectam recipit sanitatem.

4. Aqua è dicto ligno destillata, & contagionis tempore quotidie manè à jejuno sumpta quantum cochleari capitur, securum reddit à peste, spatio viginti quatuor horarum. Eadem à peste jam correpto hausta bonâ quantitate, si sudet, ac post sudorem (si possit) deambulet, contagionem depellit,

5. Qui è vasis ex dicto ligno confectis comedit, aut bibit, securus à veneno est; nec enim venenum ex dictis vasis propinatum nocet.

6. Succus è dicto ligno destillatus, ac potatus, antidotum est præsentissimum contra venenum.

7. Aqua

7. Aqua è folijs fraxini distillata, malè affectos oculos sanat, si eà frequenter laventur.

8. Eadem aqua potata, renum dolorem pellit, & ictericum morbum sanat.

9. Membrum tumidum, si fraxini ligno statim initio frequenter radatur ac demulceatur, aquâque frigidâ lavetur, detumescit, ac sanatur.

10. Cortex interior fraxini, si vino aut aquâ maceretur, ac potetur, spleneticos sanat. Ajunt etiam, si eadem aqua per triduum porco in potum detur, eum si juguletur, splene carere.

11. Potus è vasis fraxineis antidotum esse dicitur contra lumbaginem, sed lumborum dolorem.

12. Fraxinei ligni frustula ambabus manibus detenta ut incallescant, adeo sistunt sanguinem, ut nè gutta è scarificatione effluat, donec abijciantur. Experimentum fecit quidam è S. Francisci ordine, & verum esse deprehendit.

13. Fraxinus adeo venenatis animalibus, præsertim serpentibus, contraria est, ut nè umbram ejus, quantumvis manè aut vespèri longissimè projectam, subeant. Et si circum in terra è fraxini folijs ab una, ex igne ab alia parte facias, & serpentem in medio aut viperam colloques; subire ignem ac transilire potius, quàm fraxinum tentabit. Imò serpens fraxini virgâ tactus, stupefit, & moritur. Testatur inter alios Plinius, qui lib. 16. Natur. Histor. cap. 13. ait: *contra serpentes verò succo expresso ad potum, & imposta ulceribus, opifera, ac nihil aquæ, reperiuntur fraxini folia: tantaque est vis, ut nè matutinas quidem, occidentes vè umbras quàm sunt longissimæ, serpens arboris ejus attingat: adeo ipsam procul fugit. Experti prodimus: si fronde eà gyro claudatur ignis, & serpens, in ignem potius, quàm in fraxinum fugere serpentem. Mira Naturæ benignitas, prius quàm hæ prodeant, florere fraxinum, nec ante conditas folia demittere.*

14. Infans recèns natus, & ter continenter in mactra seu alveolo è fraxini ligno lotus, immunis esse dicitur toto vitæ tempore à morbo caduco.

15. Acetum in doliolis è fraxini ligno confectis, citò perficitur, & optimum redditur.

27. Medetur membris frigore destructis, si ligno illo & salivâ deliniuntur. Antidotum quoque est contra atrophiam seu tabem, inflammationes, tremorem membrorum, & alia.

28. Parturientes faciliùs ac feliciùs pariunt, si fraxineum lignum lecto imponatur.

29. Farina serratilis è ligno fraxini, quantum cultri apice capitur, sumpta à pulmonario cum pauxillo vini adusti, sanat pulmones affectos. Eadem farina cum vino adusto ter quaterve sumpta, sanat dysenteriam, dolores colicos, & uteri.

30. Succus e fraxino distillatus, ac potatus, antidotum est praesentissimum contra venenum, morsus serpentum ac viperarum, hydrophisin. Purgat etiam & corrigit pulmones.

31. Folia in vino cocta, & capiti imposita, dolores ac morbos capitis sanant.

32. Cortex in aqua coctus, ac potatus, minuit splenem, & aperit pulmonem constipatum.

33. Cortex interior pulverizatus, & cum carnis iusculo sumptus, aperit intra duarum horarum spatium apostemata interiora, atque expellit.

34. Idem cortex pulverizatus, & vulneribus priùs benelotis ac purgatis inspersus, ea sanat, tam in hominibus, quàm brutis animalibus.

35. Sal è fraxini ligno confectus, quantum cultri apice capitur, cum aqua antè dicta potatus, antidotum est contra pestem, febres malignas, pulmonis aliosque internos morbos.

36. Oleum ex eodem ligno sumptum medetur doloribus pectoris, promovet urinam, & mala interna sanat.

37. Equus ex compressione læsus sanatur, si antequam intumescat locus, eo ligno frequenter ac diligenter deliniatur, ac frigidâ lavetur. Si jam intumuit locus læsus, aperiatur ad inferiorem partem, exprimatur pus, lignum vulnerei

imprimatur, & frigidâ lavetur.

§. IV. *Crisis nostra de fraxini virtutibus.*

**Q**Uas hæcenus enarravi fraxini virtutes, Germanico idioma-  
te non nemo à se collectas ad me misit infra notando anno,  
meumque circa illas iudicium exquisivit. Culin hæc respondi  
verba.

Circa fraxini, seu ut vocant, vulnerarij ligni præparatio-  
nem, usum, atque effectum, tametsi Medicorum potius, quàm  
Philosophorum ac Mathematicorum iudicium requiratur, nè  
tamen desiderio tuo desim, hæc breviter statuo.

I. In cæsiōe, ac præparatione, uti & in applicatione,  
nihil superstitiosi, nihil illiciti reperio. Certum enim est, plane-  
tarum vires pro alia atque alia stellarum constitutione seu aspe-  
ctu, augeri, ac minui. Experientia quoque & ratio docet, fri-  
catione vulnèrum, partiumvè læsarum versus aliam atque aliam  
partem corporis, humores versus easdem derivari, ac dissipari.

II. Vanum tamen est, saltem non præcisè necessarium,  
ut lignum cædatur primâ horâ ingressus Solis in Leonem. Nam  
posito quòd Sol in Leone constitutus influat virtutem sanati-  
vam in fraxinum; tempus illius influxus non consistit in indivi-  
sibili, nec præcisè in una hora, sed habet latitudinem. Adde  
quòd non exprimat, utrum Sol ingredi debeat in Astenisum  
Leonis, an verò in signum Leonis primi Mobilis, aut Firmamen-  
ti; & tamen initia horum duorum Signorum distant inter se ferè  
integro Signo, seu 30 gradibus, adeo ut Sol uno ferè mense citius  
ingrediatur unum, quàm alterum Signum.

III. Dato quòd aliqui effectus ex recensitis veri sint, ple-  
rique tamen mihi videntur dubij, & vel conficti, vel nullâ certâ  
experientiâ comprobati. Itaque nimia virtus tribuitur dicto  
ligno: qui autem nimium promittit, totum, aut ferè totum red-  
dit suspectum. Hæc mea est sententia. Dabam Herbipoli  
Die 29. Octobris 1659.



## LECTORI MEO.

**V**esuvium, notissimum in Campania felice prope Parthenopen montem, plurimisque à condito Orbe incendijs non tam clarum, quàm formidabilem, cinerum sumo, bitumine, aliâque piceâ atque sulphureâ materiâ permistorum ingentes eructasse aggeres, nec novum est, nec rarum. Olim Byzantium usque volavit ejusmodi rejectamentorum pluvia, si fidem adhibeamus Procopio lib. 2. de Bello Gothico: aliâs Africam transvolavit, si Dionem audimus in Tito: quin & totam quandoque Europæ faciem contextit, Marcellino teste in Chronico. Idem Universitatis tellimonio agnitum aliquando, testatur Cassiodorus Variar. Epistol. 50. Incredibile ergo non est, quod Julius Caesar Recupitus refert in Vesuviani incendij Nuntio, Anno hujus seculi post Christum natum sextidecimi trigesimo primo, in famoso simul & calamitoso illo incendio, cinerem vel eo ipso primo die, quo mons ardere cepit, plerasque Neapolitani regni urbes implevisse, in Dalmatiam transmississe, Egeum mare propè contexisse. Mitior suit strages, quam simile malum ante biennium, Anno videlicet M. DC. LX. ejusdem Neapolitani regni urbibus non paucis intulit. Die quippe tertiâ Julij, albescente jam die (ne famosa tragedia spectatores deessent) in dicto monte fumus igni mistus prima dedit calamitatis securæ præludia. Qui fumus primò, ut olim, teste Juniore Plinio Epistolar. lib. 6 ad Tacitum, in pini similitudinem attenuatus, tum in vastissimi montis effigiem excrevit. Mons montem peperisse videbatur. Fumum hunc secuti sunt

Subterranei tonitruum instar fragores, igneorum globorum  
 ejaculationes formidabiles, fulgura, & fulmina; tandemque  
 ingens cineritia arenæ copii, quæ omnem circâ regionem longè  
 latèque contexuit, ac post dies multos, quibus diu noctuq; cine-  
 rea illa pluvia duravit, in portentosas diversarum formarum  
 ac magnitudinum cruces, lineis hominum vestibus, alijsque  
 telis ac mappis impressas, degeneravit, ingenti hominum stu-  
 pore. Harum genesim, genesisque causam, significationem,  
 aliaque adjuncta, doctâ discussit Diatribâ P. Athanasius Kir-  
 cherus, eamque Romæ impressam ad me misit. Quæ cum  
 digna sit ut ad multorum notitiam veniat, huic nostro  
 Opusculo adjungere in LECTORIS MEI  
 gratiam, non dubitavi.



ATHANASII  
KIRCHERI

SOC. JESV

DIATRIBE

De prodigiosis Crucibus, quæ  
tam supra vestes hominum, quàm res alias,  
non pridem post ultimum incendium  
Vesuvij Montis,

NEAPOLI

*Comparuerunt.*

SERENISSIMO PRINCIPI  
LEOPOLDO  
GVLIELMO,

ARCHIDVCI AVSTRIÆ,  
Duci Burgundiæ, Ordinis Teu-  
tonici Magno Magistro, &c.

ATHANASIVS KIRCHERVS  
SOCIETATIS JESV

Felicitatem.



*RVX pietatis & victoriæ labarum,  
pijs & invictis Imperatoribus adora-  
tum, Te, Serenissime LEOPOLDE,  
Imperatorum progeniem ardentem am-  
bit, quem pietas lactavit in cunis, quem victoriæ  
palmis toties coronavit. Dicat hoc Belgium,  
Martis filia, Bellona gemella, sub cujus discipli-  
na Regnorum omnium ira pugnant, ipsa Orbem vi-  
ctura faciliùs, quàm ab Orbe vincenda, si unita:*  
ubi

ubi non una Troja, tot Hectores habuit, quot belli  
 duces; & hi te suum Hectorem habuerunt. Ubi  
 robustior Hercule falsum reddidisti vulgatum ada-  
 gium, dum **LEOPOLDVS** unus, non <sup>Leopoldus</sup>  
 unum triumphans hostem, <sup>anagram-</sup> vocari meruit Pello. <sup>maticus,</sup>  
<sup>Pello duos.</sup>  
 duos. Ubi quoties ipse pugnasti, tot victorias,  
 quot pugnas numerasti. Et nihilominus inter cades  
 hominum, & strages Urbium, sic in Castris vixisti,  
 ut inter septa sacrorum Altarium in claustris vi-  
 xisse videreris: innocentia morum tam tenax, ut,  
 quod prodigium est in Principe, ea sola faceres, non  
 qua possent fieri, sed qua decerent. Domesticis Tuis  
 necessitatem quandam probitatis induxisti, nemi-  
 nem inter illos amicum habens, inimicum DEO;  
 inter subditos neminem fovisti, qui aut non esset  
 optimus, aut non haberetur talis: vel inter milita-  
 rem licentiam, milites docebas sanctitatem. Non  
 est igitur mirum, si Crux Teutonica, pietatis &  
 victoria tessera, Te peculiariter adamaverit, quae  
 fulgens in veste candida, amabilem vitae Tuae  
 candorem, colore suo hostium tuorum pallorem ex-  
 primit: Tibi praeter reliquis mortalibus uni debita,  
 sive ob natalium, quo fulges, Imperatorium splen-

dorem; siue ob heroicam, qua fulguras, belli gloriam; siue ob Ausiriacam, qua flores, pietatem; siue denique ob prudentiam, qua polles præ reliquis ævi tui Principibus, omninò singularem. Crux hodie solita splendere inter gemmarum sidera in Regum vertice, vestem tuam ante gemmeas coronas exoptauit, ubi nobile Hieroglyphicum, religionem **LEOPOLDI** sanctius, fortitudinem animi generosius, laborum tolerantiam animosius, zelum fidei felicius, virtutum omnium cultum incorruptius exhibet Orbi universo. Ad Tuum igitur solium à me defertur hæc brevis DIATRIBE plurimorum jam dudum votis expetita, quæ Cruces hominum vestibus imprimi solitas, vel ut debite sceleribus vindictæ prasagium, vel ut ludentis Naturæ prodigium explicat. Unum hoc me sollicitum angit, quod tantillum Opus tanto Principi exhibeam. Suasores habui hujus meæ temeritatis, & fiduciam benevolentie Tuæ, & debitum obseruantie meæ in Mecenatem optimum. Cùm esse nequeam beneficus, tantillo munere conor esse beneuolus. Tua me solatur humanitas, qua non quantum, sed ex quanto; non ex dignitate Tua, sed

ex




*ex officiosa placendi voluntate, metiri soles Tuorum in Te officium; magis expendens, quid possint, quàm quid debeant. Et quoniam ego inter plurimos debeo plus quàm possum, nec minus tamen cupiam quàm debeo; minores pariter, ac majores ingenij mei fructus, utpote Tuos, Tuæ scilicet Tuorumque munificentia radios educatos, ex affectu, ex debito Tibi dico, & consecro. Vos interim, ô Superi, Patronum optimum LEO-  
**POLDUM** ad publicam Imperij & totius Europæ salutem natum, annis, honoribus, meritis donate, ornatè, cumulate: ut cujus eximj facinoribus indulstis felicitatem, felicitati perennitatem concedatis. E Coll. Rom. 25. Martij 1661.*

Gosvvinus Nickel Soc. JESV  
Præpositus Generalis.

**C**VM Opus quod inscribitur Diatribe de prodigiosis Crucibus, &c. à P. Athanasio Kirchero nostra Societatis Sacerdote compositum, aliquot ejusdem Societatis Religiosi recognoverint, & in lucem edi posse probaverint; potestatem facimus, ut Typis mandetur, sijs ad quos pertinet, ita videbitur. In cujus rei fidem has literas manu nostrâ firmatas, sigilloque nostro munitas damus. Roma 21. Januarij 1661.

GOSWINVS NICKEL.



Imprimatur, si videbitur Reverendiss. P:  
Mag. Sac. Pal. Apost.

*O. Archiep. Patracen. Vicefg.*

*Imprimatur.*

Fr. Raimundus Capisuccus, Sac. Apost. Pal. Mag.  
Ord. Præd.

PARS

# PARS PRIMA, HISTORICA.

## CAPUT I.

### *De varijs prodigiorum classibus.*

**N**ULLUM arbitror in hac Mundi machina Divinorum operum esse, quod tantâ admiratione mortalium pectora rapiat, tantâ subinde formidine percellat, ac nonnulla, quæ uti inaccessis divinæ Sapientiæ claustris reconduntur, ita nullum quoque quantumvis purgatissimis mentibus ad eas, non dicam penetrandas, sed ne ad concipiendas quidem aditum patefaciunt, ac potissimum in triplici generum differentia versantur.

Prioris generis sunt illa miracula, quæ Omnipotentis Dei dextera vel per se immediatè, vel mediantibus hominibus sanctitate conspicuis, vel Angelis, ineffabili quodam modo operatur.

*Prodigiorum tria genera.*

Secundi generis sunt, quæ subinde Angelorum dæmonumve ope, Deo, vel ad gloriam suam manifestandam, vel ad delicta mortalium vindicanda, permittente contingunt. Et quamvis hæc naturalium causarum catenis multiplici nexu implicentur; fieri tamen non potest, ut ea ob humani ratiocinii imbecillitatem, dum obscuris tantum similitudinum umbris, & sub notatione confusa concipiuntur, perfectè quoad modum explicentur. Quemadmodum enim infusâ naturalium rerum scientiâ dotati sunt, ita occultos Naturæ consensus dissensusque tam aptè & concinnè applicare nōrunt, ut insolitis & prodigiosis effectibus producendis nihil ijs denegatum videatur. Hujusmodi sunt, repentina elementarium corporum concitatio, ventorum impetus, quo vastas turrium ædificiorumque moles passim stratas, sylvas everfas & civitates, mare disjectis littoribus in

*Angelorum ac Dæmonum potentia.*

R r

campos

campos transfusum, multa unà cum incolis domorum millia diruta, & spiritu procellarum abrepta legimus. Huc quoque revocatur animalium locutio, uti de Asina Balaam sacra refert Historia; & Plinius ait, anno Urbis 676. gallum gallinaceum, anno verò 710. bovem quoque locutum in Suburbij Romæ paulò ante Julij Cæsaris mortem, frustra se urgeri dicentem, quod non frumenta, sed homines propemodum essent defuturi. Huc spectant varia ex aëris elemento assumptorum corporum schemata, sudores imaginum, voces sylvarum, lapidum, ceu ex luco vel æthere ferientes, quorum exempla ubique sunt obvia.

*Natura  
miracula.*

Terti generis sunt, quæ puro quidem Naturæ subduntur imperio, attamen tantò à perfectâ hominum intelligentia remotiora, quantò ob varium causarum confluxum sunt occultiora; adeo ut non immeritò in omnibus rebus τὸ Θεῶν sive Divinum aliquid inesse sapientissimus censuerit Hippocrates: quæ tam latè patent, quàm latè patet multiplex rerum, specierum, individuorumque constitutio. Etenim divinorum omnium, quæ aliquam suæ occultioris indolis notam exprimunt, alia quidem ab Orbe condito illicò immutabili lege, ipsisque innata seminibus adhærescunt: quæ quamvis in Naturæ fecundissimo sinu, rerumque sensibilibus classe contineantur; vtrium tamen suarum actionumque occultas promunt & abditas causas, ijs solummodo notas, quos Pater luminum hoc inestimabili intellectûs munere beaverit; & sunt, quæ Philosophus Θεωρητικὰ τῶν Φύσεω, Latini Naturæ dicunt miracula, cujusmodi potissimum sunt, quæ de lite & amicitia, sive de Sympathia & Antipathia rerum in controversiam cadunt. Supra hanc aliud genus, quod propriè τὸ Θεῶν sive Divinum nominavimus, non à primis Mundi natalibus rebus insitum, non perpetuum & constanti perenni- que Naturæ propagine ubique extensum, sed tamen ad hominis bonum novâ prorsus insolitâque ratione certis locis, temporibus, aut etiam simulacris sensibilibus illigatur; & omne id continet, quod in homine Microcosmo, vel Mundi totius ambitu circumfuso, ab illa communi Naturæ specie atque usitata lege exorbitat, & admiratione sui mortalium sensus animosque ex-  
agitat;

agitāt; quæ Græci *νεύρων*, Latini monstrorum, ostentorum, prodigiorum, portentorum venomine amplexi sunt, nos etiam *δειάς ἐνλάσις*, Divina vocitamus spectacula, quòd nullum ejusmodi sit, quin præsentis Numinis aut Divinitatis alicujus luculentum indicium præferat; & sunt in Cælo quidem novorum siderum geneses, Cometarum sub multiplici differentia apparitiones; In atreo elemento ventorum, turbinumque insolita sævities, prodigiosa sanguinis, frumenti, lapidum, animaliumque pluvix; In aquis insolita lacuum intumescencia, portentosa diluvia, repentinæ Maris fluminumque inundationes, quas ruptis aggeribus magna cum hominum, animalium, agrorumque ruina, nil præter turrium apices adhuc extantes, ceu funesti spectaculi indices, nonnullis in locis reliquisse legimus; In Terra prodigiosa & repentinæ fontium scaturigines, aut desitiones, montium absorptio, novorumque generatio, formidanda maris, terrarum, Vulcanorumque incendia; In minori Mundo, morborum inauditorum, monstrorumque progenies; In politico Mundo, perturbationes horrendæ, invisæ rerum humanarum catastrophæ: quibus quia omnium Historicorum monumenta referta sunt, diutiùs immorari nolumus.

Et ut ad propositum nobis argumentum propiùs accedamus, ex recensita ostentorum serie non infimum locum obtinuisse existimamus id, quod magnâ omnium formidine Neapolitona pridem comparuit, prodigiosa videlicet & repentina Crucum, in lineis hominum vestimentis pantamorphæ Naturæ penicillo pictarum, exhibitio; cujus causam & rationes antequam explicemus, nè quis forsan ostentum hoc omnibus sæculis invisum inauditumque existimare possit, primò historicam hoc loco attexemus narrationem, quâ nullo non tempore hujus generis portenta diversis in locis & regionibus observata fuisse,

Deo favente, ostendemus, ut ex ijs quænam miraculo quæ Naturæ vi ortæ sint, patefiat.

*Crucis  
prodigiosa  
Neapolitana, inter  
Naturæ  
miracula  
numerata.*

## CAPUT II.

*Historica, de miraculosa Crucum in vestimentis  
hominum apparitione, Relatio.*

*Crucis va-  
rijs tem-  
poribus in ho-  
minum ve-  
stibus appa-  
ruerunt.*

**A**Nno salutis 363. Julianus Apostata secundo Imperij sui anno, Liberij Pontificis duodecimo, juratus uti Christianorum., quos in opprobrium Galilæos vocabat, ita & Crucis Christi inimicus, cum ex Evangelio cognovisset celebre illud de eversione Hierosolymæ Templique imminens exterminium, ita ut nè lapis quidem supra lapidem mansurus esset; ad irritandam annullandumque Salvatoris nostri vaticinium, Judæos ad Templi instaurationem, quibuscumque potuit modis, inducere conatus, omne ipsis in sumptibus faciendis subsidium pollicitus est; quod & præstitit. Judæi tam opportunam jam dudum concepti moliminis occasionem nequaquam aspernandam rati, tum consilij auxilijsque Juliani impulsu, tum ardenti conficiendi operis desiderio perciti, opus occeperunt tantâ alacritate, & tam ferventi mentis æstu, ut vel ipsæ fœminæ, cum cophiis deessent, complicatis vestium fimbrijs sordium rejectamenta efferrent; omnem muliebrem mundum, monilia, catenulas, in aures, in operis felix auspiciu impenderent, reliquis Hebræis per Orbem dispersis, vel ad primam hujus molitionis famam ingentem ubique locorum pecuniarum vim collectam subministrantibus. Anxit hæc res mirum in modum Christianos, præsertim cum Judæi ipsis falsum Christi vaticinium ex ipsis fundamentis adhuc integris & inconcussis, id ipsum luculenter commonstrantibus, exprobrarent. At S. Cyrilli Hierosolymitan tunc temporis Episcopi prophetico spiritu animati, jam tempus adventasse dicentis, quo completo Christi vaticinio lapis non maneret super lapidem, in fide perstiterunt; Judæis interim cum risu verba sancti Viri acceptantibus, atque Impigrè operi insistentibus: Ecce derepente formidabilis terræ motus extortus, omnes veterum Templi structurarum lapides non tantum (horrendum dictu!) funditus concussit, sed & unâ cum



cum vicinorum ædificiorum substructionibus ita discussit disjecitque, ut nullus super lapidem lapis mansisse videretur: Judæis partim occisis, partim ad formidabile spectaculum fugâ sibi consulentibus. Non destitit hic irati Numinis vindicta: ignis cælitus demissus terræ motum subsecutus, omnia opificum instrumenta, malleos, scalpra, palas, setras, secures, ascias, ligones, omnia denique quæ operæ ad opus perficiendum habebant peridonea, unâ cum Judæis flammâ, incendioque vastata in cineres redegit. Et nè quis hæc casu accidisse arbitraretur, aliud ingens accessit prodigium. Si quidem sequenti nocte in mapis Altarium, libris, vestimentis, amictibusque non Christianorum quidem, sed Judæorum, Gentiliumque tertio jam evidentiorique miraculo, Cruces radiorum lumine figuratæ non Hierosolymis tantum, sed & Antiochiæ, alijsque vicinis Urbibus impressæ comparuerunt; (eidem Juliano, in extis animalium introspectiendis Crucem coronatam apparuisse referunt;) quas cum illucescente die Hebræi intuerentur, easque nulla vi, vel artis industriâ eluere possent; multi metu & intimo mentis horrore perculsi Christum, quem blasphemis primò vocibus insectabantur, in vestibus suis jam impressum signatumque, Deum constantissimè confessi sunt; complures verò pertinacioris cervicis impetu abrepti, felicem, quæ ijs obtigerat, sortem, retento Judaismo, infelicitèr abjecerunt. Atque hoc pacto Judæi, & Gentiles locum pariter, & inani labore capti, justo Dei judicio in omnes terras dispersi reliquerunt; adeò ut verificatum videatur istud elegans S. Leonis pronunciatum: nullis artibus & technis, nullo crudelitatis genere destrui posse sacramento Crucis fundatam Religionem.

*Cruces in  
vestibulu-  
daorum ap-  
parentem  
per Juliani  
Apostata.*

Anno 361. Juliano Apostatâ fines Illyrici ingresso, fertur (inquit *Sozomenus*) vites post vindemiam circa virgiliarum occasum, uvis acerbis & immaturis onustas apparuisse, roremque tum in ejus, tum in Comitum suorum vestes ex aëre delapsum, singulis guttis signum Crucis impressisse, ejusque portentæ significationem hanc esse dicebant: Imperatorem Julianum immaturo ætatis suæ tempore periturum, Religionem autem Christianam cælestem esse, & omnes sacrâ Crucis Christi

*Cruces in  
veste Julia-  
ni Apostata-  
re. & comi-  
tum ejus  
apparent.*

figurâ cum tempore signandos fore. Vaticinium eventus docuit.

*Crux in  
monte Gol-  
gotha appa-  
ret,*

Anno Christi 353. in Monte Golgotha, ipso die Pentecostes, lucidissimum signum Crucis apparuisse, *Sozomenus* testatur; quod tanto radiorum fulgore omnia illustravit, ut omnes ex omnibus Mundi partibus confluentes homines in admirationem raperet, præsertim cum in altissimo æris loco multis stadijs à terra distito suspensum hæreret, ea potissimum de causa à Deo Opt. Max. exhibitum, quod cum Constantius Cæsar bellum adversus Catholicam Dei Ecclesiam gesturus, vexillum erexisset impietatis, Christus, cujus maxime Divinitas impetebatur, illud ipsum, quo universam cum impijs impietatem debellaret, divinum hoc signum supra sanctum Montem immensâ claritate coruscum cælitus demonstrare voluit, illud quod in mortali vita suis inculcârat, indicans: *Confidite, ego vici Mundum.* Rem sanè eventus docuit: nam virtute divinâ tantò semper Ecclesia effulsit gloriosius copiosiusque effloruit, quò magis impiorum armis extincta putabatur.

*Crucis in  
vestibus  
tempore  
Arcadij  
Imperato-  
ru,*

Anno 395. Arcadius Imperator cum arduum in favorem Armeniorum contra Persas bellum indixisset, & jam coeuntibus in prælium militibus, incredibili mentis fervore arderent; ecce derepentè aëteæ Cruces in vestibus patuère, luculentum victoriæ, quâ contra hostes potiri debebat, indicium: unde & victor aureum numisma eodem Crucis signo expressum ad posteritatis memoriam transmisit. Ita *Prosper.*

*Crucis in  
vestibus  
centi bapti-  
zatorum.*

Anno 419. quo multæ civitates villæq; in Palæstina terræmotu collapsæ sunt, eodem Christus Servator noster supra Montem Oliveti de lucida sese nube spectandum dedit: quo viso, auditoque, multæ Nationes, gentilitatis adhuc immerse tenebris, Christi fidem amplexatæ sunt, atque in singulis (mirum dictu!) sacro baptismatis fonte ablutorum vestimentis & tunicis Crucis Christi imago expressa illicò apparuit. Quæ fusiùs *Marcellinus* in Chronico suo describit.

*Crucis in  
vestibus po-  
ste affixo-  
rum*

Anno 746. Constantini Copronymi Imperatoris anno 6. post exortam derepentè formidabilem caliginem, secuti sunt terræmotus horrendi in Syria & Palæstina; hos excepit pestis ingui-

inguinaria, ex Calabria & Sicilia originis suæ principia ducens, quæ Constantinopolim invadens per triennium ita eam depasta est, ut in solitudinem redigeretur, repletisque cunctis monumentis, lacubus, hortis, vineis, ubi mortui sepelirentur, nullus superesset locus; grande prodigium! in vestimentis eorum qui inficiebantur lue, Crucum figuræ nullo sensibili motus vestigio impressæ cernebantur, & sic vitam omni medicæ artis indultriâ irritâ, sinebant. Et cum irati Numinis vindictam cognoscerent, omnes Divinam clementiam quibuscumque possent modis sollicitabant; solus Constantinus in solita sua pertinacta persistens, blasphemijs in Deum Sanctosque, cælum & terram infestare non desistebat; quæ omnia fusiùs prosequitur *Theophanes, & Theodor.*

Anno 954. Ignis cælicus demissus vestimentis hominum inhærebat sub forma Crucularum, à quibus si solum liberabantur, quia ad Ecclesiam S. Mariæ Parisijs se reciperent. Ita *Luitprandus, & Leo Ostiensis* in suis Chronicis.

*Cruces igneæ in vestimentis hominum.*

Anno Christi 958. Regni Ottonis Magni Cæsaris an. 12. in hominum vestibus Cruces apparuerunt, compluriumque vestes veluti lepræ & impetiginis sanie conspersæ infectæque maculis videbantur. Quospectaculo omnes ex malorum impendentium veluti omine quodam, incredibili formidine perculsi, ad irati Numinis iustitiam salutiferis poenitentiae operibus mitigandam confluxerunt. Vide *Trithemium* de Monasterio Hirsaugiensi.

*Cruces in vestibus hominum tempore Ottonis Imperatoris.*

Anno 1295. In Regno Castellæ duos insurrexisse Pseudo-prophetas religionem Judæos, testatur Liber, qui inscribitur *Fortalitium fidei*; hi cæteris Judæis ultimum suæ redemptionis terminum vaticinati, ultimum quarti mensis prædicti anni diem assignaverant; unde Judæi spe ferebantur, in dicta die sese, quod tot annorum sæculorumque intervallis unice expectaverant, à Deo redemptionis signum habituros. Quare consuetis Synagogæ cærimonijs sese expiantes, jejunijs elemosynisq; exoptatum à Deo promissum sibi signum operiebant. Appropinquante verò die omnes ad Synagogam, candidis pretiosisque, quibus quisque poterat, induti syndonibus, more in solemni expiationis die ipsi solito, concelebrant. Et ecce derepente, Divinâ utique dispen-

*Cruces in vestibus Iudaorum.*

dispensatione consilij, non ijs duntaxat, quibus induebantur syndonibus, sed & in ijs quoque quæ domi asservabantur, Crucis signa apparere. Quorum prodigioso spectaculo nonnulli quidem pavore correpti opus dexteræ Excelsi altius contemplantæ ad Orthodoxam fidem transierunt, alijs durioris cervicis, quod arte diaboli id contigisse dicerent, in solita mentis contumacia perseverantibus. Hanc historiam *Alphonsus Spina* medicus Judæus, huic miraculo præsens, volumine integro contra Hebræos, quod de Bellis Domini inscribit, comprehendit, quo plures deinde ex eadem Hebræorum secta convicti, Christianam Religionem amplexi sunt.

Anno 1500. ut *Spanshemense Trithemij* Chronicon testatur, novo prodigio, Cruces in lineis vestimentis hominum, in indusijs peplicque mulierum, in mensarum mappis & lintheaminibus, non solum in ijs, quæ in quotidianum usum cedebant, sed & ijs, quæ cistis reconditorijsque inclusa nulli aëris influxui exposita videbantur, in altaribus quoque palliisque eorundem, sæpe sæpius apparuerunt. In *Spanhemensi* Monasterio vicinisque locis primum visæ, magno omnes timore ac horrore perculerunt, tam repentinâ natæ genesi, ut in Ecclesia, dum *Salve Regina* à Monachis cantaretur, ad 30. homines, qui sine Crucum signaculis Ecclesiam ingressi fuerant, jam innumeris signati Crucibus exirent. Nec hic desijt Crucum apparitio; siquidem in Crucenaco, alijsque villis circumjacentibus, deinde *Moguntiz*, *Bingæ*, exterisque ad *Rhenum* oppidis visæ, animos mortalium mirè consternabant. Erant autem Cruces parvulæ, & confusi coloris, ac si pannus pinguedine quadam mixti coloris esset inunctus, nec poterant ullâ lotionē deleri; sed post nobis, aut decimum diem per se deficientes evanuerunt. Ostentum fuisse divinitus expressum eventus docuit; siquidem post biennij decursum magna secuta pestilentia Vrbes hominibus, Provincias incolis viduavit.

Admiratione digniora fuerunt, quæ anno 1500. in *Leodien*si Diocesi visa sunt, quemadmodum ex litteris Episcopi ad *Maximilianum Cæsarem* ea de re datis patet; nempe à festis Paschalibus illius anni, singulis diebus, diversis in locis apparuisse publi-

*Cruces in  
Spanhemensi Mo-  
nasterio, &  
locis vici-  
nis appa-  
rent in vo-  
libus.*

*Cruces in  
peplu mu-  
lierum in  
Leodien*  
*si*  
*diocesi.*

publicè & inopinatè, seu in Ecclesijs, seu in plateis, aut domibus, aut etiam cubiculis signum dominicæ Crucis perfectum, jam simplex, modò duplex, aut cum minoribus etiam ad latus Crucibus in formam scutarij typi Regni Hierosolymitani, nigrum autem & rubicundum, ita ut in aliquibus verus sanguis effusus videretur; apparuisse autem ut plurimum supra capita mulierum, & maximè puellarum in summitate pepi. Mulierem quandam 22. annorum, cùm ejusmodi Crucem in peplo animadvertisset sanguinolentam, territam cum reverentia peplum illud loco mundo reposuisse, aliudque capiti imposuisse, in quo mox similis Crux apparuit, adeo ut mutatis novem dierum spatio tredecim pepis, in singulis idipsum videre contigerit. Dum aliquando nonnulli eà de re cum illa colloquerentur, derepentè in ejus mento visam esse Crucem latitudinis unius digiti, coloris, & saporis mellei; cumque ad astantium monitionem manum admovevole voluisset, apparuisse etiam in ea similem Crucem, atque utramque post duas horas disparuisse: apparuisse deinde super eandem varia alia signa, ac nonnullos characteres, & in mariti indusijs Cruces sanguinolentas: monitam mulierem à Parochò, ad Ecclesiam se conferret, paruisse, & docto Theologo peccata sua confessam esse, ac nihilominus ad peplum capitis erupisset tantam sanguinis copiam, ut in extremam usque simbriam deflueret, quæ & in figuram Crucis sese amplificabat, ita ut attrectatus digito adhereret in præsentia Episcopi, qui ibi erat. Hæc *Naucerus*. De hisce prodigijs Crucibus, elegans sanè poëma, Maximiliano Cæsari inscriptum, edidit *Franciscus Picus* Comes Mirandulæ.

Anno 1501. denuò per Germaniam Cruces sanguinolentæ in hominum vestimentis, instar guttarum sanguinis de cælo delapsæ apparuerunt.

Anno Christi 1550. uti Spanheimense *Trithemij* Chronicon testatur, Cruces sanguineæ, varijque characteres in pepis mulierum apud Leodieneses & Trajectenses ad Mosam apparuerunt, quæ subito ex aëre in conspectu virorum fide dignissimorum lineis panniculis impressæ nullum non summâ admiratione compleverunt. Intererat inter alios Matthæus Herbe-

*Cruces alia  
varijs tem-  
poribus ac  
locis appa-  
rent.*

nus, Ecclesiæ Leodiensis S. Servatij presbyter, qui tam insolito & repentino prodigio percussus, luculentum de ijs tractatum edidit.

Parisijs anno 1588. (uti mihi retulit Eques Valerianus Gallus *autentus*) similes Cruces in stropholiis, lintelsque repentinâ comparitione visæ sunt; secuta sunt mox horrida bella, fames, pestis.

Anno 1660. tandem ultimis hisce temporibus, dictum Crucium ostentum & Neapoli comparuit.

Nihil igitur restat, nisi ut de harum similiumque origine, causis, & significatione impofterum nostrum decurrat ratiocinium; ut quid de ijs sentiendum sit, patefiat. Quod antequam faciam, protestor in hisce prorsus nihil me, quod aut pietati Christianæ, aut timori Dei In animis hominum concitando præjudicio futurum sit, asserturum; neque proprio me frectum iudicio quicquam dicturum, quod SS. PP. Theologorumque unanimi doctrinæ non usquequaque consentiat. Neque enim facile negârim, applicationem singularem ut plurimum causarum naturalium ad formationem huiusmodi Crucium concurrere; & valde probabile est, sæpe Angelorum, vel dæmonum operam intervenire.

## PARS SECVNDA, P H Y S I C A.

### CAPUT I.

*Necesse est, subinde prodigia apparere.*

TANTA est Divinæ clementiæ magnitudo, ut dum vel maxime mortalium ulciscendis sceleribus incumbit, tùm vel maxime misericordiæ sinum aperire videatur. Minatur, ut parcat; ut emendet, verberat; ut profit, occidit; ut sanet, vulnerat. Quod tum potissimum manifestum sit, cùm librum illum, uti est



est apud Ezechielem, foris, & intus scriptum, cui titulus Lamentationes, Carmen, & Væ, explicat. Per librum hunc arcanis ac hieroglyphicis Divini nutus Symbolis notisque insignitum, certè nil aliud fortassis allegoricè, quàm vasta Mundi machina, præter alios sensus Sac. Scripturæ proprios, innuitur; in qua cælum horrendis phasmatum monstris veluti querulum suas contra mortales exponit lamentationes; insolita elementorum Ignis, aëris, & aquæ commotio, montium terrarumque incendia, aquarum inundantium fragores, ventorum aërisque exagitatio, ominoso sibilo & murmure formidandum carmen præcitant; Tellus tandem prodigiosis motibus dum fusque deque vertit omnia, dum infandos monstrorum partus producit, dum in politico statu incredibiles tum perturbationes, tum immutationes exhibet, Væ illud malorum omnium calamitatumque Iliadem signat. Cælum librum esse, in quo omnium rerum futurarum eventus Divinâ manu descripti sint, S. August. in illud Isaia, *Cæli sicuti liber complicabuntur*, docet. Imò Prædix in Ezechielem cap. 2. expressè dicit, Librum hunc foris, & intus scriptum cælum esse, idque ex autoritate S. Joannis in Apocalypsi, ubi liber producit septem prænotatus sigillis, quorum sextum ita describit: *Sexto sigillo libri, Apostolus indicat Mundi ordinem perturbatum, quo non unius, aut alterius significatur interitus, sed Universti totius consummatio, denique malorum omnium Colluvies, & cataclysmus, non immixtus, sed potius effusus super terram consequitur.* Quæ quidem uti rarò accidunt, ita quoque homines docere videntur, ut mentem quandam supramundanam, omni naturâ superiorem, Infinitâ providentiæ suæ dispositione omnia in omnibus moderatricem cognoscant, nè ut nonnulli, stultorum quorundam Philosophorum more, opificem suis operibus ex immutabili necessitatis lege, atq; inevitabili factorum violentiâ alligari existiment, Epicuri de grege porci; sed mentem liberissimam, quæ ex abyssi nihilo condidit omnia, & eadem conservat, mutatq; pro arbitrio, vires intendit aut frangit, subindè quoque alias omninò facit, esse. Ut vel ex hoc capite plurimùm mortalibus conducatur prodigiorum apparitio, ut circa res optatâ prosperitate fluentes objectâ formidine, plus æquo audax animorū

*Liber intus  
& foris scri-  
ptus, ab E-  
zechiela vi-  
sum, quid  
significet.*

*Prodigiorū  
apparitio  
utis homi-  
nibus.*

retunderetur insolentia, ac timore Dei percussus sublideret fastuosus mentium tumor; atque hoc pacto ærumnas inter, vitæque calamitosæ reciprocos æstus se quisque continens, fiduciam suam spemque unicam in sola illa Divini Numinis providentia, in cuius voluntate vita & mors, prospera & adversa, disparesque humanarum sortium vicissitudines repositæ sunt, collocaret.

Quamquam verò ea, quæ semel Mens opifex rebus infusa produxit, pro miraculis, prodigijs, ac primis divinorum operum signaculis meritò æstimanda sint, neque quicquam tam sit vile & exiguum, quod Omnipotentis Numinis gloriam non attesteretur; hæc tamen omnia jam propè vulgatâ consuetudine ab illa prodigiorum classe eximimus, quia constanti serie quod à Mundi incunabulis acceperunt semel, in eodem perseverant. Quamvis & hæc, uti ex insita unicuique admirandarum virium indole homines admiratione veluti attonitos reddunt, ita ab iisdem facillè inter Naturæ numerentur prodigia, quòd raræ, sublimes, efficaces, quòd haud infrequenter portentis veris causam & fomitem administrent, & insensibili Naturæ gremio, ceu formæ externæ in suis subjectis sedibusque contineantur.

*Miraculo-  
rum tria  
genera.*

Quare ad ea jam, quæ propriè ostentorum miraculorumque nomine gloriantur, calamus convertamus; quæ ad triplicis generis differentiam revocari possunt. Prioris generis sunt illa, quæ in sola Dei voluntate extra omnem causarum naturalium concursum, reposita sunt; cuiusmodi plenæ sunt utriusque Testamenti paginæ. Secundo loco illa sunt prodigia, quæ Angelorum dæmonumque ope ut plurimum peraguntur, atque sine Naturæ concursu confici nequeunt. Facillimum autem Naturis liberioribus fuerit, ut ex ambientium elementorum conjugio, quodcunque libuerit, cogant vel in horrendas ac plenas formidine formas, aut metamorphoticâ quadam potentiâ in diversorum animalium se transforment spectra, quam lycanthropiam veteres vocare solent; quamvis sine spermatica virtute vix aliud, quàm figuram superficialiam præstent, sine permissione verò nutuque Divino nihil efficere queant. Per hos enim uti bona dare, mala infligere solet, ita tanquam Divinæ volun-

*Angelorum  
dæmonum  
efficiunt  
effectum  
hominis.*

voluntatis executoribus, nunc ad hæc, nunc ad illa, priusquam fiant, per novas ostentorum geneses portendenda & præsignificanda utitur. Suscipiunt hoc negotium summâ promptitudine tutelares rerum Genij Agathangeli, qui generis nostri quadam cognatione nobis nil nisi bonorum cælestium affluxum precantur: & si quandoque mortale genus à Dei montis præceptisque exorbitaverit, miserti protinus haustas à suprema mente imagines, rerumque futurarum ideas (ut cum Platone loquar) in Naturæ rebus veluti in paginis quibusdam pingunt, ut his lectis moniti, protinus de antea actæ vitæ criminibus cogitemus; periculi magnitudinem expendamus prius, quàm ea sensu experiamur; admonitiones consolationesque in sacris obvias, in memoriam revocatas intimâ mentis trutinâ ponderemus; malorum denique tela priusquàm opprimant, conversione ad preces, charitatis & pœnitentiæ operibus mitigemus: sin minùs, omnem necessitatem sortemque humanam velut in ipso Deo animi quadam concentricitate, & patientiâ superemus. Tertiò sunt ipsius puræ Naturæ prodigia, quæ uti à Divini Numinis providentia dependent, ita in certos quoque fines (cum Deus ac Natura nil frustra agant,) directâ sunt, dispositaque, & luculenter ostendunt, Deum Opt. Max. penes se alium habere ordinem providentiæ nobis occultum, cui sæpe consentiat ordinis characterismus mundanis rebus infusus, sæpe plurimum discrepet, propter hominum necessitatem, atque ut Divinæ gloriæ majestatis libera, nullis Naturæ alligata vinculis, nullis circumscripta carceribus demonstretur, atque adeò nihil in Mundi prodigiis effectibus fortuitum, nullum etiam naturæ plasticæ seu formatricis erratum propriè censerî debeat. Tamen enim utrumque nostri comparatione tale quid videatur, ipsa tamen Divina mens & certo fine, & instrumentis ceu medijs illi convenientibus agit, maximèque ordinatâ Incedit viâ, secundum intelligibilis Mundi altissimas rationes. Natura enim mutationibus obnoxia illi obtemperans, etsi juxta inferioris Mundi speciem à solita lege deflectat, rapitur tamen Divina spiritus vi, jam seipsâ præpedit diviniore facta, quippe quæ legantiquiori manum porrigens toti se subijciat totam, fatusque conspicuo divinæ

illius providentiæ fatum augustius multò sublimiusque esse demonstraret. Si enim aurea illa sublunarium substantiarum per mortalium delicta non antè convulsa, veluti abruptis anfulis interrupto rerum ordine dissilisset; suum quæque convenientem in Vniverso locum servarent, atque absque ulla *irraçione* postrema prioribus, tam in effectuum, quàm causarum genere consentirent. Veruntamen ex natura Angelica superbiz scelus ceu conjuratione in Deum factâ, tandem ad homines dimanavit; unde solutus illicò ordo ille Deum Inter, Angelos, Orbemque sublunarem, Vniversi faciem præcipuâ ornamentis & decoris portione spoliavit. Nam uti S. Augustinus, Beda, Basilus, Rupertus docent, universa natura per protoplasti peccatum vitata fuit. Præter materiem itaque propriâ quadam insolentiâ depravatam, recessuque ab uno in multitudinem coinquinata primùm in nobis fuit diviniõr mentis portio: cui accessit imaginationis absurditas, appetitionum aliorumque affectuum *avaritia*; unde morbi paulatim in generationis vitia pullularunt. Atque in hoc nonnullis probabile forsitan videbitur, cur post horrendos & insolitos cæli monstruosos vultus, atque in terra post ingentes terræ motus, hiatus, voragines, atque prodigiosas, quæ ex visceribus terræ expirant halituum aporrhæas, inexpectatæ ruinæ veluti per signa signatæ, & per ideales notiones ideatæ mox consequantur. Inter quæ cùm maximâ admiratione dignissima sit Crucum illarum in linteis vestimentisque hominum apparitio; de earum causis & rationibus, & cui prodigiorum generi potissimùm accensendæ sint, eâ quâ fieri potest diligentia, & quantum ingenij nostri Imbecillitas permittit, ratiocinabimur.

## CAPUT II.

### *De causis & origine prodigiosæ Crucum apparitionis.*

**I**N præcedenti capite fusiùs forsitan, quàm par erat, ostendimus, nullum è Naturæ visceribus adeò rarum, insolitumque effectum oriri, qui non Divinæ providentiæ connexus, in ulterioribus eoque abditissimos fines, tum in totius Mundi, tum humani

mani generis bonum coordinetur; atque adeò nemo sibi persuadeat velim, Deum semper absolutâ & immediata potentia, sed ut plurimum mediante causarum naturalium concursu in ijs, quæ divinius quid sapiunt, producendis operari. Quibus præmissis jam tandem propositum nobis argumentum propitiùs discutiamus.

Anno 1660, tertiâ die Julij, circa primam crepusculi illucescentiam, in Monte Vesuvio fumus igni mistus prima dedit tempestatum, calamitatumque secuturarum præludia. Fumus in pini morem attenuatus, tantum paulatim incrementum cæpit, ut ad triginta millia passuum, uti observatores referunt, ejaculatus in altum, cælum tertæ miscere velle videretur. Quem è vestigio ingens igneorum globorum eructatio excepit; hanc subterrancum murmur, horrendique tonitruum instar fragores, corrufcationibus fulminibusq; unâ junctis secuti, magnam arenæ cineritæ subnigri coloris copiam effuderunt; quæ humilioris substantiæ primâ quidem fronte videbatur, at mox Sole exsiccata in candidum floccis gossipij haud absimilem vertebatur colorem; luculentum sanè nitrosæ, salinæ, sulphureæ & bituminosæ miscellæ indicium.

*Crucum  
prodigiosa-  
rum Nea-  
politana-  
rum origo.*

*Vesuvius  
cineres er-  
gat, & la-  
pidet.*

Hiscæ rejectionis, consequentibus diebus usque ad 10. Julij tam noctu, quàm interdiù mons sævire non desijt, tantâ vehementiâ, & tam incredibili fumi saxorumque prægrandium copiâ, ut mons eructasse montes jure dici potuerit. Quorum continuo incremento ambitus ejus longè latèque exporrectus ita effloruit, ut nive contactus videretur. Non stetit hic portentorum modus. Sole intereà Leonem subeunte, in lineis hominum vestimentis, summâ omnium admiratione, paulatim Crucum phasmata observata fuerunt, abditâ quadam vi ita ijs impressa, ut non Naturæ industriâ, sed occultioris cujusdam manus penicillo adumbrata viderentur. Ad quorum conspectû, ex rei novitate omnium mentes stupor cæpit, stupor publicam admirandi Phænomeni famam concitavit, fama volans universam denique Italiam complevit. Naturæ Intenti studijs, curiositatis stimulo agitati, de prodigiis Crucibus, quâ literis, quâ academicis consultationibus multùm inter se contulerunt.

*Crucum  
Neapolita-  
narū causa  
inquiritur.*

Dici vix potest, quàm varia variorum de hujus portentis causis judicia fuerint, opinionesque: dum nonnulli Phænomeni causam ex occultioribus astrorum influxibus derivantes, Astrologicâ notitiâ se penetrare posse arbitrabantur. Quidam ad commune illud ignorantia, occultarum inquam qualitatum asylum confugientes, id inter Naturæ paradoxa adnumerantes, satisfactum sibi esse putabant. Non deerant, medium carpentes semitam, qui excessum utrorumque benigniori interpretatione moderarentur. Hacingentorum velitatione, tandem & ego multorum tum Romæ, tum Neapoli precibus sollicitatus, meumque de negotio oppidò perplexo, & multorum opinione impenetrabili, judicium dare iussus, hoc brevi ratiocinio parendum duxi. In quo si scopum attingisse non videbor in argumento admodum difficili; Lectorem non tam præstitam operam, quàm conatum, in laudis parte repositurum confido.

Totius igitur quæstionis cardo in hisce tribus potissimum versari videtur. Num Crucum hujusmodi portentosa apparitio solâ Dei voluntate, omni Naturæ potestate semotâ; an ex causis naturalibus suam traxerit originem; an Angelicis expressæ penicillis Divino accedente nutu comparuerint. Quæ omnia nobis jam elucidanda supersunt. Si prius admittamus, jam hoc ipso omne susceptæ disceptationis nostræ filum intercludi necesse est, cum positâ solâ Dei & absolutâ potestate, otiosum superfluumque sit omne de Mundi natura, ejusdemque partium ratiocinium. Si verò Agathangelorum ope facta asseramus, in idem recidimus, cum ijs in mirandis Naturæ effectibus, uti suprà diximus, nihil denegatum videatur. Restat itaque num Phænomenorum hoc *σταυρότυπον* Naturæ viribus exortum sit, examinemus.

*Natura vi-  
ros mirabi-  
les.*

Nemo nescit miras Naturæ vires; nemo prodigiosos in omnibus entium corporeorum ordinibus passim occurrentes effectus non obstupescit. Quos tamen si quispiam in solam primam atque universalem rerum causam conjiceret, is utique omnium philosophorum sententiæ contrarius, interrupto Universi ordine, secundarum causarum concursum destrueret; quod tamen sanæ mentis philosophum absit opinari. Indidit enim



enim omnium opifex suas rebus singulis vires, seu dotes quoddam earum conservationi consentaneas, quibus Naturæ quoddam instinctu, tum ad prosecutionem boni, tum ad contrariolorum fugam veluti necessarijs utuntur. Quæ tametsi arctos cognitionis nostræ limites excedant, novit illa tamen, quid & quomodo operetur; novit illa rerum consensus dissensusque, lites & amicitias, similiaque rerum jurgia tam apto conjugio attemperare, tam sagaci consilio in pacis unionem connectere, ut ex pacto hoc inter dissidentium dissimiliumque rerum fœdera non possit non in portentosos, ac miraculis haud absumiles effectus prodire. Qui utique tantò erunt diviores, quantò specialius Dei imperium hujusmodi paronymphæ Naturæ adaptationi, sive ad decorem universi, sive ad præsignificandum quippiam, accesserit. Mirantur multi inexplicabiles thermarum fontiumque proprietates; peregrinas animalium, plantarum, fossiliumque virtutes altùm suscipiunt: quæ etsi humano ingenio vix comprehendantur, miracula tamen, & quibus divinum quiddam inexistat, à nemine asseruntur. Quare? Quia rara non sunt, sed passim obvia; quia non nova, sed quæ sicuti perenni virtutum propagine in mortalium emolumentum continuantur, ita quotidiano penè usu viluerunt. Rursum sublati in cælum oculis mox ac in inaccessis cælorum theatris, nova prodigiorum spectacula, novas faces conspexerint, miracula clamant, ostenta ingeminant, prodigia pronunciant: concinnum tamen cælestium corporum ordinem, inexplicabilem motuum harmoniam, inflexuumque energiam minimè mirantur. Certè non alia de causa, nisi quòd hæc frequenti viluerint experimento; illa uti insolita invisique sunt, ita divinius quidplam intra se continere censeantur. Idem prorsus contingere videtur in hoc præsentis Crucis Phænomeno, quod raritate suâ non mortalium duntaxat obstupefecit animos, sed & quot dierum curriculum spectandum se præbuit, tot novos prophetas excitasse dici potest, qui ex ominoso Crucis hieroglyphico, nescio quanam calamitates non Vrbi tantùm Neapolitanæ, verùm & toti terrarum Orbi prædicere non sunt verecundati. Nos neglectis hisce nuncijs, primò earundem originem, deindè quoque prognoseos rationem assignare conabimur.

T

Quod

Quod antequam faciamus, ut majori cum cautela in negotio multorum falsâ relatione intricato procederemus, ad Provinciale Neapolitanum Societatis nostræ, P. Joannem Rho, virum jam famâ librorum notum, & omnigenâ literaturâ peritissimum arbitrum scripsimus, ut fidelem & sinceram nobis omnium eorum, quæ in Crucum apparitione observata fuerant, symptomatum informationem transmitteret. Quod & per Patrem Joannem Baptistam Zupum, Insignem Soc. nostræ Mathematicum eâ, quâ solet, curâ & sollicitudine præstitit. Quam & hic verbotenus ex Italico idiomate in Latinum conversam apponendam duxi.

*Crucum  
Neapolita-  
narû vera  
Relatio.*

*Vera, & fidelis omnium eorum, quæ circa Crucum  
prodigiosarum Phenomenum à curiosis rerum natu-  
ralium exploratoribus à 16. Augusti, usque  
ad 15. Octobris observata  
fuerunt,*

## R E L A T I O,


POST Vesuvij incendium spectabantur aliqua stella. seu Cruces. Dicam primò de ijs, quas proprijs oculis in Octaviano, & Somma intuitus sum; & postea de ijs, quæ relatione aliorum percepi. Comparent hæ Cruces in pannis lineis, videlicet in mânicis indusiorum, & potissimum in faminarum semicinctijs, quæ aëri diutius exposita fuerint, uti & in velis, quibus caput cooperire solent. Item in ealinteaminum parte, quæ à culcitris reclinantur supra lecti stragula. in collaribus quoque puerorum, in mappis altarium, in lineis Clericorum indumentis, quas collas vocant, & similibus. A personis fide dignis mihi relatum fuit, visas fuisse supra carnes, supra granum uvæ, & supra pomum persicum, supra sericeas telas, & quamvis rarò, supra lineam telam cistis inclusam. Imò ex literis 6. Octobris datis unius è Patribus Lupiensis Collegij, vulgò Lecce, auctoritate conspicuè, intelleximus, id quod sequitur.

*Item*





Figura M



Iam dno, inquit, aguntur dies, cum ecce in genu ancilla Syndici Lupiensis urbis Crux apparuit, qui visa rei prodigio territus statim Magistratum convocavit, determinavitque, ut columna honori S. Oronty destinata è vestigio erigeretur; unde heri ad sonum campanæ locus fundanda columnæ destinatus excavatus fuit. Dicunt autem, præter hanc, Cruces alias complures in manicis indusiorum visas fuisse.

Forma crucum varia est: ordinaria sunt duæ lineæ rectæ se intersecantes, in puncto intersectionis nonnihil grossiores; quæ tamen postea ad ultimos terminos paulatim attenuantur, uti in figura 1. comparet. Nonnulla sunt subtiles & perfectæ, ut 1: quadã ad macule morem grosse, ut 3: aliqua longa tres digitos, ut 4: aliæ mediocres & minima, ut 5. & 6. Quadam in transversum productæ, duæ in unum conjunguntur ad formam Crucis Caravaccensis, uti 7. Aliæ tribus solis lineis seu brachijs constant, quorum unum in transversum porrigitur, ut 8. & 9. Aliæ ad terminos bifurcæ, ut 10. Visæ sunt & plures, in unum veluti coacervatæ, ut 11. Aliæ sine brachijs ad formam monticuli, ut 12: vel simplici maculâ expressæ, ut 13.

Color quo tinguntur, omnibus ferè communis, est cineritius, aut etiam quasi adipe quodam dilutus. Duas solas me vidisse memini colore veluti ærugineo tinctas, quæ perfectam tamen Crucis formam exprimerent. Neapoli, Nola, atque in alijs partibus, visæ sunt coloris plumbei. Exterguntur verò non aquâ simplici, sed sinigmati, quem saponem vocant, dilutione. Quadam evanescunt intra decem aut quindecim dies, aliæ tardiùs. Observavi in una mappa altaris, alijsque pannis nonnullas, quæ integro mense, etsi non nisi sub obscuri coloris vestigio, durarent.

Numerus horum est inexplicabilis. Ego solus in una mappa altaris ad 30. circiter, & in altera mappa altaris S. Marthe in Castello Maris quæ radici Montis Vesuvij adjacet, ad 27: in linea quoque manica fœmmodò cujusdam 15: in alijs quoque nunc 12. jam 16. modo 40. quemadmodum & in collari unius pueri octo dinumeravi.

Nescitur præcisè dies, quo nasci ceperint. In Turri Græca, Nocera, Bosco, S. Stephano, Somma. & octaviano, circa 16 Augusti diem visæ sunt primum: Ad Salerni in S. Athanasio, in mappa altaris S. Maria dell' Arco; Neapoli, Portici, Nola, Catanzaro in Calabria, Lu-

Crucum  
Neapolita-  
narum for-  
ma varia.  
vide  
Iconismũ  
XXII.

Color.

Numerus.

Tempus  
quo com-  
paruerunt.

*pijs, & Hydrunti in Apulia, visæ sunt primùm circa principium Septembris. Octaviani, Somme, alijsque circumjacentibus locis dicta phænomena paulatim deficientia, circa finem Septembris rarò videbantur; in alijs partibus denuò instaurabantur; verum circa medium Octobris sensim evanescentes, omnes ad unum disparuerunt.*

Ex hac relatione fat probabiliter patet, hæc Phænomena nil aliud fuisse, quàm vaporem ex rejectamentis Vesuvij natum; quod ex varia figura, numero, colore cognosci potest, uti jam jam singula physiologicâ rationis trutinâ ponderantes ostendere conabimur.

*Crucis  
Neapolita-  
nis similes,  
Roma visæ*

*vide  
Iconismū  
XXII,*

*vide  
Iconismū  
XXII,*

Dum hisce investigandis ardentius insisterem, measque rationes peritioribus Patribus examinandas præberem; eorum unus non tantum meis argumentis subscripsit, sed & hujusmodi stellas linteis impressas etiam hîc Romæ monstrare se velle asseveravit, meque earum spectandarum desiderio æstuantem protinus in Nosodochium abduxit, in quo in lineo stragulo viridi colore tincto tres sublutei coloris Cruces ostendit, quam figura S monstrat. Miratus eventum rei, statim infirmorum curatorem accersivi, obnixè rogans, ut ex quonam liquore dictæ Cruces impressæ cernerentur, indicaret. Respondit, felum noctu stragulis incumbentium urinâ expressas esse; addiditque nil mirum esse, sæpè se hujusmodi intra lectos reperisse: & ut id verum esse demonstraret, nos unâ cum Medicis tum fortè obvijs intra cubiculum senis octuagenarij duxit, stragulum lecti arripuit, & in eo pulcherrimam Crucem, prorsus sive colorem, sive figuram spectes, Neapolitanis simillimam expressam, omnibus qui præsentés erant, ad spectaculum veluti attonitis ostendit: quam postea plerique curiosiores vix ad fatietatem contemplari potuerunt. Deinde post aliquot dies, novam se invenisse dicit in sudario, quo unus è servis nostris febris detentus usus fuerat; quam in hunc usque diem curiosis ostendo, ejus quam literæ N o demonstrant, magnitudinis. Evulgatâ deinde Crucum famâ, venerunt ex Collegio Germanico, qui assererent, in mappa altaris facelli domestici quatuor similes impressas spectari, tametsi fortè in aliquo casu extra phænomenon publicum. Hisce non absimile quid præterlapso anno mense

Decem-



Decembri Viterbij in Ecclesia Collegiata S. Angeli accidisse audio. Lampas enim nescio quo casu rupta, aspergine oleacea totam irrorarat altaris mappam: Unde posteris diebus quot guttæ, tot Cruces diversæ magnitudinis juxta liquoris quantitatem in sacro altaris apparatu comparuerunt. Quas Dominicus Magrius, dictæ Collegiatae Theologus & Canonicus, cum alijs compluribus ejusdem Ecclesiæ sacerdotibus, non sine admiratione proprijs oculis se vidisse ad describit; ac veluti rem publicâ famâ passim notam mihi Romæ coram etiam oretenus postea exposuit. Quin & liquorem arte chemicâ præparatum fuisse refert in epistola quadam ad me data suprâ memoratus P. Zapus, qui aspergiue in lintea diffusus, in Innumeras mox Cruces sese transformavit. Quot itaque Ars Naturæ simia adeo scitè & dextrè præstare potest, id certè prototypæ Naturæ minime denegatum esse is solus nescire poterit, qui admirabilem Naturæ potestatem ignorarit.

Verùm antequam ad caularum enodationem procedamus, protestor semper, quod & tametsi hoc phænomenon publicum, & integræ regionalicui commune, purus Naturæ effectus sit, nil tamen impedire, quò minus DEVS Opt. Max. uti universos Naturæ effectus providentiæ suæ complicatos habet, ita quoque subinde ijs ad quidpiam mortalibus significandum utatur, quemadmodum fusè in sequentibus docebimus. In particulari tamen aliquo casu Cruces hujusmodi nil prorsus portendere asserimus, tantumque significare, quantum quælibet maculæ ex disposito humani corporis vapore linteis impressæ nescio cujus delitescantis intus putredinis indices portendere possunt. Sed jam ad singulas hucusque adductorum symptomatum causas & rationes reddendas calamum convertamus.

Tria potissimum ad hoc phænomenon constituendum concurrerunt. Primò, Mons ipse varia mineralium sortura gravidus; quæ vehementi adusta incendio, & in unam conflata massam, miram variamque differentium formarum indolem sortita sunt. Montis deinde ambitus hujusmodi rejectamentis confectus, cum appropriatis agrorum glebis initio conjugio nova fundarunt variorum mixtorum seminaria. Accessit hinc

*Cruces in  
Neapolita-  
narum cam-  
pâ inveni-  
untur.*

immodicus Solis in Leonis dodecamorio constituti æstus, qui ex varia mineralium succorum miscella successu temporis vaporem subtilibus junctum halitibus eduxit: hic elevatus inter propiores aëriæ regionis thalamos condensatus, ac paulatim resolutus, roris instar decedens, ubi appropriatum subiectum invenit, ibidem ex inrita sibi naturæ indole Cruces effinxit. Verum enimverò, quam ex materia vapor hujusmodi constiterit, cur in lineæ telæ supellectile plerumque stauromorpham vim suam exeruerit, & cur non stellam aut cujuscunque alterius figuræ maculam, sed Crucis differentis magnitudinis formam exprefferit, opitulante Dei gratiâ juxta quadruplex causarum genus exponemus.

*Materialis  
causa dis-  
tinctum  
Crucum.*

Materialis causa vapor, uti dixi, fuit ex ea, quam Mons evomuerat, mineralium succorum miscella natus. Partes ad compositionem ejus concurrentes fuerunt sulphur, bitumen, sal, nitrum, alumen, vitriolum, quod calchantum vocant: ex quibus sulphur & bitumen ignium subterraneorum fomento destinantur; nitrum flatulentis turgidum spiritibus, ignibus agitaturn, unica in explodendis Montis molibus, vehementiæ & impetus, uti in bellicis tormentis patet, causa fuit; alumen vitriolumque appropriatæ junctæ matrici, variæ tincturæ serviunt; bitumen sive pingue nitro junctum, uti postea comprobabimus, vaporosum halitum fluidum tenacemque reddunt. Atque ex hac rerum combinatione mixtum illud ad mirandi Phænomeni veluti ex elementis quibusdam constitutum fuit. Sed jam singula ordine dilucidemus.

*Efficiens  
eandem  
causa.*

Efficientem hujus mixti causam Solem statuimus, qui caniculæ subditis solito majoribus effervescens ardoribus mixtum illud attenuando eduxit in vaporem; alumen, & vitriolum, quicquid in eo terrestre, & sæculentum, inciderunt, purificaverunt, attenuarunt; nitrum pro ea, quæ pollet, spirituosâ substantia ex centro deciduarum resoluti vaporis partium veluti in efflorescentis salis filamenta eduxit, cui pingue bituminosum junctum viscidam fluiditatem præbuit.

*Formalis  
causa en-  
tundem, &  
Finalis.*

Causam formalem hujus Phænomeni dicimus vim *νευρωμε-  
Φωτιχης*, sive Crucum formatricem; quam qua ratione modo ve-  
exerat,

exerat, insequentibus aperietur. Sequitur tandem finalis causa, quæ cum semper boni alicujus malive signum adnexum habeat, de ea in tertia parte agetur. Sed jam hucusque in genere tantum proposita, paulò minutiori scrutinio per erotemata sive quæstiones prosequamur.

*Quaritur igitur primò,* Quznam sint illæ Cruces, aut ex qua materia componantur? *Respondeo.* Esse resoluti supra memorati vaporis guttas minutissimas, & propè insensibiles, in quarum centro nitrosus spiritus naturâ suâ inquietus, & loco contineri nescius, exitum quærens, in appropriato subjecto guttas decussando Crucem fluore suo juxta staminum in linteis situm format.

*Crucem  
Neapolitanarum ma-  
teria.*

*Quaritur secundo,* Quomodo Cruces illæ formentur; & cur ut plurimum in linteis illas vaporosus iste halitus depingat? Verùm uti ab hoc puncto tota hujus argumenti controversia dependet, ita quoque ea quâ fieri potest singulari diligentia id pertractandum est.

*Crucis illa  
cur in lin-  
teis possi-  
mum appa-  
reant.*

*Dico* itaque, hoc Phænomenon multiplici de causa in linteæ telæ supellecile nidulari. Et primò quidem ob naturæ quandam quæ innum inter & nitro-bituminosum vaporem intercedit, similitudinem; siquidem illud, uti chimico experimento constat, tum nitro copioso, tum pingui humido abundat, ut oleum, quod ex ejus seminibus extrahitur, luculenter docet. Mirum itaque non est, hæc nitrosas guttulas faciliùs in consimili, quàm dissimili materia miro quodam magnetismo, quo unum alterum trahit, coire. Secundò, cum carbacea suppellex ut plurimum texturâ constet politâ, lævi, & nullis villis, aut scabritie obnoxiâ; florum quoque ductus per tegmen subtegmenque nunquam per obliquum sed rectum angulum decussatim se fecerit; hinc fit, ut spiritus nitrosus, flatibus sive sudore hominum, sive quocunque alio extrinseco calore agitatus, guttulam quadrifariam liquidò, seu fluidâ materiâ unâ tecum abductâ difflet; quam Crucis forma consequitur. Vide figuram M. litterâ signatam.

*Vide Icon.  
XXII.*

Sit textura lintei cujusdam recto florum ductu E B D C, in cujus medium A guttula cadat. Dico, guttulam in centro A consti-

consti-

constitutam faciliùs in decursu versus partes F, I, G, H fluxuram, quàm versus E, B, D, C. Cùm enlm Natura per brevissimas juxtà ac rectissimas lineas agens effectum suum attingat; certè guttæ diffusæ fluxus necessariò per eas lineas, cujusmodi sunt A F, A I, A H, A G, effectum suum consequetur, minimè verò per lineas A B, A C, A D, A E, quæ & longiores sunt, & obliquæ, utpote quæ naturæ legibus contrarium situm obtinent, nec non nodorum occurrentium multiplicitate fluxui obstaculum præbent.

Patet ergò, fluxum guttæ non nisi ad angulos rectos, cujusmodi ad centrum comparata sunt F, I, G, H, minimè ad obliquos se diffundere posse, cujusmodi sunt A E, A B, A C, A D. Hinc quoque clarissimè patet ratio, quare hujusmodi guttæ sensu vix perceptibiles cum tempore in linteis Cruces forment. Memini in Germania scæminas, cùm insolandi gratiâ linteamina cælo aprico exposuissent, subinde Crucibus facta se invenisse conquestas fuisse; certè non alia de causa, nisi ex simili alicujus roscidi liquoris se in decussim deducentis virtute, uti dictum fuit.

*Cruces quoque  
modo in linteis  
solum qua cistis  
inclusæ,  
apparent.*

*Quæritur tertio,* Quomodo hujusmodi Crucum phasmata non in linteis tantùm apertò cælo expositis, sed vel in ipsis mapis Ecclesiarum, domuum, quin vel (mirum dictu!) intra cistas clausas efflorentur?

*Dico,* vaporem hujusmodi roscidum halitibus mixtum adedò subtilem esse, ut nullus locus tam arctè clausus sit, quem non penetret. Quàm autem facilis intra Ecclesias aut domus sit huic vaporì aditus, nemo ignorare potest. Sufficiunt in ipsis cistis vaporì vel insensibiles rimæ, aut etiam solum foramen, cui clavis imponitur, ad supellectilem intus latentem hisce Crucibus insigniendam. Mirantur multi, cur fulmen dolium vino repletum transiens, hoc consumpto illud ab omni corruptione immune relinquat. Certè alia hujus rei causa non est, quàm exhalationis nitro-Sulphuræ subtilitas & vehementia, quâ poris inoffensis dolium subiens, id quod naturæ dissimilitudine maximè ei repugnat, resistitque, cum primis impetat. Eàdem prorsus ratione, vaginâ, quam transit, illæ sâ, chalybeam consu-

mit

mit macharam, Eodem prorsus modo fieri in hoc Phænomeno tibi persuadeas velim, cujus subtilissimæ substantiæ nihil, quantumvis intra abditos cistarum recessus clausum, resistere potest: sufficit enim eidem minima humiditatis particula, quæ uti ex insita sibi proprietate diffusionem sulappetit, ita & inter abditissima claustra recondita linteamina virtute suâ signat. Si verò alicui hæc ratio minimè arrideat, ei alteram assignamus, quæ sequitur. Solet subinde contingere, ut lintea soli exposita, dicto vapore madefacta, & necdum perfectè siccata, à forminis intra scrinia condantur, ubi primùm suam in signandis linteis virtutem exerunt: ær enim ex consortio madidorum linteorum madescens, virtute quâdam dicti vaporis tingitur; unde effectum eundem ex resolutione ejus educi necesse est.

*Queritur quartò, Cur in laneis vestimentis, lignis, faxis, nulla dictarum Crucum impressio fiat? Respondeo,* quòd in laneis vestimentis, cum villis pilisque utcumque exasperata sint, subtilissimus humor illis illapsus statim vel à lana attractus, vel inter villas dissipatus confundatur, ita ut scabritie impeditus se diffundere nequeat. Serica tamen vestimenta, præsertim si humoris affluxus copiosior fuerit, dictis Crucibus tingi posse, non abnuo. In faxis verò, & lignis, si lævi constiterint superficie, roscidum quendam madorem in minutissimis guttulis, & vix sensui obvijs, haud dubiè relinquent. Cur verò nullam in ijs Crucis efforment figuram, hujus causam hanc accipe; quia spiritus nitri centro inclusus, in lævi superficie ad diffusionem sui prorsus indifferens, uti non in hanc partem potius, quàm in alteram determinatur, ita quoque æquali nisu guttulæ circumferentiam hispida quadam lanugine crispata subinde quoque pro inæqualitate superficiei in stellulæ quoque figuram efformant. Quod verò historiæ suprâ expositæ subinde in laneis vestimentis Cruces apparuisse referant; Dico, causam fuisse igneam quandam vaporis acedinem nitro-sulphureo-vitriolatam, quæ pilis villisque tenuioribus vel usu attritis, vel primo casu ad ipsa usque texturæ fila exultis, ibidem veluti omnibus impedimentis sublati suæ tandem delineationis rudimenta, haud secus ac in ligneis, ex præfecerit,

*Crucis enim  
in laneis  
vestibus,  
lignis, faxis  
non appa-  
reant.*

*Cruces cur  
tam diffi-  
renti colore  
sint.*

*Quæritur quintò,* Cur tam differenti colore tinctæ videantur; siquidem ex historijs nonnullas sanguineo, quasdam nigro atque, alias fusco, flavo, vel etiam cinereo colore imbutas fuisse colligimus? *Respondeo,* causam hujus esse varietatem matricum, ex quibus dicti vapores educuntur. Si enim ex minera rubricæ aut minij suam trahant originem; sanguineo quoque colore imbuentur: si ex Sandaracæ, Arsenici; flavo, vel fusco: Si ex æruginea; viridi: si ex vitrioli bitumini mixta; atro: si denique e cineribus, uti Neapoli; cineritio colore tingentur. Quamvis etiam ex insita mineralium succorum, quibus vapores constant, proprietate, jam in hunc, modò in illum colorem pro tingentis corporis prædominio mutari possint. Ita vitriolum humido junctum pro intensione gradus id nunc viridi, atro, aut cæruleo colore tingit; sulphur in flavum, in lacteum colorem alumen humido mixtum vertitur; & sic de cæteris.

*Cruces ali-  
qua cur diu  
durent, alia  
citiò evanes-  
cant.*

*Quæritur sextò,* Cur, uti historiæ suprà recensitæ narrant, nonnullæ ita pertinaces sint, ut nullâ vi deleri posse videantur; quædam verò facillè abluantur, aut cum tempore seipsæ etiam evanescant? *Respondeo,* Causam hujus esse vim penetrativam quorundam succorum mineralium, pingui & oleaginoso liquori mixtorum, quibus vapor constat; qui uti intimam rerum substantiam virtute incisivâ vel in momento penetrant, ita difficulter quoque, qui semper quædam tincturæ vestigia relinquunt, dilui possunt: qui verò minùs penetrant, minùsve tenaces sunt, illi dilutionem facillè sustinent, aut etiam aëri expositi tandem prorsus evanescent.

*Cruces cur  
tam diver-  
sa magni-  
tudinè.*

*Quæritur septimò,* Cur tam diversæ magnitudinis sint Cruces in linteis effigiatae? *Respondeo,* ad fieri ob majorem vel minorem quantitatem guttarum in lintea incidentium: pro humoris enim guttulentis ubertate, aut paritate, nunc major, nunc minor figura exprimitur.

*Cruces cur  
tam diver-  
sa forma.*

*Quæritur octavò,* Cur subinde inter alias rectâ decussatas Cruces, obliqua quoque subinde, quam Andreanam vocant, obvia sit? *Respondeo,* id fieri ex dispositione ejus telæ partis, in quam incidit; quæ si detortum filorum ductûs situm obtinuerit, detor-



detortam quoque Crucem efficiet. Quæ omnia diligenti scrupulatio in linteo, quod Admodum R. P. N. Generali Neapoli transmissum fuerat, innumeris Crucibus insignito, vera esse comperi.

*Quæritur nonò,* Cur in aliquibus tantum locis, non in omnibus, hujusmodi portentia accidant? *Respondeo,* Causam esse diversitatem locorum: dici enim vix potest, quantum ad explorandas rerum abditas rationes, ipsamque interiorum essentiam pertractandam, certi alicujus loci natura & proprietates explorata conducat. Hinc Cruciformia monstra non ubique locorum, sed in ijs potissimum, ubi terrestris conditio vaporem supeditat, apparent, neque uno in loco semper idem effectus consequitur, nisi ubi terræ motus, aut notabiles subterrestrium partium alterationes præcesserint. Quis nescit succorum concretorum, id est, salinorum corporum, proprium esse, in prima efflorescentiæ suæ diffusionem figuram stellarum radijs haud absimilem affectare? Patet in sale, nitro, vitriolo, alumine, quæ microscopio inspecta nunc Crucibus, modò infinita stellarum multitudinem contexta videntur. Videtur & idem in nivium floccis, qui mox ac in vestimentis infederint, in stellarum figuram efformantur. Democriti sectatores causam conferunt in atomorum certâ dispositorem lege confluxum; alij in plasticam nivis, salinorumque corporum virtutem. Nos relictis aliorum placitis, hujusmodi stellati corporis effectum aliunde non provenire dicimus, quàm à spirituoso halitu intra niveos floccos salinosque vapores concentrato; qui dum frigore ambiente costringitur, angustię pertæsus, ruptis carcerum repagulis, quâ data porta ruens, corpus nivium salinumve terebrando in stellatam seu radiosam figuram efformat, pro superficie, in quam incidit, dispositione: quæ si scabra fuerit, Imperfectam; si polita, stellatam; si rugosa, variè distortam; in tela verò lineâ, utique non aliud quam Crucem exprimit.

Atque hucusque rationes dedimus earum Crucum, quas nos hic Romæ in varijs linteis, Neapoli ad nos transmissis, summa diligentia discussimus: nunc pari passu ad earum Crucum, quas paulò antè allata relatio adducit, peritiam examinandam, progrediamur.

*Crucis cur  
aliquibus  
tantum in  
locis appa-  
reant.*

*Crucis  
Neapolita-  
na cur tam  
variarum  
figurarum.*

*ut supra*

*ut supra*

*ut supra*

*vide  
Iconismū  
XXII.*

*Quæritur decimò*, Cur Neapolitanæ Cruces tantâ figurarum varietate præditæ sint? Siquidem ex paulò antè adductis nonnullæ perfectæ Crucis formam, aliæ imperfectam præbent; quædam tenues, nonnullæ grossiores; aliæ formam Crucis Caravacensis monstrant; aliæ tribus tantum brachijs conspicuæ; nonnullæ in unum confusæ *συνεστωρ*, sive coacervatarum Crucum figuram; quædam etiam nullam Crucis formam, sed informes maculas exhibent? *Respondeo*, rationem hujus rei partim à subjecti, cui imprimuntur, dispositione, partim ab ipso vapore resolutio pendere. Si enim guttula in lintheum humidioris constitutionis inciderit, tum liquor, quantum fieri potest, se dilatando hinc inde diffuens, grossiorem Crucis figuram reddit; quod non fit in lintheo sicco, & omnis humiditatis experte: tunc enim sicco humido obistente guttula solum juxta semitas filorum indecussim diffilatur, atque adeò tenuiores reddi Crucis lineas necesse est: nisi tamen guttula major fuerit, tunc enim juxta punctum intersectionis magis magisque se dilatare nemo non videt ex tertia figura. Crucum itaque magnitudo aut parvitas à sola guttescentis vaporosi liquoris quantitate majori, vel minori, uti suprà diximus, dependet. Crux Caravacensis nascitur, quando guttula major, & prope eam minor, in lintheum incidit; guttula enim minor brachio Crucis majoris incidens, Cruculam causat, cujus linea (sive ea perpendicularis, sive transversa fuerit, perinde est,) in lineam majoris Crucis lapsa, ob recentem madorem dispositionem diffluendo cum ea cœnuit: Altera verò uti hanc rectè decussat, ita quoque Crucem format Caravacensi non dissimilem.

Idem de *συνεστωρ*, sive coacervatis in unam Crucibus sentiendum est, cujus causa alia non est, nisi separatarum guttularum in subjectam lini materiam incidentia, quæ diffusionem suâ dum varijs modis sese interfecant, varium quoque inde Crucularum coacervatarum, uti ex undecima figura patet, *φάσμα* oriri necesse est. Similis ratio est de Crucibus, quorum extrema bifurcata videntur: ubi enim madorem vel minimum repererint, ibi humor diffuens in bifurcatam formam dispecitur. Idem de Crucibus, tribus tantummodò brachijs conspicuis intel-

ligas

ligas velim, quorum unum nempo ob siccitatis telæ humido resistentis obstaculum, quò minùs diffluere queat, impeditum deficit. Comparent subinde (uti ex 12. & 13. figura constat) integræ in linteis maculæ, nullâ Crucis figurâ insignitæ. Quæ duplici modo fieri possunt, vel lenitudine liquoris non potentis sese, spiritu flaccescente, explicare; vel subjectâ lini materiâ nimis siccâ, humido obsistente: hoc enim pacto cum obice posito diffluere non possit, ex eo maculam consequi necesse est.

*Quaritur undecimò*, Quomodo hæ Cruces in fructibus, uvis, pomis, persicis, imò in ipsa carne imprimi possint, cum non habeant dispositionem illam, quam linea tela, aut alterius texturæ opus habet? *Respondeo primò*, Omnes etiam quoscunque fructus, quemadmodum smicroscopio eos intuenti patet, fibris suis, tametsi ab omni sensu remotis, constare. Cum itaque humor sit subtilissimus juxtâ ac summè penetrans, sit ut eodem modo quo in tela incidens, guttula per rugas rimasque pellis dilatata Crucem former. *Respondeo secundo*, posse quoque id ipsum fieri per filamenta insensibilia, quæ subinde per aërem feruntur, similia his, quæ post nebulas matutinas in aëre jam à fecibus depurgato & sereno volare spectantur, nisi quòd hæc multò tenaciora sint, & sensibus non ita exposita: quibus tandem motu aëris ruptis, & in minutissima segmenta divisis, facile contingere potest, ut filamentum unum transversim cadens super aliud filamentum, formam Crucis producat: quod quando fit, non est necessarium ut texturam aut telæ, aut cujuslibet alterius rei superficiem subjectam habeant, sed ubicunque dicto modo ceciderint, ibi lineari suâ distensione Crucem formabunt jam perfectam, si rectâ se intersecuerint; modò Andream; modò aliam defectuosam; pro filamentorum incidentia, & mutua intersectione jam ad rectos, modò ad obtusos acutosque angulos factâ, non distillatione, sed totius substantiæ incidentis incubitu; ita ut in quodcunque subjectum ceciderint, sive illud saxum, sive carnes, sive fructus, sive panni aut linteamina fuerint, ibi ad incidentiam partium supra partes Crucem formari necesse sit. Duplex itaque materia in aëre formari potest: primò vaporosa materia in guttas spiritu nitroso refer-

*Cruces  
quomodo in  
fructibus  
apparent.*

tas resoluta, quæ in lino constanti tenore juxta filorum ductum perfectæ Crucis formam, nisi aliud obstet, spiritu humiditatem diffiante producit: de quibus paulò antè dictum est: Altera est viscosa sive excrementitia vaporum materia, quæ motu aëris, ut dixi, in filamenta dissoluta, & in linealia segmenta disrupta per aërem volitans, ubi duo dictæ materiæ filamenta se intersecuerint, ibi Crucem totâ segmentorum linearium extensione formant. Et ne tantum conjecturis remagere videar, & rerum propositarum veritas locum suum habeat, Lector facillimo experimento, uti nos comperimus, explorare rei veritatem poterit. Post nebulam dissipatam matutino tempore explora in hortis fructus, herbarumque latioribus folijs; & inuenies hujusmodi filamenta nunc in Cruces, jam in triangulos, modò in lineas parallelas, aliasque figuras angulares diducta; quæ tamen statim ad Solis radios pingue resolventes, ob summam quâ polent, subtilitatem evanescunt. Multæ hujusmodi, quas Natura format, figuræ passim reperiuntur, sed vel à paucis observantur, vel si etiam comperiantur, non æstimantur; sola Crucis figura, uti nescio quid ominosum præferre videtur, ita anxia mortalium pectora mirum in modum vel ad superstitionem usque exagitare solet.

Ex his *pates primò*, Hujusmodi filamenta subinde in aëre generari, quæ deinde in qualibet superficie corporis, in quod incidunt, Cruces suas pro incidentia filamentorum formant.

*Pates secundo*, si quandoque hujusmodi Cruces in alijs subjectis præterquam in linea tela visæ fuerunt, eas non aliâ ratione, quam per hujusmodi filamenta, impressas fuisse. Quamvis non negem etiam, uti in dictis subjectis, ita & in nudis humani corporis partibus aëri expositis, per vaporem guttescentem accidere potuisse, uti ex relatione Crucis in Lupienfis ancillæ genu natæ contigit: cum enim pellis genuum rugosa sit, & præ cæteris membris exasperata; ideo intra insensibiles rimas humor dilapsus facillè in Crucem se insinuare potuit.

*Quæritur duodecimo*, Quomodo in adeo remotis partibus, ut sunt Lupiæ, & Hydruntum In Apulia, & in Calabria Catanzarium, eadem Cruces apparere potuerint? *Respondeo*, cum rejectamenta cinerum ex Vesuvio longè latèque ventorum vi diffusa, totam ferè Apuliam, uti ex publica relatione constat, oppleverint; certè vapor, qui in vicinis ad Vesuvium locis, ex varia cinerum mineraliumque specierum miscella exortus est, uti Cruces hæc produxit, ita ex eadem miscellâ in alias remotiores regiones ventorum vi translata exortus vapor eandem alibi producere potuit, cum unam & eandem causam semper eosdem effectus producere notius sit, quàm ut dici debeat.

*Cruces  
Neapolita-  
nae cur in  
remota lo-  
cu apparen-  
tium.*

Sed *objiciet* mihi fortassis nonnemo, si Cruces ex cinerum rejectamenti suam originem habuerunt, illæ utique alijs temporibus, quibus Vesuvium & Aetnam incendijs sævisse legitur, comparere debuissent; quod non factum fuisse legitur. *Respondeo*, id non sequi, cum tota hæc Crucum genesis, à certa diversarum materierum in unum confluentium combinatione dependeat; alijs verò temporibus uti diversa prorsus fuit miscibilium rerum è monte rejectarum combinatio, ita idem qui hoc anno effectus consequi non potuit: quod multis varijsque modis ostendere possemus: verum cum hæc in Scrutinio nostro Physico-Medico de peste uberrimè (quo modò videlicet pestiferæ auræ halitus & vapor, vel ex remotissimis regionibus ventorum vi delatus, universa regna devastaverit,) profecuti simus, eò Lectorem remittimus.

*Cur alijs  
temporibus  
non appa-  
ruerunt.*

*Quæritur decimotertio*, Quomodò hujusmodi Cruces in multis alijs Orbis partibus, ubi tamen nullus Vulcanus Mons, neque montis incendia præcesserint, comparere potuerint? *Respondeo*, Hujusmodi vaporem non ex solis montium incendijs originem habere, sed ubicumque sub tali combinatione rerum vapor exortus fuerit, ibi eum quoque Cruces producere. Quod imò omnem etiam vaporem ex humano corpore exhalantem sub tali rerum cataclasi, similem effectum producere posse, experientia ductus assero. Et quemadmodum exoticarum rerum spectacula mirum in modum in cognitionem causarum quorundam curiosorum

*Cur alijs in  
locis, ubi  
nulla mon-  
tium incen-  
dia.*

morta-

*Cruces Ro-  
mae appa-  
uerunt.*

mortalium desideria sollicitant, ita nihil quoque non moluntur, ut tandem de ijs certiores fiant, de quibus, sive ex supina in ijs inquirendis negligentia, sive in observandis hominum oscitantia, nil prius cognitum fuit. Hoc enim eodem tempore in Collegio Romano, uti suprà meminimus dum sollicitius huiusmodi inquærem, tres Cruces in stragulis Lectorum, Neapolitanis prorsus similes reperimus, cujus testes esse possunt, quotquot hîc curiosioris ingenij viri versantur: quas cum nonnullis medicis ostenderem, sanctè affirmârunt, eas non nisi ex certo quodam vapore, quam infirmorum corpora subindè expirant, ortas esse. Addiderunt, similes in stragulis lectorum pestiferâ lue infectorum anno 1656, quo Roma pestilentia infestabatur, visas fuisse: verum uti alijs funestis spectaculis intenti erant infirmorum curatores, ita quoque sine ulla reflexione supra illas facta, pro nihilo habitas fuisse.

*Cruces in  
Nolocomijs  
sæpe appa-  
rent.*

Sed obijciat hîc quispiam, Si ita sese res habet, nullum Nolocomium fore, in quo similia non reperiantur. *Respondeo*, ita esse: ubicunque enim vapor sub dicta rerum combinatione, ex infirmorum corpore expiratus fuerit, ibi eum frigore circumfuso resolutum Cruces in stragulis producere, nullum dubium est. Nam ut reâ è *Hippocrates* lib. de flatibus, docet: Est in corporibus humanis suum sal, suum vitrum, suum sulphur, suum vitriolum quæ in intima humorum massa delitescunt, ex quibus omnia morborum genera originem trahunt: quæ uti mineralibus syngenea sunt, ita quoque eisdem effectus producere posse, nemo negare poterit, nisi is qui admirandam Microcosmi fabricam ignorat. Quemadmodum enim herbæ ex mineralibus succis suum trahunt humoris nutrimentum, ita homines animantesque cæteræ in nutrimentum trahunt eam, quæ in herbis plantisque latet, mineralium succorum, etsi varijs multisque modis alteratorum, miscellam. Addo tamen, rarò huiusmodi humorum constitutionem, ob humoris tali & tali modo combinati defectum, accidere. Si verò quandoque in lintheaminibus, quæ mulieres insolandi causâ apricis locis exponere solent, huiusmodi Cruces compareant, id in similem ex naturali loci constitutione vaporem, quem aut ætus subterra-

neus,



neus, aut quævis occulta subterreftrum partium concitatio suscitatur, consijciendum esse tibi persuadeas velim. Atque hinc factum esse puto, quòd subinde intra ipsa serinia carbalea conclusa supellex hujusmodi Crucibus infecta spectetur, quorum & mentionem præcedens relatio facit, & nos in præcedentibus id innuimus: illa enim aëri exposita uti guttescentem vaporem nullo negotio excipere potuerunt, ita & in linteis recenti madore adhuc infectis inclusisque, tum demùm vaporem Cruciformis genituræ lineamenta ponere potuisse, nil ei mirum videri debet, cui mirificæ Naturæ sagax industria nota fuerit.

*Queritur decimoquartò, Cur tam differentibus temporibus in ceperint & disparuerint dictæ Cruces?* Nam relatio eas in agris, oppidis, villisque ad radicem Vesuvij sitis, à 16 Augusti die primò comparuisse dicit; deinde à 15 Septembris etiam Neapoli, & Nolæ; ad initium verò Octobris in remotioribus Apulizæ & Calabriae locis visas primùm, donec 15. Octobris prorsus evanuerint. *Respondeo,* causam fuisse primò miscellam cineream, quæ uti prima fermentationis suæ rudimenta in locis Monti vicinis peregit, ita primos quoque præ alijs locis, eos vaporis, quem descripsimus, effectus edidit, donec crescente in dies vapore, & ulterius diffuso, suis quoque socijs Neapolim, Nolam, & Salernum participes fecerit; Lupijs verò, vulgò *Lecce*, civitate undecim dierum spatio dissitâ, sicuti fermentatio materiæ fortè pluviarum ubertate, sive ventorum siccitate impedita fuit, ita tardiorum quoque effectum exhibuit, donec tandem frequenti imbrium pluviarumque, quæ eodem tempore accidit, illuvie, materia veluti suffocata in aliam prorsus indolem degeneravit, atque adeo Phænomenis Crucum ultimum finem, qui ad 15. Octobris accidit, imposuit. Nos tamen putamus, in multis alijs locis, in quæ cinerum imbres delati fuerunt, multo adhuc tempore, præsertim in siccioris constitutionis partibus, ut in Calabria, & Sicilia, ob ignes subterraneos, quibus dati vapores veluti ex busto quodam restaurantur, durare posse; quod forsitan brevi audiemus.

*Queritur decimoquinò, Utrum hujusmodi Crucum Phænomena vere & proprie inter miracula recenseri queant?* *Respon-*

Xx

*Cruces  
Neapolita-  
na cur tam  
differenti-  
bus tempo-  
ribus appa-  
ruerint, &  
disparua-  
rant.*

*Cruces  
Neapolita-  
na utrum  
inter mira-  
cula recen-  
senda,*

deo, illa propriè miracula dici non posse. Verùm ut hæc luculentius exponantur; Dico, ea omnia, quæ præter ordinem communem in rebus constitutum quandoque divinitus fiunt, miracula dici solere. Admiramur enim aliquid, cùm effectum videntes causam ignoramus. Inde contingit, ut unâ & eâdem causâ uni cognitâ, alteri incognitâ, hic miretur, alter nullâ admiratione moveatur; uti pulchrè *D. Thomas* de Astrologo & rustico docet, quorum hic Eclipsim videns nescius causæ miratur, alter illius conscius minimè. Atque hæc miracula dici non possunt. Illud itaque simpliciter mirum est, quod causam habet simpliciter occultam, quod præfert miraculi nomen, quodque ex se & suâ naturâ sit admiratione plenissimum. Atque hoc pacto miracula dicuntur omnia ea, quæ fiunt præter ordinem Naturæ communiter constitutum. Quorum quidem miraculorum diversi à Divo Thoma observantur gradus. Primus est, cùm aliquid sit à Deo, quod omnem Naturæ potestatem longè superat, ut est replicatio corporum, Solis statio aut retrocessio, Maris divisio, qua siccis pedibus transeuntibus iter præbeatur; cum talitamen ordine, ut quantò à Naturæ potestate censeatur aliquid remotius, tantò majus diviniusque miraculum æstimandum sit. Secundum in miraculis gradum obtingent ea, quibus Deus aliquid præstat, quod tametsi omnem Naturæ facultatem superet, per alium tamen rerum ordinem ea præstat. Venim quispiam vivat, videat, ambulet, id utique purum Naturæ opus est; sed ut post mortem quies vivat, videat post cæcitatem à natiuitate exortam, post claudicationem ambulet, naturali membrorum usu destitutus, hoc enim verò vires Naturæ longè superat; cuiusmodi Deum sæpenumero, tum per se immediatè, tum mediantibus Sancti Dei hominibus præstitisse, plenæ sunt omnes sacræ Historiæ. Tertius gradus est, quando Deus facit, quod consuetum est fieri ope Naturæ, sine ullis tamen Naturæ principijs ad talem effectum cooperantibus, ut cùm Deus febrem, quæ Naturæ cæteroquin viribus curari posset, solo voluntatis suæ nutu curat; aut cum pluviam sine Naturæ cooperatione producit. Ex quo luculenter patet, non Angelos, non homines, non Naturam, sed Deum solum propriè miracula facere posse. Quod ita ostendo.

Quod-

*Miraculum propriè  
quid sit.*

Quodcunque sub ordine, quem Deus In universitate rerum sapienter disposuit, absolute & totaliter constitutum est, id ut supra aut præter ordinem illum operetur, fieri non potest: Omne agens creatum, sive corporeum, sive incorporeum, huic ordini à Deo constituto subiectum est; ergo, &c. Sic enim præter naturam operaretur; quod soli Divinæ comperit Omnipotentia, quæ uti omnem creatarum rerum potestatem longè excedit, ita quoque sola miracula facere potest. Quoniam enim creata substantia, cuicunque tandem rerum ordini subfit, *ὑποκείμενον*, sive ut Scholæ loquuntur, subiectum in quod agat, quodq; ordinem habeat & ad agens quod ipsum subiectum de potentia in actum educat, & ad actum simul in quem reducitur, requirat: patet luculenter, eam nisi præjacente ac suppositâ materiâ agere non posse: alias enim ex nihilo aliquid produceret, atque adeò soli Deo propria miracula patraret: quod unanimi Theologorum sententiæ repugnat. Præterea, omnis effectus necessariò per aliquam alterationem produci debet: quæ cùm motum localem, quo incorporeæ substantiæ propriè carent, præsupponat: illæ necessariò ad aliquem effectum producendum corporeis indigent instrumentis; quæ uti insitis Naturæ viribus connexa sunt, ita agentia quoque, quæ per ea operantur, non nisi naturales effectus, juxta immutabiles Naturæ leges producant. Solus itaque Dei est, immediatè miracula facere: ipse enim ordine superior universa continet, quin & ab ipsius providentia totus hic rerum ordo non immediatè duntaxat emanat, sed ita inseparabili nexu eidem conjunctus est, ut sine eo Natura subsistere non possit: unde cum infinitæ virtutis & potestatis sit, non debemus existimare, eum ad specialem aliquem effectum, neque ad hoc ut effectus determinato modo & ordine producatur, determinat; sed ipse solus, prout libuerit, aut necessitas rerum hominumque bonum exegerit, miracula facit in cælo & in terra. Quæ omnia fusè prosequitur *S. Thomas* 1. 3. contra Gentes c. 102.

*Ex dictis colligitur primò*, Divinæ providentiæ executionem ut plurimum mediantibus causis secundis fieri, id est, quando-  
cunque prodigiosi in Natura rerum effectus, in cælo quidem novæ cœlestium phasmatum geneses, in inferiori verò Mundo

*Miracula  
propriè di-  
ctâ Deum  
solum facere  
possunt.*

*Deum medi-  
antibus  
causis se-  
cundis pro-  
digia facit,*

monstruosa in omni genere rerum spectacula, & similia miracula signa exoriuntur, illa semper ex nexu, quo Divinæ providentiæ junguntur, ad aliquid significandum dirigi. Nam providentia duo supponit, ordinationem scilicet, & ordinis executionem: quarum illa virtutem cognoscitivam, hæc operationem respicit. Cùm autem Deo infinita ad ordinandum sapientia, & omnis termini experta ad operandum virtus & potentia insit; sequitur necessario, eum omnium ordines etiam minimorum disponere, minima verò sive infima quoque per virtutes inferiores, id est, causarum naturalium concursu, per quas ipse tanquam universalis causa rerum operatur, exequi. Sunt itaque virtutes rerum naturales verè Divinæ providentiæ executrices: si enim absque illis Deus omnia in omnibus operaretur, ex consequenti omnes effectus naturales miracula dici possent; quod dici nec debet, nec potest, ut *D. Thom. cit. loc. c. 69.* scitè ostendit. In omnibus itaque signis portentosis, Deus non semper miracula patrare censeri debet: v. gr. cùm, uti est in Libro Machabæorum, exercitus in aëre comparauerunt, aut tempore Constantini Magni Crux in aëre apparuit, cum epigraphe; *In hoc signo vinces.* ea proprio & stricto modo miracula dici non possunt, cùm vires Naturæ non excedant; imò Deus vel per se, vel mediantibus Angelis illa ex condensatione aëris nubiumque nullo negotio efformare valuit. Constat autem ex præcedentibus, quòd quodcumque Deus vel per se, vel Angeli in ordine ad effectum aliquem portentosum producendum naturalium rerum viribus tanquam instrumentis utuntur; illa non miracula, quæ omnem vim creatam superent, sed mirabilia, quæ inter Naturæ limites constituuntur, dici posse, uti luculenter *D. Thom. cit. loc.* docet.

*Miraculorum & mirabilium discrimen.*

*Colligitur secundo,* Deum subinde soli Naturæ in mirandis effectibus producendis vires permittere; sicuti in portentosis cæli ostentis fit, aut cùm cometes, aut ingens monstrum aliquod nascitur; qui tametsi effectus purè naturales sint, ita tamen Divinæ providentiæ connectuntur, ut dum eos in causis suis, & in ordinis Universalis dispositione videt, per ea semper aliquid Mundo præsignificare velit, uti pulchrè in Opere Dea&ibus

bus humanis, Cap. de prædictionibus Astrologicis, *Sfortia Cardinalis Pallavicinus* docet. Sed hæc insequentibus fusiùs.

Ex his denique omnibus huc utque adductis clarè patet, hujusmodi Crucum Phænomena, inter miracula strictè sumpta recenseri non posse, cum eæ Naturæ terminos non excedant. Atque id nobis indicio est, quòd Angelorum operà, juxta propositum Naturæ archetypum perpetuò operantium, perfecta sint, & nulli defectui obnoxia; at hujusmodi Cruces non eundem ordinem, non figuram, non formam, non quantitatem ullam servant, sed in figura, colore, quantitate summam imperfectionem arguunt: Ergo, &c. Diceret non nemo fortè, non Angelis, sed Naturæ adscribenda esse. *Respondeo*, Natura quidem quantum potest, ad perfectionem rebus inducendam laborat, sed uti multis variisque modis in executione operis impeditur, ita quoque obice posito, res ab ipsa productæ defectu quodam vitiatæ ut plurimum videntur, ut ex monstrorum generis luce meridianâ clarius patet.

*Queritur decimosextò*, Quomodò ex Crucum apparitione, miraculosus effectus à puro Naturæ effectû dignosci possit? *Respondeo*, temeritatis notam non immeritò incurrrere videri possem, si omnia hujusmodi Crucum Phænomena, quæ in prima parte adduxi, puræ Naturæ operationibus adscribere attentarem: sunt enim multa prodigia, quæ sanè adscribi nequeunt, nisi soli Divinæ potentiz, queis magnum in Ecclesia Dei eventum in Orthodoxæ fidei testimonium ad confusionem inimicorum quandòque ostendere sibi complacet: cujusmodi fuerunt, quæ Juliani Apostatæ tempore in vestibus Judæorum, dum in instaurando Templo, ad destruendum Christi vaticinium, impigrè laborarent, disjectis jam per terræ motum Templi fundamentis, cælitus demissâ luce expressæ apparuerunt: vel ex hoc capite inter altioris ordinis miracula recensendæ, quòd effectus Naturæ legibus, ex Divini utique dispensatione consilij, contrarios exhibuerint: cum Natura necessitatis vinculo adstricta non in hoc potius quàm in illo, sed ubicunque subjectum capax & proportionatum invenerit, ibi vim suam exerat, ibique effectum suum necessariò producat. Talia quoque fuerunt, quæ

*Cruces prodigia non sunt miracula.*

*Crucum in apparitione quomodo effectus naturæ à naturali discernatur.*

solis Hebræis in Hispania Messæ adventum, per Pseudoprophetas prædictum, expectantibus, at nullis fidelibus, inflicta fuerunt. Hæc itaque qualiscunque regula esse posset, quòd quodocunque in magnis Ecclesiæ controversijs & persecutionibus repentinâ quadam genesi hujusmodi phasmata comparuerunt, illa ad aliquid, vel in bonum Ecclesiæ significandum, aut in hostium confusionem Divino nutu accidisse credantur, ut per ostenta divinitus immissa erroris convincantur. Deinde quando nullo habito appropriati subiecti discrimine in quibuscunque rebus, aut in certis tantum hominibus, non in alijs promiscuè spectanda se præbuerunt, illa inter miracula censenda, nemo dubitare debet; non quòd de novo ex nihilo producantur, sed quòd Divina potentia tunc extraordinario quodam influxu, ad vindictam de scelerum, quibus mortale genus se contaminare non cessat, enormitate fumendum utatur, juxta illud: *Armabis creaturas in ulsionem inimicorum, & pugnabit pro eo Orbis terrarum contra insensatos.* Et quoniam universa Mundi Machina Divino Archetypo connexa est, impossibile est, aliquem in Natura rerum insolitum effectum sine ejus nutu contingere, cui publica rerum humanarum calamitas adnexa sit; quique non dicam in miraculosa illa sublimioris ordinis, sed vel in ipsa naturalium rerum serie (nè quis me effectus purè physicos à Divini Numinis providentia eximere velle existimet) præluceat. Verùm ut hæc luculentius pateant, tertiam ratiocinij nostri partem ordiamur.



# PARS TERTIA, PROGNOSTICA.

## CAPUT I.

*De prodigijs in genere, eorumque significatione.*

POSTquam dignitas humani generis per protoplasti peccatum contaminata decidit, illa utique non solum ab harmonia pristina plurimum recessit, sed & infesta sibi, & contraria, quæ pridem ad obsequium condita fuerant, Mundi & contenta, & continentia, per classes singulas invenit; proximè quidem in elementis omnibus, secundò in mixtis corporibus inanimatis, tertio in animalibus, ac postremò (quod omnium gravissimum duco) intra propriæ structuræ fines, in suimet animi & corporis symmetria. Quæ quidem numerosiora sunt, quàm ut recenseri possint: notiora, quàm ut debeant. Cum igitur virus illud tabificum ab homine tanquam capite in membra universitatis cætera dimanavit; meritò ab iisdem vicissim odi & inimicitiz semina, flagella, cruces, omnigenæ calamitatis machinæ juxta Adrastiz legem inevitabilem retorquentur, elementis cunctis in hominis perniciem conspirantibus. Quia vel ipsa alimenta, tum apertis, tum occultis quandoque cuniculis eum adoriuntur, ut quæ vitam dederant prius, temporis orbe jam revoluto, veluti indicto bello, quod construxerant, rursus elidant, & exterminent. Quorum quidem consideratione nihilo meliores homines, in omnium scelerum barathrum, omni Dei abjecto timore se præcipitarunt. Et sanè totum humanum genus veluti veterno quodam peccatorum sopitum utique perisset, nisi id Divina clementia subinde per insolita signorum ostenta, ad cor revocaret. Quæ quidem pro infinita Dei misericordia & bonitate ita temperantur, ut ex summis malis, quibus errantem Mundi statum perterret,

(sum-

*Mala hujus mundi, effectus sunt peccati.*

*Dei ele-  
mentia in  
revocandis  
malis, &  
bonis.*

summum bonum educat. Dum enim signis hisce prævijs futuras Rerum publicarum Ecclesiæque calamitates nunciat, peccatores ad poenitentia opera amplexanda, quibus eas evadant, sollicitat, justis verò ad eas forti animo tolerandas in ampla meritum præmia convertit. Unde luculentum patet, Deum hujusmodi malorum signis, mortalibus non nisi sub hypothesi comminari, uti Sacra Historia innumera comprobant exempla. Nam, ut rectè S. Gregorius notat, *Si bona promissa revocat Omnipotens Deus, quia ab ijs, quibus promiserat, malè permutantur: quantò magis minarum effectus retrahit, cum benè conversos eos respicit, quibus pro admissis iniquitatibus penas animadversionis insinnavit.* Vtraque sanè revocat, cum oportet; promissiones, nè de illis prælumptionis impetu in transversum agamur; comminationes, nè propter illas omni abjectâ fiduciâ in desperationis barathrum labamur: & has quidem revocat, nè puniat; illas quodammodò invitatus, nè benefacere desistat: cui cum nihil non pateat, nihil necquicquam fieri certum est, sed omnia, vel tum in hominum bonum, tum ad nominis sui gloriam ac salutem Univerſi, vel etiam hoc nomine, ut quæ apud nos nostro iudicio planè fortuita censentur, & sæpe injusta, aut à Divinæ providentiæ legibus aliena, tandem ad exactam æqualitatem redigantur.

Sunt itaque rara & insolita hujusmodi phasmata, in omnibus Mundi ordinibus elucescentia, veluti hieroglyphica quædam symbola, ænigmaticis allegoricisque involuta significationibus, quæ Divina sapientia in cælo, terra, elementis, veluti libro quodam descripsit, & mortalibus legenda proposuit, ut si quando à Divinorum mandatorum semitis recesserint, intentatis, quas ostentat, minis tercantur, & ad meliorem frugem convertantur.

*Prodigia  
cur Deus  
permittat,  
aut immit-  
tat.*

Vtitur autem Deus Opt. Max. aliquando rerum naturalium causis ad hujusmodi effectus demonstrandos, nullo miraculo interveniente, uti suprâ dictum est, nisi quod illæ ita Divinæ providentiæ dispositioni à primordijs Mundi connexæ sint, ut ex se & tua natura infallibilem effectum consequantur, si ejus, qui omnia moderatur in omnibus, imperio vel non impedi-

dantur, vel vires suas liberè exercere permittantur. Per signa  
 itaque hujusmodi Deus voluntatem suam explicat, vel in bo-  
 num, vel in malum, pro dispositione mortalium bonum vel ma-  
 lum ijs intentatum acceptantium. Addit rei novitati terrorem  
 & formidinem, quâ perculsi protinus, nescio quid inauspicatum  
 ex proposito ipsis ostento sibi Mundoque ominentur. Nasci-  
 tur exempli gratiâ quidplam ex eorum numero, quæ præ cæte-  
 ris aliquid divinius præferunt, crinitum videlicet Sidus aut  
 Cometes, cujus vel ad primum conspectum mortales veluti  
 panico quodam timore perculsi, ex insito quodam impultricis  
 Naturæ instinctu, è vestigio ejus ex magnitudine, forma, figura,  
 motu, colore, futurorum eventuum significaciones, vel ad ipsam  
 usque superstitionem hoc pacto evolvere incipiunt, ut qui gla-  
 dium, jaculum, aut tubam refert, bellis significandis oportu-  
 niores existiment; qui Solis similitudinem gerit, magni ali-  
 cujus Principis ortum, si læto fulgore corruscet; obitum, si  
 tristi colore perfusus palleseat; tragicum funestumque finem,  
 si ater aut sanguine tinctus videatur. Atque hoc pacto, con-  
 tinuâ quâdam analogiâ ad politicum Mundum traductâ, ex  
 præacuta ejus pyramide ignis dominium, igneum nempe fervo-  
 rem, & bili generandæ opportunum, qua homines in furores  
 rapti bella sitiunt, ominentur; quæ mox individui comites fa-  
 mes & pestilentia consequuntur. Qui verò uberi diffusionem  
 sub aquea substantia spectantur, hosce ex analogia quadam ele-  
 menti aequali ad seditiones, rumores, popularium commotio-  
 num tumultus, malorum omnium cataclysmos transferunt. Si  
 verò subfusci & perturbatæ figuræ signa ostendunt, tunc terræ-  
 motus, rerum penuriam, Civitatum subversiones, legumque  
 augurantur mutationes. Si denique dilutioris coloris multi-  
 formi radiorum diffusionem effullerit, ob aëris quandam analo-  
 giam ad pestilentia strages, morbosque id generis insolitos,  
 feroces, & epidemicos, haud incongruè eum applicari posse  
 existimant. Quamvis ut verum fatear, illa mille superstitionibus  
 involuta nihil certi promittant, partim ex ignorantia rerum  
 agentium, ut stellarum, & quæ stellis proximæ sunt, sive substan-  
 tiam spectes, seu magnitudinem; partim propter particula-

*Cometæ  
 significatio-  
 nes ex vulgâ  
 opinione.*

rum concurrentium rationum multitudinem penè infinitam, inquisitionis difficultatem, sensus denique aut observationis inopiam. Nam si intimum materiæ receptivæ sinum penitus excusseris, quàm multiformem illicò in inferiori Mundo solius vel loci, vel temporis ratione varietatem deprehendes? quàm obscuram causarum agentium passibiliumque inter se applicationem? Quorum sanè proportionem uti in humani intellectus captum non cadunt, ita solus ille intelligit, qui menturas primum, numeros, & pondera rebus universis geometricâ lege præfixit, qui & majorem hujus providentiæ partem magnis Naturæ involucris circumscripsit. Unde fit, ut considerandarum rerum varietas incertum animum, carnalique umbraculo tectum, hinc inde in contraria sæpe deflectat, inque simplicioris veri sententia consistere vix patiatur.

*Monstrorum parvuli significatio.*

Patet & hoc in monstruosis mulierum partibus, quibus occultum Dei judicium semper funestum aliquem in Ecclesia Dei, rerumque publicarum administratione eventum, veluti hieroglyphicis quibusdam symbolis prænotatum demonstrat. Sic anno Christi 696, puer biceps & quadrupes Bisantij natus, suis symbolis execrandum nefarii Mahumetis ortum uno post anno secutum graphicè sanè, & veluti ἐν τῇ τύπῃ demonstravit; Id est, duplici capite, versipellis animi calliditatem & fraudulentiam; quadruplici crurum pedumque discrimine, monstruosæ doctrinæ dogmatum in quatuor Mundi partes evulstationem. Innumera hoc loco adducere possem monstrorum natorum paradigmata, quæ & Mundum stupore, & Historicorum tum sacrorum, tum prophanorum annales tragicis eventibus inde consecutis repleverunt. Sed qui curiosius ea evolvere desiderat, is consulat *Lycosthenem*, *Cornesium Gemmam*, aliosque innumeros, qui copioso hanc materiam argumento prosecuti sunt.

*Dei parvula mala analogâ parvula.*

Est & hoc maximâ consideratione dignum, Deum subinde diversa Mundi prævaricantis delicta analogo quodam & prorsus simili prodigiorum genere exprimere; uti per incendia & siccitates prodigiosas, immodicum invalescentis monstruosæ

struosa luxuriae æstus, quo impuni quadam peccandi licentia, nullâ Divinarum legum habitâ ratione homines exardescunt; gula intemperatiam per locustarum muriumque de repente repullulascensium insolitam multitudinem, qua omnibus ad vitam sustentandam necessarijs rebus consumptis, Mundus qui excessu peccaverat, rerum omnium defectu & inopia culpam luat; & sic de cæteris, quæ sagaci Lectori evolvenda relinquo.

Quin & hoc, quo hæc scribo, anno cuncta supra-memorata prodigia in varijs terræ partibus evenisse comperio. Cometa ubique locorum visus & observatus, multiformes monstrorum sætus, Montium incendia, fluminum exsiccationes, novorumque alibi eruptiones, aquarum calidarum in frigidas mutationes, terræmotus frequentes, &c. In Helvetia prope Solidurum, Montem Juram ferè medietate suâ præterlapso mense, ut & in Gualconia alterum, inaudito casu insedisse accepimus. In campis Romani territorij maritimis non ita pridem Draconem bipedem, nec non alarum remigio caudâque formidabilem occisum à venatore, quem & halitu virulento intoxicatum Romæ tandem defunctum novimus. Perusij quoque mense Februarij, hoc eodem anno Basiliscum, alis, dentibus, cornuque longo repandoque ex fronte protuberante horrificum ex ovo galli veteris incubitu natum. Patres nostri Perusini, oculati ejus monstri testes, ad me perferunt. Quæ omnia quamvis insolitæ Naturæ operationes sint, quid tamen DEVS Opt. Max. per illa mundo significare velit, id forsân, qui hieroglyphica, quibus hujusmodi ostenta exprimuntur, symbola ritè expenderit, enodâritque, conjecturare poterit. Quare hisce relictis, jam propiùs ad propositum nobis argumentum explanandum accedamus.

*Prodigia  
anni 1667.*

## CAPUT II.

*De significatione istiusmodi Crucum, quæ nullo non tempore varijs in locis & Regionibus, in vestimentis hominum apparuerunt.*

*Prodigiis  
effectus.*

EX præcedenti ratiocinio aliquis deduceret, eventus rerum humanarum, naturalium causarum catenis ita ex Divinæ providentiæ lege connexos esse, ut hoc vel illo ostento posito, quantum ex parte Naturæ est, producat effectus materiæ viribus, ex qua ostentum coaluit, proportionatus; nisi is ab eo, in cuius potestate posita sunt omnia, modo quodam nobis incomprehensio impediatur. Qui quidem modus omnem Naturæ vim excedit, uti venit, quando causarum agentium operationibus fræna iniicit; quemadmodum in igne fornacis Babylo-niæ, alijsque similibus factum esse Sacra memorat Historia: in alijs verò agentium vires non adimit, sed alijs intervenientibus extrinsecis causis effectus aut divertit tantum, aut omnino destruit. Exemplo rem exponam. Cometes uti ex Solis aliorumque Astrorum evaporationibus exortus est, ita eodem quoque, quo coaluit, virulento virium influxu inferiorem Mundi Oeconomiam miris modis infestat. Qui si per elementorum *diversitatem* copiosam bilis copiam in humano temperamento generet, illa in more transfusa (*Galeno* siquidem teste mores temperamentum sive naturale, sive accidentibus extrinsecis affectum sequuntur) in hominibus eos præstat effectus, qui bilis proprii sunt; unde bella, rixas, contentiones, seditiones cum magna sæpe mortalium strage consequi necesse est. Si verò virulento virium effluvio aërem ijs sordibus, quæ *μαρμαίνα* Græci vocant, infecerit, mox aër aquæ, & hæc telluri communicatum sibi virus in alimenta propagant, alimenta ab hominibus introsumpta, paulatim altas fundant in sanguine radices, ex quibus



quibus tandem pullulat illa contagionis lues formidanda sanè, quam pestilentiam dicimus, quâ serpentem magnam sæpe mortalium portionem consumptam fuisse historiæ memorant, si fides sit penes Authores. Fidum esto de terræmotibus iudicium; qui si ob intus latentem putridioris humoris colluviem per voragines hiatusque in apertam auram expiraverint, aër deletherijs huiusmodi qualitatibus tinctus, si non semper in pestilentiam, saltem in alia morborum, aut publicæ calamitatis monstra, peste fortassis non inferiora, degenerabit.

Eodem prorsus modo & ratione de Crucum Phænomeno ratiocinandum tibi esse scias. Ejecerat jam dudum Vesuvius variam terrestrium glebarum, diverforumque succorum miscellam; quam acido mineralium spiritu fermentatam, Sol fervore æstuans in vaporem attenuarat; vapor resolutus, in appropriatam sibi materiam toris instar illapsus, Crucum prodigiosorum phasma exhibuit. De quo tale iudicium formare quis posset. Si vapor istiusmodi ex innoxijs salum speciebus supramemoratis coaluerit; certè tantum abest, ut mali quicquam portendat, ut potiùs aërem, conceptamque, si quæ latuerit, putredinem, pro ea, quâ pollent acrimoniâ, incidant, extergant, purificent, & ad perfectum salubritatis statum conducant. Accidit tamen plerùmque, ut istiusmodi vapor ex adusto sulphure & bitumine Arsenici Mercurijque lethiferis tincto spiritibus ortus, unâ cum terrestribus glebis variâ putredine vitiatis, insigni aërem intemperie inficiat: quæ cum tempore occultis machinis promota, in apertam tandem epidemicam luem erumpat. Quam tamen Divina bonitas pijs fidelium votis sollicitata non tantùm coërcet, sed etiam vel per unicum salubrioris venti statum, consumptis perniciosus, qui in aëre stabulabantur, halitibus, prorsus perimis, destruitque; nisi forsitan obstinati humani cordis contumacia iustissimum Deum vel invitum ad fræna Naturæ laxanda in proprium mortalium exitium instigârît. Vtriusque exempla nobis Historiæ in prima hujus ratiocinij parte adductæ demonstrant; uti Theodosio contra Persas moturo Cruces in vestibus militum conspicuæ, infallibili indicio victoriam mox secutam promiserunt; Juliano

*Crucum  
Neapolita-  
narum effe-  
ctus.*


quoque & Constantino Copronymo Ecclesiam crudeli persecutione infestantibus, Crucum in vestibus phasma, & mortem utrique, & unâ Ecclesiæ tranquillitatem, atque ingens incrementum portendit. Contrâ verò in Germania, uti Trithemius narrat, dictæ Cruces quandocunque conspiciabantur, epidemicam pestis luem mox infecuturam significabant. Mirum est quod de eodem Trithemio Theatrum vitæ humanæ narrat: eas enim Cruces quæ anno 1515, vestibus hominum impressæ comparuerunt, primò post decennium suam energiam exerturas prædixisse fertur: nec eventus eum fefellit; anno enim 1525, Religionis nomine seditiosi Rustici & seipsos, & totam Germaniam ingentibus implicuere malis, qui Sacræ tesserae loco, Crucis figuram suis affixam vestimentis gerebant. Quod verò pestis tempore nonnunquam tum in horrida lue Constantinopolitana tempore Constantini Copronymi, tum in Germania multis in locis, hujusmodi Cruces in vestibus, stragulisque lectorum comparuerint; ita in pestiferi vaporis constitutionem aptè conferri potest, qui in suâ *αυτομόρφωσιν* eâ profusuratione, quam suprâ exposuimus, prodigiosum effectum eduxit. Solet quoque subinde ex fulmine similis effectus Divinâ dispositione produci, quemadmodum Anglicæ historiæ narrant; siquidem primo anno, quo Elisabetha, rediviva Jezabelis imago, rerum in Anglia potiebatur, dum Proceres publicæ in Ecclesia solennitati interessent, derepentè ingens exorta tempestas fulminibus & fumo locum replevit; quo evanescente (nunc dictu!) cuncti præsentis vestes suas Crucis typo insignitas obstupuere, qui jam dudum sacrolanctæ Crucis signum, non ab Ecclesijs tantum, sed ab animis hominum eliminârant. Secutæ sunt paulò post eæ in Orthodoxos persecutiones, & tormenta, quæ Theatrum crudelitatis Anglicæ cum stupore & admiratione legentium in picturis exhibet. Non negârim tamen, in his similibusque, jubente Deo, operam Angelicam intervenire, saltem ut plurimum, ad causarum naturalium applicationem.

Atque adeo apertè patet, DEVM Opt. Max. suam providen-

dentiam ea de causa Naturæ ita arctè connexuisse, ut invisibiles illius operationes per ea, quæ facta sunt, tanquam in Divinæ mentis speculo elucescentia contemplaremur. Quod si in ullis alijs rebus, tum vel maxime in sacrosanctæ Crucis signo luculentè pateat. Quod ut ab æterno in salutis atque redemptionis humanæ triumphum destinavit ineffabilis Dei sapientia; ita quoque, nè tanti beneficii essemus immemores, sed intimis cordis fibris temper fixum teneremus, id omnibus rebus naturalibus insculptum esse voluit: unde nullius in cælo prodigij *Crucis* frequentius fuisse, Crucis apparitione, reperimus. Hoc faxis, quin vel ipsis fossilibus frequenter à Natura insculptum cum admiratione cernimus. Consule vegetabilis Naturæ Oeconomiæ; & in nonnullis quidem rudi Naturæ penicillo, in quibusdam verò, uti in certa cucurbitæ dissecitæ specie, perfectâ Naturæ industriâ expressum intueberis. Non desunt, quæ partim in ipsis folijs floribusque, partim in fructuum medullis id delineatum exhibeant. Cum ad Albulam in Tyburtino agro relaxandi animi causâ præterlapso anno agerem, pluresque lapideas Cruculas in ripam rejectas perfectè efformatas reperire; arcanum Naturæ obstupi: & ut quid intus lateret, contueri; petrosam corticem rupi, ac inveni tandem gramen, quod cruciatum vocant, aquis illapsum successu temporis petrificâ vi fluminis saxoso, seu potius nitroso cortice vestitum coaluisse. En ut vel ipsum insensatum aquæ elementum in Crucis efformationem, ad contestandum Servatoris nostri benignitatem, operam suam conferat. Si sensitivæ Naturæ familiam scrutemur, innumera Crucis signaculo in exteriori corporis superficie notata animalia, tam ex volucribus, quam quadrupedibus insecutisq; spectabimus. Ut interim miraculosas Crucis apparitiones, quæ in ipsa saxorum, lignorum, arborumque aperture se divinitus obtulerunt, sileam, quæ uti nullis non historijs obvia sunt, ita quoque ijs immorari nolumus. Legat cui libuerit, Japoniæ, Indiarum, Chiles, historias de Crucum tum inventione prorsus prodigiosa, tum de miraculis inde consecutis; & quæ diximus, vera esse inveniet. Concludo vel ipso Crucis vocabulo, quam Divina potentia mysterio Crucis vacare noluit.

*Crucis signum rebus omnibus impressum. Dicitur, voluit Deus,*

Si enim quatuor literas, quibus C R V X formatur, in quatuor Crucis cornibus scripseris, hunc ex acrostycha lectione sensum efficies.



*Christus Redimere mundum Voluit Cruce*

Sed hæc de Crucis spectaculis dicta  
sufficiant.



## CONCLUSIO.

**V**idimus, Lector, Crucis prodigiosas apparitiones; causam, quantum ingenij nostri imbecillitas permittit, explicuimus; significationes tum harum, tum aliorum ostentorum innuimus, ex quibus admirabilem Divina providentia cum rerum naturalium catenis nexum, & inde consequenter didicimus humana vicissitudinis circulum exactè in Psalmis 78. & 107. descriptum; ubi Judaica gens honorum satura, Dei cum obliviscitur, contemptis prodigijs, in omnem calamitatem protinus ruit; afflicta, Divinam opem rursus implorat; quàm consecutâ, denuo cultum Divini Numinis negligit; iterumque percussa, & sanata, supplex, & pervicax, à duris pœnitens, à prosperis inolescens, sæculorum omnium imaginem optimè representat, ut cognoscamus Mundi corporumque mundialium cyclicam circumvolutionem, & ostentorum seriem ad amussim consequi rerum humanarum *ἑκτάλωσις*, alternis felicitatis adversitatisque sortibus constitutam, quam sequenti metro scitè sanè & prorsus gemmeo stylo Gemma Medicus describit.

- Pauperles pacem, dat opes pax, copia luxum,  
Sed luxus bellum, bellaque pauperiem.  
Fons amor est odij, vitæ mox turba quietis:  
Stant, quæ deciderint; quæque steterè, ruunt.  
Et capti capiunt, & qui domuère, domantur;  
Fit victi supplex, qui modò victor erat.  
Rege fero fera plebs punitur, plebe Tyranni.  
Sic fatum alternas versat in Orbe vices.

Ludovici  
Cæsaris au-  
reum effa-  
tum.

*A signis itaque celi nè metuamus, juxta Ludovici Cæsaris, filij Caroli Magni, cedro dignum pronunciatum. Hic Aquigrani cum Cometem sibi mortem, uti credebat, minantem vidisset, eumque Astrologi ab hac persuasione dvertere conati fuissent; ille soluta usus magnanimitate, & prudentiâ: Non alium, inquit, timere debemus præter illum, qui nostri hujus sideris Creator est; sed ejus clementiam nunquam satis laudare possumus, qui nostram inertiam, cum simus peccatores & impœnites, talibus indicijs dignatur admonere. Quia ergo & me, & omnes communiter hoc ostentum tangit, omnes pro posse & sapere ad meliora festinemus, nè fortè misericordiam illo prorogante, & nostrâ impœnitudo impediante, illâ inveniamur indigni. Quocirca protinus ipse eleemosynas largas erogavit, missarum solennia per quoscunque potuit, celebrari fecit, non tantum sibi metuens, quantum Ecclesiæ sibi creditæ prospiciens; ac mox Carolum filium in Regem coronans, ad mortem se comparavit, quæ paulò post contigit. Ita Sigebertus in Chronico. Quæ cum ita sint; sufficiat nobis fructus ex hoc ratiocinio longè uberrimus, ut nosmet nosse discamus ascensu mentis in Deum, ut cum à Deo intentatas per ostentorum apparitionem minas, & ab ea pendentes multiplices humanæ vicissitudinis sortes perspexerimus, omni bono caduco malum consitum, & malo bonum assiduo cogitemus. Amemus hæc omnia tanquam osuri, oderimus tanquam amaturi, leti in tristibus, in letis successibus anxij, nunquam tamen nec spe inani, nec nimio metu, nec ullâ cupiditate transversim ruptis*  
repa-



repagulis efferramur. Nec verò id aliter fiet, quàm si & nos, & nostra omnia Divino arbitrio soli & omnium Oeconomo præstantissimo, Deo, absque ulla spe vel perturbatione insigni, vel futurorum variâ sollicitudine committamus. Da, quaeso, hanc mentem, ò præstantissime Pater, à quo omnis amor, & actio, & potestas, omnis præsentis, præteriti, atque futuri cognitio: Da adorare semper, atque optare duntaxat bonum bonitatis tuæ, ut persistentes in amore cognitionis tuæ, nunquam ab isthoc vitæ genere separemur.

## F I N I S.

LAVS DEO, DEIQVE MATRI  
MARIE.

INDEX

16031.



